

А. Кокиева

Интегрирленген курс

«КЪЫРЫМТАТАР ве ДЖИАН ЭДЕБИЯТЫ»

9


2017


Право для безоплатного розміщення підручника в мережі Інтернет має
Міністерство освіти і науки України <http://mon.gov.ua/> та Інститут модернізації змісту освіти <https://imzo.gov.ua>

9

«КЪЫРЫМТАТАР ве ДЖИАН ДЕБИЯТЫ»

А. Кокиева





Право для безоплатного розміщення підручника в мережі Інтернет має
Міністерство освіти і науки України <http://mop.gov.ua> та Інститут модернізації змісту освіти <https://imzo.gov.ua>

А. Кокиева



Интегрирленген курс
**«КЪЫРЫМТАТАР
ве ДЖИАН ЭДЕБИЯТЫ»**

9

сыныф

Окъутув къырымтатар тилинде алып барылгъан
умумтасиль мектеплери ичюн дерслик

*Дерслик Украина тасиль ве илим назирлиги
тарафаындан төвсие этильди*

«Букрек» нешприят эви
2017

УДК 821.512.19(075.3)
К59

*Рекомендовано Міністерством освіти і науки України
(наказ від 20.03.2017 № 417)*

**Видано за рахунок державних коштів.
Продаж заборонено**

Експерти, які здійснили експертизу даного підручника під час проведення конкурсного відбору проектів підручників для 9 класу загальноосвітніх навчальних закладів і зробили висновок про доцільність надання підручнику грифа «Рекомендовано Міністерством освіти і науки України»:

Люманова С. Ф. – вчитель Новоолексіївської ЗОШ № 1 Генічеського району Херсонської області;

Сарібліялова З. М. – вчитель Новоолексіївської загальноосвітньої школи І–ІІІ ступенів № 1;

Тищенко-Монастирська О. О. – молодший науковий співробітник Інституту мовознавства ім. О. О. Потебні НАН України, кандидат філологічних наук;

Годлевська І. В. – експерт з антидискримінаційних питань.

Кокієва А.

К59 **Інтегрований курс "Література" (кримськотатарська та зарубіжна): підручник для 9 класу загальноосвітніх навчальних закладів з навчанням кримськотатарською мовою / Кокієва А. – Чернівці: Видавничий дім "Букрек", 2017. – 288 с. : іл. – Кримськотатарською мовою.**

ISBN 978-966-399-862-6

УДК 821.512.19(075.3)

Кокиєва А.

К59 **Интегриленгэн курс «Къырымтатар ве джиан эдебияты»: 9-нджысы сыныф, оқытуув къырымтатар тилинде алып барылгъан умумтасиль мектеплери ичөн дерслек / Кокиев A. – Черновцы: "Букрек" нешприят эви, 2017. – 288 с. : ресимли. – Къырымтатар тилинде.**

ISBN 978-966-399-862-6

УДК 821.512.19(075.3)

ISBN 978-966-399-862-6

© Кокієва А., 2017

© Видавничий дім «Букрек», 2017

КИРИШ

«Эдебият — сёз санаты» деп, бефтан айтмагъанлар. Бу ибареде буюк мана бар. Чюнки эр бир фольклор эсери, халкъ агъыз иджады олгъаны ичюн, несиллерге агъыз-агъыздан еткизиле. Бедиий эсерлер исе язы вастасы иле беян олуна. Чешит девирлерде олып кечкен вакъиалар, яшагъан тарихий сымалар, халкъымыздынъ дюньябакъышы, арзу-хаяллары, ахлякъы акъкъындаки бир чокъ малюматлар сёз вастасы иле бильдириле. Муим насиат ве васиетлер кечкен несильден келеджек несильге сёз иле еткизиле.

Халкъ агъыз иджады, диний язылар ве Пейгъамбер къыссалары, миллий классик эдебият бутюн девирлерде озълерининъ къыйметини джоймайып, бизге ёл-ёрукъ косытерип кельмекте. Олар бизге мусбет ислер ве чизгilerден ибret алмагъа ве менфий чизгilerден арынмагъа ярдым этмектелер, къальблеримизни нурландырмакъталар.

Биз огренеджек эсерлер къырымтатар эдебияты тарихынынъ чешит девирлеринде иджат этильген эсерлердир. Эдебиятымыздынъ тарихийлиги, анъаневийлиги оларда озъ ифадесини коръгендер. Бутюн бу эдебиятта халкъымыздынъ рухий теджрибеси, анъдереджеси, миллий дуйгъусы сакълыдыр.

Чешит девирлерде яратылгъан эр бир эсер къырымтатар эдебиятынынъ шекилленгенини, илерилегенини косытере, муэллифлердинъ аятий ве иджадий ёлunu огренмеге ярдым эти.

Халкъымыздынъ бутюн тарихий девирлеринде иджат эткен, муэллифлердинъ аятий ве иджадий ёлunu араштыргъан, огренген, тертип ве талиль эткен фен къырымтатар эдебиятынынъ тарихы деп адландырылып.

Къырымтатар эдебияты тарихынынъ асыл тамырлары къадимий умумтюрк эдебияты абиделеринен багълыдыр. Бутюн алемни айретте къалдыргъан Орхон (Коктюрк) абиделери эдебият тарихымыздынъ ирмакъ башлары сайылалар. Къадимий умумтюрк эдебияты абиделерини бильмейип, къырымтатар эдебияты тарихыны огренмек олмаз.

Биз бу эсерлерден халкъынынъ яшайыш тарзыны фикир этюв къабилиети, ахлякъы, анъы насыл ёлларнен тасвир олунгъаныны огренеджекмиз. Бу абиделерде къулланылгъан сёз санатынынъ образлы беян этюв усулыны талиль этеджекмиз.

Къырымтатар эдебияты гъае, мундеридже, жанр джеэтинден халкъ агъыз иджадынынъ анъанелери эсасында илериледи. Ислям дини къабул этильген соңъ, тюрклер арап медениети, эдебияты ве фольклорынен таныш олдылар. Арап фольклорынынъ бир чокъ

нумюнелери халкъымыз тарафындан менимсенильди. Бедиий эсерлер язылды, эдебият хазинеси зенгинлешти.

XII асырнынъ сонъу — XIII асырнынъ башында Махмуд Къырымлынынъ «Хикяет-и Юсуф ве Зулейха» дестаны пейда ола. Бу дестан Къырымда язылгъан энъ къадимий эсер сайыла. Арап халкъ агъыз яратылжылыгъында айтылып кельген дестан эса-сында язылгъан бу дестан къырымтатар эдебияты тарихынынъ Къадимий деврине темель къоя.

XIII асырнынъ ортасындан XV асыргъа къадар девам эткен де-вир къырымтатар эдебиятынынъ Алтын Орду **деври** сайыла. Бу девирде тизильген Алтын Орду девлетине Къырым ярым аласы да кире. Эки юз беш сене девамында яратылгъан эдебият акъкъында малюмат гъает аз. Амма эльде этильген базы бир тарихий ма-люматларгъа коре, Солхат шеэри (Эски Къырым) Къырымнынъ буюк бир медениет меркези олгъян экен. Бу медениет меркезининъ Алтын Ордугъа кирген Сарай, Булгъар, Хорезм ве Орта Асиянынъ дигер медений меркезлеринен алякъалары пек къавий олгъян.

Абдульмеджит Эфенди, Ахмед Ходжа эс-Сарайий, Сейфи Сарайий, Мевляне Исхакъ, Мевляна къады Мухсин киби муэллифлернинъ эсерлери шу девирде язылгъандыр. Оларнынъ чокъусы Къырымда дөгъып, Сурье, Мысырда ве Османлы императорлыгъынынъ меркезлериnde иджат эткенлер. Олардан бири Абдульмеджит Эфенди Къырымда яшап, иджат эткен шаирdir.

1428 сенесинден та 1783 сенесине къадар къырымтатар эдебияты тарихында буюк илерилевлер ола. Эдебиятымызынъ **Къырым Ханлыгъы деври** деп адландырылгъан бу заманда халкъымыз мустакъиль бир девлет мейдангъа кетире ве озюнинъ девлетчилигине саип ола. Халкъ милlet оларакъ шекиллене. Этрафтаки бутюн девлетлерге озюни таныта. Бу девирде миллий медениет, эдебият, санат, илим, икътисадият зияде инкишаф эте. Шунынъ ичюн де иджаткярларнынъ сайысы арта. Биз оларнынъ арасында эр бир джеэттен айырылып тургъян Гъазай, Мухаммед Къамиль, Джанмухаммед, Ашыкъ Умер, Джевхерий киби классиклеримиз-нинъ шириетини огредежекмиз.

Эр бир халкъынъ эдебиятында юкселиш (илерилев) ве дургъунлыкъ девирлери олгъаны киби, Къырым Русие къолуна кечкен сонъ, къырымтатар эдебияты дургъунлыкъка огърады. Бойледже, 1783 сенесинден 1883 сенесине, яни «Терджиман» газетасы чыкъып башлагъанына къадар деври эдебият тарихымызда **Рус истилясы деври** адыны алды.

Бу девирде халкъ тувгъян юртундан иджрет этип (меджбурий кетип) башлай. Иджретлер медений инкишаф ве бедиий иджат-

ны юз йылдан зияделик дургъунлықъкъа оғърата. Бу девирде Исметий, Эшмырза, Абиулла Керем, Орлы Сеит-Халиль киби пармакънен сайыладжакъ мүэллифлер иджат этелер.

Амма XIX асырның экиндже ярысында эдебиятымыз джанланып баштады. Бу вакъыт Абдураман Къырым Хавадже ве Абдурефи Боданинський киби зиялыштарымыз русча-къырымтатарджа, къырымтатарджа-русча лугъатлар нешир этелер. Шуның ичюн 1883 сенесинден та 1921 сенесине къадар пейда олгъан къырымтатар эдебияты **Уянув деври** сайыла.

Халкъымыз яваш-яваш джеалет (джаиллик) юкъусындан уяна. Оджалар, окъумыш инсанлар халкъны джаилликтен къуртартмакъ гъасине хызмет этелер, халкъның медений севиесини юксельтерлер. Бу девирде Исмаил Гаспринский, Сеид Абдулла Озенбашлы, Асан Сабри Айвазов, Усейн Шамиль Тохтаргъазы, Якъуб Шакир-Али, Асан Чергеев, Джәфер Сейдамет, Мемет Нуゼт киби мүэллифлер иджат этелер.

Къырымтатар, эм де джиан эдебиятының тарихына иссе къошкъян языджы, шаир ве драматургларның эсерлеринде эсасен умуминсаний ахлякъий мевзулар айдынлатыла. Бу эсерлер озыларинин бедиийлик дереджесинен, оларда тасвир олунгъан муимден муим меселелеринен халкъның ис-дуйгъуларыны уянтмагъа хызмет этелер. Яш несильниң илери дюньябакъышлы, бильгили, алидженап инсанлар олып осьмесине мейдан яраталар.

Бойледже, бу дерсликте эдебиятымыздың асырлар төрүндөн XIX асырның сонъу — XX асырның башына къадар кечкен ёлу бойле шекильде анълатыладжакъ. Эдебий классик эсерлер, эдебият аньанелери (несильден несильге кечип девам этильген зенгиллиги) талиль олунып, тавсиятлы оғрениледжектир.

Бутюн инсанитетниң келеджегини ве эдебиятымыздың тарихыны озюнде сакълагъан бу аньанелер бизим медений мирасымыздыр. Земаневий эдебиятта да миллій чизгилерниң айдынлатылmasына хызмет этеджек менбалар бу миллій эдебий ве медений вариетимизде сакълыдыры.

Суаллер ве вазифелер:

1. Къырымтатар эдебияты насыл меселелерни оғрене? Бу фенниң эсас вазифелери неден ибарет олгъаныны айтыңызы.
2. Эдебиятымыздың девирлери насыл адландырыла? Бу девирлерниң асырлар ве сенелерини айтыңызы.
3. Бизим кунюмизге етил кельген медений зенгилликлер илериде насыл бир денъишивлерге темель оладжакътыр?

КЪАДИМИЙ УМУМТЮРК ЭДЕБИЯТЫ АБИДЕЛЕРИ

ОРХОН (КОКТЮРК) АБИДЕЛЕРИНИНЬ ТАПЫЛУВ ТАРИХЫ

Бутюн алемни айретте къалдыргъан къадимий умумтюрк эдебияты абиделери эдебият ве медениетнинъ юкселиш девирлеринде язылгъандыр.

Тюркий къабилелернинъ рухий бирлигини, къудретини, аманлыгъыны шерефлеген бу абиделер тюркий халкъларнынъ тарихий весикъалары сайыла.

Къадимий умумтюрк эдебият абиделеринден Орхон абиделерининъ тапылув тарихы пек меракълыдыр. Абиделер *Орхон ве Енисей озенлерининъ якъынларында тапылгъаны ичюн оларны Орхон абиделери деп адландыргъанлар*.

Орхон абиделери акъкъындаки ильк малюмат 1720 сенесине айт. Соңра 1889 сенеси фин алимлери бу абиделерни фин халкъынынъ ядикъярлыкълары санып, ресимли атлас китабы нешир этелер. Айны шу 1889 сенеси рус тедкъикъатчысы Н. М. Ядринцев Могъулстанда балабан ташлар тапкъан соңъ, фин алимлерининъ тюшюнджелери янълыш олгъаны анълашыла. Чюнки бу вакъыт алимлер ташлар узеринде язылар эки тильде язылгъаныны корелер. Чин тилиндеки язылардан бу абиделер Бильге Къагъан (Бильге Хан — Могилян Къагъан) ве онынъ къардашы Куль Тигин Къагъангъа (Куль Тигин Хангъа) багъышланып тикленгени белли ола. Амма экиндже языны алимлер насыл язы олгъаныны билип оламайлар.

Бу языларны 1893 сенесине къадар Вильгельм Томсенден гъайры кимсе бельгилеп оламай. Шу сенеси ноябрь айынынъ йигирми бешинде о, «турк» **ГҮЧИК**, «тенъри» **ЕТНИК** киби даа бир къач сөзлернинъ язылувины окъуп, бу сөзлерде къулланылгъан арифлерни бельгилей. Соңра исе бельгиленген арифлернинъ эсасында тапылгъан ядикъярлыкъларнынъ элифбесине анахтар уйдура. Оларнынъ рун язысина менсюп олгъаныны тарифлей. Тюркий халкълар илиминде бу язылар коктюрк элифбеси, кок-турк язысы деп адландырыла. В. Томсеннинъ тарафындан элифбе тизильген соңъ, бу тедкъикъатнен файдалангъан В. В. Радлов ташлар узеринде языларнынъ терджимеси ве изаатыны япа.

Бойле этип, къадимий девирлерде яшагъан кочебе къабилелерден шекилленген Коктюрк девлетининъ кечмиш тарихыны айдынлатаджакъ Коктюрк абиделери деп адландырылгъан янъы бир менбаа тапыла.

Суаллер ве вазифелер:

1. Къадимий умумтюрк эдебият абиделерининъ тили, оларда тасвирленген миллий ве ахлякъий чизгилерининъ къырымтатар халкъынынъ эдебий ве медений вариетине якъынылыгъы бармы? Тюрик къабилелерининъ рухий бирлиги, къудрети, аманлыгъыны шерефлеген бу абиделер тюрик халкъларнынъ насыл весикъалары олгъаныны айтынъыз.
2. Коктюрк абиделерининъ тапылуv тарихы насыл вакъиаларнен багълы? Абиделерининъ къачынджа асыргъа айт олгъаныны ве оларнынъ оқыулып, терджиме олунувына иссе къошкъан алымлерининъ адларыны айтынъыз.
3. Къадимий умумтюрк эдебият абиделери не себептен Орхон абиделери деп адландырылгъанлар?
4. Алымлерининъ Орхон абиделери акъкъында бильдирген малюматыны икяе этинъиз. Коктюрк языларынынъ элифбесине анахтарны ким уйдурды?

Орхон (Коктюрк) язысы

Орхон ве Енисей озенлери янында тапылгъан бу абиделерининъ Орхон, Коктюрк язысы или язылгъаны белли ола. Орхон (Коктюрк) язысынынъ элифбесини асырлардан сонъ янъыдан тизген ве тертип эткен В. Томсен бутюн тюрик халкъларнынъ эбедий миннетдарлыгъыны къазана.

Къадимий тюрк язысынынъ тарихында орхон (коктюрк), уйгъур, арап язылары къулланылгъан. Олардан орхон язысы (коктюрк язысы) язы тарихынынъ ильк асырларында къулланылгъан языдыр. Сонъра онынъ ерине умумий язы оларакъ уйгъур язысы ишплетильген. Уйгъур язысы чокъ девирлер девамында къулланылгъан. Сонъра исе арап язысына кечильген, ондан сонъ язы латин элифбеси эсасында девам этильген. Шимди къырымтатар халкъы кирил графикасыны къулланып кельмекте. Латин элифбесине кечюв меселеси де девримиззинъ эсас меселеси олып къалмакъта.

Орхон язысы, биринджи миллий элифбе оларакъ, энъ аздан беш асыр девамында къулланылды. Бунынъле озюнинъ къудрети ве къьеветини косътерди.

Онынъ 150-ден зияде ишарет шекиллери бар. Бу ишаретлер 38 ариф иле бериле. Арифлер бири-бирине къошулып язылмай. Олар сагъдан солгъа айырылып язылалар. Сёзлер ве ибарелер бири-бириinden эки нокъта иле айырыла.

Орхон (Коктюрк) язысынынъ арифлери	Транскрипциясы		Орхон (Коктюрк) язысынынъ арифлери	Транскрипциясы	
	кирил.	латин.		кирил.	латин.
𐰢	a, ä	a, ä	𐰢	ä	ä
𐰤	b ¹	b ¹	𐰤	bt	nt
𐰥	b ² , ä	b ² , ä	𐰥	ñch	nč
𐰦	v	v	𐰦	o, u	o, u
𐰨	g	g	𐰨	ö, ü	ö, ü
𐰪	d ¹	d ¹	𐰪	p	p
𐰫	d ²	d ²	𐰫	p ¹	r ¹
𐰬	z	z	𐰬	p ²	r ²
𐰭	i, ī	y, ī	𐰭	c ¹	s ¹
𐰮	j ¹	j ¹ , ī	𐰮	c ²	s ²
𐰯	j ²	j ² , ī	𐰯	t ¹	t ¹
𐰱	k	q	𐰱	t ²	t ²
𐰲	k	k	𐰲	č	č
𐰳	l ¹	l ¹	𐰳	sh	š
𐰴	l ²	l ²	𐰴		
𐰵	lt		𐰵		
𐰶	m		𐰶		
𐰷	n ¹	n ¹	𐰷		
𐰸	n ²	n ²	𐰸		
𐰹	ŋ	ŋ	𐰹		

Орхон (Коктюрк) язысынынъ элифбеси

Суаллер ве вазифелер:

1. В. Томсен бутюн тюркій халқъларның әбедиј миннетдарлығыны насыл ишлөр япып, къазангъаныны айтынъыз.
2. Къадимий тюрк язысының тарихында насыл язылар къулланылған? Орхон (коктурк) язысындан сонъ, онынъ ерине умумиј язы ола-ракъ, насыл язы ишлөтильгенини айтынъыз.

«Куль Тигин», «Тоньюкъукъ» абиделери

Къадимий девирлерде яшагъан кочебе (бир юрттан дигер юрт-къа кочькен) къабилелерден шекилленген Кок-Түрк девлети бутюн инсаниетке сырлы муджизелер къалдырыды. «Куль Тигин», «Бильге Къагъан», «Тоньюкъукъ» киби Орхон абиделери бизге гъает меракълы малюматлар берелер.

Та VIII асырда язылгъан бу абиделерде о девирдеки ханлыкъларның тарихий кечмиши тасвирлене. О девирлерде яшагъан ханларның дигер юртларгъа япкъан сеферлери, къазанчлары, оларның къыяфетлери арды-сыралыкънен икяе олуна.

Орхон абиделери Бильге Къагъан укюмдарлыкъ эткен девирден къалгъандыр. Оларның арасында Куль Тигин, Бильге Къагъан, Тоньюкъукъ адына язылгъан язылар энъ буюк ве муим абиделерdir. «Куль Тигин» абидесини Куль Тигиннинъ агъасы — Бильге Къагъан, «Бильге Къагъан» абидесини — Бильге Къагъаннынъ огълу, «Тоньюкъукъ» абидесини исе Тоньюкъукънинъ озю даа сагъ олгъанда тиклегенлер.

Абиделerde Ильтирис Къагъан кочебе къабилелерни бир ерге топлагъаны тасвир олуна. Ильтирис Къагъаннынъ бу эйи хызметлери ичюн халкъ онъа экиндже — Къутлу Къагъан (Хайырлы Къагъан) деген ад къоя. Ильтирис Къагъаннынъ Ильбильге Къатун адлы къадыны ола. Олар дюньягъа эки огълан кетирелер. Буюгининъ адыны — Бильге, кучюгининъ исе Куль Тигин къоялар. Ильтирис Къагъан кечингенде, Бильге — секиз ве Куль Тигин еди яшларында ола. Бу вакъыт девлетни Ильтирисинъ къардашы Къапагъан Къагъан идаре эте. 716 сенеси Къапагъан Къагъан да вефат эткен сонъ, эки агъа-къардаш — Бильге ве Куль Тигин Тоньюкъукънынъ ярдымы иле девлетни идаре этелер. Бир чокъ тюркій къабилелерни бирлештирип, девлетнинъ къудретини даа зияде арттыралар. Ильтирис ве Къапагъан Къагъаннынъ укюмдарлыкъ эткен девринде Тоньюкъукъ везирлик япа. Бильге Къагъан Тоньюкъукънынъ къызына эвлене.

Куль Тигин 731 сенеси, Бильге Къагъан 734 сенеси кечинелер. Онынъ ольгенинден он йыл кечкен сонъ, башта Коктюрклерге таби олгъан дигер бир тюркий къабиле — уйгъурлар тюрк акимиетини йыкъып, девлетни эльге алалар.

Иште, бу абиделернинъ мундериджесинде Куль Тигин, Бильге Къагъан, Тоньюокъукъ киби ужумдарларнынъ тюркий къабилернинъ бирлештирилови огърунда япкъан хызметлери тасвир олuna. Меселя: «Къагъан отурып, ач, факъыр халкъны топладым. Факъыр халкъны зенгин эттим. Аз миллетни чокъ эттим...» «Куль Тигин» абидесинден.

Бу абиделерде тарихий шахыслар акъкъында малюмат бериле. Меселя: «Екяне Танъыдан, Коктен дөгъгъан тюрк Бильге Къагъаным, бу тахткъа отурдым». «Куль Тигин» абидесинден. «Мен, идракли Тоньюокъукъ буны Тюрк Бильге Къагъан илинде язмагъа бердим» «Тоньюокъукъ» абидесинден.

Орхон абиделеринде бир чокъ этнографик малюматлар да бар. Олардан биз мевталарнынъ дефн этюв адетлери акъкъында бильги аламыз. Къабирлернинъ устюне башташлар къоюлып, узеринде ханлар акъкъында тафсилятлы малюмат язылгъаныны билемиз. Башташларнынъ четлеринде тизилишип тургъан бал-баллар¹ исе ханнынъ ольдюрген эсас душманларынынъ сайысыны косътергенини анълаймыз.

Абиделерде келеджек несиллерге дөгъруттылып айтылгъан пек чокъ насиатлар бар. «Куль Тигин» абидесинде Бильге Къагъан тюрк халкъынынъ келеджегини къайгъыра. Озы күртүнүн биракъып, дигер күртларда мекян къурмагъа истеген халкъларнынъ алы фена оладжагъыны табирлей. О: «Тюрк халкъы, пек чокъ ольдинъ... Дженюпте — Чогъай орманына, Тёгюльтинъ вадийсине ерлешмейим десенъ, Тюрк халкъы, оледжексинъ!» — деп халкъкъа насиат бере. «Куль Тигин» абидесинден.

Бильге Къагъанынъ тюрк халкъына мураджаат этип айткъан бу насиатында Бильге Къагъанынъ тюрк халкъынынъ келеджеги ичюн къасавет чеккени ифаде олuna.

Бу насиат ве васиетлер, язылгъан асырындан биз яшагъан асыргъа къадар, арадан къаарарнен XIII асыр кечкенине бакъмадан, бугунь де озы къыйметини джоймадылар. О девирде яшагъан къадимий къабилелерге дөгъруттылып айтылгъан бу фикирлер бизим күнүмизде де муимден муим меселелер олып къалмакъта. Чюнки бу къадимий абиделерде халкъынынъ бирлиги, къудрети ве аманлыгъы акъкъында айтыла.

¹ бал-бал — таштан пицильген инсан къыяфети — эйкель.

Суаллер ве вазифелер:

1. VIII асырда язылгъан бу абиделерде насыл адисе-вакъиалар тасвирленгенини тарифлөнъиз.
2. «Куль Тигин», «Бильге Къагъан», «Тоныюкъукъ» абиделерини кимлер тиклегенини айтынъыз.
3. Коクトурк абиделеринде анги тарихий сымалар акъкъында малюмат бериле?
4. Коクトурк абиделеринде келеджек несильге дөгърултылып айтылгъан фикирлерни эсерден тапып окъунъыз. Бу акъта озюнъизнинъ фикирленинъизни бильдиринъиз.

Бирлик, къудрет ве аманлыкъ орынеги

«Куль Тигин» ве «Бильге Къагъан» абиделерининъ узеринде язылгъан малюматнынъ муэллифи Йолугъ Тигиндир. О, хан ве тигинлернинъ (о девирде яшагъан хан балаларынынъ) тарихчысы эди. Бу абиделер о девирде шекилленген эдебий тильде язылгъан.

Йолугъ Тигин бу абиделерде озюнинъ дөгъмушлары Куль Тигин ве Бильге Къагъанларнынъ укюмет ишлери акъкъында икяе эте. О, тюрк къабилелер ве укюмдарларнынъ озъара мунасебетлерини тасвирлей.

Меселя: «Тюрк халкъы къагъан этип къойгъан Къагъаныны джойды. Табгъач (чин) халкъына бейлерден тёреген (асыл олгъан) эркек несили къул олды, ханымлардан тёреген къызы несили джарие (къул къадын) олды. Тюрк бейлери тюрк адыны джойдылар. Табгъач бейлери чин адыны тутып, чин къагъанына итаат этти (бойсунды)» киби сатырларда тюрк ве чин халкъы арасындаки мунасебетлер ве алякъалар тасвир олунса.

Я да: «...Чин халкъына бутюн эсини-кучюни бергенини тюшюнмеди. Тюрк халкъы ёкъ ола башлагъанда, коктен тюрк Танърысы, тюрк мукъаддес Ери ве Суву: «Тюрк халкъы ёкъ олмасын, халкъ олсун!» деп, Ильтирис Къагъаны, анам — Ильбильге Къатунны Танъры тёпеде тутып, юкъары котюрген (котерген). Бабам Къагъан он еди укюмдар эр иле дженк япкъан. ...Къыркъ еди дефа ордусынен сеферге чыкъкъан, йигирми кере дженк эткен, Танърыгъа сыгъынгъаны ичюн, Танъры онъа иллери олмагъанларны илии этмеге ёл ачкъан. Душманыны таби эткен. Кучьлюге тиз чёктюрткен. Башлыгъа (укюмдаргъа) баш



Могъулстанда Орхон музейинде
ерлешкен «Куль Тигин абидесинден
нумюне

эгдирткен» киби парчаларда тюрк халқынынъ къадимий кечмиши, башындан кечирген вакъиалары беян олуна. Бу беяnlарда укюмдарларнынъ халкъ къудретини арттырмакъ ичюн япкъан хызметлери ве укюмет ишлери айдынлатыла.

Абиделерде буюк къыйынлыкънен бирлешип, мейданға кельген тюркий къабилелерниң тарихы акс олунгъан. Тюрк миллети абиделерде айтылгъан насиат ве васиетлерге илериде къулакъ асмаса, девлетчилигини джоя биледжеги де табир олунгъан. Шунынъ ичюн бу абиделер тюрк миллетине доғърултылып айтылгъан бирлик, къудрет ве аманлыкъ орьнегидир.

Суаллер ве вазифелер:

1. «Куль Тигин» ве «Бильге Къагъан» абиделерининъ муэллифи кимдир? Бу инсан о девирде насыл вазифе беджергенини икяе этинъиз.
2. Тюркий халқъларнынъ къадимий кечимиши насыл сатырларда беян олуна? Бу беяnlарда укюмдарларнынъ насыл бир хызметлери ве укюмет ишлери айдынлатылгъаныны икяе этинъиз.
3. Бу абиделерниң тилинде расткельген насыл бир сөзлер бугунь де буғунь бизлөргө анълашыла?
4. Бу абиделерниң мундериджесине насыл гъаелер синъдирильген. Абиделерниң бедиий эмиети неден ибараттири?

«КУЛЬ ТИГИН» АБИДЕСИ^{[1]*}

«Куль Тигин» абидесиндең языларның транслитерациясы^[2]

(Парчалар)

Кучюк язылар

1. Тенъгри тег тенъриде болмыш Тюрк Бильге Къагъан бу одъке олуртым. Сабымынъ тюкети эсидгил. Улайу ини йигюним, оғыланым, бирики оғышум, будунум, бирийе шадпыт беглер, йырайы таркъат буйрукъ беглер, отуз. (Татар...)

2. Токъуз оғыз бергели будуны бу сабымынъ эдгюти эсид, къа-тыгъды, тынъла. Ильгерю күн тогъсыкъкъа, биргерю күн орту-сынъару, къурыгъару күн батсыкъынгъа, йыргъару түн орту-сынъару, анта ичреки будун коп манъа кёрюр, анча будун

3. коп итдим. Ол амты аныгъ йокъ. Тюрк Къагъан Отюкен йыш олурсар, ильте бунъ йокъ. Ильгерю Шантунъ йазыкъа теги сюле-дим, талуйкъа кичиг тегмедин, биргерю Токъуз Эрсенке теги сюле-дим, Тюпютке кичиг тегмедин, къурыгъары Йинчю оғъ (узъ)

Нұз; ғұн; ғұйғақ; ғұтмә; ғұлж; ғұғұтқи; ғұғұтқи (1)
ғұғұғұнн; ғұл; ғұхғи; ғұған; ғұғас; ғұғи; ғұғи;
ғұғасғұз; ғұтқақ; ғұзғас; ғұзғас; ғұзғас; ғұзғас;
ғұзғас; ғұзғас; ғұзғас; ғұзғас; ғұзғас; ғұзғас; ғұзғас;

«Куль Тигин» абидесинин «Кучюк язылары»ндан
алынгъан бир нумюне

* Библиографик изаатлар 283—284-инджи саифелерде бериле.

«Куль Тигин» абидесиндеки языларныңъ терджимеси^[2]

(Парчалар)

Күчюк язылар

1. Екяне Танърыдан, Коктен дөгъгъан Тюрк Бильге Къагъаным, бу тахткъа отурдым. Сёзюмни биткенине къадар динъленъиз! Күчюк къардаш тувгъанларым, огъланларым, бутюн союм, миллетим, сагъ тарафымдаки — шадпыт халкъыныңъ бейлери, сол тарафымда — таркъат буйрукъ бейлери, Отуз Татар...

2. докъуз Огъуз бейлерининъ миллети бу сёзюмни яхши эшпит, адамакъыллы динъленъиз, Шаркъта — кунь догъушкъа, дженюpte — кунь ортасына, Гъарпта — кунь батысына, шимальде исе — гедже ортасына къадар созулгъан ерлерде яшагъан халкъыныңъ эписи манъя табидир (менимкидир). Бу къадар халкъыны бир ерге мен топладым, бирлештиридим. Аз халкътан

3. чокъ халкъ яптым. О халкъ шимди ярамаз дегиль. Тюрк Къагъан Отюкен орманында отурса, ильде муңъ (кедер) олмаз. Шаркъкъа — Шантунг вадийсине барып еттим, денъизге барып етмедим, дженюpte — докъуз Эрсенге барып еттим, Тибетке барып етмедим. Артымдаки Йинчю озенини кечип, Темир Къапыгъа барып еттим.

4. Шимальде — Йыр-Байырку деген ерге барып еттим. Бу къадар ерлерге барып еттим. Отюкен орманында яхши эр (халкъыны бир ерге топлагъан укюмдар) ёкъ эмиш. Иль (юрт) тиклемеге ляйыкъ ер — Отюкен ери эмиш. Бу ерде ерлешип (темель тиклеп), Табгъач (Чин, Къытай) халкъынен озюмнинъ халкъымны бирлештиридим.

5. Алтын, кумюш, йипек къумачны Къытай баягъы бере эди. Чин халкъыныңъ сёзю татлы, йипек къумачы йымшакъ эди. Татлы сёзю, йипек къумачы иле алдатып, узакътан кельген халкъыны озюне о къадар пек якъынлаштырыр эмиш. Озюне якъынлаштырып, (юргине таби этип) янында ерлешкен сонъ, шу ань ярамазлыкълар уйдурыр эмиш.

6. Яхшылыкъ япмагъа бильген киши, яхшылыкъ япкъан джесюр пельванларны бу ёлдан тайдырмаз. Бир киши янълыш арекетлер япса, онъя къабилеси, миллети, акърабасынен барышмакъ ясакъ олуныр эмиш. (Янъылгъан, ёлunu шашыргъан инсанны сой, акърабалыкътан айырыр экенлер). Татлы сёзюне, йымшакъ йипек къумачына алданып, къавмынъ иле,

Тюрк халкъы, пек чокъ ольдинъ. Тюрк халкъы, оледжексинъ! Дженюпте — Чогъай орманына, Тёгюльтинъ вадийисне къонайым (ерлешейим) десенъ, Тюрк халкъы, оледжексинъ!

8. Дженюпке догъру кетер экенсинъ, Тюрк халкъы, оледжек сенсинъ! Отюкен ерине ерлешип, алыш-вериш этсенъ, ич бир къасеветинъ олмаз. Отюкен орманына ерлешип яшасанъ, ильни эбедиен тиклеген сен оладжакъсынъ. Тюрк халкъы, сен токъсынъ. Ачлыгъынъны, токълугъынъны тюшюнмейсинъ. Ойле олгъанынъ

9. ичюн, Къагъанынънынъ сёзюни динълемей, истеген еринье бардынъ. Бус-бутюн, тамамынен енъильдинъ, анда ёкъ олдынъ. Анда къалгъанлар (артаджакъ халкъынъ) сеферлерден ёрулып, яры олю алына кельди. Танъры багъышлагъаны ичюн, озюм де девлетли олгъаным ичюн, Къагъан отурдым (падиша олдым). Къагъан отурып,

10. ач факъыр халкъны топладым. Факъыр халкъны зенгин эттим. Аз миллетни чокъ эттим. Ёкъса, бу сёзюмде ялан бармы? Тюрк беклерининъ халкъы, буны эшигинъиз! Тюрк миллетини топлап, Иль тикленильгенини мында (башташта) ойдырып яздырдым. Янъылып (насиатларны динълемейип) оледжегини де кене мында ойдырдым (ойдырып яздырдым).

Суаллер ве вазифелер:

1. Куль Тигин коктурк языларында анги къагъан акъкъында лакъырды юрютиле? Бу къагъан озю ве догъмушлары акъкъында нелер айткъа-ныны метинден окъуп анълатыныз.

2. Бильге Къагъанынъ япъян сеферлерини метин узеринде тайин-ленъиз. Бу тарихий джогърафик адларны дефтеринъизге язынъыз.

3. Бильге Къагъан къаерде ерлешип, озъ халкъынен дигер халкъны бирлештирди? Къытайларнынъ табиат чизгилери акъкъында метинде насыл фикирлер бильдирильгенини айттыныз.

4. Тюрк халкъына догърутлылып айтылгъан насиатларны бирер-бирер метинден тапып окъунъыз. Маналарыны анълатмагъа тырышынъыз. Бильге Къагъанынъ тюрк миллетине Отюкен орманында ерлешип, яшагъанларыны төвсие эткенининъ себеби недедир?

Буюк язылар

2. Дёрт тарафы бус-бутюн душман экен. Аскерлери иле сеферге чыкъып, дёрт тарафта яшагъан халкъларны бус-бутюн алгъян, таби эткен экен. Оларнынъ бус-бутюн ябанджы, ят эткен. Башыны котерип юръгенлерге — баш эгдирткен, тизлеринде къавий тур-

гъанларны — тиз чёктирткен. Тап Шаркътан — Къадыркъан орманындан Гъарпкъа — Темир Къапыгъа къадар ерлерде бу халкъларны ерлештирген.

6. Бейлери, халкъына садыкъ олмагъаны ичюн, Табгъач халкъы (чин халкъы) ийлекяр ве сахтекяр олгъаны ичюн, яланджы олгъаны ичюн, кучюк ве буюк къардашлары арасында кин туткъанлары (бири-бирини кунылгенлери) ичюн, бей ве халкъларны бири-бирине къаршы къойгъанлары ичюн, Тюрк халкъы иль этип алгъан илини (тиклеген илини) элинден къачырды.

7. Къагъан этип къойгъан Къагъаныны гъайып этти (джойды). Бейлерден тёреген (келип чыкъкъан) урь, сербест эрекк несили Табгъач халкъына къул олды. Ханымлардан тёреген къыз несили джарие олды. Тюрк бейлери тюрк адыны джойдилар. Табгъач бейлери чин адыны тутып, чин къагъанына итаат эттилер (таби олдылар).

10. Душман олып, озю ичюн бир шей япып оламай, гъайрыдан халкъыны бирлештирип оламай, кене де теслим олунды. Чин халкъына бутюн эсими-кучюни бергенини тюшюнмеди. Чин халкъы тюрк халкъыны ольдюрейим, кокюни къурутайым дер экен. Тюрк халкъы ёкъ ола башлагъанда, Коктен тюрк Танърысы, тюрк мукъаддес Ери ве Суву:

11. «Тюрк халкъы ёкъ олмасын! деп, халкъ олсун деп, Ильтирис Къагъаныны, анам Ильбильге Къатунны Танъры тёпеде тутып, юкъары котурген (котерген). Бабам Къагъан он еди укюмдар эр иле дженк япкъан.

15. Бабам бу къадар вакъыт Къагъан олгъан... къыркъ еди дефа ордусынен сеферге чыкъкъан, йигирми кере дженк эткен. Танърыгъа сыгъынгъаны, оны севгени ичюн, иллери олмагъанларны илли эткен. Къагъанлыкълары олмагъанларны къагъанлы эткен, душманыны таби эткен. Кучълюге тиз чёктюрткен, башлыгъа [укюмдаргъа] баш эгдирткен.

16. Бабамынъ Къагъан олгъаны шанына, балабан Баз Къагъаны бал-бал оларакъ, бири-бири артындан тизип, къабир ташлар ойдырдыкъ (къойдыкъ). О вакъыт эмджең Къагъан эди. Эмджең Къагъан олгъанда, Тюрк халкъынынъ гъайрыдан бирлештириловине чокъ хызметлер этти. Факъырны зенгин этти, азны чокъ кылды (этти).

27. Тюрк Къагъаныны къайгъырып, геджелери юкъламадым, куньдюз отурмадым. Кучюк къардашым Куль Тигин иле, эки шад бейлери иле оледжегимизге къадар дёгюштик, къазанчлар арттырыдыкъ. Шойле этип, къазанчлар арттырып, бизлерге къошуулгъан миллетлерни от (атеш) ве сув япмадым (бири-бирине къаршы къоймадым), бирлештиридим.

28. Бизден кеткен халкъ анда-мында юре-юре, оледжек алыш на къадар болдурып, талып, ач-чыплакъ алда къайтып келип, кене де бизге къошулдылар. Халкъны чокълаштырайым деп, Шимальге — Огъуз къавмына дөгъру, Шаркъкъа — Къытай татабы къавмына дөгъру, Джениупке — Чинге дөгъру он эки кере буюк орду иле сеферге чыкътым... (дженклештим) халкънынъ аякълары титреди, перишан олаязды. Куль Тигин бизден эвель кельген душман ордусыны артына къайтарды. Тонъгъа Тигиннинъ матеминде тонъгъа къавминден он йигитни ольдюордик. Бешинджи сефер биз огъузларнен Эзгинти Къадызда дженклештик. Куль Тигин боз тюстеки аз атына минип, уджюм этти. Эки эрни сюнгюнен санчты, чамургъа сокъты. О орду о ерде ольди. Амгъа къургъанда къышлап, ильк баарь де огъузгъа къаршы орду чыкъардыкъ. Халкъны идаре этмек ичюн, Куль Тигинни арткъа къайтарып, мудафаа тедбирини кечирдик. Огъузлар меркезимизни келип бастылар.

29 Огсиз адлы атына минип, докъуз эрни санчты, ордусыны душмангъа теслим этмеди. Анам-къатун ве джеми аналыкъларым, аптерлерим, келинлерим, кинягинялар — эпинъиз хавф астында къалгъан единъиз. Куль Тигин олмаса, эп оледжек единъиз.

31. Бабам ольгенде, еди яшындаки кучюк къардашым Куль Тигин бабасыз къалды. Анам Умай Къатуннынъ къутына (бахтына) къардашым Куль Тигинге эр ады берильди. Он алты яшында олып, Къагъан эмджеңинъ илини, тёресини баягъы зенгинглештириди, тёретти (чокълаштырды).

37. Ыртыш озенини кечерек, чокъ юрьдик. Тюргиши къавмыны юкъу арасында басып алдыкъ. Тюргиши Къагъанынынъ ордусы Болчуда атеш киби, фуртуна киби кельди. Дженклештик. Куль Тигин озюнинъ Башгъу боз атынынъ устюне минип уджюм этти.

41. Къушу Тутукъ иле дженклештик. Аскерлерни эп ольдюорди. Мал-мулькюнинъ эпизини эвине эксиксиз кетирди. Куль Тигин йигирми еди яшыны толдургъанда, бизге къошуулгъан къабилелер урь ве мустакъиль олгъан сонъ, бизге душман олды.

45. Куль Тигин Азман атына минип, докъуз эрни къылышнен санчыды. Ордуны бермеди. (Аскерлеринен енъильмеди).

50. Кучюк къардашым Куль Тигин вефат этти. Къайгъын-къасеветке далдым. Корыген козълерим — корымез олды, бильген бильгим — бильмез олды. Тюшонджеге далдым. Инсанларнынъ такъдири Танърыдандыр. Инсан огъулларынынъ джемиси ольмек ичюн тёрейлер.

51. Меним козълеримден яшлар акъкъанда, юрегимнинъ тёрюнден къуветли аизарлар сарсылгъанда, мен бойле шейлер акъкъын-

да тюшюндим. Гъайрыдан эп гъайрыдан къайгъырдым. Мудхиш тюшюнджеге далдым. Меним артымдан кельген эки шадымның, кучюк къардашларымның, огъуларымның, бейлеримнинъ, халкъымның къашы, козю тез вакъытта бозуладжагъыны къасевет этип, тюшюнджеге далдым.

52. Такъмакълайыджы, агълайыджы сыйфатында, къытай ве табы халкъындан ёлбашчы оларакъ, Удар Сенгун кельди. Табгъач къагъанларындан Исы ве Ликенг кельди. Он бинъли хазине алтын ве кумюш кетирдилер. Тибет къагъанындан Бёлён кельди. Арттан — Гъарптан — Куньдогъуш дияяларында яшагъан согъд, берчекер (фарслар) ве бухара киби халкъларындан — Нек Сенгун ве Огъул Тархан кельдилер.

53. Он окъ халкъындан ве тюргин халкъынынъ къагъаны — меним огълумдан муурьдар Макраджа кельди ве муурьдар Огъуль-Бильге кельди. Къыргъыз Ханындан — Чур Тардыш-Ынанчу кельди. Тюрге япыджы ве башташлар узеринде дюльбер орънеклер ойып язгъан Табгъач Къагъанынынъ мемурлары ве Чанг-Сенгун кельдилер.

Куль Тигин къоюн йылында он единджи кунъде кечинди. Докъузынджы айда, йигирми единджи кунъде яш тёренинъ дженазесини къылдыкъ. Тюргесини, эйкелини, китабе ташыны шамек йылында, единджи ай, йигирми единджи кунъде битирдик. Куль Тигин къыркъ еди яшында булат олды. Ташны... таш узеринде оюп язгъан чокътан-чокъ адамларны тойгъун ве эльтеберлер ёлладылар.

Суаллер ве вазифелер:

1. Буюк языларда чин, яни табгъач халкъынынъ насыл бир янты табиат чизгилери тасвир олун�а?
2. Тюрк халкъы ииль этип алгъан илини (тиклеген илини) насыл бир сепеллерден отърю, элинден къачыргъаныны метиндеки сатырлардан тапып аньлатынъыз.
3. Бейлерден тёреген (келип чыкъкан) урь, сербест эркек несили Табгъач халкъына не себептен къул олды? Ханымлардан тёреген къызы несили джарие олмасына да, насыл бир адисе-вакъиалар себеп олгъаныны метиндеки сатырлардан тапып окъунъыз. Тарихий девирлерде олып кечкен вакъиалардан сизлер озюнъиз ичюн насыл бир нетиджелер чыкъара билесинъиз?
4. Куль Тигин тюрк халкъынынъ гъайрыдан тикленмесине не киби хызметлер япты? Онынъ япкъан арекетлерини метинден тапынъыз, окъунъыз. Субет кечиринъиз.
5. Куль Тигиннинъ сымасыны айдынлаткъан сатырларны ве парчаларны окъуп, онынъ насыл бир инсан олгъаны хусусында субет кечиринъиз.

ТОНЬЮКЪУКъ АБИДЕСИ

«Тоньюкъукъ» абидесиндең языларның транслитерациясы^[3]

(Парчалар)

ТӨРКИ : НІҢЕМВІННІН : ↓↓Э>♂ ЄҮГӘ : *ЧИМНІХ : *ОУА (17)
ЖҰЗГІНІНДІН : >ЧИ>Д : ЄЧАНЕҢ : ГХІЧКІ> : ІЛДҮҮНІ : ТІ
: ГІҮҮЧІ> : ІЛДҮҮ> : НЧУКВЕҢИ : *НЧІ> :
ОҒТАҢ : ЧІХННІ : ЧІНІТ : ЧІГІР : ЧІРГ : ІЛДІГІЛІМІ (18)
ҮН : ІЧІ : ІМ>Д1<>Д : ГХІННІ : ІЛДІЧЕҢ : ЧІФ<>Д : ІЛДІЧ
ІЛДІЧ : НІЛДІЧУ : МІННІЛДО : ВВІННІ
ЄҮГӘ : *ЧИМНІХ : ІЛДІГІНІН : Ы<>ДІГІМІ (19)
: >>>Д : ІЛДІГІ<>Д : НІЛДІ<>Д : ІЛДІГІН : ↓↓Э>♂ : І
: ГІҮҮЧІ<>Д : ГІЛДІЧЕҢ : ГІЛДІЧ : ГІЛДІЧУ

«Тоньюкъукъ» абидесиндең парчалардан алынгъан
бир нумюне

17. Тюрк будунугъ Отюкен йирке, бен озом бильге Тоньюкъукъ Отюкен йириг къөнмуш, тийин эсидип берийеки будун, къурыйакъы, йирийакъы, онъреки будун кельти.

18. Ики бинъг эртимиз, ики сюмюз болты. Тюрк будун къылынгъалы, Тюрк Къагъан олургъалы, Шантунг балыкъ(къ)а талуй оғюзке тегмиш йокъ эрмиш. Къагъанымга отюнюп, сюилтдим.

19. Сантуң балыкъ(къ)а, талуй оғюзке тәгюртюм. Учъ отуз балыкъ сыйды. Усын Бунда иту йуртда жату къалур эрти. Табгъач Къагъан ягъымыз эрти, Он Окъ Къагъаны ягъымыз эрти...

«Тоньюкъукъ» абидесиндең языларның
терджимеси^[4]

(Парчалар)

17. Бутюн тюрк халкъыны Отюкен (ерине) топрагъына кетиргенимни ве мен, идракли Тоньюкъукъ Отюкен ерине къонгъанымны (ерлешкенимни) эшитип, дженюп халкълар, гъарп, шималь, шаркъ халкъларды да бизге келип къошуулдылар.

18. Биз эки бинъ эдик, биз экиге болюндик. Тюрк халкъы, тюрк Къагъаны Шантунг шеэрине, денъиз дересине барып етмединдер. Къагъанымга отюнип (ялварып) сейледим.

19. Аскерлеримни Шантунг шеэри ве буюк денъизге кетирдим. Отуз учь шеэр якъылып-йыкъылды. Усын Буниту топрагъында яшамагъа къалдылар [мекян булдылар]. Табгъач Къагъан душманымыз эди, Он Окъ Къагъаны душманымыз эди.

20. Энъ кучлю Окъу Къыргызы Къагъан бизим душманымыз эди. Бу учь Къагъан бир сөзге келип: «Алтун Ыыш узерине барайыкъ» — дединдер. Бираз тюшюнип: «Тюрк Къагъанлыгъына къаршы сеферге чыкъайыкъ» — дединдер. — «Оларгъа къаршы кетмесек, биз не къадар олсакъ да, о бизни енъер».

21. «Онынъ Къагъаны (тюрк халкъынынъ къагъаны) — батыр, меслеатчы, акъыл-идракли инсан экен. Не къадар олсакъ да, бизим эпимизни ольдюртири, учевимиз бирлешип онъа къаршы сеферге чыкъайыкъ, оны ёкъ этейик». — дединдер. Тюргиши Къагъан бираздан: «Меним халкъым анда олур» — деди.

22. «Тюрк халкъынынъ джемиси (эписи) шашкъынлыкъта — деди о, — огъузлар кене дагъылышмакъта» — деди. Онынъ сөзүни эшитип, геджеси юкъум асыл кельмеди (ич юкълап оламадым), куньдюз де тарсыкъып юрдим, о вакъыт буны тюшюндим (tüshünp талтым)...

27. «Аны озени бою кетейик!» — Аны озени бою бардыкъ. Аскерлеримизни саймакъ ичюн токъталдыкъ, атларны тереклерге багъладыкъ. Куньдюз демей, гедже (тунь) демей, кете бердик. Къыргызларны юкълагъан вакъытта басып алдыкъ.

28. Сюнгюлер иле ёл ачтыкъ. Ханнинъ аскерлери джанланды, тирильди. Сюнгюлеримизни санчтыкъ, ханны ольдюрдик. Къыргызы халкъы Къагъангъа табынды, онынъ элине кечти. Къайткъанда, Кёгмен къарасыны доланып, артымызгъа къайттыкъ.

45. Душманларымызыны Темир Къапыгъа къадар къувудыкъ. Оларны андан къайтмагъа меджбур эттик. Арап ве тохарларнынъ Къагъаны Инельни де...

46. О вакъыт бутюн Согъдакъ халкъы озюнинъ Суг деген ёлбашчысынен кельди. О куньлери тюрк халкъы Темир Къапыгъа барып етти.

47. Тинсининъ огълу ерлешкен дагъыга барып етти. Анда оларнынъ ёлбашчысы ёкъ эди. О ерге мен, акъыл-идракли (бильгили) Тоньюкъукъ, халкъкъа етмек ичюн, кельдим,

48. Халкъ сары алтын, беяз кумюш, къызы ве къадын, къыйметли ташларнен зийнетленген урбалар ве бир чокъ джевхерлер кетирдиндер. Ильтириис Къагъан бильгили олгъаны ичюн,

49. къараман олгъаны ичюн, табгъачларгъа къаршы йигирми еди кере дженклешти, Къытайгъа къаршы — еди кере, огъузгъа — беш кере къаршы кетти. О вакъыт аскерлернинъ меслеатчысы

50. ве ёлбашчысы мен эдим. Ильтирис Къагъангъа... Тюрк Бёгю Къагъангъа, Тюрк Бильге Къагъангъа...

51. Къапагъан Къагъан... Мен геджелери юкъламайып,

52. куньдюз де ич бир раатлыкъ бильмейип, къырмызы къанымны акъызып, къан, теримни тёкип, халкъкъа иш ве къувет бердим, арбий сеферлерни де озюм алып бардым.

53. Аркъуй къаравулларыны улудаттым (улу эттим), бойсунгъан душманларына бизге къошуулмагъа ёл ачтым. «Танъры ярдымджы ол!» — деп Къагъанымнен бирликте сеферлерге чыкътыкъ.

54. Бу тюрк халкъына мен къуветли къушангъан душманларны ёлламадым, къушангъан атларны ёлламадым. Эгер Ильтирис Къагъан къазанмаса (сеферлерден сонъ зенгинлешмесе),

55. онынъ пешинден мен де къазанмасам, халкъ ёкъ олур эди. Онынъ къазангъаны ичюн, меним къазангъаным ичюн,

56. иль кене иль олды, халкъ акъикъий халкъ олды. Озюм къартайдым, буюк олдым (улу олдым). Эгер эр бир ердеки халкънынъ Къагъаны (кутюк) тембелъ олгъан олса, о халкънынъ алы не олур эди!

58. Мен, идракли, Тоньюокъукъ, буны Тюрк Бильге Къагъан илинде язмагъа эмир бердим.

59. Эгер Ильтирис Къагъан къазанмагъан олса, озю ёкъ олур эди, мен, озю Бильге Тоньюокъукъ, къазанмагъан олсам, мен де ёкъ олур эдим,

60. Къапагъан Къагъан ве Тюрк Сир халкъынынъ ерлеринде уюмет, халкъ, уюмдары олмаз эди.

61. Тек Ильтирис Къагъан ве идракли Тоньюокъукъынынъ япкъан къазанчлары муджиби [нетиджесинде] Къапагъан Къагъан ве Тюрк Сир халкъы яшамакъта.

62. Тюрк Бильге Къагъаны Тюрк Сир халкъыны ве Огъуз халкъыны юксеклерге котерди.

Суаллер ве вазифелер:

1. Бутюн тюрк халкъыны Отюкен (ерине) топрагъына кетирген ким олды? Тоньюокъукъынынъ Отюкен ерине ерлешкенини эшитип, оларгъа даа насыл халкълар келип къошуулгъаныны, бирер-бирер метинден окъуп, айтынъыз.

2. Тюрк халкъынынъ сайысы не къадар олгъаныны айтынъыз. Олар не себептен экиге болюндилер? Ондан сонъра олар насыл бир мусибетлерге огърадылар?

3. Душманларыны Темир Къапыгъа къадар къувгъан сонъ, олып кечкен вакъиаларны метин эсасында икяе этинъиз.

4. Метинде Ильтирис Къагъан акъкъында не киби малюматлар эльде этмек мумкюн. Онынъ сымасыны айдынлаткъан сатырларны тапып, табиат чизгилерини айрынъыз.

5. Бизге малюм олгъан Коクトюрк абиделеринде кимлер акъкъында икяе олуна? Йолугъ Тигин тарафындан язылгъан абиде «Тоньюкъукъ» абидесинден фаркъ этеми? Метинлерден мисаллер кетирип, исбат этинъиз.

6. Эсерде тарихий шахыслар акъкъында насыл малюмат бериле? Оларны тарифленъиз.

7. Къадимий тюрк эдебияты абиделери насыл меселелерге багышланы? Буну мисаллер эсасында анълатынъыз.

8. Бильге Къагъаннның тюрк халкъына дөгърултылгъан мураджаатынынъ эмиети неден ибарт? Мисаль эсасында анълатынъыз.



ЭДЕБИЯТ НАЗАРИЕСИ

ЯЗЫЛЫ ЭДЕБИЯТНЫНЪ ИФАДЕ УСУЛЛАРЫ. БЕЯН ЭТЮВ УСУЛЫ

Эр бир эсерде аятий левхалар, тарихий вазиетлер, къараманларнынъ табиат чизгилери, арекетлери, лакъырды тили тасвир олуна. Бедиий эдебиятта бу вазиетлерни тасвир этмек ичюн языджылар, шаирлер суретли тасвират, беян этюв, монолог, диалог киби чешит усуллар къулланалар.

Куль Тигин ве «Тоньюкъукъ» абидесинде икяе олунгъан адисе-вакъиалар о девирде олып кечкен тарихий левхаларны козумиз огүнде джанландыралар. Ильтирис, Къапагъан, Куль Тигин, Бильге Къагъанларның арекетлери, фикир дюньясы, ички дуйгъулары бири-бири артындан икяе этильген левхаларда тасвир олуна.

Йолугъ Тигин ве Тоньюкъукънынъ таш узеринде язгъан икяелери буюк усталыкъ ве кымиллик иле беян этиле. Бунынъле эсернинъ мундериджеси айдынлатыла.

Бир сыра вакъиаларның бири-бири пешинден багъланып, икяе этилюв усулына эдебиятшынастықта — беян этюв усулы дерлер. Беян этюв усулы эсернин сюжетини икяе этмеге ярдым эте. Бу эки абидеде къулланылгъан беян этюв усулы иле къадимий девирлерде олып кечкен тарихий вакъиалар тасвиrlenе.

Орхон абиделеринде тарихий вакъиалар бир шахыс адындан беян этиле. «Куль Тигин» абидесинде — Куль Тигиннин агъасы — Бильге Къагъан, «Бильге Къагъан» абидесинде Бильге Къагъаннын оғылу, «Тоныукъукъ» абидесинде — Тоныукъукъынын озю адындан икяе олuna.

Меселя: «Екяне Танърыдан, Коктен догъгъан тюрк Бильге Къагъаным, бу тахткъа отурдым». «Куль Тигин» абидеси. «Мен идракли Тоныукъукъ...» «Тоныукъукъ» абидеси.

Бу эки абидеде икяе биринджи шахыс адындан беян олuna. Икленин бойле беян олунгъаны чокъусы алларда джумлелердин манасындан я да мулькиетлик аффикслеринден анълашила.

Абиделерде беян этюв усулы биринджи шахыс адындан айтылып къулланыла. Бу хитапларда шу девирде яшагъан къабилелердин лакъырды тили миллий рух, миллий анъ иле ашланылып бериле.

Дидактик (огретиджи) насиатлар беян этильген нумюнелерде озынтунда къавий темель къурып, бирлешеджек халкъынын миллий руху, миллий анъынын къыйметли джеэтлери анълатыла. Меселя: («Бейлери халкъына садыкъ олмагъаны ичюн, Табгъач халкъы (чин халкъы) ийлекяр олгъаны ичюн, сахтекяр олгъаны ичюн, яланджы олгъаны ичюн, кичик ве буюк къардашлары арасында кин туткъанлары ичюн, бейлерни ве халкъны бири-бирине къаршы къойгъанлары ичюн тюрк халкъы иль этип алгъан Ильни элинден къачырды». «Куль Тигин» абидеси).

Насиат бериджи сатырларда беян этюв усулы иле миллетлерге хитап этилип, муим фикирлер айтыла. Эр бир миллеттин мен-фий чизгилери онъя заар кетиреджеги акъкъында бильдириле. Демек, тюрк бейлери халкъына садыкъ олгъан олсалар, яланджы, ийлекяр, пахыл ве бири-бирине кин тутмагъан олсалар, Къагъанлары тиклеген Илини джоймаз эдилер!

Бойледже, Орхон абиделеринде къулланылгъан язылы эдебиятнын беян этюв усулы о девирде яшагъан халкъынын, тарихий шахысларнын кечмиши лакъырды тили, яшайыш тарзы, арекетлери ве табиат чизгилерини джанландырмакъ ичюн хызмет этелер. Беян этюв усулы иле язылгъан Орхон абиделери бизге эр бир адымымызыны тюшюнип-ташынып атмагъа, еди ольчеп, бир пичмеге ограте.

Суаллер ве вазифелер:

1. Коктюрк абиделеринде язылы эдебиятнынъ насыл ифаде усулы къулланылған? Насыл усулгъа беян этюв усулы дерлер? Метинден мисаль кетирип, анълатынъыз.
2. Коктюрк абиделеринде тарихий вакъиалар кимнинъ адындан икяе этиле? Мисаллер кетиринъиз.
3. Насиат ве васиет берильген парчаларда шу девирде яшагъан къаби-лелернинъ насыл къыйиметли джеэтлери анълатыла? Мисаллер эсасында анълатынъыз.

МАХМУД КАШГЪАРИЙ (XI асыр)



XI асырда яшап иджат эткен Махмуд Кашигъарий тюркий халкъарнынъ алимиendir. Бизим кунюомизге етип кельген «Дивану лугъат-ит-турк» эсери оны алим сыйфатында бутюн дюньягъа танытты.

Кашгъар виляетинде дөгъгъаны ичюн Махмуд Кашигъарийнинъ нисбети¹ (лагъабы) Кашигъарийдир. О, тюркий иллэрнинъ бир чокъерлерини долангъан. Тюркий тиллердеки шивелернинъ хусусиетлерини оренгенген ve анълаткъан. Бу топракъларда яшагъан къабилелернинъ тили, тарихы, дестанлары, эфсанелерини ограйнип, оларны бир китапкъа топлагъан.

Махмуд Кашигъарийнинъ дөгъгъан сенеси белли дегиль. Амма «Дивану лугъат-ит-турк» эсери 1072—1077 сенелерде язылгъаны эсасында, онынъ, XI асырнынъ башында дөгъып иджат эткенини бильдирилер.

Махмуд Кашигъарийнинъ къайда ве не вакъыт окъуугъаны акъкъында малюмат ёкъ. Амма онынъ япкъан хызметлери бизге бу инсан озъ деврининъ юкsec малюматлы алими олгъаныны бильдири.

Махмуд Кашигъарий ялынъыз тильшынас дегиль де, о, эдебият, тарих ве дигер фенлерден де хабердар олгъан корюмли фен эрбабыдыр. Онынъ корюмли фен эрбабы олгъаныны эсеринде къулланылгъан ширий ве несрий парчалар тасдыкъламакъта. О, фарс, арап тили ве эдебиятыны темелли менимсеген алимлердендир.

Суаллер ве вазифелер:

1. Махмуд Кашигъарийнинъ иджадыны оренгенде, онынъ шахсиети акъкъында не бильдинъиз? Беян этинъиз.
2. Джиангъа мешур алимнинъ япкъан хызмети неден ибарет? Онынъ эсери акъкъында бильген малюматларынызnen пайлашынъыз.

¹ нисбети — бир де бир шахыснынъ дөгъгъан ерине айт мунасебетини бильдирип, къюолгъан ады.

Махмуд Кашгъарийнинъ **«Дивану лугъат-ит-тюрк» сёзлюги**

Махмуд Кашгъарийнинъ «Дивану лугъат-ит-тюрк» эсеринде сёзлер насыл маналарда къулланылгъаны изаатлана. Бутюн изаатлар джумлелер мисалинде анълатыла.

Дивандаки эдебий метинлер къадимий девир тюрк эдебиятындан алынгъан. Амма оларнынъ муэллифлери ким олгъаны косытельмеген, акс алда биз о девирде яшагъан шаирлернинъ адларындан да хабердар олур эдик.

Ширий парчалар дагъыныкъ алда берильсе де, оларнынъ эрбири белли бир сюжетнинъ парчалары олгъаны дуюла. Оларнынъ эрбири санки айры бир эсер кибидир. Меселя, **ягъмур**, **Этиль** сёзлерининъ ишлетилови:

**«Къыйды булут ягъмурын
Керип тутар акъ торун
Къыркъа къозты ол къарын
Акъын акъар энърешур»,**

*Булут къуйып ягъдырды ягъмурыны
Орталыкъекъа яяр акъынтысыны
Къыргъа ягъдырды (къойды) къарыны
Къырны къарнен орьттю,
Акъынты акъар чокълашыр*

киби ширий сатырлар иле изаатлана. Бу дёртлюклер эм сюжет, эм везин джеэтинден бири-бирине якъындыр. Бунъа бенъзеген даа бир чокъ дёртлюклер гуя бир колемли эсерден алынгъан.

Бу нумюнелерде шу девирнинъ тили, эдебияты, тарихы, джогърафиясы, икътисадияты, фельсесефеси акъкъында да малюмат бериле. Эсердеки нумюнелер ширий везинлернинъ тизилишини ве о девирдеки эдебиятнынъ бедиетлигини косытерелер.


Базы бир ширий парчаларда озен, кой, шеэрлернинъ адлары да анъыла, дюнья харитасы бериле. Меселя:

**«Этиль суву акъа туур
Къая тюбю къакъа туур
Бакъа телим бакъа туур
Колюнъ таки кюшерур»**

*Идиль суву акъып турар,
Къая тюбюни къакъып турар,
Бол балыкълар бакъып турар,
Гольнинъ тюбю чокълашыр*

киби дёртлюкте «Этиль — къыпчакъ иллериңде акъекъан озен адыйыр. Булгъар дензизине тёкюлир. Бир къолу рус диярына акъар» деп, озеннинъ джогърафик ерлешюви биле анълатыла.

Джумлелерде пек чокъ икметли (къыйметли) ибарелер, айтымлар, аталар сёзлери ишлетиле. Бейитлерде тюркй халкъларнынъ къадимий тиллери, тюшюнджелири, яшайыш тарзы тасвирлене.



**Махмуд Кашигъарий тарафындан тертип этильген
дюнъя харитасы. (XI асыр) Бу харита тюрклер тарафындан
япылгъан ильк харитадыр**

Бу бейитлер ве дёртлюклерде ишлетильген аталар сёзлери, айтымлар о девирде яшагъан халкънынъ анъ дереджесини косьтере. Аталар сёзлери ве айтымларда халкънынъ акъыл-идраки тасвир олунса.

Меселя, *Озъ* сёзю — озю, кенди деп анълатыла. Ондан сонъ бу сёзинъ манасы ширий метинлерде изалана.

*«Яхши урбанъны — озюнъе,
Татлы ашны — башкъасына,
Мусафиринъни сай, урьмет эт,
Шан-шерифинъни этрафкъа бильдирсин»*

киби дёртлюкте тюрк халкъынынъ мусафирпервер, инсансевер чизгилери тасвирлене. Халкъларгъа насиат ве огют бериле. Мусбет чизгилернинъ саиби олып етишмек ичюн несиллерге ёл-ёрукъ косытериле.

Огют сёзю — огют, акъыл огремтmek, бир де бир ишнинъ беджे-рильмесине ёл-ёрукъ косытерmek деп анълатыла:

«Оғұл, менден огют алмақъны эр вакъыт Танърыдан тиле.

Ульгенъде буюк инсан олып, бильгинъни этрафтакилерге огрем»

киби мисали иле изаатлана. Бу сатырларда тюрк халкъынынъ бильгиге ынтылувы тариф олуна. Тюрк халкъынынъ бильгини этрафкъа дагъытув киби маарифпервер чизгилери шерефленидириле. Несиллерге насиатлар бериле. Эйилик япувнынъ бир ёлу косытериле.

Эшиитти сёзю:

*«Кұулакъ эшиитсе — ғонъюль билир,
Козь коръсе — джошкұнлықъ келир»*

киби аталар сёзюнен анълатыла. Бу сатырларда инсан психологи-ясынынъ хусусиетлери акс олуна. Сёзниң ве гузель муамеленинъ (мунасебетнинъ) инсан ғонълюне олгъан эйи тесири косытериле. Халкъымыз арасында сёзниң эмиети «Яхшы сёз — джан азыгъы, яман сёз — баш кәазыгъы» киби аталар сёзюнде бильдириле. Бу эки аталар сёзюнинъ арасында буюк якъынлықъ бар.

Эсерде докъуз юз йыл эвель ата-деделеримиз йипек мендиль (явлукъ) алып юръгенлери, урбаларыны утюлемек ичюн утю къулланғынлары да косытериле. Ондан да гъайры бу эсерде тюркий халкъларнынъ къадынларгъа, балаларгъа нисбетен олгъан сайгъы ве иззетлери киби, оғренмеге ве ибret алмагъа ляйыкъ олгъан бир чокъ мисаллер де бардыр.

Бойледже, Махмуд Кашгъарийнинъ «Дивану лугъат-ит-турк» сёзлюги пек къыйметли эсердир. Лугъатта о девирде язылгъан эсерлернинъ бедиетлик дереджеси косытериле. XI асырда яшагъан тюркий халкъларнынъ урф-адетлери, яшайыш тарзлары ве рухиет дюньясы (психологиясы) тасвир этиле. Бутюн бу меселелер эсернинъ эмиетли ве къыйметли тарафларыны /джеэтлерини/ тешкиль этелер.

Суаллер ве вазифелер:

1. «Дивану Лугъат-ит-тюрк» сёзлюгинде берильген парчаларда не акъкында айтыла? Сиз озюнъизге олардан бир ибret ала билесинъизми? Оларның тербиевий эмиети неден ибaret экен?

2. Бейитлерде тюркий халкъларның насыл бир тарафлары тасвирлене?. Бу бейитлер ве дёртлюклерде ишлетильген аталар сёзлери, айттымларда о девирде яшагъан халкъның анъ дереджесини ifade этими? Аңълатынъыз.

2. Метинден икметли ибарелер, насиат ве огютлерге багъышланған сатырларны тапып, нетиджелер чыкъарынъыз.

3. Диваңда изааты берильген сёзлер шимди де тилимизде шойле ишленилеми? Бу сёзлеринъ бизим девирде де айны шойле теляффуз этилюви бизге нени исбатламагъа ярдым эте?

4. *Озъ* сёзюнинъ изааты берильген дёртлюкте инсаннынъ насыл фазилетлери (яхшы чизгилери) косытерилे?

5. *Огют, эшилти* сёзлерининъ изааты берильген сатырлар бизим насыл инсанлар олып осьмемизге ёл-ёрукъ косытере? Шахсий фикирлеринъизни бильдиринъыз.

ДИВАНУ ЛУГЪАТ-ИТ-ТЮРК^[5]

(Эсерден алынгъан парчаларның терджимеси)

Эсиргиен, къоругъан Танърының ады иле.

Эр тюрлю окъув, буюк эйиликлер, гузель ишлер — Танъры ады ичюндири...

Юдже Танъры девлет кунешини тюрклернинъ хызметлеринден дögъургъаныны коръдим. Коклердеки даирелерни, оларның девлетлери этрафына дёндюргенини коръдим.

Оларгъа «тюрк» адыны озю берген. Оларны ер юзюнинъ укюмдары япкъан. Асырымызының Хакъянларыны эп олардан чыкъартылган. Джиян халкъының югенлерини оларның эллери туттыргъан. Оларны эр бир халкътан устюн эйлеген... Акъи-къятсеверликте оларгъа (эр заман) ярдымджы олгъан. Оларгъа къошуулгъанларны, оларның хызметинде булунгъанларны эп азиз къылгъан. Бутюн тилеклерине ириштирген. Бойле инсанларны ярамазларның шерлеринден къоругъан.

Кимлер олса да, оларның тилине сыгъынса, о тильни озъ тили киби сайса, севсе, озылерини эр бир тюрлю телюкеден къурттарырлар. Тюрк олмагъанлар да тюрк тилине сыгъынгъанлары ичюн озылерини зарап ве зияндан къурттармакъталар.

كتاب دیوان لغات الترك

تألیف محمود بن الحسین بن محمد الشاشعی رحمه الله عليه

حروف
معکوس

لأنني أتعرّج على بريء عولار هذا الكتاب بلغة الترك زمان هيز القبايا غير عار بلغة الترك
ولا بلغة التركان أيضاً ولديه ذلك على حمله التركانية هو أول من صرّح بذلك في علم التركانية
ويقول عليه من الفاطمة فليلنكرما وفاليسير هذا الكتاب اشتهرت أن القabilان له بلغة الترك
جاميل التركانية على أن المقطة الفعلية لاتتفق بما في التركان لا تترجم ما ذكره المعنى وما يقال
وقد وقع ذلك في الفاظتين استعملها التركانية التي هي بيته ولجهة وأسلوبها.
يدل على حمله بالقافية وأشعارها وإنما لها في ذلك مرجع من طلاق البلاد في قيارة معدة
إن التغيير لا يحصل بلغة قومه لا ولا الكبار، سألاه إلينا ليس أمته بعد، في بلاد الأفغان
ويستغل العجم ثم تنتهي الآلاظ اللدرم مزاجهم به لا يفهمها معنى حتى يطلبهم
في الكتاب بل قد سمع المقطة من إذكاب العجز، (عزم) - من حيث يختلف في الكتاب أيضاً من
لدراساته كله أهل المستعدين ينزلونه في تعلمها له - (فـ) يكتب بشئناها باسحق فوز
قد له عزوجل وشند نكل بقى وآلة تعيون في طلاق العجم، (عزم) - والبعض ينجز لم تنتهي بلاده
العلانية والمثال هذا الكبير ولذا كان التعمّد به في (عزم) - ذات كتاب شفاعة، (عزم)
التي تذكر في طلاق العجم ومعرفتها بتركيا ثم قوم المجريز، (عزم) - يذهب إلى بذلك يذكر روايات
لسوف في التأكيد من على يلسان قلم أحجم منه ولا يدرك فعاز، (عزم) - ألم يسمع، (عزم)
الإسكندر، ستراؤ في لغة الترك، (عزم) - ستراؤ، (عزم) - ستراؤ، (عزم)

«Дивану лугъат-ит-турк» китабының биринджи саифеси

* * *

Мен бу китапны икметли ибарелер, аталар сёзю, шиир, несир киби сатырлар иле сюслеерек, элифбе сырасында тертип эттим. Сёзни къыдыргъан, озъ сырасында булсын деп, келимелерни (ибарелерни) ерли-ерине къойдым. Йыллар девамында бир чокъ кучьлюклер корьдим. Бу лугъат китапны (сёзлюкни) башындан сонъуна къадар секиз болюкке больдим...

* * *

Озъ — озю, кенди

Шу парчада бойле къулланыла:

Коръклюг тонугъ — озюнъге,
Татлыг ашыг — адынъкъа.
Тутгъыл къонукъ агъырлыгъ,
Ядсун чевинг будункъа.

Яхши урбаны — озюнъе
Татлы ашны — башкъасына.
Мусафиринъни сай, урьмет эт,
Шан-шерифинъни эр кеске бильдирсин.

(Яхши, янъы урбаны озюнъ кий, татлы емегинъден бир къысмыны дигерлерге де айыр, мусафиринъни ойле сай, урьмет эт ки, шан-шерифинъ этрафкъа билинсин).

Огют — огют, акъыл огремек, бир де бир ишнинъ беджерильмесине ёл-ёрукъ косытермек.

Шу парчада бойле къулланыла:

Алгъыл огют мендин, огъул,
эрдем тиле.
Бойда улугъ бильге болуп ,
бильгинъ ула.

Огъул, менден огют алмакъны
Эр вакъыт Танърыдан тиле.
Улькенъде буюк, бильгили инсан олып,
бильгинъни этрафтакилерге огрем.

(Эй, огълан менден огют ал, эдеп ве тербие огърунда ойле чалыш, ве хызмет эт ки, улькенъде буюк инсан ол, этрафтакилерге эдеп ве икметинъни (къыйметинъни) бильдир).

Этиль — Идиль

(Къыпчакъ иллериnde акъкъан озеннинъ адыдыр. Булгъар денъизине тёкюлир. Бир къолу рус диярына акъар.)

Шу парчада бойле къулланыла:

Этиль суву акъа туур,
Къая тюбю къакъа туур,
Балыкъ телим бакъа туур,
Колюнъ таки кюшерур.

*Идиль суву акъып турар,
Къая тюбюни дёгип турар,
Бол балыкълар бакъып турар,
Гольнинъ (тюбю) тюбюндекилер
(сувда яшагъан айванлар, махлюкъат) чокълашыр.*

(Идиль деръасы дагъ-ташлы багъынъ этегини дёгип, омратаракъ акъмакъта. Сувнынъ ташып акъышындан гольнинъ тюбюнде яшагъанлар эп чокълашыр).

Ай — ай, толу ай. Толгъун ай — Айнынъ он дёртю.

Ай — отуз куньден ибарет олгъан ай.

Бу бейитлерде къулланыла:

Къышкъа этин кельсе, къали къутлугъ яй,
Тун кунь кече алкъынур одълек биле ай.

*Хайырлы яз кельгенде, къышлыгъынъа азыр ол,
Гедже ве куньдюз кечкен киби, айлар кечип, заманлар да битер.*

(Мубарек яз кельгенде, къышкъа азырлыкъ корь. Чюнки гедженинъ ве куньдюзинъ кечкенини дуймай къалырсынъ. Гедженинъ ве куньдюзинъ кечмеси иле заман да тюкенир, битер).

Ай толун болса, элигинъ имлемес.

Ай толгъун (толгъун ай) — айнынъ он дёртю олса, пармагъынъ иле оны косътермек олмаз. Чюнки козю олгъан эр бир кимсе оны коре.

Бу ибаре козыге мешур олып корюнген эр шей, эр бир кимсе акъкъында айтыладжакъ вакътында къулланыла.

«Дивану лугъат-ит-тюрк» эсеринде расткельген аталар сёзлериңден нюмюнелер.

Ач не емес, токъ не темес.

(Ач олгъан не еmez, токъ олгъан не демез).

Агъыз есе, козъ уядур.

(Агъыз есе, ашаса, козъ утанаыр.

Алымджы — арслан, беримджи — сычан.

(Алыджы (алгъан инсан) — арслан, бериджи (кѣйтарып берген киши) — сычан).

Аркъасыз эр черигъ сиумас.

(Аркъасыз (таянчы олмагъан) киши душманыны ендиp оламаз.

Ата огълу атач тогъяр.

(Ата (баба) огълу бабасына чекмек (ошамакъ) ичюн дөггүлүр.

Атасы , анасы аччыкъ алмила есе, огъли, къизи тиши камар.

(Бабасы, анасы экши алма ашаса, огълунынъ, къызынынъ тиши кѣамашыр).

Айин киши ненъи ненъ санмаз.

(Башкъасынынъ малы-мульку мал мульк сайылмаз).

Баликъ субда. Кози таштин.

(Балыкъ субда, козю — тышарыда).

Беш эрнек тюз эрмес.

(Беш пармакъ бир дегильдир, бири-бирининъ эши дегильдир).


Суаллер ве вазифелер:

1. Махмуд Къашгъарийнинъ «Дивану лугъат-ит-тюрк» эсерининъ башланув хусусиетине дикъкъят этинъиз. Муэллиф не ичюн озь эсерини бойле баштай? Бу акъта озь фикирлеринъизни бильдириңиз.

2. «Тюрк» миллети акъкъында бу эсерде насыл бильгилер анълатыла? Миллий тиль меселесинен багълы сатырларны метинден тапынъыз.

3. «Дивану лугъат-ит-тюрк» эсериндеки аталар сёзлеринен икяе тиинъиз. Бойле аталар сёзлерини биз де тилимизде къулланамызмы?

ЮСУФ БАЛАСАГЪУНЛЫ (1017—1077)



Юсуф Баласагъунлы (Юсуф Хас Хаджиб) — умумтюрк классик эдебиятының ильк шаири. О, XI асырның башларында, 1017 сенеси Түркистанда, Баласагъун шеэринде дюньягъа кельди.

Юсуф Баласагъунлы яхшы тасиль корыген шаир, илим ве санат адамы олгъан. Онынъ генчлиги къайсы ильде кечкени, насыл медреседе окъүгъаны бизге белли дегиль. Амма о, буюк алим, тибиеттүнъ атасы Абу Али Ибн-Синаның (980—1037) талебеси олгъаны акъкъында малюмат бар. Бу меракълы малюмат онынъ несиллерге язып къалдыргъан дестанындан алынгъан. Юсуф Баласагъунлы тюркй алемге бу дестанынен танылгъандыр.

Юсуф Баласагъунлы «Къутадгъу билиг» дестаныны 1069—1070 сенелерде язғыан. «Къутадгъу билиг» дестаны тюркй тильде язылгъан къадимий эдебий ядикярлыкътыр.

Юсуф Баласагъунлының насыл инсан олгъаны онынъ дестанында ачыкъ-айдын айтыла. Юсуф Баласагъунлының адына къошулып язылгъан «Хас Хаджиб» сөзю — о девирде укюмдарлар тарафындан онъа берильген рутбени анълатта. О девирде бу рутбеге эр бир инсан саип оламаз экен. Адден зияде мусбет табиат чизгилерине саип олгъан инсан хаджип олгъан. Бу акъта Юсуф Баласагъунлы озь эсеринде бойле яза:

«Улугъ хаджиб артукъ бутюн чин керек,
Бу чинлик биле кед бутюн дин керек».

*Улу хаджип артыкъ пек темиз гонъюлли инсан олмакъ керек,
Бу темиз гонъюллилик иле о даа динли-иманлы олмакъ керек.*

Факъыр, тул, оксюзлернинъ тилегине темиз гонъюльнен ёл-ерукъ косътерген инсан хаджип олгъан. Бутюн джемиет ве сарай ишлерини акъылдане чезген инсан хаджип олгъаны бу дестанда пек тафсилятлы анълатыла.

Булардан биз о девирде хаджип олмагъя истеген инсанларгъа пек чокъ шартлар къюолгъаныны да анълаймыз. Эсерде хаджипке бой-пост, юзъ, къяфет, акъыл, бильги ве тез давранув киби чизгилер де менсюп олгъаны да бильдириле. Меселя:

«Севитюр юзю, коръкю, корълюклюги,
Ярашур кирип чыкъса эрсиглиги».

*Севидирир юзю, урбасы, корюмли олгъаны,
Ярашыр — кирип чыкъса, чин йигит сёзюнде тургъаны.*

Шаир хаджип олгъан инсангъа «еди козъ, къулакъ, сагъ гонъюль» керек деп яза:

«Хаджибликка ашну бу он ненъг керек,
Йити козъ, къулакъ, сакъ конъгуль керек».

Яни бу сатырларныңъ даа «еди кере корип, эшитип меселени анълы ольчеп пичкен инсан керек» деген манасы бардыр. Бу сатырлар бизге «Еди ольчеп бир пич» киби аталар сёзюни хатырлата.

Эсерден Юсуф Баласагъунлы бойлу-постлу, дюльбер юзылю, гузель ве кымиллик иле кийинген бир инсан олгъаныны анълаймыз. Сатырларда айтылгъан чизгилер шаирге менсюп олгъаныны да дуямыз.

Бойле этип, дестанда шаир акъкъында баягъы малюмат тапмакъ мумкун. Юсуф Баласагъунлы озь деврининъ улу шаира олгъаныны онынъ язгъан эсерине эсасланып айтамыз. Шаир бойле къыйметли табиат чизгилерининъ саиби олмагъан олса, мешур дестан язып, несиллерге къалдырмаз эди.

Дестандаки эр бир сатырлардан шаир яшайышныңъ сырларыны чокъ яхшы бильген, виджданлы инсан олгъаныны анълаймыз.

«Яхшы эрнинъ болур дайм къысмети,
Бу къысмет кетирип онъа олгъан урьметни».

*Инсанныңъ яхшылыгъынен келир яхшылық,
Яманлыкълар арттырып козъге яманлыкъ.*

Юсуф Баласагъунлыныңъ бу дестанда язгъан эр бир огюти, огредиджи насиаты онынъ шахсий табиат чизгилерини айдынлатта. Шаирнинъ эсеринде онынъ шахсиети акъкъындаки бир чокъ малюматлар сакълы олгъаныны эсернинъ мундериджесинден окъуп билемиз.

Суаллер ве вазифелер:

1. Юсуф Баласагъунлы насыл шаир эди? Эсерден мисаллер кетирип, онынъ табиат чизгилерини беян этинъиз.
2. Юсуф Баласагъунлы тюркй алемге насыл эсеринен танылды? Къачындых асырда яшагъаныны ве о, кимнинъ талебеси олгъаныны айттынъиз.
3. Юсуф Баласагъунлынынъ адына къошуулыш язылгъан «Хас Хаджиб» сёзю нени анълаты? Насыл инсангъа хаджиб намы берильгенини метинден мисаллер кетирип, анълатынъиз.
4. Шаир омюрнинъ сырларыны чокъ яхши билгэн, виджданлы инсан олгъаныны метинден тапып оқъунъиз, эзберленъиз.
5. Юсуф Баласагъунлынынъ эр бир огюти, огредиджи насиаты онынъ шахсий табиат чизгилерини айдынаткъаныны мисаллернен исбатланъиз.

«Къутадгъу билиг» дестанынынъ мундериджеси

Юсуф Баласагъунлынынъ «Къутадгъу билиг» дестаны субет шеклинде тизильген шиирий эсердир. Къараманлар арасында мераракълы ве насиатлы субетлер олып кече. Бу субетлер чешит мевзуларда отъкериле. Къараманларнынъ сымасы (образы) ремзлер (символлар) шекилинде тасвир этиле.

Ай-Толды адында бир фазыл ве зеккий инсан Кунь-Догъдынынъ элинде хызмет этмек истей. О, бир де-бир ёллар арап, не исе де онынъ везири олмагъя наиль ола. Олар озъара субетлешелер. Факъат Ай-Толдынынъ омюри узакъ олмай. О, хасталанып оле. Ольмезден эвель о, оғълу Огдюльмишке отгютер береге: «*Аллахкъа инан, онынъ эмирине үй, эйи ве акълы ол! Санъа мураджаат эткенлернинъ эр бир сёзюни динъле, амма айтылгъан эр бир сёзге ич бир вакъыт инанма, сабырлы ол!*» — дей.

О, укюмдаргъя да бир васиетнаме къалдыра. Укюмет ве халкъны адалетли идаре этмек кереклигини анълаты.

Укюмдар Ай-Толдынынъ бильгиси ве неслинен ферахлана. Халкъынынъ келеджеги ичюн пек къайгъыргъаны такъдирде, Ай-Толдынынъ беджерген хызметини онынъ оғълу — Огдюльмишке авале эте. Тек бундан сонъ, укюмдар субетлерини энди Огдюльмиш иле къура. Бир кунь Кунь-Догъды: «*Эй, Огдюльмиш, сени тапмакъ (булмакъ) Танъры лутфудыр (Аллахтандыр). Зулумлыкътан четте олмам, тек мулькте адалетлик къурмам. Эр бир тюрлю эйиликнинъ япылувиңда сен себепчи олдынъ. Лякин сен тексинъ (бир данесинъ, бир озюнъ-*

синг). Бир кунь ола сени де джоя билирим. Мемлекетимизнинъ сенинъ киби файдалы инсанларгъа ихтияджы бар. Бойле инсанларны кѣйдан тата билирим?» — деп акъыл сорай.

Огдюльмиш укюмдаргъа Одгъурмыш адлы пек бильгили ве аким бир тувгъаны бар олгъаныны бильдире. Бу инсан укюметке файда кетиреджеги акъкъында да айта.

Анджақъ Одгъурмыш дюньяда олып кечкен шейлерден узакъ, озюни эбедин алемнинъ джазибесине (озюне чекиджи гузелликке) берилип яшагъан бир софу олгъан. О, бутюн омюрини ибадетте ке-чирген.

Укюмдар, Огдюльмиш ве Одгъурмышнынъ араларында терен ве меракълы субетлер олып кече. Базыда субетлер мектюп вастасы иле де отъкериле.

Нетиджеде, укюмдар Одгъурмышнынъ дюнья ишлерине не ичюн къарышмайып, кенди кошесинде ибадет этип, мешгъуль олгъан икметини анълай. Онынъ бойле япкъаныны акълы таный. Чюнки укюмдар да: «Эбедин дюнья бизге якъынлашаткъанына ич шубе ёкъ» — деген ишанчинен яшап башлай.

Одгъурмыш укюмдаргъа (Кунь-Догъдыгъа) укюмдарлыкъ вазифелери ве миллетине къаршы япкъан муаммелелерини тюзете, огют ве насиатлар бере. Одгъурмышнынъ берген насиат ве огютлери инсан рухиетининъ тюзетильмесине дөгърултыла. Рухиет дюньясынынъ шекилленювине темель къоя. Онынъ айткъанына коре, эр бир инсаннынъ, укюмдар я да адий бир койлю олгъанына бакъмадан, инсаниетлик, медениетлик, виджданлыкъ чизгилери дигер чизгилерден устюн олмалы. Эр бир инсан ахиретини тюшүннеп яшамалы. Онынъ эр бир арекети, ниети, эр бир сёзю эйлилк япмакътан ибарет олмалы.

Кунь-Догъды ве Огдюльмиш, Одгъурмышнынъ берген насиат ве огютлерини ахыр сонъу анълайлар. Оны къыдырып башлайлар. Амма олар оны тапкъанда, Одгъурмыш буюк бир акъибетке огъратъанынынъ шааты олалар.

Суаллер ве вазифелер:

1. Юсуф Баласагъунлынынъ «Къутадгъу билиг» дестаны насыл шекильде тизильген ширий эсердир. Къараманлар арасындаки мунасебетлер насыл тасвир олунса?
2. Ольмезден эвель Ай-Толды, оғылу Огдюльмишке насыл огютлер бере? Бу огютлерни сиз насыл анълатата билесинъз.
3. Одгъурмышнынъ берген насиат ве огютлерининъ къыйметли тарафлары ненен багълыдыр? Онынъ эсерде айткъан насиатларыны айдынлатынызыз. Шимдики девирдеки омюренен багълап анълатынызыз.

Эпик-дидактик дестан

«Къутадгъу билиг» ибаресининъ пек къыйметли манасы бар. «Къутадгъу билиг» демек, «Бахт кетирген бильги» демектир.

Дестанда Адалет, Сеадет, Акъыл, Къанаат ве Акъибет озыра лакъырды этелер. Адалет чизгилери — Кунь Догъды адында укюмдарнынъ сымасында тасвирлене. Сеадет чизгилери — везирлик япкъан Ай-Толдынынъ сымасында бильдириле. Акъыл ве идрек чизгилери — везирнинъ оғълу Огдюльмишнинъ образында косътериле. Къанаат ве Акъибет киби умуминсаний чизгилер исе Огдюльмишнинъ сою — Одгъурмышнынъ сымасында аллегорик (кинаели) шекильде тасвир олуна.

Бу эсерде аят ве олюм акъкъында бир чокъ фельсөфий фикирлер бильдириле. Меселя:

«Негю бар дюньяда анар хийлесиз,
Негю хийле бар ким анар чаресиз,
Къамугъ ненке хийле итиг чаре бар,
Негер бу оюмке олюм хийлесиз».

*Не бар ки, дюньяда олгъан иллесиз,
Не илле бар ки, тапылмагъан чареси,
Эр бир шайге илле эр бир чаре бар,
Нечюн бу омюрде олюм чаресиз.*

киби дёргүнчүлүкте инсан аятында эр шайге чаре олып, тек олюмге чаре олмагъаны тасвирлене. Бунынъен омюрнинъ фанийлиги (кечиджилиги) ве рухнынъ збейдиллиги исбатлана.

Дестанда о девирде яшагъан къабилелернинъ яшайыш тарзы, адетлери тасвирлене. Девлетни идаре этюв усуллары, девлет эрбапларынынъ табиат чизгилери, ахлякъы, джемиет арасындаки мунасебетлер эсерде буюк усталыкъынен ифаде олуда. Меселя:

*Истер огълум, истер якъыным, акърабам олсун,
Ишлер — кечиджи мусафир олсун.
Къанун назарында меним ичюн эписи бирдир.*

*Укюм чыкъарыр экенлер, укюмни денъиштирмеге
манча мин тапамазлар.*

киби сатырларда эрбапларнынъ эйи табиат чизгилери, ахлякъы, джемиет арасындаки мунасебетлери де (аллегорик) шекильде тасвир олуда.

Бу дёртлюклерде инсанлар арасындағи мұнасебетлер акъкъында айтыла.

Меселя:

«Конъюль кимни севсе, корюр козъде ол,
Козюнъ къанча бакъса, учар юзъде ол,
Конъюльде эрсе арзу, тилек,
Агъыз ачса, барча тилин сёзде ол».

*Гонъюль кимни севсе, корер козъ оны,
Козюнъ не къадар бакъса, учар хаялы онынъ
Гонъюльде олса не къадар арзу, тилек,
Агъыз ачса, о къадар чокъ сёйлер оны.*

киби дёртлюкте **анъ**, **гонъюль** киби анъламлар акъкъында айтыла. **Анъ** ве **гонъюль** арасындағи дава тасвирилене.

Юсуф Баласагъунлының «Къутадгъу билиг» дестанында бир сыра тербиеий-ахлякъий меселелерге бағышланған бейитлер де бар. Меселя: «Укюмдар — миллетини, аиле башлыгъы — аиле азаларыны оқъутмагъа меджбурдыш». Я да: «Кенди эйилигинъни истеме, бейинънинъ эйилигини исте. Бейинънинъ эйи олувы — халкъының файдасыдыр».

Бүтүн бу мисаллерде шаир инсанларға насиат берे, оларны яшамагъа огрете, омюрде расткельген алларны анълатып, оларға ёл-ёрукъ косытере. Бу насиат бериджи ве огредиджи васиетлер атап сөзлери, айтымларда бериле.

Насиат берген ве яшамагъа ограткен эсерлерге дидактикалық эсерлер дейлер. Чокъ йыллар девамында олып кечкен вакъиаларны ве кениш тарихий мұитни тасвириlegen эсерлер эпик эсер (эпопея) сайылыр.

Юсуф Баласагъунлының дестанында бу әки хусусиет бирдем-ликтеги берильгени ичюн бу эсер эпик-дидактикалық дестандыр. Демек, **чокъ сенелер** **девамында олып кечкен вакъиаларны тасвириlegen**, **инсанларға насиат берген ве яшамагъа ограткен эсерлерге эпик-дидактикалық эсер дерлер**.

Бойледже, буюк колемли эпик-дидактикалық эсер яратмагъа мұвафықъ (наиль) олған мұәллиф 1069—1070 сенелери къараҳанлылар (ханлар сюлялеси) девлетининъ меркези — Кашгъарда болуна. Баласагъунда язмагъа башлагъан эсери узеринде он секиз ай девамында чалыша. Юсуф Баласагъунлы бу эсерини Кашгъарда язып битире.

Шу заманда Табгъач Бугъра Къаракан къараҳанлыларның укюмдары ола. Язып битирген эсерини шаир укюмдарға оқыу-магъа бере. Эсерни оқыуп, оны эйи тақъдирлеген укюмдар шаирге къараҳанлылар сарайында Хас Хаджиплик рутбесине айт хызметни бере. Бу рутбе о девирде везирлик ве орду команданлыгъындан сонъ кельген пек улу бир вазифе сайылгъян. Шаир Хас Хаджиплик намына наиль олмаса, о, бойле буюк ве къудретли эпик-дидактик эсер язып оламаз эди.

Суаллер ве вазифелер:

1. «Къутадгъу билиг» ибаренинъ манасы насыл изаатлана? Озы сёзлериңизнен анълатынъыз.
2. Юсуф Баласагъунлының «Къутадгъу билиг» эпик-дидактик дестаны не акъкъыннадыр? Иккяе этинъиз.
3. Эсерде иштирак эткен къараманларның сымаларында инсаниетликнинъ насыл чизгилери тасвирленген? Оларның адларыны айтынъыз. Маналарыны изаланъыз.
4. Эсерде фельсөфий фикирлер бильдирильген дёртлюклерде не акъкъында айтыла? Омюрнинъ фанийлиги ве рухның әбедийлигини тасвирлеген сатырларны оқыуп анълатынъыз.
5. Девлетни идаре этнов усуллары, ахлякъы, джемиет арасында мунасабетлер эсерде насыл ифаде олунгъаныны тарифленъыз.
6. Тербиевий-ахлякъий меселелерге бағышланған дёртлюклерде насыл мүимден-муим меселелер айдынлатыла?
7. Насиат бериджи ве огратиджи васиетлер халкъ ағызыз иджадының насыл бир жаңында тасвир олунгъаныны айтынъыз. Метинде оларны тапшып, айрынъыз. Дефтерлеринъизге къайд жеткен, зерттеленъыз.
8. Юсуф Баласагъунлының бу эсери жаңы джеэтинден насыл бир эсердир? Оның эсас хусусиетлерини айрышып, анълатынъыз.

Дестанда айдынлатылгъан меселелер

Юсуф Баласагъунлының «Къутадгъу билиг» дестанында къадимий тюрк къабилелерининъ тарихий кечмиши косытериле. Бу девирде яшагъан инсанларның табиат чизгилери, арекетлери тасвирлене. Табиат адиселерининъ гузелликлері де буюк усталикъ иле беян этиле.

Эсердеки табиат гузелликлері биз, оқъуйыджыларны да, озюне чеке ве табындыра. Меселя: «*Къуругъан тереклер ешиллер кийди. Табиат мор, ал, сары, ешиль ве къымызы ренклерге сюсленди. Къара топракъ озюне ешиль йипеклер багълады. Гүя чин керваны ерлерге чин йипеклерини яйды*».

Бу сатырларда Юсуф Баласагъунлы ондан эвель иджат эткен шаирлернинъ ширий усулларыны пек яхшы бильгени корюне. Шаир, оларнынъ иджадий теджрибесинден файдаланып, бойле шаирлане сатырлар яраткъян.

Эсерде о девирдеки ичтимайи-сиясий вазиетлер де ачыкъ-айдын тасвир олуна. Меселя: «*Улу Табғаң Бугъра хан дюньягъа аким олды. Ады көүтүлү (хайырлы) олсун. Танзыры оны эки джианды азиз этсин*» сатырларда янъы падишанынъ укюметте япаджакъ эйиликлери косытериле.

Укюмдарлар укюметни насыл идаре этмек керек олгъаны акъ-къында да сатырлар бар. Меселя:

*Мен ишлерни пычакъ киби кесер, пычарым,
давасы олгъан кишининъ ишини тез ве акълы чезерим.*

киби сатырларда укюмдарлар укюметлеринде ишлерини насыл алып бараджакълары аллегорик шекильде бильдириле.

Я да:

*Мен ишлерни дөгърулыкъле юрютиirim,
Инсанларны бей ве күул деп, экиге айырмам.*

киби бейитте джемиеттеки тенъисизликнинъ ёкъ этилюви ве дюньяда яшагъан инсанларнынъ арасында тенълик олмакъ керек-лиги акъкъында айтыла.

Феналыкъ — джаилликтен, хасталыкълар — ярамазлыкътан пейда олгъаны бейитлер вастасы иле анълатыла. Эр бир хаста тек тедавийленип, озюне шифа тапа бильгени косытериле. Ярамазларны тек тербиелеп, яхшылыкъ ве эйилик япмагъя согретмек мумкүн олгъаны бильдириле. Бильгилери олмагъанларгъя окъутув иле бильги берильгени тафсилятлы ифаделене.

Эсерде faziletli инсанларнынъ душманлары чокъ олгъаны акъкъында шойле тасвир олунгъан: «*Ким faziletli ве асыл сойдан олса — дей шаир, — юртнынъ этрафында нидже кимселир онъа душман кесилир (олур)*».

Бойледже, тиль ве тефеккюр (нетиджеленген фельсесфий фикир) меселелерини тарифлеген «Къутадгъу билиг» дестаны джемиетте расткельген менфий алларгъа къаршы дөгъруттылгъан. Бу эсер бизим девирде де фена (ярамай) вазиетлерден чыкъмагъя ёллар косытерген къыйметли эсерdir.

Юсуф Баласагъунлынынъ «Къутадгъу билиг» эпик-дидактик дестаны бизим куньге учъ нусхада келип етти. Бу учъ нусха Вена,

Къаир ве Ташкент шеэрлерининъ ильмий-тедкъикъат институттарында сакълыдыр. Вена шеэринде сакълы нусха уйгъур, Къаир ве Ташкент шеэрлеринде сакълы нусхалар исе арап язысы иле язылгъан.

Юсуф Баласагъунлынынъ «Къутадгъу билиг» эсери XI асырда янъы басамакъкъа котерильген язы иле анълатылгъан эдебий тильнинъ аджайип нумюнесидир.

Бу дестан — медениет, эдебият ве тилимизнинъ эсас тамырлары шу девирлерден келип чыкъкъаныны тасдыкълагъан къадимий абидедир.

Суаллер ве вазифелер:

1. «Къутадгъу билиг» эсеринде насыл вазиетлер тасвир олунгъан? Фазилетли инсанлар акъкъында насыл фикирлер бильдирильгенини тарифленъиз.

2. Эсерде табиат гузелликлерини тасвирлеген сатырларны окъуп насыл нетиджелер чыкъара билемиз? Шаиранды сатырларда Юсуф Баласагъунлыдан эвель иджат эткен шаирлернинъ ширий усулларыны козете- билемизми?

3. Эсерде о девирдеки ичтимай-сиясий вазиетлерни тасвирлеген сатырларны окъунъиз. Оларда насыл бир муим фикирлер бильдирильгенини икяе этинъиз.

4. «Къутадгъу билиг» дестанынынъ бугуньки куньде къыйметли джеэтлери неден ибарет? Мисаллер кетирип анълатынъиз.

КЪУТАДГЪУ БИЛИГ^[6]

(Дестандан алынгъан парчаларның
транслитерациясы ве терджимеси)^[7]

Бисмилляхи-ир-рахман-ир-рахим

I

Тенъгри Аззе ве Джелле оғдишин айур (Танъры Аззе ве Джелельнинъ бейитини айттыр)

1. байат аты бирле сёзюк башладым,
тёрютген игидген кечюрген идим.

*Аллах ады иле сёзюм башладым,
Яраткъан, етишитирген, афу эткен Танърым, Раббимдир.*

2. окюш огди бирле тюмен минъг сена,
угъян бир баяткъа анъгъар ёкъ фена.
*Тек, бир (екяне) олгъан Танбырыгъа бинълердже сена
(къадир) олсун,
Онъа фанилик айт дегильтидир.*
3. ягъыз йыр, яшиль кок, кунь, ай бирле тунь,
тёрютту халайыкъ одь одълек бу кунь.
*Къара ер, ешиль кок, кунеш, ай иле гедже ве куньдюз
заман иле халкъны ве дюнья узеринде бутюн
яратылгъанларны яратты...*
4. тиледи, тёрютту бу болмыш къамугъ,
бир окъу бол тиди, болды къолмыш къамугъ.
*Истеди ве бутюн дюньяда олгъан шейлерни яратты
Бир кере: «Ол!» — деди. Тилеген шейлеринин ёписи олды.*
5. къамугъ барча мунъглюг тёрютюльмиши,
мунъги ёкъ иди, бир анъгъар ёкъ иши.
*Бутюн яратылгъан шейлер онъа мухтадждыр,
Ихтияджы олмагъан бир Аллахтыр. Онын ёкътыр...*
6. ай эрклиг угъан, менъгу мунъгсуз байат,
ярамаз сенинъдин адынъкъа бу ат.
*Эй, къуветли, къудретли, эбедин ве эксиги олмагъан Аллах!
Сенден гъайрысына бу ад келишmez, уймаз.*
7. улугълыкъ санъга ол бедюклөк санъга,
сенинъдин адынъ ёкъ санъга, туш тенъге.
*Улулукъ Санъа ве буюклик Санъа (махсустыр),
Санъа эш ве бенъзеген башкъасы ёкътыр...*
- Суаллер ве вазифелер:**
1. «Къутадгъу билиг» эсерининг биринджи къысмында насыл насиат ве бильгилер такъдим олuna? Бу насиат ве бильгилер Аллахнынъ адынен бағыланып анълатылгъанынынъ себебини тарифленъиз.
 2. Биринджи ве экинджи бейитлерде бильдирильген маналарны ментинден мисаллер кетирип анълатынъыз.
 3. Дюньянынъ яратылгъаны акъкъындаки малюмат къачынджы бейитте тасвир олuna? Тапынъыз, окъунъыз, озъ сёсюнъизнен изаланъыз.
 4. «Къутадгъу билиг» эсерининг биринджи къысмында Аллахнынъ даа насыл бир фазилетлери тасвир олунгъаныны мисаллер кетирип, беян этинъиз.

IV

**Ярукъ яз фаслын улугъ Бугъра Хан отдишин айур
(Улугъ Бугъра Хан парлакъ баарь мевсимининъ
бейитини айтыр)**

64. ягъыз йыр йыпар толды кафур китип,
безенмек тилер дюнья коръкин итип.
*Къара топракъ мис къокъулар иле толды,
Индже (маддени) анъдыргъан къарлар ирип битти,
Дюнья, гузеллигини косътерип, сюсленмек истей.*
67. къурумыш йыгъячлар, тонанды яшыл,
безенди йипюн ал, сарыкъ, кок, къызыл.
*Къуругъан тереклер ешиллэр кийди. Табиат мор, ал, сары,
ешиль ве къырмызы ренклерге сюсленди, бурюнди.*
68. ягъыз йыр яшыл торкъу юзке бады,
хытай аркъышы ятлы, табгъяч яды.
*Къара топракъ юзюне ешиль йипеклер багълады,
Гүя чин керваны киби ерлерге чин йипеклерини яйды.*
70. тюмен тю чичеклер язылды куле,
йыпар толду кафур айын йид биле.
*Бинълердже чечеклер кулип ачылдылар,
Дюнья толды мис къокъулары иле.*
71. шаба йылы къопты къаранфиль йидин,
айюн барча бютрю йыпар бурды кин.
*Саба рузгяры къаранфиль къокъулары иле эсти,
Дюнья баштан-башкъа мис анбер къокъуды.*
72. къаз, оръдек, къугъу, къылкъалыкъыгъ тоды,
къакъылайу, къайнар йокъару къоды.
*Къаз, папий, къугъу, къылкъуйрукъ сеслеринен фезаны
толдырды,
Багъырышып юкъары, ашагъы къайнаштылар.*
73. къаюсы къопар корь, къаюсы къонар,
къаюсы чапар корь, къаю сув ичер.
*Къайсы (бираиси) сес чыкъарып учар корь, къайсы (бираиси)
къонар,
Къайсы (бираиси) чапар корь, къайсы (бираиси) сув ичер.*

75. улар къуш унюн тюзди ундер ишин,
силигъ къыз окъыр тег гонъгуль бермишин.
Олар къуш (екеклик) сесини анъдырып сесленелер,
Гүя бир гузель къызы гонъгуль берген инсаныны чагъырмакъта.
86. булит кокреди, урды невбет тугъы,
яшын яшнады, тартты хакъан тугъы.
Булут чокъ гурьледи, невбет кельгенде, давулыны урды,
шемишек чакъты,
Хакъаннынъ, укюмдарнынъ байрагъыны чекти.
87. бири къында чыкъты, сунуп иль тутар,
бири къуси, къуси джавы айынъкъа эттер.
Бири къындан чыкъаракъ къудретнен иль тутар,
Бириси душманны къоркъузып, адыны дюньягъа дуйдырыр.
88. айун тутты табгъач Улугъ Бугъра хан,
къутадсу аты бирсю ики джихан.
Улу Табгъач Бугъра хан дюньягъа аким олды,
Ады къутлу (хайырлы) олсун, (Танъры) оны эки джианды
азиз этсин...

Суаллер ве вазифелер:

1. IV къысмында улу Бугъра Хан парлакъ баарь мевсимининъ дюль-берлиги акъкъында не айта? Бу ибарелерде Бугъра Ханнынъ сымасыны айдынаткатъан сёзлерни айырнызыз.
2. «Къутадгъу билиг» эсерининъ IV-юнджи къысмында табиат дюль-берлигини айдынаткатъан сатырларны бирер-бирер окъуп, оларнынъ шаирлане сатырларыны анъламагъа ве эзберлемеге арекет этинъиз. «Къара топракъ», «мис къокъу», «дюнья, гузеллигини косътерип, сюсленмек истей» киби ибарелерни къулланып тувгъан юртумыздынъ дюльберлигини тасвирлеген мини инша язынызыз.
3. Дигер бейитлерде де бойле ибарелерни тапынъыз, ифадели окъунъыз ве анълагъан бильгинъизни тарифленъиз. Эсас манааларны сакълагъан ибарелерни айырнызыз, дефтерлеринъизге къайд этинъиз.
4. Къушларнынъ арекетлери, акъкъында тасвир олунгъан сатырларда шаирлане сёзлерни айырнызыз. Манаасыны анълаткатъан сонъ, оларны къулланып дигер бир джумлелер тизинъиз. Лакъырдынъызда оларны ишлетмеге арекет этинъиз.
5. Укюмдарлар акъкъында малюмат къачынджы бейитлерде айдынлатыла? Укюмдарнынъ чизгиси, хасиети аталар сёзюнен бильдирильген бейитни тапып окъунъыз, манаасыны анълатынъыз.

XVIII

**Кунь Тогъды илиг Ай-Толдыгъа адиль сыфаты
нетег эрдюкин айур**
(Укюмдар Кунь-Догъды, везир Ай-Толдыгъа адалетлик васфыны
(чилизгилерини) айттыр)

800. Муну мен ма коръギль конъюлик тёрю,
тёрю къылышкълары бу бакъа тур корю.
*Иште, бакъ, мен Догърулыкъ ве Къануным,
Къанунымның эсаслары булардыр. Дикъкъат эт!*
801. Бу курси озеле озъ олдурдукъы,
адакъы учь ол, коръ, ай конъглюм токъы.
*Мен устюнде отургъан бу курсюнинъ (тахтнынъ)
учь аягъы бар. Бакъ, эй, гонълюмни тойдургъан!*
802. къамукъ учь адакълыкъ митмез болур,
учегю турур тюз къамытмаз болур.
*Бутюн учь аякълылар (бир тарафкъа) эгилемез
ве учю де бирдем тургъанда, тахт да деврильmez.*
804. къамукъ учь адакълыкъ кони тюз тутур,
къали болса, тёрт коръ, бир эгри болур.
*Бутюн учь аякълы курсю тюз турар, эгер дёрт
(аякълы) курсю олурса, бири эгри (къыйыш) ола билир.*
809. конъюлюк озеле кесер мен ишиг,
адырмаз мен, бегсиг я, къульсиг кишиг.
*Мен ишлерни дөгърулыкъле юрютиrim,
инсанларны «бей» ве я «күул» деп, экиге айырмам.*
811. бичег тег бычар, мен кесер ишиг,
узатмаз мен, деви къылыгълы кишиг.
*Мен ишлерни пычакъ киби кесер, пычарым,
давасы олгъан кишининъ ишини тез чезерим,
узатмам, оны акълы тарзда чезерим.*
817. Керек оғълум эрсе, якъын я ягъукъ,
керек баркъын эрсе, кечикили къонукъ.
*Истер оғълум, истер якъыным, къысмым, акърабам олсун,
Истер ёлджу кечиджи мусафир олсун!*

818. тёрюде икигю манъга бир саны,
кесерде адын булмаган ол мини.
*Къанун назарында меним ичюн эписи бирдир,
Укюм берир экенлер, олар башкъа тюрлю этип,
денъиширип оламазлар, мени де денъиширип оламазлар.*

819. бу беглик ули корь конилик тутур,
кони болса, беглер тириглик болур.
*Бу бекликнин ў темели дөгърулык ётыр,
Беклер дөгъру олсалар, (халкъ) сеадетке къавушыр,
макъсадына иришир...*

Суаллер ве вазифелер:

1. XVIII къысымда Кунь-Догъды Ай-Толдыгъа адалетнинъ насыл сыйфатлары акъкъында икяе эте? Олардан насыл фельсевий фикирлер сечтинъиз? Бу эсернинъ тербиевий эмиетини айдынатмагъа тырышыныз.
2. Укюмдар везирьге адалетлик васфы, чизгилерини насыл усулнене анълата? Курсю сымасында укюмдарнынъ насыл бир табиат чизгилери тарифленгенини беян этинъиз.
3. Укюмдарлар укюметни насыл идаре этмек кереклиги къачындыкъа бейитлерде айттыла? Оларны тапынъыз, окъунъыз ве анълатмагъа арекет этинъиз.
4. Эсерде джемиетте расткельген менфий алларгъа къаршы дөгърүлтүлгъан фикирлернинъ эмиетини изаланъыз.

XXXV

Огдюльмиш джевабы Илигке (Огдюльмишнинъ Илигке айткъан джевабы)

6479. Къаны бир конълиликт къылгъылы къаны,
Къаны, Тенъгрилик ёругълы къаны.
*Къайда бир дөгърулыкъ косътерген, къаерде?
Къайда Танъры ичюн иш коръген ким?*
6480. Айун барча бутрю тюкель артады,
Корип танъгладачы къаны бир муны.
*Дюньянынъ эр бир тарафы башындан сонъунадже бозулды,
Буны корип, шашкъан бир кимсе бармы..?*

Суаллер ве вазифелер:

1. Огдюльмишнинъ Илигке айткъан джевабында насыл бир терен мана бар? Огдюльмишнинъ Илигке айткъан джевабыны бизим девирде де муимлигини анълатынъыз.

2. «Къайда, бир дөгърулыкъ косытерген къаерде?», «Дюньянынъ эр бир тарафы башындан сонъунадже бозулды» киби эсерден алынгъан сатырлар сизинъ яздажакъ иншантыйзынъыз эсас мевзузы олсун. Шимдики аятымызnen багълы олгъян бутюн тюшонджелеринъизни бу иншагъа синъдирмеге арекет этинъиз.



ЭДЕБИЯТ НАЗАРИЕСИ

ШИИРИЙ ОЛЬЧЮЛЕР. АРУЗ ВЕЗНИ

Юсуф Баласагъунлынынъ «Къутадгъу билиг» дестаны месневи шеклинде язылгъан эсерdir. Бейитлер чифт къафиелешелер. Меселя:

Байат аты бирле сёзюк башладым,
Тёрютген игидген кечюрген идим.

Ягъыз йырг яшиль кок кунь ай бирле тунь,
Тёрютто халайыкъ одь одълек бу кунь.

Эки бейиттинъ окъулув къыраатыны эджаларнен бойле косьтермек мумкюн:

Ба йат а | ты бир ле | сё зюк баш | ла дым,
Тё рют ген | и гид ген | ке чюр ген | и дим.

Созукъ сеснен биткен эджа — эджаның ачыкъ олғаныны анълатыр. Схемада ачыкъ эджа (.) иле косътерилир. Ачыкъ эджа чокъусы алларда — къыскъа, базы алларда исе къыскъа олса да, девамлы окъулыр.

Тутукъ сеснен биткен эджа — эджаның япыкъ олғаныны анълатыр. Схемада япыкъ эджа (—) иле косътерилир. Япыкъ эджа эр вакъым девамлы окъулыр.

Мисаль этип алынгъан бейитте сёзниң биринджи:

Ба эджасы — ачыкъ эджадыр. Бу эджа къыскъа окъулыр, ве схемада (.) иле косътерилир.

йат эджасы — япыкъ эджа, девамлы окъулыр, ве схемада (—) белъгиси иле косътерилир.

а эджасы — ачыкъ эджа, къыскъа олса да, девамлы окъулыр;

Къалгъан эджалар да кене шу тертипте окъулыр. Белли бир тертипке тизилип, белли бир везин пейда этерлер.

Ачыкъ ве япыкъ (къыскъа ве девамлы) эджаларның тертибинде язылгъан ширий эсернин везнине *аруз везни денилир*.

Ачыкъ ве япыкъ, къыскъа ве девамлы эджалар схемада бойле косътерилир:

Ба	йат	а	ты	би	р	ле	сё	зю	баш	ла	ды	м,
.	—	—	.	—	—	.	—	—	.	.	—	.
Тё	рю	т ген	и	ги	д	ген	ке	чи	р ген	и	ди	м.
.	—	—	.	—	—	.	—	—	.	.	—	.

Бу схема Юсуф Баласагъунлының «Къутадгъу билиг» дестаны аруз везнинде язылгъаныны бильдирир.

Суаллер ве вазифелер:

- Насыл бир ширий эсернин везнине аруз везни денилер?
- Аруз везнинде къулланылгъан ачыкъ эджа насыл сеснен биткенини ве насыл окулгъаныны айтынъыз. Ачыкъ эджа схемада насыл косътериле? Мисаллер кетиринъиз.
- Аруз везнинде къулланылгъан япыкъ эджа насыл сеснен биткенини айтынъыз. Япыкъ эджа схемада насыл косътереле? Мисальнен исбатланъыз.

КЪЫРЫМТАТАР ЭДЕБИЯТЫНЫНЪ КЪАДИМИЙ ДЕВРИ

«Дюнъяджа белли «Орхон (Коктюрк) язылары, Махмуд Къашгъарийнинъ «Дивану лугъат-ит-турк», Юсуф Баласагъунлынынъ «Къутадгъу билиг», Махмуд Къырымлынынъ «Хикяет-и Юсуф ве Зулейха», Халиль огълу Алининъ «Къысса-и Юсуф» киби тюркий тильде язылгъан абиделер энъ къадимий, эдебий язы абиделердир. Оларда халкъымызнынъ кечмишини, эдебий тилимиз ве эдебияттымызнынъ тарихыны огремек ичюн муйим менбаалар бардыр.

Къырымда мейдангъа кетирильген «Кодекс Куманикус» лугъаты да бизим къырымтатар тилининъ энъ къадимий язы абиделери олмакънен бирге, умумтюркий язы абидеси сайылмакъта.

Тюркий халкъларнынъ язылы эдебияттынынъ асыл тамырлары Орхон абиделери (VIII асыр), Махмуд Кашгъарийнинъ «Дивану лугъат-ит-турк» (XI асыр), Юсуф Баласагъунлынынъ «Къутадгъу билиг» (XI асыр) киби къадимий эсерлеринен багълыдыр. Къырымтатар халкъынынъ да асыл тамырлары шу де-вирлерден келип чыкъа.

Эдебияттымызнынъ темелини бу эсерлернен бир сыртада Махмуд Къырымлынынъ «Хикяет-и Юсуф ве Зулейха» киби дестаны тешкиль эте. Бу дестан асыл къырымтатар тилинде язылгъан абидедир.

Къырымда Ислам дини таркъалып башлангъанынен, арап халкъ яратыджылыгъындаки диний мевзуулар къырымтатар фольклорында да тасвир этиле. Бу вакъыт диний къыссалар ве иляхилер языла. Бу эсерлерде варлыкъ-ёкъулукъ, аят-олюм, дженнет-джеэннем киби мевзуулар тасвир этиле. Айны шу мевзуулар халкъ агъыз яратыджылыгъынынъ эсас мевзусына чевириле.

Язылы эдебиятта да диний мевзууларгъа багъышлангъан эсерлер языла. Диний мевзууларгъа багъышланып язылгъан эсерлер тасаввуф эдебияттыны пейда эте.

Тасаввуф назариесине коре, Аллах бирдир, екянедир. Кяинаттаки эр бир шей онынъ колъгесидир. Аллах инсанни ве алемни яраткъан. Инсан Аллахкъа даима зикр кетирип (хатырлап) асерт чеке. Гъайрыдан онъя къавушмакъ истей. Аллахкъа

къавушмакъ ичюн исе ашкъ ве гонъюль ёлу бар. Бу ёлдан кеткен инсан омрю бою озъ нефсине (истегине) аким олмакъ, юксек муртебеге (алгъя, вазиетке) иришмек ичюн хызмет этер. Ишлеген гуняхлары ичюн тёвбе этер (багъышлав сорар), нефси ни тутар (токътатыр), Аллахның бергенинен шукюр этер.

XII асырның сонъунда ве XIII асырның башында иджат эткен Махмуд Къырымлының «Хикяет-и Юсуф ве Зулейха» дестанында диний эдебиятның тесирини корымек мумкүн.

Бу эсерниң инглиз ве испан тиллерине терджиме олунгъяны белли. «Юсуф ве Зулейха» дестанының Рогерс ве Гриффит тарафындан инглиз тилине чевирильген эки терджимеси бар. Олардан биринджиси — келиши гузель япылгъан, экинджиси — сербест терджимедир. «Юсуф ве «Зулейха»ның испан тилинде эки терджимеси бар. Булардан бири — «Поэма де Йосе», экинджиси — «Лайендас де Йосе»дир.

Бойледже, къадимий девир къырымтатар эдебиятның темель ташы олгъан Махмуд Къырымлының «Хикяет-и Юсуф ве Зулейха» дестаны дигер тюркий халкъларның да эдебий вариетидир.

«Къырымда язылгъан ядикярлықълар къырымтатар эдебиятның темель ташлары, мирасыдыр. Къырымгъа могъуллар кельмезден эвель, мында умумий тили, дини, эдебияты, медениети олгъан халкъ шекилленгенини исbat этелер.

Суаллер ве вазифелер:

1. Тюркий халкъларның язылы эдебиятның асыл тамырлары сиз бильген насыл къадимий эсерлернен багълыдыр? Къырымтатар халкъының асыл тамырлары анги девирлерден келип чыкъкъаныны айтыңыз.
2. Асыл къырымтатар тилинде язылгъан дестаның серлевасыны ве муэллифинң адыны тарифленьиз.
3. Къырымда Ислам дини таркъалып башлагъанынен, эдебиятта насыл мевзуулар тасвир этиле?
4. Диний мевзууларгъа багъышланып язылгъан эсерлер насыл эдебиятны пейда эте? Тасаввуф назариесининъ инджеликлерини анълатыңыз.
5. Махмуд Къырымлының «Хикяет-и Юсуф ве Зулейха» дестаны насыл тиллерге терджиме олунгъаны белли?
6. Махмуд Къырымлының «Хикяет-и Юсуф ве Зулейха» дестанының инглиз тилине терджиме эткен муэллифлернинъ адыны айтыңыз.
7. Махмуд Къырымлының «Хикяет-и Юсуф ве Зулейха» дестанының испан тилиндеки эки терджименинъ серлеваларыны тарифленьиз.

МАХМУД КЪЫРЫМЛЫ (XII—XIII асыр)



Къырымтатар язылы әдебиятынынъ ильк векиллерinden бири — Махмуд Къырымлы XII асырнынъ сонъу ve XIII асырнынъ башында яшап иджат этти. Онынъ къалемине менсюп «Хикяет-и Юсуф ве Зулейха» дестаны къырымтатар әдебиятынынъ миллий вариети сайыла. Бу дестан къырымтатар язылы әдебиятынынъ төмөлөштөшүндө орнашып жатыр. Онынъ асыл нусхасы къолумызгъа келип етмегени пек языкъ. Биз оңтүстүк оренеджек дестаннынъ экиндже нусхасыны о девирде яшагъан Халиль огълу Али адында бир шайр асыл нусхадан кочюрип алышп язгъан, чөнки Махмуд Къырымлы озын эсерини язып битирмейип, вефат эте. Бу малюмат Халиль огълу Али тарафындан кочюрилип язылгъан дестанда бойле бильдириле:

Бу къысса бунда динди,
Къырымлы Махмуд ольдю.
Къаланын дилемеди,
Яренлере бильдирию.

Махмуд Къырымлынынъ язып битирмеген дестаныны Халиль огълу Али екюнлей. Соңра бир къач вакъыт кечкен сонъу, бу эсерни къырымтатар тилиндөн (дешт тилиндөн) тюрк тилине терджелиме эте. Япкъан хызметини шайр дестанда бойле тасвирлей:

Бу китабы дёндюрен,
Къырым дилин гидерен,
Тюркий диле гетирен,
Чокъ захмет горьме дею.
Ол Халиль огълу Али.
Еди дивандыр эли.
Ол дюэзди тюркий дили
Дешт дилиндөн дёндерю.

Халиль огълу Алининъ тюрк тилине терджиме эткен дестаны 5600 сатырдан ibaret эсердир. Бойле къыйметли заметинден сонъ, шаир Халиль огълу Али озюнинъ «Къысса-и Юсуф» дестаныны язмагъя башлай, ве, оны 1232 сенеси язып битире. Бу малюматлар бизге Махмуд Къырымлынынъ «Хикяет-и Юсуф ве Зулейха» дестаны 1232 сенеден эвель язылгъаныны бильдирелер.

Дестанда халкъ тилининъ зенгинлиги буюк усталыкънен къулланыла:

Кельди базар ичине,
Табирджилер янына.
Отурды дюкянына
Дюшюни дер анъладу...

Ахыр аны сатасынъ,
Мал ичине батасынъ.
Падишалыкъ этесинъ,
Та олондже шад олу.

Пармакъ везнинен язылгъан дестанынъ сюжети арап халкъ агъыз яратыджылыгъында, Къуранда, Тевратта (еудийлернинъ диний китабында) анъылгъан вакъиаларны беян эте. Бу вакъиалар Якъуп Пейгъамбернинъ дюльберден-дюльбер огълу Юсуфынъ башына тюшкен хорлукъларны ифаделей.

Къараманларнынъ арекетлери, ынтылышлары, фаний (шимдики-кечиджи), бакъий (олюмден сонъ оладжакъ) дюнья ве Аллах киби анълайышларны изалай. Дестан инсан аятындаки гъурбетлик, асретлик, дин ве иман киби меселелернинъ муимлигини ифаделей. Махмуд Къырымлы аятий варлыкъка керекли дереджеде къыймет кесмеге огрете, дюньянынъ лезетине алданмайып, Аллахкъа итаат этмеге давет эте. Олгъан, олып кечкен, оладжакъ адисе-вакъиалар Аллахнынъ къудрети иле арекетке кетирильгенини беян эте.

Муреккеп омюрнинъ эр бир тарафыны терен бильген ве анълагъан шаир яшайышнынъ манасы акъкъында лакъырды юрюте. Эр бир инсан омюрнинъ къыйметини билип яшамакъ керек олгъаныны анълата.

Суаллер ве вазифелер:

1. Къырымтатар язылы эдебиятынынъ ильк векиллерinden бири — Махмуд Къырымлы къачынды асырда иджат этти? Къырымтатар эдебиятынынъ миллний вариети насыл бир эсернен зенгинлешкенини таифленъиз.

2. Дестаннынъ экиндже нусхасы ким тарафындан кочюрилип язылгъаныны айтынъыз. Бу малюмат къайда бильдириле?

3. Махмуд Къырымлынынъ «Хикяет-и Юсуф ве Зулейха» эсери насыл везиннен язылгъан? Дестанда икяе олунгъан вакъиалар акъкъында айтынъыз.

4. Мешур дестан насыл эдебиятнынъ ирмакъ башларыны тешкиль эте? Махмуд Къырымлы аятий варлыкъта насыл ёлларнен къыймет кесмеге огреткенини метинден дикъкъатнен окъунъыз ве озъ сёзлеринъизнен бу маналарны анълатмагъа тырышынъыз.

Махмуд Къырымлынынъ «Хикяет-и Юсуф ве Зулейха» дестанынынъ сюжети

Кенъан шеэринде яшагъан Якъуп Пейгъамбернинъ алты къадынъындан он эки огълу ола. О, Юсуф адлы огълууны пек севе. Юсуф дюньягъа кельгенде, онынъ анасы джан бере ве о, агъасы Ибн Яминнен берабер оксюз къалалар.

Якъуп Пейгъамбер яш баласы олгъан (еудий) джариени базардан сатын ала. О, Юсуфнынъ сют анасы ола, оны эмизе. Куньлернинъ биринде джарие (къараваш) бир коксюни озъ огълууна эмизгенини сезип къалгъан Якъуп Пейгъамбер ачувлана ве балачыкъны Мысыргъа сатып йибере:

*Якъуб ич эслемеди,
Сөзюни динълемеди.
Сатты онынъ огълууны
Къалды гъарип агълаю.*

Якъуп Пейгъамбернинъ япкъан арекетине даянып оламагъан джарие, Ислям динини къабул эте, Аллахтан онынъ джезаланмасыны тилей:

*Ахыры козъсюз къалгъыл,
Юсуфынъдан айрылгъыл.
Дюрлю асремелер коръгиль
Дилерим айанмаю.*

Юсуф он яшыны толдургъанда, коктен ай, кунеш ве он эки йылдыз энгенини тюшүнде коре. Якъуп Пейгъамбер огълууна бу тюшни табирлеп, онынъ султан оладжагъыны ве он бир агъасы онъя келип теменна этеджеклерини айта. Амма, агъалары тюшке севинмейджеклерини билип, тюшни оларгъа айтмакъны ясакъ эте.

Лякин бу лакъырдыны эшиткен Юсуфнынъ аласы тюшни торунларына еткизе. Юсуфны эвель де севмеген агъалары бу янъылыкъны эшитип, пахыллыкътан даа бетер яна-якъылалар. Оны ольдормек къаарына келелер. Амма озъара давалашкъан сонъ, Юсуфны Адд адындаки къуюгъа ташлайлар. Къозу къанында булгъалангъан Юсуфнынъ кольмегини Якъуп Пейгъамберге косътерип, къардашыны борю ашады дейлер.

Якъуп Пейгъамбер огъулларынынъ сёзюне инанмай. Огъуллары тузып кельген борю инсан тилинде сёйленип, Кенъан мемлекетинде яшагъан борюлер инсан ашамагъаныны айта. Якъуп Пейгъамбер гедже-кунъдюз агълай-агълай, козълери сокъур ола.

Дюльберликнинъ юзюнджи къысмы бутюн инсанитетликке такъсим олунып, докъсан докъуз къысмы келеджекте догъаджакъ огъланчыкъка бериледжегини даа учь юз йыл эвель насылдыр бир китаптан окъугъан Худ Пейгъамбер, бу муджизени корымек арзуында къала. Аллахнынъ эмиринен, юкъугъа далгъан Худ къуюгъа ташлангъан, Юсуфны элинен тузып ала. Юсуфнынъ дюльберлигини коръгенинен шу ерде джаныны теслим эте.

Коктен къуюгъа энген Джебраиль Аллахнынъ «даянып, сабыр эт-син» деген эмирини Юсуфкъа бильдире ве Худнынъ джеседини алыш кетип, коме.

Айны шу вакъытта Мысырда яшагъан бир базиргян (малик) тюшүнде гуя Кенъан мемлекетинде юргенде, коктен энген кунеш апансыздан онынъ къойнуна кирип чыкъкъаныны, сонъ тёпеге котерилип, онъа нурлар сакъканыны коре.

Бир къач алтынгъа тюшюни табирлекен базиргян пек зенгинлешдегине къуванып, Кенъан мемлекетине кете. Адд къуюсындан Юсуфны чыкъара. Юсуфнынъ агъалары онъа бу огълан оларнынъ къачакъ къулу олгъаныны айталар. Оларгъа къайтарып бермесини талап этелер. Нетиджеде, Юсуфны бу мемлекеттен бутюнлей алыш кетиледжеги шартынен, базиргянгъа докъуз алтынгъа сatalар:

Малик Юсуфа бакъты:
— *Бу эрлер сени сатты,*
Эм сен күулмыйсынъ? — деди,
Юдунмагъыл гизлею.

Мысырнынъ султаны Къатыфыр Юсуфны къазнасында олгъан алтынларгъа сатын ала. Онъа бу ишни япмагъа къадыны Зулейха меджбур эте. Чюнки бу иште буюк бир сыр сакълы ола...

Магъриб (Шималий Африка) эмири Таймуснынъ къызы Зулейха даа генчлигинде дюльберден дюльбер йигитни тюшюнде коръген-

де, онынъ къаерде булунгъаныны ве илериде султан оладжагъыны сорап биле. Мысыр султаны Юсуфдыр деп беллеп, онъа акъайгъа бермесини бабасына риджа эте. Мысыр султанына Эмир Таймус къуда ёллагъанда, султан дюльбер Зулейхагъа эвленимеге разылыкъ бере. Амма той геджеси акъайы Юсуф олмагъаныны коръген Зулейха, такъдирине табынып, онынънен омюр этмеге разы ола.

Отуз яшыны толдургъан Зулейха Юсуфны базарда корип, генчлигинде тюшюнде коръген огълангъа ошата ве Къатыфыргъа оны сатын алдырыт.

Юсуф осыкен сайын Зулейха онъа севда ола, севдалыкътан япкъан арекетлерине де эмиет бермей. Юсуф оны ред эте. Бунъа ачувлангъан Зулейха оны зиндандыгъа быракътыра.

Къатыфыр султан эмизикли баланынъ агъызындан Зулейха къабаатлы олгъаныны эшитип, кечине.

Рейан (Къатыфырнынъ къардашы) янъы султан олгъан сонъ, дюльбер Зулейхагъа эвленимек истей, амма о, онынъ истегини ред эте. Шунынъ ичюн де сарайдан къувула.

Юсуф къыркъ йыл зинданда отура. Онынъ анда булунгъаныны эр кес унута. Аллахнынъ къудретинен тюш табирлемеге бильген Юсуф зиндандан чыкъта. О, Рейан султаннынъ тюшюни табирлеп, халкъны ачлыкътан, олюмден къуртара. Рейан султан оны везир япа ве еди йылдан сонъ, султанлыкъ тахтына да отурта. Бойле этип, Якъуп Пейгъамбернинъ тюш табирлегени акъикъяткъа дёне:

Танъры султанлыкъ верди,
Рейан бир себеп олды,
Пес Юсуф султан олды,
Мысыр ичинде беллю.

Султан олгъян Юсуф, къартайып, фукъарелешип, сокъурланып къалгъан, Зулейхагъа эвлене. О, Зулейханынъ одасына кирежекте, Аллаху Тааля Зулейханы генч ве дюльбер къызгъа чевире.

Мысыргъа богъдай алмагъа кельген агъаларыны Юсуф джезаламай, аксине оларны айлелери ве бабасы иле Мысыргъа келип яшамаларыны төвсие эте. Якъуп Пейгъамбер юз йигирми яшында кечине. Мысырда, огълунынъ янында къыркъ йыл яшай, къалгъан сенелерини озь юртунда кечире.

Зулейха он эки огъуль догъура. Якъуп Пейгъамбернинъ олюминден алтмыш йыл кечкен сонъ, Юсуф кечине. Онынъ къыркъына бармайып, Зулейха да фани дюньядан козь юма. Юсуф Пейгъамбер бабасы Якъуп Пейгъамбернинъ янында, тувгъан юрту Кенъанда дефин олунна.

Бойле этип, буюк бир мундериджеге менсюп Махмуд Къырмалынынъ «Хикяет-и Юсуф ве Зулейха» дестанында пахыллыкъ, ошек, къаарардан зияде севги киби дүйгүү ве табиат чизгилери инсанынъ аятында маджералы ақъибетлер пейдә эткени тасвир олуна. Къаарардан зияде севги, къаарардан зияде неферт киби табиат чизгилери инсан анъына тесир этип, келишмеген арекетлөргө уйтеклегени косьтериле.

Дестан о девирде яшагъан халкъынынъ омюриндеки денъишишувлерни тасвирлей. Къырым ярымадасында яшагъан халкъынынъ та о девирде эдебий тили, эдебияты, медениети олгъаныны бильдире. Халкъ Ислям динини къабул этип, миллет оларакъ шекилленгенини исбаттай.

Суаллер ве вазифелер:

1. «Хикяети-и Юсуф ве Зулейха» дестанынынъ сюжети бизге насыл адисе-вакъиаларны тарифлекенини анълатынъыз.
2. Дестанынъ мундериджесинен таныш олгъанда, Якъуп Пейгъамбер ве онынъ оғузулларынынъ япкъан арекетлерине дикъктъат этинъиз. Сиз бунта насыл бакъасынъыз? Фикирлеринъизни анълатып, оларны миссалернен тасдыкъланыңыз.
3. Юсуфнынъ башына кельген маджераларны икяе этинъиз. Адд къу-косындан Юсуфны ким чыкъара?
4. Юсуфны къазнасында олгъан алтынларгъа ким сатын ала? Онъа бу ишни япмагъа ким меджбур эткенини ве бу иште насыл бир сыр сакълы олгъаныны икяе этинъиз.
5. Рейан (Къатыфырнынъ къардашы) янъы султан олгъан сонъ, дюльбер Зулейханынъ башына нелер келип-кече?
6. Юсуфнынъ корыген тюшюни метиндеки дёртлюклерден окъуп, анълагъанынъыз киби икяе этинъиз.
7. Юсуфнынъ ирадесини косьтермек ичюн, онынъ башына кельген мусибетлерни дефтеринъизге язынъыз. Джебраильдинъ онъа айткъан сёзлерини метинден тапып, Юсуфнынъ сабырлы олгъаныны исбатланыңыз.
8. Къыркъ йыл зинданда яткъан Юсуф насыл бир фурсаттан файдаланып, андан азат олуна? Дестандан бунта аит сатырларны тапып окъунъыз, изаатланыңыз.
9. Рейан Султаннынъ тюшюни Юсуф насыл табирлей? Метинни окъуп, анълагъанынъыз киби тарифленъиз.
10. Озь севгисине садыкъ къалгъан Зулейханынъ омюринде насыл денъишимелер ола? Бу денъишишувлернинъ темелинде насыл бир сыр бар?
11. Дестандаки къараманларнынъ арекетлери, табиат чизгилери узеринде субет кечиринъиз. Такъдир, баш язысы меселеси эсерде насыл анълатыла?

ХИКЯЕТ-И ЮСУФ ВЕ ЗУЛЕЙХА^[8]

(Дестандан парчалар)

Бисмилляхи-ир-рахман-ир-рахим

1

Бир сёзе башлаялум
Эввелин Аллах — дею.
Эм инает¹ ол иде
Фадли бисмиллях — дею.

2

Вир салават, эй, азиз,
Башлаялум сёзе биз.
Хош хикяет горесиз,
Къыссайы аджеpleю.

3

Бу бир гузель къыссадыр,
Сизе чокъ ал анълатыр.
Юсуф алын бильдирир,
Нитти Якъуб агълаю.

4

Якъуб Пейгъамбер иди,
Хакъкъа явер² эр иди.
Динъле, ахыр не олды,
Къыссасыны анълаю.

5

Вар иди ол Якъубынъ
Алты элял авраты.

Ол хатунлар къамусы³
Корюклю, эйи хулу⁴.

6

Дегме бир авратындан⁵
Олды икишер огъул.
Огъул он бир олыджакъ
Къаюрды⁶ Якъуб къаю.

7

Якъуб Хакъкъа юзь урды⁷ :
— Бер генч огъланчыкъ —
деди. —

Къаму огълум буюди,
Охшалуму ёкъ — дею.

8

Дуасы олды къабул,
Хакъ Чалаб⁸ вирди огъул.
Якъуб онъа ад вирди,
Гузельдже «Юсуф» — дею.

9

Ол Юсуф анасындан
Бир огъул догъмуш иди.
Ибн Яминди ады
Уз, гузель Юсуфлаю.

¹ инает — эйилик, яхшылыкъ

² явер — ярдымдже, ресуль

³ къамусы — джумлеси, эписи, бутюни

⁴ эйи хулу — яхшы табиатлы, эйи чизгилер саиби

⁵ дегме бир авратындан — эр бир къадынындан

⁶ къаюрды — къайгъырды, къасеветленди, кедерленди, раатсызланды

⁷ Хакъкъа юзь урды — Аллахкъа ялварды, мураджаат этти

⁸ Чалаб — Аллах, Танъры, Мевля

10

Чюн Юсуф дюнъяя кельди,
 Эм анасы ол дем ольди.
 Якъуб къараваш¹ алды,
 «Юсуфы эмзир» — дею.

11

Ол къаравашынъ, эй, яр,
 Бир эмердже² огълу вар.
 Къараваш дайм уюр,
 Огълуны «эмсин» — дею.

12

Мемесининъ бирисин
 Юсуф ичюн сакълады.
 Бир мемесин гизледи
 Кенди огълун эмзирю.

13

Чюн буны Якъуб корьди,
 Конълю ийу (эйи) олмады.
 Джариее сёйледи:
 «Огълунъ сатарым!» — дею.

14

Чюн джарие³ ишиitti,
 Коксюн уруб ах итти.
 Якъуба чокъ сёйледи:
 «Огълумы сатма!» — дею.

15

«Икисине сиот вирем,
 Къарынларын доорам,
 Бен бунлары къайырам,
 Бени агълатма!» — дею.

16

Якъуб ич эслемеди,
 Сёзюни динълемеди.
 Сатты онынъ огълуны,
 Къалды гъариб агълаю.

17

Ол огъланынъ баасы —
 Къыркъ алтун сермаеси,
 Якъуб ол Тенъри хасы
 Алтуна таъмелею.

18

Якъуб алтуны алды,
 Базардан эве кельди,
 Джариее сёйледи:
 — Огълунъны саттым, — дею.

19

Джарие къаршы варды,
 Башын ачыб агълады,
 Ах идюбен⁴ инъледи,
 Огълуны чюн къайыру.

20

Деди: — Огълумы саттынъ,
 Бени къатты агълаттынъ,
 Дилерим, хич сен де агъла,
 Къыркъ йыл ейленмею.

21

Ахыры козьсюз къалгъыл,
 Юсуфынъдан айрылгъыл,
 Дюрлю асретлер коръгиль.
 Дилерим айанмаю⁵.

¹ къараваш — къул хызметкяр къадын

² эмердже — эмисикили

³ джарие — хызметкяр, къул къадын

⁴ ах идюбен — ах этип, ах чекип

⁵ айанмаю — аджымайып

22

Сен Пейгъамбер оласынъ,
Аллахы бир билесинъ.
Банъя зулум къыласынъ,
Ол Хакътан утанмаю. —

23

—Джарие бойле диди.
Якъуб бираз агълады,
Буны дебюбен¹ урды,
— Вар, Юсуфы эмзирию! —

24

Джарие дурды, варды,
Ол Юсуфы эмзириди,
Агълаяракъ отурды,
— Бу иш Аллахтан — дею.

25

Ол къаравашды, ишит,
Корь, не димиш эр-йигит.
Ич сен де эттиким ит
Дюньяда анджилаю².

26

Учъ кунъ эвде отурды,
Дюрлю фикир гетюрди,
Бу захмети готюрди,
Аллахкъя шукъ эйледи.

27

Бир сабах ори дурды,
Юзюн топрагъя урды,
Пармагъыны къалдырыды³,
Хакъ Чалаба ялварды.

28

Чюнки муслиман олды,
Хакъкъынъ бирлигин бильди.
Дюрлю мунаджат къылды⁴,
Огълу ичюн агълаю.

29

Деди: — Ол Якъуб бени
Чокъ агълатты ол гъаний,
Сен дахи агълат аны,
Динъмесин бенчилею.⁵

30

Бир беля виргиль анъя,
Ол зулум къылды банъя.
Хакъ Танъры! — дерим санъя,—
Хаджетим къабул къылу.

31

Юсуфыны айыргъыл,
Анынъ къатындан алгъыл.
Фуркъатына яндыргъыл,
Агъласын: «Огъул!» — дею.

32

Анынъ козълерин алгъыл,
Беним алым сен бильгиль.
Аны бир асret къылгъыл,
— Я улу Танъры! — дею.

33

Бек чокъ мунаджат итти,
Варды, къабула етти.
Джарие эве китти,
Ол оғъланы къайыру.

¹ дебюбен — тепип, тепмелеп

² анджилаю — ойледже

³ пармагъыны къалдырыды — къолларыны тёпеге (кокке) котерди

⁴ мунаджат къылды — ялварды

⁵ динъмесин бенчилею — мен киби токътамай агъласын

60

— Бабама дидим буны,
Султан олур, дир бени.
Чюн ишииттим бена аны,
Кельди санъя севиню. —

61

Аласына сейледи,
Дюшюн такърир эйледи.
— Кимсее диме! — деди,
Басирет исмарлаю.¹

62

Ол хатун бир кунь мегер,
Сыгъмаз ичине хабер.
Ол дюши такърир идер,
Манисине севиню.

63

Юсуфынъ къардашлары
Ишиттилер хабери.
Эп къараарды ичлери,
Юсуфы кунюлею.

(Агъалары Юсуфын султан оладжакъ деп, куньлеп, оны ёкъ этмек пешине тюшелер. Бир кунь олар бабаларыны алдатып, Юсуфын чёльге алып кетеңдер. Анда оны уралар ве къуюгъя ташлайлар. Кольмегини исе къангъя булгъалап, Юсуфын къашкъыр ашады деп, шу къанлы кольмекни бабаларына косытерелер. Якъуб Пейгъамбер Юсуфын къараардан зияде севгени ичюн яна-кюе, гедже-куньдюз агълай, козълери кёр ола. Нетиджеде, Юсуфынъ такъдири бам-башкъя ола. Аллах онынъ джаныны къуртара — А.К.)

Суаллер ве вазифелер:

1. Махмуд Къырымлынынъ «Хикяет-и Юсуф ве Зулейха» дестанынынъ башланув хусусиетине дикъкъят айрынътыз. Сиз эвельде оренген даа насыл эсерлер бойле башланғаныны хатырлантыз. Нетидже чыкъарынътыз.
2. Къыссада Якъуб Пейгъамбернинъ аяты ве аиласи акъкъында насыл малюматлар бильдирильгенини айттынътыз. Метиндең дәртлюклернен джевабынътызын исбат этинъиз.
3. Юсуфынъ догъулувы ве ондан сонъра насыл адисе-вакъиалар олып кечкенини тарифленътыз. Эсердеки сатырларнен тасдыкълантыз.
4. Якъуб Пейгъамбер не ичюн джариенинъ оғълуны сатты? Бу вакъиадан сонъ нелер олып кечти? Метинден джариенинъ Якъуб Пейгъамберге айткъан сөзлерини тапынътыз ве окъунтыз. 24-юндже дәртлюкте джарие насыл бир нетидже чыкъаргъаныны метинден окъуп анълатынъиз.

¹ басирет исмарлаю — оладжакъ шейни эвельден корымеге билүв къабилиетини багъышлап, (сымарлап)

191		204	
Мегер Мысыр шеҳринде Бир малик ¹ вардыр анда. Мисли ёкъдур дюзенде Базиргяндыр девлетлю.		Ахыр аны сатасынъ, Мал ичине батасынъ. Падишалыкъ этесинъ, Та олондже шад олу.	
192		205	
Малын исабын бильмез, Дилинден ялан кельмез. Хергиз ² хата иш къымаз, Гъаетте эйу хулу.		Таъбирде бойле коръдюм, Дюшюнъи, иште, ёрдум. Догърусын айди вердим, Дур вар имди севиню.	
193		206	
Бир кунь эвине варды, Гидже ятуб ууды. Бир хош эйю дюш коръди, Саба дурды севиню.		Малик орадан дурды, Теъджилъ эвине варды. Къатыр, деве котюрди, Ёл тутты къатарлаю.	
194		215	
Кельди базар ичине, Табирджилер янына. Отурды дюкянына, Дюшюни дер анъладу.		Маликинъ ики къулы Вар иди юзи сувы. Бирининъ — Кямиль иди, Бирине — Бешир дею.	
202		216	
Айдур: Ол йире вардынъ, Кунь индигин эм коръдинъ, Дюрр-и мерджен ³ ки тердинъ, Сандыкъларны толдыру.		Кямиль Беширле дурды, Къую устюне варды. Къавий оргъан ⁵ кетирди. Бир эшеге беркидю.	
203		217	
Ол язуя варасынъ, Бир къул оғълан буласынъ. Аны сатун аласынъ, Хублугъына имреню. ⁴		Ол къуюдагъы къушлар, Ол имиш фериштелер. Юсуфа эш олмушлар, Юр алурлар чигриню.	

¹ малик — туджджар, базиргян

² хергиз — ич бир вакъыт, ич де

³ дюрр-и мерджен — инджи ве мерджен

⁴ хублугъына имреню — дюльберлигине сукъланып, шашып, авесленип

⁵ оргъан — аркъан

218

Бешир оргъан индириди
 Къамиль къогъа¹ долдурды.
 Джебраиль ирюб кельди:
 — Я Юсуф, дургъыл? — дею.

219

Танърыдан буйрукъ кельди:
 — Оргъана япыш! — деди.
 Эгленмее тез дурды:
 — Къуюдан чыкъ къуртулу!

220

— Юсуф алын бильдинъму?
 Козюнъ иле бакътынъму?
 Озюнъ къыялс иттинъми?
 Айтгъыл, сен банъа дөгъру.

221

Юсуф айтты: — Бен бакътым,
 Гонълюмден бен айттым.
 Эгер бен къул олайдым,
 Баамы ким етирию²?

222

Джебраиль айдур: — Имди дур,
 Элинъи аркъана ур.
 Къуюдан чыкъ, баҳанъ горь.
 Нее дегерсинъ — дею.

223

Бешир аркъаны чекти,
 Къамиль бакъубан корьди.
 — Бир гузель огълан чыкъты! —
 Бешире³ — дер севиню.

224

— Я Бешир! Хаза гъулям⁴
 Санасынъ бедр-и тамам.
 Сурети джеддюль энам⁵
 Бир фериште сыйфатлу.

245

Малик айттыр: — Айытынъ,
 Айиблеринъ хеп деюнъ,
 Хем алтунымы алуңъ,
 Сейлешелю сатышу.

246

Бунлар айттыр: — Яланджы,
 Хем огърыдыр икинджи,
 Учюнджиси — къачыджы,
 Ишитгиль бизден беллю.

247

Малик айттыр: — Ишиттим,
 Айыбларыны бильдюм,
 Къамусын къабул къылдым,
 Кесинъ баҳасынъ беллю.

(Малик Адд къуюсындан Юсуфны чыкъарып кетеяткъанда, Юсуфнынъ агъалары келип, бу огълан оларнынъ къачакъ къулу олгъаны ичюн, оны къайтарып бермесини талап этелер... Докъуз алтынгъа каталар — А.К.)

¹ къогъа — къопкъа

² етирию — битирип

³ бешире — къуванч, козъайдын

⁴ хаза гъулям — бу огъландыр (арапча)

⁵ джеддюль энам — улу инсан

248

Янумда алтунум ёкъ,
 Кюллеб¹ иле къумаш² чокъ,
 Пул ярмакъ³ вар, къыймет ёкъ,
 Бенден ишитинъ догъру.

263

Къафиле гочьти, юрюди,
 Гидже къаранъ олды,
 Бир мензиле огърады,
 Дюшдю Юсуф агълаю.

264

Юсуф анасы ольмюш,
 Мегер къабри андаймыш,
 Юсуф деведен инмиш,
 Анасына агълаю.

265

Айтыр: — Аначыгъым,
 бильгиль,
 Гъарип олдум, бени корыгиль.
 Огълуны эсиргегиль,
 Къул олдум ош сатылу.

266

Атамдан айырдылар,
 Ильтуб къуюя салдылар.
 Сонъ къул деюб саттылар,
 Къардашлыкъ хакъкъы, — дею.

267

Аначыгъым, тогъмышдым,
 Нола сеннен ольсейдим,
 Бу джефайы корымейдим,
 Ики эльчигим багълы.

268

Я, Ана, сен ольмиединъ,
 Я бу сине⁴ кельмиединъ,
 Беним халым бильмиединъ,
 Огълуну эсиргею.

269

Сининден бир унъ кельди:
 — Джаным, Юсуф, санъа
 нолду? —
 Юсуф ишитти, огънады,
 Анасы унюн динълею.

270

Юсуф бунда, бу ёнде,
 Анасын мескенинде.
 Агъарды, олды ирте,
 Малик: — Къаны Юсуф? — дею.

271

Юсуфы истедилер,
 Деведе булмадылар.
 Корыдилер: — Къачмуш! —
 дедилер.
 Яйылдылар истею.

272

Бир къара къулу варды,
 Варып ол Юсуфы булды,
 Юзюне бир къач урды,
 Кетюрди сюрюклөю.

273

Аллахына ялварды,
 Бу кез Юсуф агълады.
 — Хакъкъымы алгъыл! — диди.
 Сучюм ёгъун бильдирию.

¹ кюллеб — уджу къыйыштырылгъан демир, ченгель

² къумаш — кетен, юн ве йипектен токъулгъан басма

³ пул ярмакъ — капик, пары

⁴ сине — мезар, къабир

274

Эль кетирип, агълады ол бигунях,
Аза наз идуб диди: — Эй, падишах!
Бени сучсуз ере дёгди бу къул, ах,
Нелер итти бана ишбу ру-сиях¹.

275

Къысмет олмуштыр банъа бу дерт ах,
Хакъмы шимди, кяр-и керде², я илях.
Сен билирсинъ халымы, сенсингъ илях.
Санъа малюмдир ишпим — сенсингъ гувах³.

276

Гер хара къылдым исе асий олуб,
Я анам хакъкъын тутма би гунах,
Пес, гунахым ёкъ исе, бильдир, къон...
Бир алямет эйлекиль бунлара сен, падишах.

277

Бен багъры башлыя медед⁴, сенден медед,
Ирмединсе, къылырам олюнды феръяд иле ах.

.....
.....

278

Къул Юсуфы кетирди,
Малике исмарлады.
Малик девее ирди,
Белин зындыхыр багълаю.

280

Джихан къаранъу олды,
Къар, ягъмур долу ягъды,
Сахра къаму сель олды,
Къафиле къоркъты къаму.

279

Хош тамам эрте олду,
Къызарубан кунь догъды.
Бир къара булут къопты,
Йылдырымлар шакъую.

281

Къаракъулны ол Малик⁵
Чагъырып дер: — Хюнелик⁵,
Бизе дегиль виренлик,
Бери келинъ языкълу! —

¹ ру-сиях — сия бетли, къара бетли

² кяр-и керде — япылгъан иш

³ гувах — шаат, олгъян ишни озъ козюнен коръген инсан

⁴ медед — имдат, ярдым

⁵ хюнелик — бойледже

282
Пес, ол къара къул кельди:
— Язукълу беним, — деди.
— Ол огъланы урдумды,
Юзю узре сюрею.

283
Къачтым дею огъланы,
Булунджа къызбин аны¹,
Гёке тутты юзюни,
Имран дилин² сёйлею:

284
— Билорим — андан олды,
Бу беля бизе гельди.

Танърысына ялварды
Бу огъланчыкъ агълаю.

285
Малик айтыр: — Тез варгъыл,
Анынъ хатырын соргъыл,
Элин, аягъын опьгиль,
Ол сучуны дилею.

286
Олаким, эсирге
Танърысына ялвара:
— Бизи халас эйлее,
Ёкъса, къалдыкъ къырылу.

Суаллер ве вазифелер:

1. Дестанда Мысыр шеэрининъ базиргяны акъкъында насыл малюматтар эльде эттингиз. Онынъ зенгин олгъаны ве ич де ялан айтмагъаны ве даа дигер бир мусбет табиат чизгилери акъкъында къачынджы дёртлюклерде бильдириле?

2. Маликнинъ корыген тюшюни табирджилер насыл анълаттылар? Эсердеки сатырларнен тасдыкъланызыз.

3. Малик кимлер иле берабер ёлгъа чыкъты? Къую янында къушлар кимлер олгъаныны эсерден окъуп анълатынъыз. Джебраиль алейхи селлям Юсуфъа не сёйледи? Оларнынъ арасында олып кечкен субетни таифленъыз, метиндеки сатырларнен исбат этинъыз.

4. Юсуфнынъ агъалары ве Маликнинъ арасында олып кечкен алыш-вериштен сонъ, Юсуфнынъ агъаларына айткъян сёзлерини дестандан тапынъыз, окъунъыз ве анълатынъыз. Бу сёзлерден Юсуфнынъ насыл табиат чизгисини сече бильдинъыз?

5. Анасынынъ къабири янында отурып, Юсуф насыл бир гонъюль истирапларыны тёктю? Аллахтан нелер тиледи? Тилеклерининъ эписини бирер-бирер метинден тапып окъунъыз.

6. Къуль Юсуфны Маликке кетирип берген арада насыл аляметлер олып кечти? Бу табиат аляметлери къачынджы дёртлюклерде айдынлатылгъаныны дестандан тапып айтынъыз ве окъунъыз.

¹ къызбин аны — онынъ яланыны

² имран дилин — ехудилер тили

358

Султандан хабер варды:
— Малик Мысыра гирди,
Хуби дильбери горьди,
Сокъакълары долдыру.

360

Юсуф чаршыя варды,
Хубларын усси¹ гитти,
Султан теферрудж² итти:
— Бу адам дегиль! — дею.

371

Тамам алты гюн гечти,
Алтун хисабдан ашты,
Малик гонълюне дюшти:
— Юсуфы сатам, — дею.

390

Бек динъле ишбу сёзю,
Зелиха Таймуз къызы,
Гунеше бенъзер юзю,
Учмакъ къызы сыфатлу.

391

Ол Таймуз Магъриб беки,
Ёгъыйды анынъ гиби,
Къабул олды дилеги,
Мурадына дегирю.

392

Ол Зелиха эрген³ къыз
Хабер билюнъ бу кез сиз,
Бир гунь уюркен о къыз,
Бир дюш горьмюш ибretлю.

393

Бир гузель огълан горюр,
Хем: — Адынъ недюр? — сорар,
Дюшунде алур хабер:
— Адым, Юсуфдур, — дею.

407

Учъ йылда йине горьди,
Зелиха йине сорды:
— Айыт, къандасынъ? — деди, —
Къылдынъ сен бени делю.

408

Юсуф дер: — Бени бильгиль,
Варуб Мысырда горьгиль,
Бени сен анда булгъыл,
Мысыра султан олу.

411

Атасы айдур: — Неймиш,
Севдигин къанда имиш?
Зелиха джевап вермиш:
— Мысырда султан олу.

412

Зелиха ах эйледи,
Бу къайгъусын гидерди,
Атасы бу кез диди:
— Севдюгюнъ булам, — дею.

426

Бир гунь Мысыр шехринден
Эльчилер гитти андан,
Мысырын султанындан,
Зелихайы истею.

¹ усси — эси

² теферрудж — кезинти, сефер

³ эрген — яшы еткен, къувамына кельген, къувамына кирген

- 427
Зелиха хош донанды,
Атасы разы олды,
Бинъ къатар мал юкледи,
Зелихая харджаю¹.
- 428
Бинъ къул — къараваш верди,
Къызын биле гонъдерди,
Эльчисин агъырлады:²
— Султан — гювейим³, — дею.
- 431
Алтун курсие бинди, Зелиха
Дуруб янына бакъды,
Гедже дёшек дёшениди:
«Севдигим гелюр», — дею.
- 432
Къатыфыр гелип гирди,
Зелиха аны горьди:
— Ишбу эр кимдир?! — деди, —
Беним устюме гирю?!
- 433
Чагъыртынъ, гирю чыкъсын,
Эдепсизлик этмесин,
Намахрем устюне гельмесин! —
Буюрды: — Урунъ! — дею.
- 434
Андан джарие сёйледи:
— Ол султан будур! — деди, —
Дюшюнъде севдинъ, — деди, —
Бисим дургъул³ утану.
- 441
Дедилер къаравашлар,
Зелихайы огютлерлер:
- Эйи сёз сёйле, — дедилер, —
— Сабыр къыл, къатлан, — дею.
- 445
Бир ниче вакътлар гечти,
Ахир ваде иришти,
Чюн Юсуф Мысра дюшти,
Гельди деллял чагъырув.
- 448
Зелиха айдур: — Бильдим,
Бен учь кез дюшюмде горьдим,
Севдигиме эш бугунь булдым,
Деюп дуур чагъыру.
- 449
— Варынъ, Малике деюнъ,
Джумле малыны вирюнъ,
Севдигим алыверинъ,
Айрыкълар гитсин гирю.
- 453
Ашыкъларда ар олмаз,
Горюндже къарап къалмаз,
Къучмайынджа къуртулмаз,
Севдигине огюшю.
- 465
Сёз чокъ — Къатыфыр гельди,
Юсуфы анда горьди,
Аджепленюп танълады,
Юсуфа хайран олу.
- 466
Султан айдур Малике:
— Баха кесгил къулунъя,
Айыт, нидже алтуна,
Вересинъ аны беллю?

¹ харджаю — нишангъа берильген баҳшышлар

² гювейим — қуевим

³ бисим дургъул — күлюмсиреп тур

467

Бу кез фериште гельди,
Малик агъзына гирди,
Ол фериште сёйледи,
Султана хабер вирю.

468

Айдур: — Я Султан бильгиль,
Бу к'ульу сатын алгъыл,
Къаму долу малындан,
Агъырынджа вир, — дею.

519

Ол путуна ялварды,
Юсуф аны танълады,
Зелихая сёйледи:
— Бу дуран недир? — дею.

520

Зелиха айдур: Танърымдыр,
Сени банъя ол вирю,
Не дерсем, ол ишидир,
Хаджетим къабул къылу.

521

Юсуф айдур: — Бу олмаз,
Бу хаджет къабул къылмаз,
Санарсынъ, Танъры бильмез? —
Деп Зелихая сёйлею.

522

Юсуф ишарет къылды,
Ол бут еринден ийкъылды,
Он паре олып уфанды:
— Юсуф Пейгъамбер, — дею.

523

Зелиха Юсуфы сорды:
— Бу санем неден сынды,
Хем санъя ничюн сёйледи,
Депренди селям вирю? —

524

Ол Юсуф джевап берди:
— Беним Танърым вар, — диди, —
Сенинъ Хачынъа хышым этти,
О да дюштю уфану.

529

Юсуф илери гельди,
Дудагъыны тепретти,
Ол санем бутюн олды,
Тамам эвельгилею.

530

Зелиха аны горьди,
Юсуфы дахи севди,
Ол къадар ашыкъ олды,
Аштан-сувдан кесилю.

539

Къатыфыр бир гунь гельди,
Зелиха къатына гирди,
Халыны зайыф корьди,
Мегер бенъзи сарару.

540

Айдур: — Халинъ не олды,
Бенъзинъ неден сарарды?
Зелиха: — Бильмем? — диди, —
Бу халым недир, — дею.

546

Табиблер аджиз къалды,
Хич илядж идемеди,
Зелиха: — Юсуф, — сёйледи, —
Дердиме дерман дею.

547

Экимлер къалкъты гитти,
Зелиха яту къалды.
Къатыфыр дахи бильди:
— Бу ашыкъ олмыш, — дею.

(Зелиха даясынынъ айткъян сёзюне базанып, Къатыфыр Султангъа сарай къурдырта. Диварларында озюинъ ве Юсуфнынъ къучакълашып отургълан ресимлерини сыйздырта. Сарайгъа кельген Юсуф диварда язылгъан огютни коре — А.К.)

611

Юсуф бу хали горьди,
Халикътен медед эрди,
Бакъты бир ает горьди,
Къаршысунда язылу.

612

— «Феленфур би-зинне»¹ язылмыш,
Юсуфы огютлемиши:
— Ол Танърыдан къоркъ! — демиши,
Юсуфа огют вирю.

613

— Юсуф атанъ — пейгъамбер,
Деденъ — Ибрахим сервер,
Бу иши къальбден чыкъвар,
Ол санъя ярамаю.

620

Юсуф къапуя гельди,
Эп къапылар ачылды,
Эле Юсуф къуртулды,
Арт этеги йыртылув.

(Рейангъа (Къатыфырнынъ къардашына) ачувлангъан Зелиха Юсуфыны зиндангъа ташлай. Буны бильген султан Къатыфыр Зелиханы тенбилий, Юсуф къабаатлы олмагъаныны айта. Зиндангъа барып, эллерини чезип, аш бере, урба кийдире — А.К.)

687

Деди: — Сен бунда дургъыл,
Бир ики гунь сабыр къыл,
Зелиха истер: — Эве гель,
Сени чыкъарам, — дею.

688

Къатыфыр эве гельди,
Пес эджель назир олды —
Хеман ол гедже ольди,
Мысыр султансыз къалу.

690

Султан къардашы — Рейан,
Ол олды Мисира султан,
Азад олды эхли зиндан,
Юсуф ялынъыз къалу.

691

Джебраиль гоктен инди,
Хакътан селям гетюрди,
Юсуфы огютледи:
— Сабыр къыл, къатлан, — дею

693

Юсуф зинданда къалды,
Чокъ йыллар унутылды...
.....
.....

697

Зелихайы Рейан къоды,
Хем сарайындан сюрди...
.....
.....

¹ феленфур би-зинне — намусынъа сыгъмагъан ишни япмакътан нефret эт

- 691
Джебраиль гоктен инди,
Хакътан селям гетюрди,
Юсуфы огютледи:
— Сабыр къыл, къатлан, — дею
- 693
Юсуф зинданда къалды,
Чокъ йыллар унутылды...
.....
.....
- 697
Зелихайы Рейан къоды,
Хем сарайындан сюрди...
.....
.....
- 698
Пес отуз йыл агълады, (Зелиха)
Ахыры гозьсюз олды,
Мал гитти — дервиш къалды,
Юрор шехирде диленю.
- 775
Бир гунь Юсуф ол дурды,
Халыкъына ялварды,
Ол къадар ким агълады:
— Бени къурттару — дею.
- 776
Джебраиль гоктен энди,
Хакътан селям гетюрди,
Султанлыкъ муштулады¹:
— Имди къуртулдынъ — дею.
- 778
Ол гидже ишит нолду,
Мегер султан дюш горьди,

- Табирджи — деюп сорды, —
Бу дюшюм недир? — дею.
- 779
Еди сыгъыры горьдим,
Узерине бинердим,
Бундан анъа гечердим,
Къамусы семиз, кучълю.
- 780
— Йине бир дюши горьдим — дер,
Еди гъайры сыгъыр — дер,
Семизлери еди — дер,
Къамусыны дёндирю.
- 781
Еди башакъ яш богъдай,
Еди башакъ къуру богъдай,
Къурусы яша дёнди,
Эм ол яшы къуруйы.
- 782
Эп бир арая гельди,
Он дёрт баш богъдай олды,
Икиси гоке учты,
Гитти эм корюнмею.
- 797
.....
.....
Юсуф ол дюши ёрды,
Бирер-бирер анъладу.
- 798
Семиз сыгъыр дедиги,
Арыкъ аны едюги,
Богъдай гоке агъдугъы,
Доланып горюнмею —

¹ муштулады — хайырлады

² тахыллар — ашлыкъ, арпа, богъдай(лар)

799

Еди йыл боллукъ ола,
Эйю ягъумурлар ягъя,
Дюрлю тахыллар² бите,
Иллер уджузлукъ олу.

800

Андан сонъра, биль, нола:
Еди йыл къытлыкъ ола,
Гоктен ягъумур ягъмая,
Экильмишлер къурийу.

801

Андан сонъра ноласы:
Ягъумур укюш оласы,
Дюрлю тахиль оласы,
Джихан уджузлукъ олу.

827

Джебраиль анда гельмиш,
Ол Юсуфа сёйлемиш:
— Султан олурсынъ — демиш, —
Мысыр тахтына, — дею.

831

Танъры султанлыкъ верди,
Рейан бир себеп олды,
Пес Юсуф султан олды,
Мысыр ичинде беллю...

Суаллер ве вазифелер:

1. Зелиханынъ корыген тюшюни тарифленъиз. Магъриб султаны Юсуфтыр деп, онъа къоджагъя чыкъкъан Зелиханынъ башына нелер келип кечे?

2. Мысыргъя кетирильген Юсуфны насыл ёлларнен Къатыфыргъя сатын алдырта?

3. Фериште Маликнинъ агъзына кирип, Султангъя нелер айткъаныны дестандан тапып окъунъыз. Озь сёзүнъизнен анълатынъыз.

4. Юсуф Маликке озюнинъ асыл заты кимден олгъаныны айта. Бу сёзлерни дестандан тапып окъунъыз. Маликнинъ де сонъки сёзюне эмиет беринъиз. Олар насыл сагълыкълашалар?

5. Къатыфы Юсуфны сатын алгъан сонъ, хазинесинде даа чокъ алтын ве мал-мульк пейда олгъаныны Юсуфкъа бильдире. Юсуф бу алны онъа насыл анълаткъаны дестанынъ къачынды дёртлюгинде олгъаныны тапынъыз. Юсуфнынъ бу сёзлерини ифадели окъунъыз.

6. Юсуфнен Зелиханынъ арасында насыл бир фаркъ бар эди? Юсуф омюринде расткельген маниаларны Аллахына ялварып, аль эткенини билесиңъиз. Я Зелиха кимге ялвара? Бу акъта оларнынъ арасында насыл лакъырды, ве адисе-вакъиалар олып кечкенини дестандан тапып окъунъыз.

7. Юсуф насыл этип Мысыр султаны ола? Джевабынъызыны Къатыфырынъ корыген тюшюни насыл табирлегени узеринде тизинъиз.



ЭДЕБИЯТ НАЗАРИЕСИ

ШИИРИЙ ОЛЬЧЮЛЕР. ПАРМАКЪ ВЕЗНИ

Бутюн шиирий эсерлер пармакъ ве аруз везинлери эсасында язылтыр. Ачыкъ ве япыкъ, къыскъа ве девамлы эджалар белли бир тертипке тизилип, аруз везнини пейда эткенини билемиз.

Махмуд Къырымлының «Хикяет-и Юсуф ве Зулейха» дестаны насыл везин иле язылгъаныны талиль этейик. Бунынъ ичюн мисаль этип алгъан дёртлюкни эджаларгъа болейик. Меселя:

- | | | | | | | |
|-----------|-------|------|----------|-------|-------|-----|
| 1 | 2 | 3 | 4 | 5 | 6 | 7 |
| 1. Къар - | даш - | ла - | рынъ у - | лу - | лар | (7) |
| 2. Дюш | ма - | на - | сын | би - | люр - | лер |
| 3. Са - | нъа | а - | сед | къы - | лур - | лар |
| 4. Душ - | ман - | лы - | гъа | къу - | ва - | ну |

Бу дёртлюкнинъ эр бир сатыры еди эджадан ибарттир, яни эр бир сатырдаки эджалар бири-бирине тенъдир. Бойле везинге шириетте пармакъ везни деп айталарап. Пармакъ везни эджаларның сайысы эсасында тизиле. Шиирдеки эджаларның сайысы бири-бирине тенъ ола.

Бойледже, сатырдаки эджаларның сайысына риает этилип (бакъылып) язылгъан шиирий эсернинъ везнине пармакъ везни дерлер.

Суаллер ве вазифелер:

- Пармакъ везни не эсасында тизиле? Онынъ эсас хусусиетлерини айтынъыз.
- Махмуд Къырымлының «Хикяет-и Юсуф ве Зулейха» дестаны къаач эджадан ибарттир?
- Шиирий эсернинъ насыл бир везнине пармакъ везни дерлер?

КЪЫРЫМТАТАР ЭДЕБИЯТЫНЫНЪ АЛТЫН ОРДУ ДЕВРИ

*(Могъол истилясындан (1223 с.) Къырым Ханлыгъы
деврине къадар (1428 с.))*

Къырымтатар эдебияты тарихында эдебияттымызынынъ инкишашаф эткен ве дургъунлыкъкъа огърагъан девирлери олгъан. Бу девирлерде эдебият хазинемизни зенгинлештирген бир чокъ эсерлер язылгъан. Бу эсерлер бугунь де-бугунь эм халкъымызынынъ, эм де башкъа тюркий миллетлеринъ эдебий вариети сайыла.

IX—X асырларда Ислам динининъ Къырымда кениш джайрамасы эдебият саасында бир чокъ денъишювлерге ёл ачты. Арап халкъ агъыз иджадынынъ «Юсуф ве Зулейха», «Лейля ве Меджнун» киби нумюнелери халкъ арасында айтыла-айтыла тильде дестан ола. Бу эсерлердинъ эр бири о девирдеки эдебияттынынъ инкишафына тесир эте. Нетиджеде, Махмуд Къырымлынынъ «Хикяет-и Юсуф ве Зулейха» дестаны языла. Бу эсер XIII асырда асыл къырымтатар тилинде язылгъан ильк эсердир.

Дюньягъа мешур «Кодекс Куманикус» латин-аджем-къуман лугъаты 1245—1295 сенелери Солхатта (Эски Къырымда) языла. Оны итальян түддәрлары ве ерли улемалар тизе. Бу эсер де Махмуд Къырымлынынъ «Хикяет-и Юсуф ве Зулейха» дестаны киби асыл къырымтатар тилинде язылгъан экинджи язылы абиде сайыла.

Тарихтан бильгенимизге коре, 1239 сенеси Къырым бутюнлей могъолларнынъ къолуна кече. Эки асыр девамында Къырым (1239 сенеден 1428 сенесине къадар) оларнынъ къолунда булуна. Бу мураккеп девирде язылгъан эсерлердинъ чокъусы элимизгэ келип етмеди. Амма бу девирдеки эдебияттымызыни зенгинлештирген эсерлердинъ сайысы аз олса да, олар халкъ вариети олып къалмакъта.

Бу девирлерде де эдебий аят омюорини эп девам эткен. Къырымнынъ медений меркези олгъан Солхат шеэринде эдебий аят гурьделенген ве къайнагъан. О девирдинъ буюк улемалары бири-бири иле мында къонушкъанлар, фикир алышып беришкенлер.

Девирлер кечкен сайын мемлекетте пейда олгъан зорбалыкълардан чокъусы алимлер, улемалар, шаирлер дигер мемлекетлерге кеткенлер. Оларнынъ базылары мамлюк султанларынынъ даветинен Мысыр ве Суриеге кеткенлер. Лякин гъурбетликтеки яшайышкъа даяналмагъанлар, кене де тувгъан юртуна къайтып, Къырымда иджат этмекни девам эткенлер.

Иште, XIV асырда яшагъан Абдульмеджит эфенди, Ахмедходжа эс-Сарайий, Тугълуходжа, Тана-Бугъя, Мевляна Исхакъ, Эбубекир

Мухаммед, Сейфи Сарайий киби муэллифлернинъ къыйметли эсерлери халкъ вариети сайылмакъта.

Бу эсерлерининъ къолумызгъа келип еткен тарихы гъает меракълыдыр. XIV асырда яшагъан шаир Сейфи Сарайий 1391 сенеси «Гулистан» серлевасында бир джыйынтыкъ нешир эте. Бу китапкъа о, озюнинъ такълит этип язгъан гъазеллерини ве улу аджем шаири Саадий Шеразийининъ мешур «Гулистан» эсерини де кирсете. Абдульмеджит ве Ахмедходжа эс-Сарайининъ гъазеллери де анда дердж олуна (басыла). Джыйынтыкъка кирсетильген эсерлер толу сакъланып къалмаса да, элимиздеки эсерлернинъ мундеридже-синден муэллифлернинъ дюньябакъышы тасавур этиле. О девирде яшагъан халкъымызынынъ яшайыш тарзы, ахлякъы акъкъында ма-люмат бериле. Бу эсерлерининъ тизилиш шекиллеринден о девирде насыл ширий жанрлар ишлетильгени корюне. XIV асырда иджат эткен муэллифлернинъ иджатларында насыл мевзу ве гъаeler тасвир олунгъаныны да бу джыйынтыкътаки эсерлерден билемиз.

Тувгъан юрткъа мукъаддес севги дуйгъусы киби мевзу оларнынъ иджатларыны бирлештире. Оларнынъ эсерлеринде бу дуйгъу инсанынъ рухий къыйметини, шахсietтинъ уриетини юксельте. Аят ве олюм, гонъюль ве анъ, акъыл ве рух арасындаки къарама-къаршылыкълар эр бир девир ичон муим ве эбедий меселе олгъаныны косытере. Бу эсерлер о девирлерде иджат эткен шаирлернинъ миллий руху, анты, къабилиети, истидат дереджесини корьмеге ярдым этелер.

XIV асырда яшап иджат эткен Абдульмеджит эфендининъ «Эй, гонъюль!» шириринден бизим кунюмизге алты сатыр, Ахмедходжа эфендининъ шириринден — он сатыр этип кельгендир.

Бойледже, къырымтатар эдебиятынынъ Алтын Орду девринде иджат олунгъан эсерлернинъ эписи эдебият тарихымызынынъ тюкенmez хазинеси сайылмакъта.

Суаллер ве вазифелер:

1. Къырымтатар эдебиятынынъ Алтын Орду деврине айт насыл эсерлерни билесинъиз? Бу девирде олып кечкен тарихий вазиетлерни беян этинъиз.
2. XIV асырда яшап иджат эткен муэллифлернинъ чокъусы Алтын Ордунынъ зорбалыгъы саесинде насыл мемлекетлерге кеткенлер? Бу девирде иджат эткен муэллифлернинъ сой адларыны айтЫнъиз.
3. Сейфи Сарайий насыл серleva алтында джыйынтыкъ дердж эте? Бу джыйынтыкъка кирсетильген эсерлерни окъуп, биз насыл бильгилер пейда этемиз?
4. Бу девирдеки муэллифлернинъ иджатларыны бирлештирген фельсифий тюшюндженлерни ачыкъландырынъыз. Бильдирильген фельсифий тюшюндженлернинъ къыйметли джеэтлери нeden ибараттири?

АБДУЛЬМЕДЖИТ ЭФЕНДИ (XIV асыр)

Мамлюклер девринде, хусусан Мысырда къырымлы Бейбарс султандыкъ эткен вакъытта, бир чоң улемалар ве шаирлер Къырымдан Мысыргъа кеткенлер. Соңъра о якълардан тувгъан юртуна къайтып кельгенлер, иджадий ве омюр ёлларыны тувгъан топракъларда девам эткенлер. Абдульмеджит эфенди шу девирде иджат эткен шаирлерден биридир.

1391 сенеси Сейфи Сарайий Саадининъ «Гулистан» эсерини дердј эте. Бу дивангъа Абдульмеджит эфендининъ тек бир «Эй, гонъюль» серлевалы гъазели кирсетиле.

Абдульмеджит эфендининъ даа бир дестаны бар. Бу дестанны о, Къырымда яшагъанда яза. Дестан XIII асырда яшагъан Махмуд Къырымлынынъ «Хикяет-и Юсуф ве Зулейха» дестаны киби Юсуф ве Зулейханынъ севгиси акъкъындадыр.

Алтын Орду деври къырымтатар эдебиятынынъ нумюнелеринден бири олгъян «Эй, гонъюль» серлевалы гъазелинде ирадели инсанынъ гонъюлю не къадар индже ве назик олгъаны акъкъында айтыла. Эсерде аятта расткельген чешит эзиетлерге даянмагъа бильген инсанынъ гонъюлю акъкъында икяле этиле.

Шаирнинъ гонълюнде пейда олгъан дюльбер, алидженап ве терен ислер гонъюль ве анъ арасындаки къарама-къаршылыкъыны пейда эте.

Мукъаддес севги дуйгъусы онынъ башына не къадар ындыхнувлар кетирмесин, гонълюни не къадар хырпалап чекишитирмесин, о дигер инсаний дуйгъулардан устюн ве мукъаддестир.

Гъазельде къулланылгъан ошатувлар шаирнинъ рухий дюньясыны тасвирлей.

Сызды теним, тюкенди сехер шемидек яныб,
Эй, вай! Не къылды, корь ки, башымгъа беля гонъюль!

Сааръде янып биткен шем киби теним ирип битти;
Эй, вай! Не япты, корь ки, башымга беля(лы) гонъюль!

Истек яшым акъыб, тунь-у-кунъ йыгълатыр мени,
Тигме ки, эрсе, кульсе манъя — не рева гонъюль.

*Эр гедже къанлы козьяшым акъып, геджелернен мени агълатыр.
Тийме, эгер кульсе, манъа, уймагъан гонъюль.*

киби сатырларда севгининъ къудрети, кучю беян олуна.

Абдульмеджит эфенди инсаннынъ гонълю вазиетине коре деньишкени акъкъында фельсесий фикирлер юрюте. Севги ислери-нинъ истирапларына даянып оламагъан шайр: «Я Рабби! Козюмден ал бу гонъюль дадыны!» — диерек, ярдым истеп, Танърыгъа мураджаат эте.

Гонъюль ве анъ арасында зиддиет (къарама-къаршылыкъ) ойле къуветли ки, оны тек Рабби аль эте биле. Яни бу дава инсаннынъ козълери юмулгъан сонъ чезиледжек. Бутюн инсанiet ичюн исе бу къарама-къаршылыкъ эп девам этип, эбедий чезильмейип къаладжакътыр.

Гонъюль дадыны ис эткен шайрнинъ башындан нелер келип кечмесе де, кене де ильк дуйгъусына садыкълыгъыны о, бойле сатырларда бильдире:

Михнет элине алды хаятym якъасыны —
Абдуль къатында къылмады бир маджера гонъюль.

*Дава эткен гонъюльге Абдуль гонъюль бермедин,
Омюрини, аятыны захмет этип кечирди.*

Демек, бу тенъештиров иле муэллиф эр бир инсаннынъ шахсий фикри, дюнъябакъышы, умуминсаний ахлякъы олмакъ кереклиги акъкъында сёйлей. Мукъаддес севги дуйгъусы (севда олгъан гонъюль) бутюн инсанiet ичюн эбедий ве мукъаддес олмалыдыр демек истей. Гонъюль ве анъ арасындаки зиддиетинъ эбедийлигини бильдире.

Бойледже, Абдульмеджит эфендининъ «гонъюль» акъкъында юрютken бу фельсесий тюшюнджелери омюрни, юртны, ананы, озиуни севмеге бильген гонъюльнинъ алидженаплыгъы, инсанiet-лигини тасвирлей.

ЭЙ, ГОНЪЮЛЬ!^[9]

Андан бери ким, алды о шул дильрубе гонъюль¹!
Күйди джефада², корьмеди хергиз вефа гонъюль³.

¹ дильрубе гонъюль — севда олгъан гонъюль

² джефа — эзиет, ынджытуv, азап

³ вефа гонъюль — сёзюнде тургъан, достлугъыны девам эткен садыкъ гонъюль

Козьдин тюшюрди бир ёлы, козь тюшкели анъа,
Терк ит десем, тилегими бермез риза гонъюль¹.

Сызды теним, тюкенди сехер шемидек² яныб,
Эй, вай! Не къылды, корь ки, башымгъа беля гонъюль!

Коръгенге козь тикер, къолы етmezge эль сунар,
Къойгъыл бу ишни эмди, барайы Худа гонъюль!

Баштан кечиб, къара къан ичиб, къан яшым сачыб,
Тапмаз гонъюль тилегини ве хасрета гонъюль.

Еди фелекни тарх къылыйб, накъд-и джан билен³
Бу ашкъ нардын ойнама⁴, эй, бинева гонъюль⁵!

Истек яшым акъыб, тунь-у-кунъ йыгълатыр мени,
Тигме ким, эрсе, кульсө манъя — не рева гонъюль⁶.

Я Рабб! Козюмден ал бу гонъюль дадыны! Манъя —
Ким булдыкен белясы билен мубтеля гонъюль⁷.

Михнет элине алды хаяттым якъасыны —
Абдуль къатында къылмады бир маджера гонъюль⁸.

Суаллер ве вазифелер:

1. Абдульмеджит эфендининъ «Эй, гонъюль» гъазелинде не акъкъында айтыла? Гъазельде бильдирильген фельсесий фикирлерни беян этинъиз.

2. Гъазельде къулланылгъан ошатув, тенъештирювер насыл меселелерни ачыкъландыра? Мисаллер кетирип, иккяе этинъиз.

¹ риза гонъюль — разы, мемнүн, хошнут гонъюль

² сехер шемидек — саары чырагъы киби, сабагъа якъын сёнип биткен шем-чыракъ киби

³ накъд-и джан билен — энъ къыйметли шей иле

⁴ ашкъ нардын ойнама — ашкъ чечеги, отунынъ, къанлы яшларынен ойнама

⁵ бинева гонъюль — насипсиз, заваллы, факъыр, мухтадж, гъарезиз гонъюль

⁶ не рева гонъюль — лаяйкъ олмагъан, келишмеген гонъюль

⁷ мубтеля гонъюль — тюшкюнлешкен, яшамакъыны ред эткен гонъюль

⁸ маджера гонъюль — дава эткен, давалашкъан гонъюль

АХМЕДХОДЖА ЭС-САРАЙИЙ (XIV асыр)

Ахмедходжа эс-Сарайий XIV асырда иджат эткен шаирлерден биридир. Муэллифнинъ аяты, дөгътъан ве ольген йыллары акъкъында малюмат ёкъ. Ялынъыз онынъ Къырымдан Мысыргъа кетип, анда яшагъаны белли. Абдульмеджит эфенди, Тугълуходжа, Тана-Бугъя, Мевляне Исхакъ, Эбубекир Мухаммед киби гъурбет иллдерден ватанына къайтып кельген шаирлер сырасында олгъаны да малюмдир.

1391 сенеси Сейфи Сарайий тарафындан дердж этильген «Гулистан» диванына Ахмедходжа эфендинингъ де бир шири кирсетиле. Абдульмеджит эфендинингъ «Эй, гонъюль» гъазели киби бу эсер де Алтын Орду деври къырымтатар эдебиятынынъ тюкенmez хазинесининъ джевхеридир. Бу эсерден Ахмедходжа эс-Сарайий эсерлерини «Ахмед» тахаллюсы /лагъабы/ алтында язгъаны белли олды.

Алтын Орду девринден бизге келип еткен зенгин мирас эдебиятымызынынъ тарихыны огремеге хызмет эте. Олар бу девирде иджат олунгъан эдебий эсерлерининъ язылув севиесине къыймет кесмеге имкян яраталар.

Ахмедходжа эс-Сарайийининъ «Ахмед» тахаллюсынен язылгъан эсеринде лирик къараманнынъ къыяфети юкsek услюптехи тасвирий васталар иле косытериле:

Бенде Ахмедни бек табугъында хош эсрар ирур,
Ким анынъ ширий сёзлери эсрар ирур.

Эсерде усталыкъынен тасвир этильген табиий джанлылыкъ лирик къараманнынъ сымасыны арекетке кетире. Козюмиз оғондe дюльбер къызынынъ къыяфети, юзюнинъ чизгилери, онынъ юрюши, джазибеси, незакети джанлана.

Шаир севгилисисининъ дюльберлигини эр тарафтан (джеэттен) тасвир эте, инсан гонълюнинъ дюльберлигини ачыкъландыра. Лирик къараманнынъ ахлякъий темизлиги, дуйгъу-ислерининъ дюльберлиги шаиране сёзлер ве ибарелерде беян олунса.

Дильберимнинъ ол садефтек агъзында дюр бар иур,
Лалынынъ шевкъында тунь-кунь дийделер дюр бар иур.
Равза янълыгъ хусн багъында янагъына нар иур,
Хиджр ве ашкъы гонъюллernerни якъаргъа нар иур.

Шаир севгилисисининъ агъзындақи тишлерини инджи иле тенъештире, севгилисисинъ дюльберлигини этрафкъа сачылған нурларнен къыяс эте. Бу нурлар гедже ве куньдюзни ярыкъ эте. Онынъ сачы, боюны-постуны, юрюшини гульзаргъа бенъзете. «Янагъына нар иур» ибаресинен янакълары къып-къырмызы ол-гъаныны анълате.

Эсерде къулланылған къафиедеш ибарелер лирик къараманнынъ сымасыны даа да къуветли тасвир этелер:

«Агъзында дюр бар иур — дийделер дюр бар иур»
Агъзында инджи бар киби — козълери инджи ягъдырыр

«Энълери гульзар иур — бульбулю гульзар иур»
Этрафы гульзар истер — бульбулю гульзар истер

«Не адже базар иур — наз этиб бизар иур»
*Не аджен, базар этер, наз этип (назланып) бизар
(раатсыз) этер.*

Бойледже, лирик къараманнынъ къыяфетини шаиране сёзлернен джанландырмакъ усулы о девир шириетининъ эсас чизгиси олгъаны ичюн гъазеллернинъ чокъусы бойле шекильде язылғандыр.

Шаир шаиране сёзлернен эсернинъ бедиетлигини юксек севиеге котере. Къафие бирлиги ве къафие текrary исе лирик эсерге тюзгюнлик багъыштай. Буларнынъ эписи мүэллифнинъ фикири, дүйгъуларыны бар къуветнен ис этмеге джельп этелер. Ахмедходжа эс-Сарайининъ эсериндеки эр бир сатыр о девирдеки тилимизнинъ бедиетлик дережесини косытере.

* * *

Дильберимнинъ ол садефтек¹ агъзында дюр² бар иур,
Лалынынъ³ шевкъында тунь-кунь дийделер дюр бар иур⁴.

¹ садефтек — инджи къабугъы киби индже ве темиз агъзында

² дюр — инджи

³ лалынынъ — къырмызы дудагъынынъ

⁴ дийделер дюр бар иур — козълери инджи ягъдырыр

Зюльфи¹ сунбульдек², бойы — серв³, энълери гульзар иур,
Юзюни корымекке бир дем булыбулю гульзар иур.

Джан алыш хуснюн⁴ сатар — бу не аджең базар иур,
Я мегер ашықъларына наз этиб⁵ бизар иур.⁶

Равза⁷ янълыгъ хусн багъында янагъына нар иур,
Хиджру ашкъы⁸ гонъюллэрни якъаргъа нар иур.

Бенде Ахмедни бек табугъында хош эсрар иур,
Ким анынъ ширий сёзлери эсрар иур.⁹

Суаллер ве вазифелер:

1. Ахмед Ходжа эс-Сарайийининъ гъазелинде лирик къараманнынъ къяяфети насыл косътерильгенини мисаллер иле анълатынъыз.
2. Ахмед Ходжа эс-Сарайийининъ гъазелинде ишлетильген ошатув ве тенъештирювлөрни айрыджа къайд этинъиз. Оларнынъ маналары насыл ифаделене? Сатырларнен исбатланъыз.
3. Ахмед Ходжа эс-Сарайийининъ гъазелинде къафиедеш ибарелернинъ къуветини беян этинъиз. Лирик къараманнынъ сымасы насыл къафиедеш ибарелерде тасвир олунат?
4. Ахмед Ходжа эс-Сарайийининъ гъазелинде къулланылгъан бедиий тасвирий васталарнынъ бедиетли тарафларыны ифаделенъиз. Оларда муэллифнинъ фикири, дүйгүлары насыл ёлларнен косътериле?

¹ зюльфи — эки янагъыннынъ янындан саркъкъян сач теллери

² сунбульдек — сумбуль (гиацинт) киби

³ серв — сельби

⁴ хуснюн — гузеллигини

⁵ наз этиб — озюни бегендирмек ичюн безгин, кусъюн, джильвели арекет этип

⁶ бизар иур — раатсыз этер, бездирир, кусъюрир

⁷ равза — багъча, чименлик

⁸ хиджру ашкъы — ясакъ олунгъан севги

⁹ эсрар иур — сыр этер

ЭДЕБИЯТЫМЫЗНЫНЬ КЪЫРЫМ ХАНЛЫГЪЫ ДЕВРИ

*XV асырнынъ биринджи черигинден (1428 с.) —
XVIII асырнынъ сонъуна къадар (1783 с.) девир.
Къырым Ханлыгъы мейдангъа кельгенинден
рус истилясы деврине къадар)*

XV асырнынъ биринджи черигинде Алтын Орду дагъыла. Къазан, Астырхан, Сибирь, Къырым ханлыкълары мейдангъа кетириле. Биринджи Къырым ханы — Аджы Герай 1428 сенеси Къырымнынъ мустакъиль девлет олмасыны темин эте. Бу девирде Къырым ханларынынъ намлы Герайлар сюлялесинъ темель ташыны Аджы Герай хан къоя. Герайлар сюлялеси учь бучукъ асыр девамында ханлыкъ эте. Бу девирде Герайлар сюлялесинъ эллиге къадар векили ханлыкъ тахтында булуна. Олардан базылары экишпер, учер, атта дёртер кере тахттан эндирилип, кене де тахткъа кечелер.

Иште, XV асырнынъ биринджи черигинден (1428 с.) XVIII асырнынъ сонъуна къадарки (1783 с.) девирде Къырымда Къырым Ханлыгъы укюм сюре. Демек, Къырым руслар тарафындан ишгъаль олунгъанына къадар, Къырымда Герайлар укюм сюрген девир — Къырым Ханлыгъы деври сайыла.

Къырымтатар халкъынынъ тарихында Къырым Ханлыгъы деври муим эмиетке малик бир девирдир. Бу девирде мустакъиль бир девлет мейдангъа кетириле. Халкъ озь девлетчилигине саип ола, милlet оларакъ шекиллене.

Бу девирде энди бир къач асыр эвель шекилленген медениет, урф-адетлер, сиясет, икътисадият, ичтимаиет миллий ренк ала. Миллий медениетни шекиллендирген язылы эдебият инкишаф эте. Эр бир саада асыл къырымтатар тили къулланыла.

Бу девирде Къырым Ханлыгъы ичтимаи, сиясий ве арбий джеэттен озюнинъ барлыгъыны алемге таныта. Къырымнынъ мустакъиль девлетчилиги вакътында Къырымда яшагъян ерли халкъ къыпчакъ тилинде лакъырды эте. Ондан гъайры эдебият алени ве реесмий дайрелерде къонушув да къыпчакъ тилинде алынып барыла.

Лякин Къырымнынъ мустакъиль девлетчилиги чокъ вакъыткъа сюрмей. Гедик Ахмет Паша 1475 сенеси Кефени басып ала. Къырым Тюркиенинъ имаесине кече. Бу девирде Къырымда укюмдарлыкъ этеджек ханлар да Тюргиеде тайин-

лена ве тасдыкълана. Бу девирде къырымтатар халкъынынъ эдебий, медений, ичтимаий, икътисадий аятына Тюркиенинъ тесири пек арта. Энди Къырым Ханлыгъынынъ ресмий муарририети къыпчакъ тилинде дегиль де, тюрк тилинде алынып барыла.

Къырым Ханлыгъы девиринде мейдангъа кельген къырымтатар эдебияты пек маҳсулдар ола. Юксек севиеге етишкен эдебият бугунь де-буғунь несиллерни тааджипке къалдырмакътадыр.

Бу девирде къырымтатар эдебияты тарихында пек чокъ муэллифлер хызмет этелер. Айны девирде язылгъан эдебий эсерлернинъ шекиль ве мундериджеси гъает зенгинлеше.

Къырым Ханлыгъы девиринде къырымтатар эдебиятында юксек севиеге иришкен улема (алим), эдип ве шайрлер дигер тюркий девлетлерде де белли олалар. Бу девирдеки эдебиятны чокъусы ханлар илерилетелер. Олар озъ деврининъ кениш ма-люматлы, илимли адамлары ве корюмли шайрлери олгъанлар. Ханлар, озылерининъ шан-шуретлерини, эдебият усталыгъыны юксельтмек ичюн, сарайларына шайрлерни давет эткенлер.

Бу девирде укюмдарларнынъ (ханларнынъ), халкъ ве саз шайрлерининъ эдебияты шекиллене. Бутюн тюрк дюньясында диван эдебияты илерилей. Диван эдебияты эр бир джеэттен юк-селип, зенгин классик эдебияткъа чевириле.

Диван эдебиятында арап ве аджем миллий услюpler ишлетиле. Шайрлер озъ эсерлеринде пек чокъ аджем, арап, тюрк сёзлери къулланалар. Диван эдебиятында гъазель, семаи, рубай, къыта, бейит, муамма, фельсөфий-дидактик фикир бильдирген месневи киби ширий шекиллер кениш къулланыла.

Диван эдебияты арап ве фарс медениетинъ тесиринде шекилленген бир эдебияттыр. XI — XII—нджи асырлардан язылгъан Юсуф Баласагъунлынынъ «Къутадгъу билиг», Эдип Ахмед Югнекининъ «Атабет-уль-Хакъайыкъ» киби эсерлери бу эдебиятнынъ ильки нумюнелери олгъандыр.

Къырым Ханлыгъы диван эдебиятында илерилеген тарихий несир «тарих», «теварих» я да «ахбар» деп адландырыла. Оларда «шах-наме» «вакъайи-наме, сефарет-наме, сергюзешт-наме», терджиме киби тюрлер кениш инкишаф эте. Бу саада иджат эткен эдиплернинъ чокъучы Гирай сулялесине мен-сюптирлер. Бизге белли олгъан эсерлернинъ асыл нусхалары дюнья архивлери, китапханелеринде сакълыдыр.

Шимдики девирде тарихий несирге айт Къайсуни-заде Нидайининъ «Тарих-и Сахиб Гирай хан», Аджы Мехмед

Сенайининъ «Тарих» (1651), Мухаммед Гирайнынъ «Тарих» (1703), Сейид Мухаммед Ризанынъ «Эс-себъу-с-сейяр фи ахбари мулюки-т-татар» (1744), Хурреми Челебининъ «Тарих-и ханан-ы Къырым» (1756/57), Саид Гирайнынъ «Тарих-и Саид Гирай» (1758) киби эсерлерининъ базысы толу, къысмен ве айры парчалар сыйфатында нешир олундылар. Халкънынъ эмәнетине къайтарылдылар.

Къырым ханлыгъы девиринде джанлы олгъан диний омюр Исламий (диний) эдебиятнынъ инкишафына себеп олды. Ислам дини ве тасавуф тюшюнджесини халкъкъа анълатмакъ ичюн, янъы бир шиирлер — иляхилер язылып башланды. Бойле этип, халкъ эдебиятында диний-тасаввуфий шиир ёнелиши пейда олды. Тасаввуф — Аллахны чокъ анъмакъ ве ибадет этмекнен онъя якъынлашмакъ ёлудыр. XVIII асырнынъ орталарында яшагъан Мехмед Факърийнинъ иджадында иляхилер тюрю эсас алгъандыр.

Эдебияттымызнынъ Къырым Ханлыгъы девринде Гъазай, Усеин Кефевий, Резми Бахадыр Герай, Мухаммед Кямиль, Ашыкъ Умер, Мустафа Джевхерий, Джанмухаммед ве даа бир чокъ муэллифлер иджат эткендирлер.

Суаллер ве вазифeler:

1. XV асырнынъ биринджи черигинде Алтын Орду дагъылгъан сонъ-, насыл ханлыкълар мейдангъа кетириле? Къырымнынъ мустакъиль девлет олмасыны ким темин эткенини айтыңыз.
2. Къырым ханлыгъынынъ укюм сюрген девирининъ сенелерини тарифленъиз. Къырым Ханлыгъы деври не вакъыткъа къадар девам эти?
3. Къырым Ханлыгъы девринде медениет, икътисадият, ичтимаиет са-асында насыл денъишивлер олып кече? Эдебият алеми ве реесмий дайрелерде къонушув насыл тильде алнып барылгъаныны сёйленъиз.
4. Къырымтатар халкъынынъ эдебий, медений, ичтимай, икътисадий аятына Тюркиенинъ тесири не вакъыт пек арта? Бу вакъыт Къырым Ханлыгъынынъ реесмий муарриети насыл тильде алнып барылгъаныны айтыңыз.
5. Къырым Ханлыгъы девриндеки эдебиятны кимлер илерилетелер? Бу девирде шекилленген эдебиятнынъ адларыны тарифленъиз.
6. Диван эдебиятында насыл миллий устюплер ишлетиле? Диван эдебиятында къулланылгъан ширий шекиллерни къайд этинъиз.
7. Къырымтатар эдебиятынынъ Къырым Ханлыгъы девринде иджат эткен муэллифлернинъ адларыны айтыңыз.

ГЪАЗАЙ (1554—1607)



Къырымтатар эдебиятынынъ Къырым Ханлыгъы деврине иссе къошкъан шаирлернинъ чокъусы ханлар олгъандыр. Девлет Герай ханнынъ огълу, Ислям Герай ханнынъ къардаши — Гъазай — орта асырлар девринде яшап иджат эткен укюмдар шаирлерден биридир. О, шаирлер арасында **Бора Гъазы Герай, Гъазай** адларынен белли олгъан. Гъазай диван ве тасаввуф эдебиятына дегерли иссе къошкъан шаирдир.

Асылында Бора Гъазы адынен белли олгъан Гъазы Герай аскер башы да олгъан. О, тюрк сераскери Озътиумур огълу Осман пашанен иран аскерлерине къаршы урушларда дефаларджа иштирак эткен. Джеклерде буюк джесарет ве ярарлыкълар косътерген. Къазанылгъан гъалебелерге де иссе къошкъан.

Хан-заде йигирми секиз яшында олгъанда, аскерлеринен иранлы аскерлерге къаршы уджюм эте. Акъшамдан сабагъя къадар дёгюше. Акъибетинде, енъильген хан-заде иранлыларгъа эсирликке тюшө. Еди йыл зинданда ята. Онъя Иранда къалып яшаса, зиндандан азат олунаджагъы теклиф олuna. Амма озъ Ватаныны джан-гонъюльден севген Гъазы Герай бу теклифни кесен-кес ред эте. Истегини ширий сатырларнен бильдире. «Сизинъ мемлекетинъизде энъ раат ер — къале ве зиндандыр», — деп мыскъыл тарзда адjem тилинде джевап бере.

Сонъундан истидатлы ве джесюр хан-заде татлы сёз иле зиндан бекчисини алдата. Зиндандан къачып, башта эрзуумгъа, сонъра исе Тюргиеге келе. 6 йыл Къырым хансыз эди ёкъса? 1587—1588 сенелери Османлы девлети тарафындан Гъазы Герай Къырым Ханлыгъынынъ тахтына тайинлене.

Гъазай диний, риязият илимлерининъ мутехассысы, алими де олгъан. О, тюрк-къырымтатар классик музыкасы тарихынынъ энъ буюк бестекярларындан биридир.

Шаир бестекяр олгъан сонъ, эльбет де, чалгъыджы да олгъан. О, башта танбур чалгъан. Сонъра бир чокъ дигер чалгъы алетлеринде де буюк усталыкъ иле классик макъамларны иджра эткен. Онынъ бестекяр оларакъ иджат эткен ве бизге малюм олгъан энъ аздан етмиш дөрт эсери бар. О девирде Гъазайни музыкашынаслар арасында «Татар» ады иле анъгъанлар.

Бойледже, Къырымнынъ сиясий ве медений тарихынынъ энъ буюк исимлерinden бири — Гъазы Герай къуветли укюмдар, мустакъиль фикирли ве келеджекни корымеге бильген сиясетчи ол-макънен биргэ — алым, шаир, бестекяр, чалгъыджы, хаттат ве буюк меценат олгъан.

«Гуль ве бульбуль», «Долаб», «Къаве ве баде» месневилери ве онларджа шиирлерден ибарет джыйынтыгъынен беллидир.

«Диван» ширий джыйынтыгъына къыркътан зияде лирик мевзуда язылгъан гъазеллери кирсетильген. Бу эсерлер назым эсерлер сырасыны кенишлетеңдер. Айны девирде язылгъан хан ярлықълары, ресмий ве хусусий (шахсий) мектюплер муэллифнинъ несир эсерлерини тешкиль этелер.

Арап, адjem, османлы ве къырымтатар тиллеринде язылгъан бу эсерлернинъ мевзуладары чешиттири.

Гъазай 1607 сенеси Акъмесджитте элли беш яшында веба хасталыгъындан вефат этте. Мезары Багъчасарайда, бабасы Девлет Герайнынъ тюрбесиндейdir.

Суаллер ве вазифелер:

1. Диван ве тасаввуф эдебиятына дегерли иссе къошкъан шаир алемге насыл адларынен белли олгъандыр? О, аскербашы оларакъ, дженклерде насыл джесаретлик ве ярарлыкълар косытергенини икяе этинъиз.

2. Иранлыларгъа эсирлүкке тюшкен хан-задеге зиндандан азат олу-наджагъы теклиф олунгъанда, истегини насыл ширий сатырларнен бильдиргенини тарифленъиз. Зиндандан о, насыл этип къача ве не вакъыт Къырым Ханлыгъынынъ тахтына тайинлене?

3. Гъазайининъ даа насыл саалар мутехассысы олгъаныны беян этинъиз. Музыкашынаслар арасында Гъазай насыл адынен антылгъаныны айттынъиз.

4. Бугуньки куньде Гъазайининъ насыл месневилери ве ширий джыйынтыкълары беллидир? «Диван» ширий джыйынтыгъына не къадар гъазеллери кирсетильгенини айтынъыз. Несир эсерлерини насыл жанрлар тешкиль эткенини ве насыл тиллерде язгъаныны икяе этинъиз.

Гъазайининъ шириети

Гъазай къырымтатар классик шириетининъ чешит шекилеринде иджат эткен шаирдир. Гъазайининъ ашкъ лирикасында севгилисine олгъан ашкъ, севги, айрылыкъ, асret киби дуйгъула-ры айдынлатыла. *Хамасий лирикасында* — лирик къараманнның дженкчи — аскер сыфатында япкъан йигитлиги, къараманлыгъы, мердлиги — шерефлендириле. *Диний — тасаввуфий ве фельсифий лирикасы* — диний-тасаввуфий ве фельсифий меселелерге багъышланы. *Хиджавий (сатирик) ве мизахий (юмористик)* эсерлеринде айны заманда джемиэтте укюм сюрьген интизамсызлыкъ, эки-юзълюлик, идаре ишлериндеки беджериксизлик, нефисхорлыкъ, сахте диндарлыкъ киби бир сыра менфий чизгилер тасвирлене. *Талилий (дидактик)* эсерлеринде огредиджи, насиат бериджи шекильде аятий аллар анълатыла. Гъазайининъ яратыджылыгъында гъурбетликнинъ аизары, ватан, яр асretлигининъ фаджиасы буюк усталыкъ иле тасвир олuna.

Шаирнинъ «*Эй, Саба, еткур пеямым ол юзю гуль дильбере*» гъазелинде севги дуйгъусы ве асretлиги ifаде олuna. Лирик къараман (Гъазай) шаркътан эскен хафиф ельге (Сабагъа) мураджаат эте. Онынъ башына тюшкен яр асretлигининъ аизарыны симинберге (кумюш тенли дюльбер къызгъа) барып еткizмесини хафиф ельге риджа эте:

«*Эй, Саба, еткур пеямым ол юзю гуль дильбере,
Хаста халым шерх къылгъыл бир-бир ол симинбере*».

«*Айрылыкъ оты*» лирик къараманны насыл алгъа кетиргенини шаир бар акъикъатынен тасвирлей:

«*Сейле, ким коръди сенинъ ол козю яшлу ашыкъынъ
Хаставеш бенъзи сарапмыш, бенъземиши нилюфере*».

Къасевет, гъам юкюнден букюлип, хаста алына кельгенини шаир гүя озю ис эткени киби икяе эте. Козюмиз огюнде шаирнинъ иранлыларгъа эсирликке тюшкени джанлана. Ватаны, тувгъан юртуны джан-гонъюльден севген шаирнинъ сымасы джанлана. Айрылыкъ маджераларыны озь башындан кечирген шаир, асretликтен янгъан инсаннның алыны бойле инджелик иле тасвирлей.

«*Чак-чак этмиш якъасын дест-и хиджран япышуб,
Дуд-и ахы чыкъса, еттай ишбу черх-и ахдерे*».

Дияр асretлигинден янгъан шаирнинъ гонълю ойле бир вазиетте ки, атта бу яныкътан чыкъкъан «аизар тютюни» та о бир дюньягъа барып етеджек дереджесиндедир.

Шаир озъ-озюндөн «Дөртли Гъазай, о къадар джефа, зулум чектириджинъ ким?» деп сорай ве гъазельнинъ сонъунда нетидже чыкъарыла:

«Мундже ким джевринъ чекер хаста Гъазай дердименд».

Сонъра исе ватан, яр асretлиги даянылмаз бир агъры олгъаныны ифаделемек ичюн мубалягъа усулы (гипербола) къулланылып, Хакъ (Танъры) бу даянылмаз гонъюль агърысыны тек мусульмангъа дегиль, атта кяфирге (душманына) биле бермесин деп, тилек тилей:

«Вирмесион ол хали Хакъ муслим дегиль бир кяфире».

Шаирнинъ гъурбетлик, асretлик мевзуладына багъышлангъан гъазеллеринде омюр, олюм акъкъында фельсефий фикирлер юрютиле. Меселя, «Киче юзынинъ хасретидин пес ки гирьян олды шем...» киби гъазелинде Гъазай бутюн гедже янyp, тама-тама липильдеген чыракънынъ (шем) сымасыны тасвирлей:

«Киче юзынинъ хасретидин пес ки гирьян олды шем,
Атеш-и гъам шулесиддин янды сузан олды шем.

Коръди ким олмаз мюневвер арызынъдын мунджели,
Къальб-и ашыкъ гиби ахир янды хирман олды шем».

Гъазай асret чеккенлернинъ алыны янyp ириген чыракъкъа бенъзете. Янyp ириген ве ирип биткен чыракънынъ алыны гъам-къасеветте кечирильген инсаннинъ омюрине ошата:

«Безм-и васлынъ хасретидин башлады яш тёкмеге,
Субхадек дюнья эвинде герчи михман олды шем.

Субх-и васле коръди ахир етмеги олмыш мухаль
Эксилюб гъам бирле омри хаке ексан олды шем».

Шаир озю де базы бир гъамдан, базы исе кульгюден чыракъ киби иригенини тенъештирме (бенъзетме) усулы иле:

«Эй, Гъазай, гех висалы фикр къылды, гех фирақъ,
Гяхи гирье къылды гъамдын, гяхи хандан олды шем».

деп, ашкъыны беян эте. Гъазай бу классик гъазелинде ашыкъынъ чешит аллары акъкъында сёз юрюте. Чыракъ (шем) сымасында къаршылыкъсыз (джевапсыз) севгининъ къурбаны олгъан ашыкъынъ сымасы костериле.

Бойле этип, гъурбетлик ве асретлик мевзусына багъышлангъан эсерлеринде шаир тез кечиджи омюрни тасвир эте. Инсан не къадар яшамасын, бу фаний дюньяда онынъ омюри бир геджеде ирип биткен чыракъ кибидир. Эр бир инсан бу дюньяда мусафирдир, дегени киби фикирлер юрюте.

Гъазайинъ гъазеллери ве месневилери самимиетлик ве алчакъгонъюллик чизгilerинен ашлангъандыр. Онынъ эсерлеринде фельсөфий фикир, дюньябакъыш, инсан гонълюнинъ ве муреккеп аятнынъ сырлары усталыкънен айдынлатыла.

ГЪАЗЕЛЛЕР

* * *

Эй, Саба, еткур пеямы¹ ол юзю гуль дильбере,
Хаста халым шерх къылгъыл² бир-бир ол симинбере³.

Сёйле, ким корьди сенинъ ол козю яшлу ашыкъынъ
Хаставеш бенъзи сарармыш, бенъземиш нилюфере.

Айруулукъ оды⁴ ки, сенсиз джанына кяр эйлемиш⁵,
Бар-ы гъамдынъ⁶ хам олуб та, къадди дёнмиш ченбере⁸

Чак-чак этмиш якъасын⁹, дест-и хиджран япышуб,¹⁰
Дуд-и ахы¹¹ чыкъса, етгай ишбу черх-и ахдерे¹².

¹ еткур пеямы — еткис хаберимни

² шерх къылгъыл — ачыкъ айдын айт, иззат бер, анълат

³ симинбере — кумиょш вуджутлыгъа, вуджуды кумиょш киби олгъан къызгъа

⁴ айруулукъ оды — айрылыкъ оты, атеши, дуйгъусы

⁵ джанына кяр эйлемиш — джанына кучь эйлеген, кучь берген

⁶ бар-ы гъамдынъ — гъам юкюндөн, къасевет юкюндөн

⁷ хам олуб та къадди — букюлип бою

⁸ дёнмиш ченбере — алкъагъа дёнгөн, алкъа сыйфатына ошагъан, букюльген

⁹ чак-чак этмиш якъасын — йырткъаң якъасын

¹⁰ дест-и хиджран япышуб — айрылыкъ эли (къолу) такъдири япышып

¹¹ дуд-и ахы — эй-вах тютюни, аизар тютюни

¹² черх-и ахдере — фелек ихтиятына, сакътлыгъына, тынчлыкъ укюм сюрген дюньягъа

Мундже ким джевринъ чекер¹ хаста Гъазай дердименд,²
Вирмесон ол хали Хакъ муслим дегиль бир кяфире.

Сатыр асты терджимеси^[11]

*Эй, рузгяр, еткіз хаберимни юзю гульге бенжзеген дюльберге,
Хаста алымны барып анълат бирер-бирер кумюш тенли
гүзель көзызға*

*Сёйле ким корьди сенинъ — о козю яшлы ашыкънынъ
Хаста юзю эп сарарған, ошагъанын(ы) нилюферге.*

*Айрылықъ атеши ки, сенсиз джанына кучь берген,
Гъам ююнден пек букюлип, бою алкъагъа дёнген.*

*Шарт-шурт йырткъан якъасыны айрылықъ эли япышып,
Аизар тютюни чыкъса, етер та о (бир) дюньягъа.*

*Джефа чектериidжинъ ким, хасталықъ чеккен дертели
Гъазай,
Бойле алны бермесин Хакъ тек мусульманға дегиль,
атта кяфирге биле*

* * *

Киче юзынинъ хасретидин пес³ ки гирьян олды⁴ шем⁵
Атеш-и гъам шулесиддин⁶ янды сузан олды шем.

Корьди ким олмаз мюневвер⁷ арызынъдын⁸ мунджели⁹,
Къальб-и ашыкъ гиби ахир янды хирман олды¹⁰ шем.

¹ мундже ким джевринъ чекер — о къадар джефаджынъ ким, зулум чектериidжинъ ким

² Гъазай дердименд — дертели Гъазай

³ хасретидин пес — асреti битти

⁴ гирьян олды — агълады

⁵ шем — мум, чыракъ

⁶ шулесиддин — алевинден

⁷ мюневвер — ышыкълы, баҳытлы

⁸ арызынъдын — янакъларындан

⁹ мунджели — парлакъ

¹⁰ хирман олды — умутсиз олды

Безм-и васлынъ хасретидин¹ башлады яш тёкмеге,
Субхадек дюнья эвинде герчи михман олды шем.

Субх-и васле² корьди ахыр етмеги олмыш мухаль,³
Эксилюб гъам бирле омри хаке ексан⁴ олды шем.

Эй, Гъазайй, гех висалы фикр къылды, гех⁵ фиракъ,
Гяхи гирье къылды гъамдын, гяхи хандан олды шем.

Сатыр асты терджимеси^[12]

*Бутюн гедже асрем чекип, агъламакъта мум-чыракъ,
Гъам атеши, алевинден ирип янды мум-чыракъ.*

*Коръген кимсе олмаз бахытлы парлакъ янакъларындан,
Къалъби ашыкъ киби битип, янып битти мум-чыракъ.*

*Корюшмекнинъ асреминден башлады яш тёкмеге,
Сабадай дюнья эвинде мусафирдир мум-чыракъ.*

*Сабанен корюшмекнинъ сонъу олмагъаныны анълагъан сонъ,
Эксилип гъам иле омрю /ерге къарышып/ ирип битти
мум-чыракъ.*

*Эй, Гъазайй, корюшмекни якъын корьди, кя узакъ,
Кяде гъамдан агълады о, кя къуванды мум-чыракъ.*

Суаллер ве вазифелер:

1. Гъазай къырымтатар классик шириетининъ насыл шекиллеринде иджат эткен шаирdir? Гъазайининъ ашкъ лирикасында насыл дуйгъулар айдынлатылгъаныны ifаделенъиз.
2. Хамасий лирикасында насыл меселелер шерефлендириле? Диний тасаввуфий ве фельсифий лирикасында насыл меселелер тасвир олунгъаныны тарифленъиз.
3. Хиджвий (сатирик) ве мизахий (юмористик) эсерлеринде насыл бир менфий чизгилер айдынлатыла?

¹ безм-и васлынъ хасретидин — корюшмек асреминден

² субх-и васле — сабанен корюшмек

³ ахыр етмеги олмыш мухаль — сонъуна, ахырына етмек мумкүн дегиль

⁴ хаке ексан — ернен ексан, ернен тер-тегиз, ерге къарышып

⁵ хандан — кульгюден

4. Талилий (дидактик) эсерлеринде насыл аятий аллар анълатыла.
5. Шайрнинъ «Эй, Саба, еткур пеямым ол юзю гуль дильбере» гъазелинде насыл дуйгъулар ифаде олунгъаныны мисаллар кетирип таифленъиз.
6. Шайрнинъ «Киче юзынинъ хасретидин пес ки гирьян олды шем...» гъазелинде насыл фельсөфий фикирлер юрютильгенини мисаллар кетирип анълатынъыз. Сатырлардаки бедиий ифаделерни тайинленъиз.

Гъазайининъ «Долаб» месневиси (дестаны)

Гъазайининъ «Долаб» месневисинде лирик къараман долапнен субет эте. Долап да гуя инсан киби, башындан келип кечкен адис-вакъиаларны онъя икяе эте.

Долап (сув дегирменининъ копчеги) сымасында сув киби акъ-къан инсан омюри тасвир олуна. Такъдир (омюр копчеги) инсаны насыл чельтемесин, насыл айланымасын, инсан исе эр бир къыйынлыкъка къаршы кетип, эп даянып яшамакъны девам эте.

Долапнынъ мекяны бир вакъытлар юдже дагълар олгъян. Бир вакъыт о юдже дагъларда ем-ешиль тал тереги олып осъкен. Башынынъ тёпесинде къушлар йырлагъян:

«Юдже дагълар иди эввель мекяным,
Беним де вар иди таб-у туваным.

Башымда къумру ве тугърач отерди,
Земинимде нидже гуллер битерди.

Либасым гех ешиль, гех ал олурды,
Хазан вакъты зерим памал олурды».

Амма «эджель еллери» эсе... Терекни келип пычалар, кеселер. Ондан истеген алетлерини япалар. Долап лирик къарамангъа бу акъта пек тафсилятлы икяе эте:

«Зекерийя тек мени анда бичерлер,
Ишит, имди бана не иш гичерлер».

Пычылгъан бу диреклернинъ эсас къысмындан сув дегирмени къуралар. Энди о, онынъ «джисми къурсуса» да, «ешиль тону къарып чюрюсө де», бир ерде токътамайып айлана:

«Дёнермен ол замандур, бу замандур,
Билурсен, ким фелек иши ямандур.
Йиди Эййубтек багърымны кирман
Къазая-чаре не сёйле, не дерман».

Юкъарыдаки ширий сатырларда «Зекерийя ве Эййуб» киби адлар антыла. Эюп ве Зекерия — Пейгъамберлеримизнинъ адларыдыр. Эсерде анълатылгъан вазиетлер исе оларнынъ башындан келип кечкен адисе-вакъиалардыр. Пейгъамберлеримиз акъкъындинаки ривааетлер гъает меракълыдыр.

Зекерия Пейгъамбер душманларындан къачкъан вакътында онынъ къаршысына бир къавакъ тереги расткеле. Къавакъ тере-ги ярылып, Зекерия Пейгъамберни душманлардан къорчалай. Зекерия Пейгъамбер къавакъ терегининъ ичинде душманларындан гизлене. Амма онынъ джуббесининъ этеги тышта къала. Пейгъамбернинъ этеги тышта къалгъаныны душманларгъа шейтан бильдире. Олар пейгъамберге къавакъ терегининъ ичинден чыкъмасыны буюралар. Лякин Зекерия Пейгъамбер сес-солукъ чыкъармай. Ондан соңъ, душманлар пычкы алып, пычкынен къавакъ терегини пычып башлайлар. Амма Зекерия эп даяна, дюньядан шеитлер киби кете. Зекерия Пейгъамбернинъ сымасында садыкълыкъ, чыдам, даянув, сабыр орнеклери тасвир олунгъандыр.

Эюп Пейгъамбернинъ де такъдири пек меракълыдыр. О да, башындан бир чокъ алларны корип кечиргендер. Омюрининъ башында о, пек сеадетли, бахытлы бир инсан экен. Онынъ баласы-чагъасы ве малы-мулькю чокъ экен. Дюнья сеадетине малик олгъан Эюпни Аллаху-Таалая сынай. Оны мал-мулькten марум эте. Эюп бунъя шукюр эте, даяна. Онынъ балалары бири-бири артындан олелер. О, бунъя да сабыр эте. Ахыр-соңъу о, агъыр бир хасталыкъ-къа оғърай. Онынъ тенини къуртлар ашай, кемире. О, исе эп сабыр этип, Аллаху Таалягъя ибадет этмекни быракъмай. Дженабы Хакъ онъя шифа бере. О, гъайрыдан мал-мульк саиби ола. Пейгъамбер оларакъ мужделене.

Бойледже, месневиде Гъазай пейгъамберлернинъ аятынинъ мисалинде сабыр, садыкълыкъ, чыдам киби инсан чизгилерини шерефлей. Бу чизгилер Долап сымасында тасвирлене. Долап буюк бир фельсефеджи киби фикир юрюте, чюнки Долап сымасында омюр, чарх-фелек вакъиалары беян этиле. Шунынъ ичюн де Долап хангъа ибретли насиатлар бере:

«Сёзюмден ибret алгъыл сен де, эй, хан.
Фелек милькинде варсыз джумле михман.

Фелек бир еди башлы эдждерхадур,
Ки накъд-и омр-и адем ход гъыдадур.

Нидже шахлар келюр анда олур мат,
Мурад узъре сюрюльмез бунда хич хат», — дей.

Месневининъ сонъки сатырларында «Кимсе бу фаний дюнъядан о бир дюнъягъа тойгъандже яшап кетмеди. Нидже падишалар ве ханлар да бу укюмге огърадылар» деп айтыла. Бойле этип, насиатлар бериле:

«Гечюрме гъафлет иле рузигярунъ,
Ки вар икен, элинъде ихтиярунъ.
Дилерсинъ ким, ириширсинъ кемале,
Тевеккюль къыл хер иште Зульджеляле».
«Долаб» месневисинде:
«Ики алемде истерсенъ ферагъат...
Ки таат къыл, диле Хакътан ризай».

киби сатырларда эсернинъ эсас манасы бильдириле. Бу сатырларда дюнъяды эр бир шей Аллахнынъ ризасы иле олгъаны анълатыла. Онынъ ичюн эр бир инсан эр бир шейге даянып, Аллахкъа итат этеджек, такъдирине бойсунаджакъ, инанаджакъ, онъа коре арекет этеджек, давранаджакъ, такъдиринъ буюргъаныны япаджакътыр. Демек, Гъазаийнинъ «Долаб» месневисинде долаб сымасында джианда яшагъан бутюн инсанитетнинъ аятий маджерасы (адисе-вакъиалары) айдынлатыла.

Бойледже, Гъазаийнинъ яратыджылыгъы зенгин асабалыкътан къалгъан муджизедир. Бу эсерлернинъ зевкъы, лезети ве фельсеси миллетимизнинъ рухий дюнъясыны зенгинлештирмек ичюн хызмет эте. Осияткъан несильге алидженаплыкъ, темизгонъюллик, инсанитетлик киби ислерни ашлай.

Суаллер ве вазифелер:

1. «Долаб» месневисининъ мундериджесинде не акъкъында айтылгъаныны тариф этинъиз.
2. Долап сымасында насыл адисе-вакъиалар тасвир олuna? Анълатынъыз.
3. Долап хангъа мураджаат этип, онъа насыл насиат бере? Мисаль кетирип, фикиринъизни беян этинъиз.
4. Дестаннынъ сонъки — эсас мана ташыгъан сатырларында насыл фикир бильдириле? Джевабынъызын мисальнен ифаделенъиз.

ДОЛАБ^[13]

(Месневи)

Ёл устюнде ёлукъым¹ бир долаб²,
Дидим ничюн сюересинъ юзь бу аба.
Делинмиш багърынъ-у-къаддинъ букюльмиш,³
Гёзинъ яшы аягъынъа дёкюльмиш.
Недир ашыкъмысынъ, вармы фыракъынъ⁴?
Бу гъурбетте кимедюр иштиякъынъ⁵?
Гичер бойле сенинъ лейлю-некарунъ,
Ки ёкъымыдыр элинъде ихтиярунъ?
Недюр баис хеле бойле фигъана?⁶
Бюкюльмиш къаметинъ, дёнмюш кемана.⁹
Хем агъларсынъ, хем инълерсинъ демадем¹⁰,
Бу гизлю дердинъ бильмез хич адем¹¹.
Долаб ишитти бенден бу хитабы,
Зебан¹²-и хал иле вирди джевабы.
Хаберсиз адем огълу маджерадан,¹³
Къазадан биль, диме чун-у чырадан.¹⁴
Юдже дагълар иди эввель мекяным,
Беним де вар иди таб-у туваным¹⁵.

¹ ёлукъым — расткельдим

² долаб — сув дегирмени — чарх фелек, такъдир

³ делинмиш багърынъ-у-къаддинъ букюльмиш — багърынъ тешильген, боюнъ букюльген

⁴ вармы фыракъынъ? — узакъ бир ерлерде бир кимсенъ бармы, бир кимсенъ къалдымы?

⁵ кимедюр иштиякъынъ — кимгедир чеккен асретлигинъ

⁶ гичер ... лейлю-некарунъ — кечер гедженъ-кунъдюзинъ

⁷ ёкъымыдыр элинъде ихтиярунъ — ёкъымыдыр элинъде ираденъ, кучюнъ, къуветинъ

⁸ недюр баис хеле бойле фигъана? — агълап сызлавынънынъ, багъырып-чагъырманънынъ себеби недир?

⁹ букюльмиш къаметинъ, дёнмюш кемана — букюльген боюнъ, энданынъ яйтъа ошап букюльген

¹⁰ демадем — дайма, токътамадан

¹¹ бильмез хич адем — бильмез ич бир адам, инсан

¹² зебан — тиль, лисан

¹³ хаберсиз адем огълу маджерадан — инсан огълу инсан олып кечеджек шейден хаберсизdir (илериде олып кечеджек шейни эвельден бильмей)

¹⁴ къазадан биль, диме чун-у чырадан — Аллахнынъ эмри иле олгъяныны биль, насыл ве не ичюн деме

¹⁵ таб-у-туваным — кучюм-къуветим

Акъарды хер заманлар дешти сары¹
Реван олуп аягъым чешме сары.
Тутып хер янымы: къолум, будагъым —
Чемен узьре тутып³, хердем аягъым.
Башымда къумру ве тугърач отерди,
Земинимде нидже гуллер битерди
Либасым⁷ гех ешиль, гех ал олурды,
Хазан вакъты зерим памал олурды.
Бенефше⁹ баш ууруды сола-сагъа,
Нихал-и невресим¹⁰ дуруб аягъя.
Сафа иле¹¹ тузып джамыны ляле.
Сачарды джюръасыны хаке джале.¹²
Олуп нергис¹³ гозю хер гидже би-хаб¹⁴
Олурды нукл-и меджлис анда хуннаб.¹⁵
Эсюп бад-и эджель¹⁶ нагех¹⁷ йыкъылдым,
Кесильди бих-и омрюм¹⁸ анда бильдим.
Бюке гельmez иди хергиз¹⁹ кеманым,
Йыкъылдым къалмады таб-у туваным.
Хеман дем кесдилер къолум, будагъым,
Сюрмек ичюн бири дельди аягъым.

¹ дешти сары — дешт, къумлукъ, чөль тарафларгъа таба

² реван олуп аягъым чешме сары — акъа рухум, джаным чешме бою

³ чемен узьре тутып — чечеклер ве ешилликлер иле толгъян чайыр устюнде тузып

⁴ къумру — къушның ады *rus:* горлица

⁵ тугърач — торгъай

⁶ земинимде нидже гуллер битерди — ер юзюнде (еримде) нидже гуллер осер эди

⁷ либасым — урбам, кийимим

⁸ хазан вакъты зерим памал олурды — кузъ вакътында алтыным (сары япракъларым) аякъ астында (тюбюнде) къалыр эди

⁹ бенефше — мелевше

¹⁰ нихал-и невресим — янъы осип чыкъкъян тазе фиданым

¹¹ сафа иле — гонъюль шенгълиги, зевкъы иле

¹² сачарды джюръасыны хаке джале — сачар эди соңкы ютумыны, чыкъ киби соңкы ютумыны топракъкъа сачар эди

¹³ нергис — *rus.* нарцисс

¹⁴ би-хаб — юкъусыз, уяныкъ

¹⁵ олурды нукл-и меджлис анда хуннаб — бу даиреге топлашкъанларның акъшамы маналы олур эди

¹⁶ бад-и эджель — эджель еллери, эджель рузгъары

¹⁷ нагех — апансыздан, вакъытсыз, оппадакътан

¹⁸ бих-и омрюм — омрюмнинъ темели, тамыры, омрюмнинъ къайнакъ деври

¹⁹ хергиз — аслы, ич бир вакъыт, ич бир заман

Такъып бойнума анда рисманы¹,
Ки бильдим, къалмады ишрет нишаны².
Къани ол, мургъзарым³, лялезарым,
Диригъа⁴ гитди эльден ихтиярым.
Мени къылдылар анда хаке ексан,
Ки эфгъян⁵ эйлер идим анда налан⁶.
Ниче йыл гечди вю джиссим къуруды,
Ешиль тоным къаарды ве чюрюди.
Зекерийатек⁷ мени анда бичерлер,
Ишит, имди бана не иш гичерлер.
Къылып тахта, мени хем мых уурлар,
Теджемму эйлеюб⁸ сүе сюрюрлер.
Дёнермен ол замандур, бу замандур,
Билюрсен, ким фелек иши⁹ ямантур.
Йиди Эййубтек¹⁰ багърымын кирман¹¹,
Къазая-чаре не сёйле, не дерман.
Сёзюмден ибред алгъыл сен де, эй, хан.
Фелек милькинде¹² варсыз джумле михман¹³.
Гъурур итме¹⁴, сакъын сен де джихана,
Гюлердим бен де нидже натувана¹⁵.
Фелек бир еди башлы эдждерхадур,
Ки накъд-и омр-и адем ход гъыдадур¹⁶.
Ниче мюрселлере¹⁷ зехрин ичюрди,
Ниче юз бинъ вели¹⁸ андан гечюрди.

¹ рисман — ийип

² ишрет нишаны — зевкъ, сефа нишаны

³ мургъзар — къушлар ятагъы, чокъ къушлар яшагъан ер

⁴ диригъа — языкълар олсун! Эй-вах!

⁵ эфгъян — фигъян ферьяд, инъильти

⁶ налан — инълеген, ферьяд

⁷ Зекерийатек — Зекерия дек, Зекериядай (алейхиселям) киби

⁸ теджемму эйлеюб — топлашув беллеп

⁹ фелек иши — такъдир иши, талий иши

¹⁰ Эййубтек — Эюпдай (алейхиселям) Эюп киби

¹¹ кирман — къурт

¹² фелек милькинде — такъдир мемлекетинде, такъдир улькесинде

¹³ михман — мусафир

¹⁴ гъурур итме — гъурурланма, кибирленме, озюнъни буюк тутма

¹⁵ натувана — къуветсизге, зайыфъя (зайыф, къуветсиз инсанъя)

¹⁶ ки накъд-и омр-и адем ход гъыдадур — гуя инсаннынъ омюр сермаеси (яшагъан эр бир куню) фелек ичюн гъыдадыр

¹⁷ ниче мюрселлере — не къадар Пейгъамберлерге, небилерге, Аллах-нынъ ёллагъан эльчилирине

¹⁸ вели — Аллахнынъ севимли къулу, якъын кишиси, эвлиясы

Нидже шахлар келюр анда олур мат¹,
Мурад узъре² сюрюльмез бунда хич хат.
Не хош димиш бу эбъяты³ бир устад,
Ки хер демде ануң рухы ола шад.
Дилияверлер⁴ джихана доймадылар,
Заманын хамлесине⁵ доймадылар.
Ки алданма арус-и дехре зинхар⁶,
Ниче арслан хелякъ эйлер о мюрдар⁷.
Не хал олса, анъа диль вирме бари,
Вефалы дип бу кяхбе рузигяры⁸.
Гечюрме гъафлет иле⁹ рузигярунъ,
Ки вар икен, элинъде ихтиярунъ.
Дилерсинъ ким, ириширсинъ кемале¹⁰,
Тевеккюль къыл¹¹ хер ишде Зульджеляле¹².
Ики алемде истерсень ферагъат¹³,
Акъыт гёзюнъ яшыны, эйле таат¹⁴.
Сёзюнъ хатм ит¹⁵, етер дидинъ Гъазай,
Ки таат къыл, диле Хакътан ризайы¹⁶.
Риза вир¹⁷, хер не ким гельсе къазадан,
Худадан¹⁸ биль, Худадан биль, Худадан.

¹ олур мат — чыкъымсыз вазиетке огърар, олюмге дучар олур, оле

² мурад узъре — арзу, макъсат этильген шей узеринде

³ эбъят — бейитлер

⁴ дилияверлер — джесюрлер, йигитлер

⁵ заманын хамлесине — заманынът уджюмине

⁶ ки алданма арус-и дехре зинхар — девир, чагъ, джиан адлы келинге асла алданма

⁷ мюрдар — пис, кирли, пусюр

⁸ вефалы дип бу кяхбе рузигяры — садыкъ деп бу намуссыз ельни, эдепсиз алемни, девирни

⁹ гечюрме гъафлет иле — гъафлетсизликте, дикъкъатсызылыкъта, ихтиятсызылыкъта кечирме

¹⁰ ириширсинъ кемале — мукеммелликке, эксиксизликке ириширсинъ

¹¹ тевеккюль къыл — ишинъни Аллахкъа быракъып, такъдиринъе разы ол

¹² Зульджеляле — Джелял (азамет, иззет) саиби Дженаабы Хакъ

¹³ ферагъат (истерсень) — раатлыкъ истесенъ, дюнъядаки эр бир шейге къанаатленсень

¹⁴ эйле таат — итаат эт, ибадет эт

¹⁵ сёзюнъ хатм ит — сёзюнъе екюн чекип, битир

¹⁶ диле... ризайы — тиле разылыкъ (разылыкъ тиле)

¹⁷ риза вир — разылыкъ бер, мемнүон ол, хошнұтлыкъ бильдир

¹⁸ Худадан — Аллахтан, Раббиден, Мевлядан, Танърыдан



ЭДЕБИЯТ НАЗАРИЕСИ

ЯЗЫЛЫ ЭДЕБИЯТНЫНЬ ШИИРИЙ ШЕКИЛЛЕРИ. ГЪАЗЕЛЬ. МЕСНЕВИ

Гъазель — шаркъ шириетинде кениш ишлетильген шекиллериңден биридир. Гъазель 5—12 бейиттен ibaret ола. Оларның мөвзусы кеништири. Базы гъазеллер ашкъ, севгили, шарап, гузеллик, къадынлықъ мөвзуларында язылып. Фельсефе, тасаввуф, дин ве ортатиджи, насиат бериджи (дидактик) мөвзуларда язылгъан гъазеллер де бар.

Гъазайининь бир гъазелини мисаль этип алайыкъ да, оны аңълатайыкъ:

Киче юзынинъ хасретидин пес ки гирьян олды шем,
Атеш-и гъам шүлесиддин янды сузан олды шем.

Коръди ким олмаз мюневвер арызынъдын мунджели,
Къальб-и ашыкъ гиби ахир янды хирман олды шем.

Безм-и васлынъ хасретидин башлады яш тёкмеге,
Субхадек дюнья эвинде герчи михман олды шем.

Субх-и васле коръди ахир етмеги олмыш мухаль,
Эксилюб гъам бирле омри хаке ексан олды шем.

Эй, Гъазай, гех висалы фикр къылды, гех фиракъ,
Гяхи гирье къылды гъамдын, гяхи хандан олды шем.

Гъазельниң биринджи бейити озыара — *гирьян, сузан, олды шем* сөзлери иле къафиелеше. Къалгъан бейитлерниң биринджи мисралары (*мунджели, яш тёкмеге, олмыш мухал, гех фиракъ*) сөзлери озыара сербест къафие тизелер. Къалгъан бейитлерниң экинджи мисралары исе биринджи бейиттеки (*гирьян, сузан,*

хирман, михман, ексан хандан) сёзлери озъара къафиелешелер. Экинджи сатырларның сонъунда текраглангъан (*олды шем, олды шем, олды шем, олды шем*) киби сёзлерге **редиф** дерлер. Бу гъазельде «*олды шем*» сёзлери редиф сайлып. Схемада о «R» арфи иле косътерилир.

Гъазельнинъ ильк бейитине матла дерлер. Матла гъазельнинъ пейда олув ерини ве башланувыны анълатып.

Гъазельнинъ сонъки бейитине макъта дерлер. Макъта гъазельнинъ биткенини анълатып. Макъта бейитинде сыйын-сыйын шаирнинъ ады анъыллып.

Шаирнинъ ады анъылгъан бейитине даа маҳлас бейити деп айтылып.

Юкъарыда мисаль оларакъ кетирильген гъазельнинъ къафие тизилиши схемада бойле косътерилир:

_____	a +R
_____	a +R
_____	б
_____	a +R
_____	в
_____	a +R
_____	с
_____	a +R
_____	д
_____	a +R

Бойледже, беш-он эки бейиттен ибарет олгъан, аруз везни иле язылгъан ве биринджи бейитте озъара, къалгъан бейитлерде исе экинджи сатырлары къафиелешкен шиирге — гъазель дерлер.

Месневи де гъазель киби язылы эдебиятның назм шекиллери-нинъ бир чешитидир. Эдебиятта колемли мундериджени икяе эткен эсерлер месневи шеклинде язылып. Месневи, бейитлернинъ сайысына ве мевзусына коре, девам эттирилип ве я да къыскъартылып язылып.

Гъазайинъ «Долаб» дестаны месневи шеклинде язылгъандыр. Бу дестанда эр бир бейит озъара къафиелеше. Месневининъ биринджи бейити гъазельдеки киби озъ-ара — *доймадылар-доймадылар* сёзлери иле, дигер бейитлерде *зинхар-мюрдар, вирме бари-рузигяры, рузигярунгъ-ихтиярунъ* киби сёзлери иле къафиелешип келелер. Бойле къафиелешшов мевзу биткенине къадар девам этиле:

*Диляверлер джихана доймадылар,
Заманнын хамлесине доймадылар.*

Ки алданма арус-и дехре зинхар,
Ниче арслан хеляк эйлер о мюрдар.

Не хал олса, анъа диль вирме бари,
Вефалы дип бу кяхбе рузигяры.
Гечюрме гъафлет иле рузигярунъ,
Ки вар икен, элинъде ихтиярунъ.

Месневидеки бу сатырларның къафие тизилиши схемада бой-
ле косътерилир:

_____	а
_____	а
_____	б
_____	б
_____	с
_____	с
_____	д
_____	д
.....	е
.....	е

Месневидеки бейитлер озыара *аа, бб, сс, дд* тарзында къафиес-
леше. Схемадаки соңыки нокъталар исе месневийнинъ кене де шу
везин ве къафие иле девам этильгенини косътере.

*Бойледже, колемли мундериджени икяе этмек ичюн къулланыл-
ған ве бейитлери озыара къафиелешкен шиирге месневи дерлер.*

Суаллер ве вазифелер:

1. Язылы эдебиятның насыл назм шекиллерини билесинъиз? Мисаллер кетириңиз. Гъазель недир? О къач бейиттен ибарет ола? Къафиелер-
нинъ тизилишини схема вастасы иле язып косътеринъиз ве анълатыныз.
2. Гъазельнинъ насыл къысымларына «матла» ве «макъта» дерлер? «Матла» ве «макъта»даки къафиелернинъ къафиелешшови насылдыр? Схема тизип анълатыныз. Мисаль кетириңиз.
3. Гъазельде сатырларның соңунда текрарланған сөзлер насыл адландырыла? О схемада насыл косътериле?
4. Месневи недир? О къач бейиттен ибарет? Къафиелерининъ тизили-
ши насыл? Гъазайинъ «Долаб» месневисинден мисаллер кетириңиз. Сатырларны схема иле косътеринъиз. Къафиедеш сөзлерни айырып, аст-
ларыны сызынъиз.

МУХАММЕД КЯМИЛЬ (1595—1674)

Мухаммед Кямиль Къырым Ханлыгъы девринде яшап иджат эткен укюмдар шаирлерден биридир. Иджадынен диний-тасаввуйфий эдебиятны зенгинлештирген шаирнинъ эсерлери гъает меракълыдыр. Онынъ эсерлери къырымтатар классик шириетини огредиджи насиатларнен теминлейлер. Дидактик (огредиджи) ёнелиште язылгъан къошма ве тюркюлери (шаркъылары) классик шириетимизнинъ тюкенmez хазинеси сайылмакъта.

Мухаммед Кямиль Къырымда ханлыкъ япкъан IV Мухаммед (Мехмед) Герайдыр. О, Селямет Герай ханнынъ огълу, Резми Бахадыр Герайнынъ къардашыдыр.

Мухаммед Кямильнинъ бабасы Селямет Герай хан кечинген сонъ, 1641 сенеси ханлыкъ тахтына Резми Бахадыр Герай тайнинлене. 1644 сенеси исе о, тахттан эндириле.

Мухаммед Герай да эки дефа тахтта булуна. Агъасынынъ тахттан эндирильгенинен он сене кечкен сонъ, о, экинджи кере — 1654 сенеси бир даа тахткъа тайнинлене. Бундан сонъ он эки йыл ханлыкъ эткен Мухаммед Герай тахттан 1667 сенеси эндириле.

Ханлыкътан эндирильгенини эшиткен Мухаммед Герай, отузгъа якъын хызметчилерини янына алыш, Дағъыстангъа кете. Анда даа докъуз йыл яшай. 1676 сенеси вефат эте. Вефат эткенинден бир йыл кечкен сонъ, онынъ нашы (прах) Багъчасарайгъа кетириле. Хан-Сарай мезарлыгъында дефн олунса.

Мухаммед Кямиль гъает диндар ве хайырсевер инсан олгъан. Дервишлернинъ диний-тасаввуйфий мерасимлеринде иштирак эткен. Бу инсан пек чокъ унерлернинъ саibi олгъан. Дюнья ве ахирет илимлерини темелли бильген. Пек зенгин ве барлыкълы бир укюмдар экен.

Мухаммед Герай Багъчасарайда бир мевлевий-хане (дервишлер эви) ве бир амам яптыра. О, хан оларакъ тарихта белли бир нам къалдырмаса да, шаир сыфатында XVII асыр къырымтатар шириетининъ зенгинлешмесине белли иссе къошкъандыр. Шиирлерини «Кямиль» «Кямиллий», «Ханий» лагъабы алтында язгъан.

Мухаммед Кямильнинъ чокъусы эсерлери огредиджи мевзууларгъа багъышланана. Онынъ эсерлеринде тасвир олунгъан адисе-вакъиаларнынъ эписи Аллахнынъ ризасы иле олып кече. Бу

эсерлерде дюнъядаки эр бир шейнинъ кечиджилиги, талийсизлиги, айрылыкъ аджджылары Аллахтан олгъаны бильдириле. Мухаммед Кямильнинъ эсерлеринде онынъ шахсий фикир ве дуйгъулары тасвир олунгъандыр. Севги ислери ве айрылыкъ аизарлары умют ве ниетлери ифаделенгендир.

Мухаммед Герай язылы эдебиятнынъ гъазель, къошма ве тюркюлер (шаркъы) киби назм шекиллеринде иджат эткен. Диван шаирлери онынъ шиирлери адий халкъ тилинде язылгъан деп бегенмегендер. Онынъ эсерлеринде арап ве фарс сёзлери аз къулланыла.

Суаллер ве вазифелер:

1. Мухаммед Кямиль орта асыр къырымтатар ширииетине насыл иссе къошты? О, насыл шаир? Мухаммед Кямильнинъ сюлялеси кимлердендер?
2. О, къач кере Къырым Ханлыгъынынъ тахтында булунды? Сенелерини айтынъыз. Омюрининъ соңъки къысмында къайда яшады ве не вакъыт вефат этти?
3. Мухаммед Герай язылы эдебиятнынъ насыл назм шекиллеринде иджат этти?

Мухаммед Кямильнинъ ширииети

Ханлыкъ деври къырымтатар эдебияты тарихына иссе къошкъан классик шаирлернинъ иджадындан Мухаммед Кямильнинъ ширииети халкъ тилине якъынлыгъынен айрылып турмакъта. Шаир халкъ назмиетinden гъыда алгъан алельхусус ширииетни пейда этти. Шекилленген классик ширииетнинъ мундеридже ве шеклине халкъчанлыкъ рухуны синъдириди.

Мухаммед Кямильнинъ къошма ве тюркюлерининъ мундеридже, мевзу ве гъаеси бу девир эдебиятынынъ илерилевини косытере. Бу эсерлерде шаирнинъ дюнъябакъышы, ахлякъы, табиат чизгилери тасвир олuna.

Джемиетте олып кечкен денъишмелерге шаир сускъунлыкънен бакъмай. Аксине, укюмдар шаир дюнъядаки алларны корип, оларгъа акъылане къыймет кесе. Озюнинъ дюнъябакъышыны, мунасебетини бильдирип, умуминсаний ве ахлякъий меселелерни айдынлатмагъа ынтыла.

Шаирнинъ «*Бу девирнинъ алына эйледим назар*» къошмасы иنسан аятында расткельген вакъиаларгъа багъышлана. Шаирнинъ фикриндже, инсанннынъ омюринде не киби вазиетлер олмасын, о, озы омюрини ибret иле кечирмели. Онынъ аяты дигерлерге орьnek, нумюне олмалыдыр.

Бойле фельсесфий нетиджени о, озъ-озылюгинден чыкъармай.

*Кими малик олмыш тадж ве байлыхъекъа,
Кими дервииш олмыш, къалмыш хорлукъекъа...*

диерек, джемиеттеки денъишювлерни эр бир джеэттен козете.

Омюрнинъ эр бир муреккеп девринде биле, инсан, акълыны гъайып этмейип, келеджегини тюшюнип яшамакъ ичюн, муит яратмалы, дей.

*Гъайып олмадымы, эй, гонъюльдеки акъыл?
Ничюн кезметесинъ алемде гъафиль?*

Шаир бу къошмада умуминсаний чизгилернинъ къыйметини терен фельсесфий тюшюндженер вастасы иле беян эте.

Къошмаларда Мухаммед Кямильнинъ шахсий омюринден лев-халар яратылып, фельсесфий нетиджелер чыкъарыла. Шахсий омюр маджералары умумийлештирилип такъдим олунан.

«Не агъларсынъ, гонъюль, недир феръядынъ» киби къошмасында Мухаммед Кямиль Алтын Орду девринде иджат эткен Абдульмеджит Эфенди киби инсан гонълюнинъ алидженаплыгъы, мукъаддеслиги акъкъында лакъырды юрюте.

Садыкълыкъ чизгиси гъурбетликте даа да терен ис этильгенини шаир:

*«...Бу эйам кянына чатмазмы сандынъ?
...Бир дахи ич темель тутмазмы сандынъ?
...Кендинъи мурада етmezmi сандынъ?»*

киби сатырларны бири-бири пешинден текрарлап, къошмагъа синъдирильген гъаени къуветлендире.

Бойледже, бу къошмада шаир инсан гонълюне, инсанынъ рухий вазиетине айрыджа дикъкъят айрылып, инсанитетликни эбедий яшатаджакъ чизги акъкъында фельсесфий фикирлер юрюте.

Айны шу мевзу ве гъаелер шаирнинъ **«Гъафиль олма, гонъюль, тюшюн, фикир эт»** къошмасында девам этиле. Яшамагъа ве оль-меге яратылгъан инсанлыкъынъ эр бир адымы, фикри Худадан дин, иман истемеккен багълы олгъаныны шаир бойле бильдире. **«Будыр теменнасы Кямильнинъ, аман, Истер Худасындан дин или иман»** деп, екюн чеке.

Бойледже, Мухаммед Кямильнинъ иджады халкъ тилинде языл-гъан ве миллий дүйгүуларнен ашлангъан зенгин асабалыкътыр.

Суаллер ве вазифелер:

1. Мухаммед Қамильнинъ къошмаларында аят акъкъында насыл фельсefий фикирлер юрютиле?
2. Мухаммед Қамильнинъ къошмаларында онынъ шахсий омюрине айт адисе-вакъиалар тасвир олунгъаным? Инсаннынъ гонълю акъкъында къошмасында насыл фикирлер бильдирилгенини айтынъыз.
3. «Кими малик олмыш тадж ве байлыкъекъя. Кими дервиш олмыш, къалмыш хорлукъекъя...» киби сатырларда насыл тюшөнджелер ифаде олунгъан?
4. Яшамагъя ве ольмеге яратылгъан эр бир инсанннынъ адымы акъкъында шаир насыл фельсefий фикирлерни бильдире? Къошмадан мисаллер кетирип, анълатынъыз.

КЪОШМАЛАР^[14]

* * *

Бу деҳрин халына эйледим назар
Хер бири бир дерде гирифттар анджакъ.
Кемале иридже хар иле гульзар
Бульбульнинъ адети ах-у зар анджакъ.

Эгер падишаҳ ол, эгер ким геда,
Иде коръ бордужунъы вакътында эда.
Кимини сефае дюшюрмиш Худа,
Кимининъ къысмети зехр-и мар анджакъ.

Кими малик олмуш тадж-у къабае,
Кими дервиш олмуш кирмиш абае.
Кимсининъ мейли мал иле дюньяе,
Кимининъ башында бадж бар анджакъ.

Къаарар олмадымы, эй, дили акъыл,
Нече бир гезерсинъ алемде гъафиль.
Бары чалынайды сури Исрафил,
Бизден гиденлере индираз анджакъ.

Ашкъ-и Аллахийден ала коръ себакъ,
Ариф ол — эр ише ибret иле бакъ.
Ишиден ашыкълар дерсингилер ол чакъ:
«Қамильнинъ бу сёзю ядикяр анджакъ».

Сатыр асты терджимеси^[15]

*Бу девирнинъ алына ташладым назар,
Эр бири бир дертке огърагъан анджакъ.
Кемалына етишкендже гуль багъча,
Бульбульнинъ адети севдалыкъ анджакъ.*

*Истер падиша ол, я факъыр адам,
Борджуунъны озъ вакътынъда эт эда.
Кимини сефагъа тюшюрген Худа,
Кимине йылан зеэри къысметтир анджакъ.*

*Кими малик олгъан тадж ве байлыкъкъа,
Кими дервиш олгъан, къалгъан хорлукъкъа.
Кими мейиль бере мал топламакъкъа,
Кимининъ башында борджу бар анджакъ.*

*Гъайып олмадымы, эй, гонъюльдеки акъылъ?
Ничюн кезмектесинъ алемде гъафиль?²
Эп бир биль ки, чалар сури Исрафиль!
Бизден кеткенлерге интизар анджакъ.*

*Ашыкъ! Иляхиден алып корь сабакъ,³
Алим ол, эр ишке ибред иле бакъ!⁴
Эшикен ашыкълар десинлер анджакъ:
«Кямильнинъ бу сёзю хатыра анджакъ...»*

* * *

*Не агъларсынъ, гонъюль, недир феръядынъ?⁵
Дерд-у гъам шеринъден гитmezми сандынъ.
Бир кунь шад эйлейип, берип мурадынъ,
Хакъ сени теселли этmezми сандынъ?*

¹ кемалына етишкендже — мында: пиштин, джошкъун, деврининъ соңындердегесине етишкенине къадар

² гъафиль — гъафлетли, дикъкъатсыз, ихтиятсыз, далгъын, келеджетини тюшюнменеген тенбел

³ сабакъ — дерс

⁴ ишке ибред иле бакъ — мында: иштен къыйметли нетидже чыкъар, нетидженет нумюнели олсун, аятынъда орънек олып къалсын

⁵ недир феръядынъ — недир о (ичтен, сессиз) айкъыргъанынъ, яйгъара къолпаргъанынъ

⁶ дерд-у гъам шеринъден — гъам-дертни башынъдан

Къуртулмадынъ гонъюль, ах-у феръяддан,
Гъам киш атты¹, сакъын кендинъи² маттан.
Къуртарып зеврагъынъны бу зулматтан,
Бу эйям кянына⁴ чатмазмы сандынъ?

Бильмезим, гонъюль, ич санъа не олмыш?
Агъларсынъ, козълеринъ къан иле толмыш.
Шадлыкъ мулькини зай-ы харап этмиш⁵,
Бир дахи⁶ ич темель тутмазмы сандынъ?

Ексан олдым дею намерд ят иле,⁷
Якъмакътасынъ гонълюнъ кендинъ орьд иле⁸.
Бу дунья бойледир, эр дем дерт иле,
Къалыр гидер ишинъ, битмезми сандынъ?

Эр зульф-и сиягъа гонъюль багъларсынъ,⁹
Дерде дюшер, нара синенъ дагъларсынъ.
Недир оксюз Кямиль, ничюн агъларсынъ?
Кендинъи мурада етмезми сандынъ?

* * *

Гъафиль олма,¹⁰ гонъюль, тюшюн, фикир эт,
Бу йигитлик кечип, къартайсанъ керек.
Хакъкъынъ бинъ бир исмини зикир эт¹¹,
Бу тедарик¹² санъа, эр исенъ, керек.

¹ киш атты — шах атты (шахмат оюнында)

² сакъын кендинъи — сакъла озюнъни, сакът ол озюнъе

³ къуртарып зеврагъынъны зулматтан — къуртарып къайыгъынъны къараплыкътан, зульметтен

⁴ эйям кянына — заманлар хазинесине, заманларнынъ байлыкъ оджагъына

⁵ зай-ы харап этмиш — бефтан (ботен) харап эткен

⁶ бир дахи — бир даа

⁷ ексан олдым дею намерд ят иле — ят ильде джесюрлик косътерип оламай, ёкъ олдым деп

⁸ кендинъ орьд иле — озюнънинъ атешинъ иле

⁹ нара синенъ дагъларсынъ — коксюнъни откъа, атешке якъарсынъ, яныкъ ярасыны пейда этерсинъ (нар — атеш, сине — кокюс)

¹⁰ гъафиль олма — *мында:* алданма

¹¹ зикир эт — Аллахнынъ адыны анъ

¹² тедарик — азырлыкъ

Кеч бу хаялдан, биль асылнынъ джанын,
Чыкъма ёлдан корип, шериат бабын.
Корьдигинъ маальде къабринъ азабын,
Вуджудынъ махв олып¹, ирисенъ керек.

Рухунъ чыкъып кетип, беден къалынджа,
Эттигинъ ишлерге пешман олунджа,
Эмир этип Ибраһим сур чалынджа,
Ятып ер ичинде чюрюсенъ керек.

Мумин олгъан пек сактыныр эр куни,
Дайм Хакъкъа догъру тутар бойнуны.²
Козь ачып корьдикте махшер кунюни ,
Тюшми дейип, юв(у)рып юрюсенъ керек.

Будыр теменнасы Кямильнинъ, аман,
Истер Худасындан дин иле иман.
Сырат копюрсинден кечтигинъ заман,
Бир къыл узеринде юрюсенъ керек.

ШАРКЪЫ

Буны инкяр этmez бир ферд³ ,
Бу ашыкълыкъ башкъа бир дерт.
Чыдаялмаз бунъа эр мерд,
Бу ашыкълыкъ башкъа бир дерт.

Манъа юзълеме, эй, ярым,
Сакъын, алма интизарым.⁴
Кетти эльден ихтиярым ,
Бу ашыкълыкъ башкъа бир дерт.

Санъа джаным олды мефтуон,
Козюм агълар, гонъюль мемнюон.
Ашкъынъ чеккен, олыр меджнун,
Бу ашыкълыкъ башкъа бир дерт.

Кямиль козъяшы кесильмез,
Аджынып да, ярым сильмез.
Башына кельмеген бильмез,
Бу ашыкълыкъ башкъа бир дерт.

¹ махв олып — ёкъ олып, харап олып

² махшер кунюни — къыямет (олюлернинъ гъайрыдан тириледжек) кунюни

³ ферд — бирев, бириси, кимсе

⁴ ихтиярым — къатланувым, даянувым, чыдамым



ЭДЕБИЯТ НАЗАРИЕСИ

ЯЗЫЛЫ ЭДЕБИЯТНЫНЪ ШИИРИЙ ШЕКИЛЛЕРИ КЬОШМА. ШАРКЪЫ (ТЮРКЮ)

Къошма — халкъ шириетининъ энъ къадимий назм шекли-дир. Бу назм шекли иле чешит-чешит мевзулар ифаде олуныр. Иляхилер, семаи, дестан ве тюркюлер къошма шеклинде язылыр.

Къошма беш, алты дёртлюклерден ибaret олур. Къошманынъ нетиджели дёртлюгинде шаирнинъ ады, лагъабы косътерилир. Бешинджи я да алтынджа дёртлюклер нетиджели дёртлюклер сыйылыр.

Мухаммед Кямильнинъ къошмалары беш дёртлюктен ибaretтири. Бешинджи, нетиджели дёртлюгинде онынъ ады анъыла.

Къошмаларда инсанннынъ, яшайышы, гонъю, омюрининъ нетиджеси киби мевзулар айдынлатылыры.

Мухаммед Кямильнинъ «*Гъафиль олма, гонъюль, тюшюн, фикир эт...*» киби къошмасынынъ учюнджи дёртлюгине мураджаат этейик. Бу дёртлюкни эджаларгъа болип, талиль этейик:

Ру-хунъ чы-къып ке-тип, бе-ден къа-лын-джа,
Эт-ти-гинъ иш-лер-ге пеш-ман о-лун-джа,
Э-мир э-тип, Ис-ра-филь сури ча-лын-джа,
Я-тып ер и-чин-де чю-рю-сенъ ке-рек.

Анълашылгъанына коре, бу къошманынъ эр бир сатыры (мисрасы) он бир эджадан ибaretтири. Яни бу къошма он бир эджалы назм къалыбында язылгъандыр.

Къошманынъ «*эр исенъ керек*», «*ирисенъ керек*», «*чюрюсенъ керек*», «*юрюсенъ керек*», «*юрюсенъ керек*» киби дёртюнджи сатырлары.

рында къафиедеш сёзлер бар. Олар эсерде айтылгъан фикирнинъ манасыны къуветлендирелер.

Бу къошмада беш дёртлюкнинъ биринджи, экинджи ве учюнджи сатырлары озъара къафиелеше. Меселя: «*къалынджы, олунджа, чалынджы*»; «*эр күнү, койнұны, күнүни*»; «*Кәмільнинъ аман, дин иле иман, кечтигінъ заман*» ве иляхри къафиедеш сёзлер шиирге аэнклик берелер.

Мухаммед Кәмільнинъ къошмасындан алынгъан айны дёртлюк схемада бойле косътерилир:

I	II	III	IV	V
а	с	д	е	х
в	с	д	е	х
а	с	д	е	х
в	б	б	в	в

Бойледже, учъ, беш, алты дёртлюктен ибарет олгъан, он бир әджалы пармакъ везнинен язылгъан ве нетиджели дёртлюклерде шаирнинъ лагъабы анзылгъан шиирге къошма дерлер.

Шаркъы — классик шаркъ шириетининъ назм шеклидир. Шаркъы халқъ әдебиятынынъ классик әдебияткъа тесири алтында пейда олгъандыр. О, бестеленерек айтылыр, яни йырланыр.

Шаркъыларда бир чокъ ашкъ, айрылыкъ, эглендже, омюр киби мевзуладар айдынлатылыр. Шаркъынынъ назм шекли — дёрт дёртлюктен ибараттар.

Шаркъы эки ве беш дёртлюкten де ибарат ола билир.

Дёртлюкте деңышшемейип, текрарланған сатырларға накъарат денилир. Накъарат дёттюнджи сатырда олур.

«Дёртлюк»нинъ биринджи ады накъарат олса, экинджи ады бенттир. Бентлернинъ учюнджи мисралары (сатырлары)на «миян» (ортa) ве я да «миянхане» денилир. Бентлернинъ сонъларында текрарланған накъарат сатырлары шаркъыда бильдирильген мананы къуветлештирмеге хызмет эттер.

Мухаммед Кәмільнинъ шаркъысында:

«*Бу ашыкълыкъ башкъа бир дерт*» сатыры, накъарат сайылыр.

«Чыдаялмаз бунъа эр мерд», «Кетти эльден ихтиярым», «Ашкъынъ чеккен олур меджнун», «Башына кельмеген бильмез» — учюнджи сатырлар миян я да миянханелердир.

Шаркъы схемада **aBаB, cccB, dddB, xxxB** киби шекиллерде косътерилир. Буюк арифлер накъаратларны косътерир.

Мухаммед Кәмільнинъ бу шаркъысыны әджаларға больсек, секиз әджадан ибарат олгъаныны анълармыз.

Са - нъа джа -nym ол - ды меф - тюн, (8)
 Ко - зюм агъ - лар, го - нъюль мем - нюн,(8)
 Аш-къынъ чек - кен о - лыр медж - нун,(8)
 Бу а- шыкъ - лыкъ баш- къа бир дерт.(8)


Мухаммед Кәмилъинъ бу шаркъысы схемада бойле косътерилир:

I	II
_____ a	_____ c
_____ B	_____ c
_____ a	_____ c
_____ B	_____ B
III	IV
_____ д	_____ х
_____ д	_____ х
_____ д	_____ х
_____ B	_____ B

*Бойледже, эки, дөрт ве беш дөртлюктен ибарет олгъан, дөртюн-
дожи сатырлары дендиши мейип текрарлангъан ве бес теленерек ай-
тылгъан шиирге шаркъы дерлер.*

Суаллар ве вазифелер:

- Къошма, халкъ шириетининъ насыл назм шекли сайылыр? Насыл ширий жанрлар къошма шеклинде язылгъаныны айтынъыз.
- Мухаммед Кәмилъинъ дигер къошмаларындан мисаль кетириңиз. Тахтада ве дефтерлеринъизде оларны къайд этинъиз.
- Мисаль оларакъ алынгъан къошмалар насыл мевзууларгъа бағышланы? Айны мевзууларны сатырлардаки мисалларнен исбат этинъиз.
- Шаркъы классик шаркъ шириетининъ насыл назм шеклинир, о, къач дөртлюкten ибарет ола?
- Шаркъынынъ насыл бир къысмына накъарат денилир? Мухаммед Кәмилъинъ шаркъысындан мисаль кетирип, аньлатынъыз.



XVII АСЫРДАКИ КЪЫРЫМТАТАР ЭДЕБИЯТЫНЫНЪ ИЛЕРИЛЕВИ

Къырымда учь бучукъ асыр девамында Герайлар сюлялеси ханлыкъ япкъан девирде мустакъиль девлет мейдангъа кетирильди. Къырымтатар халкъы озы девлетчилигине саип олды. Миллет оларакъ шекилленди. Медениет, икътисадият, ичтимаист миллий ренк алып, юксек дереджесине етти. Миллий медениетни шекиллендирген язылы эдебиятта асыл къырымтатар тили къулланылды. Амма Къырым Осман императорлыгъынынъ имаесине кечкен сонъ, Къырым Ханлыгъынынъ реcмий исп юрютиджи весикъалары тюрк тилинде алынып барылды. Бу ал эдебий тилимиздинъ ёнелишине тесир этти. Эдебий эсерлерде тюрк, арап, адjem (фарс) сёзлерининъ ишлетилюви пек кенишледи.

Будевирде пек чокъ муэллифлер иджат эттилер. Оларнынъ язгъан эсерлери девир эдебиятымызыны зенгинлештириди. Бу девирдеки эдебият шекиль, мундеридже ве гъае тарафындан бутюнлей денъишти. Улемалар (дин саасында хызмет эткен зияллылар, муфти, имам), эдип ве шайрлер тюркй халкълар дюнъясына белли олдылар.

Бойледже, къырымтатар эдебиятынынъ XVII асырдаки деври гъает махсулдар (зенгин) девир эди. Миллий ширииетте классик шаркъ ширииетининъ гъазель, месневи, дестан, къошма, шаркъы, семаи, мустезат киби шекиллери темеллешти. Бу девирде иджат эткен Джанмухаммед, Ашыкъ Умер, Джевхерий, Исметий киби бир чокъ муэллифлер эдебиятымызынынъ инкишафына семерели иссе къоштылар.

Мундеридже, мевзу, жанр джеэтинден зенгинлешкен эдебиятта диван, тасаввуф, халкъ эдебияты киби ёнелишлерининъ инкишафы девам этильди. Бу учь ёнелиште саз (ашыкъ) шайрлерининъ иджады айрыджа ер алды.

Эдебий тиль инкишаф этти. Юкъарыда анъылгъан муэллифлерининъ арасында Ашыкъ Умер ве Мустафа Джевхерий классик ширииетининъ эм диван, эм саз услюбинде иджат эттилер.

Гъает махсулдар олгъан Ашыкъ Умернинъ иджадында котельгөн мевзуулар шимдики девирде де пек къыйметлидир. Онынъ ахлякъий, ашкъий (севги), огредиджи, насиат бериджи мевзуларгъа багъышлангъан эсерлеринде шаирнинъ акъыл-идраки ве тюшюнджееси ифаделене.

Мустафа Джевхерийнинъ шиирлеринде севгилисine, тувгъан юртуна олгъан асретлиги косътериле. Омюр ве яшайыш акъкъында бильдирген фельсифий фикирлери юксек бедиет иле тасвир олунна. Шаирнинъ диван ве саз шаирлери услюбинде язгъан эсерлери бири-бириinden баягъы фаркъ эте. Мустафа Джевхерийнинъ къошма, тюркю, мане шекиллердеки эсерлери халкъ тилинде язылгъандыр.

XVII асырда иджат эткен Джанмухаммед ве адь белли олмагъан муэллифнинъ дестанлары да айрыджа дикъкъаткъа ляйыкътыр. Бу дестанларнынъ бедиетлик хусусиетлери шу муэллифлернинъ истидатыны косътере. Джанмухаммеднинъ «Тогъай-бей», адь белли олмагъан муэллифнинъ «Сефернаме» дестанлары XVII асырда халкъ тилинде язылгъан реалистик эсерлердир.

Бойледже, XVII асырда язылгъан бу дестанлар эм халкъ тилинде, эм аджем, арап сёзлери къулланылып язылгъандыр. Эдебий тилимизнинъ инкишафына бу хусусиетнинъ буюк тесири олгъан. XVII асырда эдебияттымыздаки денъиshawлерни айры муэллифлернинъ иджадыны оренгенде кореджекмиз.

Суаллер ве вазифелер:

1. XVII асырдаки къырымтатар эдебиятынынъ илерилевине темель къойгъан ичтимай-тарихий вакъиаларны айтынъыз. Бу девирде Къырым ханлыгъында насыл денъиshawлер олып кече?
2. Бу девирдеки эдебият тарихында олып кечкен янъылыкълар неден ибарат эди?
3. XVII асырда миллий шишириетте шаркъ шишириетининъ насыл шекиллери темеллешти.
4. Бу девирдеки эдебияттымыздынъ инкишафына семерели иссе къошкъан муэллифлернинъ сойадларыны айтынъыз.
5. Эдебияттымызда девам этильген учъ ёнелишни къайд этинъиз.
6. Ашыкъ Умернинъ шишириетинде котерильген меселелернинъ эмие-тини тайинлентьиз.
7. Джевхерийнинъ шишириетининъ хусусиетлерини айтынъыз.

ДЖАНМУХАММЕД (XVII асыр)

XVII асырның шаири — Джанмухаммеднинъ ады къырымтатар эдебияты тарихында эки бинъ сатыргъа якъын «Тогъай бей» серлевалы дестанынен беллидир.

Джанмухаммеднинъ «Тогъай бей» реалистик дестаны акъкъындаки ильк малюматны 1920 сенелерде алим, тарихчы ве языджы Осман Акъчокъракълы тапкъан.

Дестанның тапылув тарихы гъает меракълышыр. Осман Акъчокъракълы ве Усеин Боданинский тарафындан 1925 сенесининъ язында тешкилятландырылгъан этнографик экспедиция ильмий-тедкъицкий ишлер алыш бара. Олар Судакъ районынынъ Къапсихор коюнде яшагъан Аджы Али Эфенди къартнынъ эвинде джыйынтыкъ тапалар. Бу ипрангъан къалын джыйынтыкъта буюк бир дестан язылгъаны анълашыла. Эсерде тасвир олунгъан вакъиалар исе 1648—1651 сенелерге айт олгъаны белли ола. Дестанда Тогъай бей ве Богдан Хмельницкийнинъ Лехистангъа япкъан сеферлери акъкъында икяе этиле. Ондан да гъайры бу дестан сеферде иштирак эткен Джанмухаммед адлы бир шаир тарафындан язылгъаны да белли ола. Джанмухаммед Тогъай бейнинъ киеви экен.

Шимди элимизде эки бинъ сатыргъа якъын дестанынъ текетмиш секиз сатырдан ibaret бир парчасы булунмакъта.

Джанмухаммеднинъ «Тогъай бей» дестанында украин халкъынынъ лех магнатлары ве шляхтичлерине къаршы куреши тасвирлене. (Лех магнатлары ве шляхтичлерине украин халкъыны XIV асырдан берли эзип кельген). XVII асырнынъ орталарында украин гетманы Богдан Хмельницкий Къырым ханына мураджаат эте. Бирлешип, умумий душмангъа къаршылыкъ косытермеге чагъыра. Хан украин казакларынынъ теклифини къабул эте. Хан ярдым косытерюв ишини белли сераскер Тогъай бейге буюра. Полония къыралы IV Владислав Къырым ве Украинаны алыш, халкъыны эсир этмеге истей. Нетиджеде, IV Владиславнынъ бу гъарез мерымы украин ве къырымтатар халкъыны бирлештире.

«Тогъай бей» дестанында акс олунгъан вакъиаларда тарихий шахысларнынъ (прототиплернинъ) сымалары бедиетлик иле

тасвирлене. Мында миллий аньанелернинъ зенгинлиги буюк кя-милликнен ишлете. Бутюн бу хусусиетлер Джанмухаммеднинъ бедиий сёз устасы олгъаныны косьтере, эдебиятымызын миллий аньанелернен зенгинлештиренини тасдыкълай.

Суаллер ве вазифелер:

1. Джанмухаммеднинъ ады къырымтатар эдебияты тарихында насыл эсеринен белли?
2. «Тогъай бей» дестанынынъ тапылув ве огренилов тарихы насыл тарихий шахысларнынъ адларынен бағыллы?

Джанмухаммеднинъ «Тогъай бей» дестаны

Тарихий, ичтимай ве сиясий джеэттен къыйметли парчалар дестанннынъ умумий мундериджесини козюмиз огүнде джанландыра. Олар дестанннынъ мевзу ве гъаесини сечмеге хызмет этелер.

Лехистан Къыралы IV Владислав 1647 сененинъ кузонде Алий Девлет меджлисинде (Сеймде) сёзге чыкъа. Озъ нуткъунда о, къырымтатар халкъына къаршы дженк ачаджагъыны сёйлей. Девлет меджлиси къыралнынъ бу сёзлерини бегене. Амма шу арада улу гетман Потоцкий бойле буюк дженкни башламакъ ичюн мытлакъ азырлыкъ керек олгъаныны бильдире. Шунынъ ичюн де башта Озю казагына (Запорожье казакларына) къаршы сефер япмакъны теклиф эте.

Лехистаннынъ сиясетине къаршы баш котерген Запорожье казакларынынъ гетманы Богдан Хмельницкий 1648 сенесининъ февраль айында Къырым халкъындан ярдым истей. Умумий душман — лехлерге къаршы курешке дөгъруттылгъан бу теклифни хан къабул эте. Ярдым косьтерюв ишини энъ къуветли мырзалардан бири — Ор къапысынынъ къуманданы, Озу халкъынынъ атаманы — Тогъай бейге авале эте. Тогъай бей о вакъыт озъ деврининъ белли сераскери ола.



Къырым ханы.
III Ислам Герай хан

«...Дедилер ки: — Эй, бизим султанымыз,
Баш урып, селям къылды атаманымыз.

Ол Тогъай бей, ол saatte нейледи...
Зар къылып, ах-у-фигъан эйледи.

Атамана деди: — Имди не дуралым?
Дурмаялым, хеман къылыч уралым».

Богдан Хмельницкийнинъ ады эсерде «Мелеске» (Малиска) деп анъыла. Къырым ханы III Ислям Герайдан о, аскерий ярдым сорай.

Аргъын мырзаларындан Ор бейи, мешур сераскер Тогъай бей бу Ордугъа къуманданлыкъ этмеге тайин этиле. Къырымтатар ве украин аскерлери бераберликте Сары Сув, Ильбав (Львов), Бар къалелери дживарапындаки дженклерде иштирак этелер. Олар озылери-нинъ федакярлыгъы ве къараманий арекетлери иле пек чокъ яралыкълар косътерелер.

Базы дженклерде Къырым ханы III Ислам Герайнинъ озю, онынъ къалгъасы — Къырым Герай, къардашы — Мурад Герай султанлар да иштирак этелер.

Джанмухаммеддинъ «Тогъай бей» дестанында лех аскерлери-нинъ Украина гъялган уджюми косътериле. Украина ве Къырым халкъы тарафындан дарбе эндирильгени джанлы суретте тасвир олунса:

«Эм семаден къудрет отун аттылар,
Бир saatte ол кяфири къырдылар.

Чокъ аскерлер анда телефон олдылар..».

Тогъай бей лехлер ордусынен олгъян дженклерде сынъырсыз батырлыкъ косътере. О, Ватаны ве халкъына садыкъ, гъает къуветли сераскер оларакъ тасвир этиле. Джанмухаммед Тогъай бейни дженк мейданында алевленип янгъан атешке бенъзете. Саргъуш арсланнен тенъештире. («Санарсынъ бир от киби янар эди», «Санарсынъ саргъуш арслан киби эди...»)

Дестанда лехлернинъ къыралы ве гетман Н. Потоцкий немсе ве франсызларнынъ ярдымына умют багълагъан баскъынджылар, аджиз макътанчакълар оларакъ тасвирленелер. Меселя:

«Менде олан мал хазине кимде вар...

Москъов, немсе, франсыз иллери —
Эр бириси верир банъя аскери.

Къырымтатар халкъыны къырсам керек».

Лехли къыралынынъ озъ кучюне эминлиги:

«Геледжек сене улу сефер къылалым,
Уджюмле барып, Къырым халкъын къыралым»

киби сатырларда беян этиле.

Потоцкий ве онынъ ёлдашлары урушларда масхададжа енъилелер ве Тогъай бейнинъ элине тюшелер.

Бойле этип, дестанда бедий сёзнинъ къувети иле тарихий сымалар ве тарихий вакъиалар тасвирлене. Базыда тарихий шахысларнынъ образлары (этрафлыджы) яратыла.

Суаллер ве вазифелер:

1. Джанмухаммеднинъ «Тогъай бей» дестаны насыл джеэттен къыйиметли олгъяныны айтынъыз. Олар дестанынъ мевзу ве гъасини сечмеге хызмет этелерми?
2. 1647 сенесининъ кузонде насыл вакъиалар олып кече? Лехистанынъ сиясетине къаршы курештеп Къырым Ханлыгъындан ким ярдым истей?
3. Ярдым косътериов меселеси кимге авале олунса? Бу вакъиа акъкъында эсерден насыл бир сатырларны мисаль оларакъ кетирмек мумкун?
4. Ордугъа къуманданлыкъ этмеге ким тайнленгенини сёйленъиз. Базы дженклерде Къырым ханы III Ислям Герайнен бераберликте даа кимлер иштирак эткенини айтынъыз?
5. Джанмухаммеднинъ «Тогъай бей» дестанында насыл тарихий вакъиалар тасвир олунса? Эсерден мисаллер кетирип, фикирлеринъизни беян этинъиз.

Дестанда халкъ ве Тогъай бей сымасынынъ тасвирленови

Бу реалистик эсерде девирнинъ руху ве къараманларнынъ сымалары буюк къамиллик ве усталыкънен тасвирлене. Нефислик ве бедийликнен яратылған сымаларда миллий чизгилер акс эттириле.

Халкъ сымасынынъ тасвири дестанда Тогъай бейнинъ сымасынен къуветлендириле. Дигер къараманларнынъ да арекетлери

ве сёзлери халкъ сымасынынъ айдынлатылмасына ярдым этелер. Меселя, дестанда лех къыралы халкъымыз акъкъында бойле фирмирлер бильдире:

«Татар халкъы ки, аджен халкътыр билинъ...

Санки къурттыр, къоюн гиби урькериз.

Гелип онлар ель гиби эсер гидер.
Нидже бинъ аскери кесер гидер».

«Ки аджен бехадер олур эр бири,
Биз — къоюныз, санки онлардыр — борю».

«Бир saatte ол кяфири къырдылар».

Лех къыралынынъ сёзлеринде халкъымызынынъ суретли тасвири бериле. Та о девирлерде халкъымызынынъ фасиети (авторитет) дигер халкълар арасында буюк олгъяны косытериле. Халкъымыз озюинъ дженкявер джесюрлиги ве джанбазлыгъынен душманынъ козюне къоркъу къойгъяны ифаделене. Эсерде бу акъта аскерлернинъ «эр бири пельвандыр» дениле.

Дестанда халкъ ве Тогъай бейнинъ сымалары бири-бирининъ кениш суретте тасвир олунмасы ичюн къулланыла.

Эсерде Тогъай бейнинъ сымасы дженк мейданында олып кечкен вакъиалар тасвирленгенде косытериле. «Дюньянынъ варлыгъыны унутмыши эди, горюнирди адждер-беха..., шекли — инсан, сурети — арслан эди» киби ибарелер ве джумлелер козюмиз огюнде Тогъай бейнинъ суретини джанландыралар.

«Арсланнынъ» джесюр сераскерлиги онынъ дженк мейданында япкъан арекетлеринен тасдыкълана:

«Мейдан ичине кирип ойнар эди,
Санарсынъ ки бир от гиби янар эди.

Хич де олюм гельmez эди айнине,
Шойле биль ки, бир къурт гиби горюнен...»

Душманларыны ве этрафтакилерни озъ усталыкъ ве джанбазлыкъ арекетлеринен шашырткъан ве къоркъузгъан Тогъай бей «къурт гиби» эр бир сеферден сагъ къайта эди.

Дестан Тогъай бейнинъ 1651 сенеси Ақъ-Керман шеэринде хасталыкътан вефат эткенинен бите. Бу аджджы хаберни алгъян

къадыны, къызы, къыз-къардашлары «*къаралар киелер*». Аи-зар иле агълашып-сызлашалар. Ольмезден эвель Тогъай бей къалгъан парасына бир теккие, джами ве медресе къурулмасыны васиет эте. Тогъай бейнинъ джеседи Къырымда дефн этиле.

Бойледже, орта асырлар къырымтатар эдебияты тарихында халкъ тилинде яратылгъан колемли «Тогъай бей» дестанында халкъ сымасы тарихий сымаларнен бир сырада тасвирленгенлер. Мында тувгъан юртны къорчаламакъ огърундаки куреште джанларыны феда эткен джесюр сераскерлернинъ сеферлери косытерильтген. Къардаш халкълар арасында достлукъ-муаббетлик дуйгъулары тасвир олунгъан, вахшияне сарсынтыларгъа, дженклерге къаршы япылгъан чыкъышлар тарифленген.

Суаллер ве вазифелер:

1. Дестанда халкъ сымасы насыл тасвир олuna? Джевабынъызын мисаллернен исбатлантыз.
2. Тогъай бейнинъ сымасы насыл тасвир этильген? Онынъ сымасыны айдынаткъан сатырларны эсерде тапып, джесюр сераскерлигини тарифлентиз.
3. Халкъымызынъ суретли тасвири насыл ёлларнен косьтериле? Тогъай бей ве халкъ сымасынынъ тенъештирилип косьтерилови эсернинъ бедиетини юксельтеми?

ТОГЪАЙ БЕЙ^[16]

(Дестандан парчалар)

... Ол заман Лехли къыралы¹ нейледи,
Еди беклер беклерин джем² эйледи .

Эм дахи баярлары кетирдилер,
Бир алий меджлис къурып отурдылар..

Башлады къырал сёзюн ол дем аман³ :
Билирсиз /ки/ фурсат кечти бу заман⁴ ...

¹ Лехли къыралы — поляк къыралы

² джем эйледи — бир ерге кетирди, топлады

³ ол дем аман — о ань, о заман, бирден шу арада

⁴ фурсат кечти бу заман — бу заманда уйгъун вазиет пейда олды

Менде олан мал, хазине кимде вар...

Москъов, немсе, франсыз иллери
Эр бириси верир банъа аскери.

Иште, бу йыл бен сефер къылсам керек,
Къырымтатар халкъыны къырсам керек.

Татар халкъы ки, адже¹п халкътыр билинъ,
Тизине олмаз², бир тедарик къылынъ.

Душманымыздыр³ бизим ки, къоркъарыз,
Санки къурттыр⁴, къюон гиби уръкериз.

Гелип онлар ель гиби эсер гидер,
Нидже юзъ бинъ аскери кесер гидер.

— Эм сен бу сене тедарик къыларсынъ,
Немсе, франсыздан аскер аларсынъ.

Ки адже⁵п бехадер олур эр бири,
Биз — къюоныз санки, онлардыр — борю.

Геледжек сене улу сефер къылалым,
Уджюмле барып, Къырым халкъын къыралым⁶.

Бу йыл дестюр вер⁷ банъа, (бен) варайым,
Озю⁸ къазагынынъ алын сорайым.

Эгер муті олма/з/са⁹, къыллыч урайым,
Илин, койин — джумлесини алайым.

Озю узерине нидже исар къалайым...

¹ тизине олмаз — тез олмаз, къыскъа бир вакъытта, бир муддетте олмаз

² тедарик къылынъ — азырлыкъ корюнтиз, азырланынтыз

³ санки къурттыр — санки къашкъырдыр

⁴ уръкериз — уръкмек, къоркъмакъ

⁵ бехадер /бахадыр/ — батыр, къараман

⁶ Къырым халкъын къыралым — Къырым халкъыны къырарым

⁷ дестюр вер — рухсет, изин бер

⁸ Озю — Днепр озенининъ ады

⁹ эгер муті олма/з/са — эгер боюн эгмесе, эмирге бойсунмаса

Къыркъ бинъ аскернен анда бен варайым,
Сераскеринъ олып¹, хазыр турайым.

* * *

...Ол заман Озю халкъын атаманы
Малиска эди, Батавский — душманы.

Ол Малиска ишитти бу хабери,
Акълы кетти башындан тар-у-мары².

Джумле Озю къазакъны джем³ эйледи,
Муаребе атешин шем эйледи.

...Дедилер ки: — Эй, бизим султанымыз,
Баш урып, селям къылды атаманымыз,

Батавский сексен бинъ аскер иле
Гельмек ичюн тедарик этти бизе.

Илимизи, коюмизи йыкъса герек
Джумлесини эп ота якъса герек.

Келеджек йыл эм Къырыма гельсе герек,
Къырым халкъын къыймайып, алса герек.

* * *

...Тогъай бей адлы бир бек вар эди,
Шеджааттаки⁴ ол улу дильдар⁵ эди.

Та эвельден дёрт къараачын⁶ бириси
Эрлик ичре санки арслан яврусы...

Бир дахи Озю къазакълар кельдилер...

¹ сераскеринъ олып — орду къуманданы олып

² тар-у-мар — дагъыныкъ, къарама-къарышыкъ перишан алда

³ муаребе атешин шем эйледи — дженк атешини якъмагъя чыракъ тапты / дженк башламагъя себеп тапты/

⁴ шеджаат — йигитлик, девюrekлилик

⁵ дильдар — бирисининъ гонълюни алгъян, севда олгъян инсан

⁶ дёрт къараачын — Къырым Ханлыгъы девринде Къырым асыл-заделеринден энъ буюк дёрт айленинъ унваны

...Ол Тогъай бей, ол saatte нейледи,
¹
Зар къылып, ах-у-фигъан эйледи.

Атамана деди: — Имди не дуралым?
Дурмаялым, хеман къылыч уралым.

Ол Тогъай бей къазакъ иле би-гуман²
Кяфирин къаршына чыкъып, турды аман.

Озю халкъы джумле къаршы турдылар,
Бир-бирине топ-тюфеклер урдылар.

Эм семаден къудрет окъун аттылар,
Бир saatte ол кяфири къырдылар.

Чокъ аскерлер анда телефон олдылар...

* * *

Ол Тогъай бей къазакъ иле би-гуман,
Кяфирин къаршысына турдылар аман.

Гъазылар³ оны корип къылыч урур,
Санарсынъ ки, къыямет къопмуштырыр⁴.

Тогъай бей бу ортада джурюр эди,
Санарсынъ, сархоп арслан гиби эди.
Элине эльмаз къылыч алмыш эди,
Дюньянынъ варлыгъын унутмыш эди.

Кимсе сёз итмеюп, ол дем зи-беха⁵,
Хейбет иле горюнирди адждер-беха ...⁶

¹ зар къылып, ах-у-фигъан эйледи — агълап, сызлап, багъырып чагъырды

² би-гуман — къоркъмайып, йигитликле, джесаретликле

³ гъазылар — дин оғурунда дженклемшкенлер

⁴ къопмуштырыр — къопарыр, котерир

⁵ зи-беха — иззетли, урьметли, къуветли

⁶ хейбет иле горюнирди адждер-беха — буюк бир адждерха киби корюнир эди

* * *

...Шаркъа, гъарба чыкъмыштыр анынъ (онынъ) ады,
Джихан ичре беллидир анынъ намы.
Не ере варса, ол (ери) эр заман¹
Фетх идер¹ ол, санки олдыр Къараман² ...

* * *

Батавский мельуны³ туттылар,
Хорлукъ этип, боюнына йип такътылар.

Таланский-Паланский эр бири,
Онлар эди Лехлининъ баш беклери...

Ол Тогъай бей йине гирди мейдана,
Къылычыны бояндырды ал къана.

Биндиги ат ве эсбабы⁴ къан эди,
Шекли — инсан, сурети — арслан эди.

Мейдан ичине кирип ойнар эди,
Санарсынъ /ки/ бир от гиби янар эди.

Хич де олюм гельmez эди айнине⁵,
Шойле биль ки, бир къурт гиби горюнен...

* * *

Гонълюмин мах-и элялым⁶,
Акълымын, джанымын шах-и элялым.

Бир тюкенмез дерде огъраттынъ бени,
Бу гонълюмин седждегях-и элялым.

Сенсиз бен бу дюньяйы нейилейим,
Вуджудымын падиших-ы элялым...

¹ фетх идер — ишгъаль этер /бир де бир топракъларны бастырып алыр/

² Къараман — иран мифологиясындаки бир батырнынъ ады

³ мельун — иблис, лянетленген шахс

⁴ эсбабы — кийимлери, урбасы

⁵ айнине — козюне

⁶ мах-и элялым — ай киби темизим

⁷ седждегях-и — ибадет этиледжек ер

Суаллер ве вазифелер:

1. «Тогъай бей» дестанының ильк сатырларында лакъырды не акъ-къында кетмекте? Лех къыралы не дей? Бу сөзлерден къыралның насыл табиат чизгилерини сечмек мумкун?
2. Къыралның чыкъышыны дикъктәтнен динълеген Потоцкий оны тенбиелеп, насыл сөзлер айта? Бу сөзлер халкъымызының насыл миллий чизгисини косытре? Мисаллер кетирип анълатыныз.
3. Бу хаберни эшиткен Малиска не япа? Малиска ким? Ханның узурына чешит бахшышларнен кельген Богдан Хмельницкийнинъ эльчилири онъя насыл сөзлер иле мураджаатта булуналар? Дестандан бунъя айт сатырларны окъунъыз, анълатыныз.
4. Тогъай бейнинъ аскерлеринен лех аскерлерининь курешкени насыл тасвир олуна? Сатырларны тапып окъунъыз, нетидже чыкъарыныз.
5. Дестанда Тогъай бейнинъ къоркъубильмез сераскер чизгилерини та-рифлекен сөз ибарелери ве сатырларыны айырып, оларның маналарыны анълатыныз.
6. Тогъай бейнинъ сымасыны тасвир этмеге ярдым эткен: «*Ич оллом кельмез эди айнине, Шойле биль ки, бир къурт гиби горюне*» киби сатырларны насыл анълайсыныз? Озъ сөзлеринъиз иле икяе этинъиз.



ЭДЕБИЯТ НАЗАРИЕСИ

БЕДИЙ ТАСВИРИЙ ВАСТАЛАР. ТЕНЬЕШТИРЮВ

Эсердеки тарихий манзаралар, къараманларның арекетлери, суретли тасвираты, къыяфети *меджаз (эпитем), тенъештирюв, къыяс (къарама-къарышы тенъештирюв)*, гипербола (мубалягъя) киби бедиий тасвирий васталар иле джанландырыла.

Джанмухаммеддининъ «Тогъай бей» дестанында къырымтар тар халкъының дженкяверлиги, джесюрлиги «санки къурт-

тыр, къюн киби уръкериз...», «гелип онлар ель киби эсер, гидер... Нидже юз бинә аскери кесер гидер» киби ибаре ве джумлелер иле къуветлендирилир.

Къырымтатар сераскери Тогъай бейнинъ сымасына суретли тасвират берильгенде, бу къараманнның эбедийлик темсилі «Санаарсынъ(ки) бир от гиби янар эди... Шойле биль ки, бир къурт гиби горюне. Фетх идер ол, санки олдыр Къахраман» киби сатырларда ифаде олунған.

Халкъ агъыз иджадында эбедиет ремзи (темсили) «атеште, отта янмаз», «къурт киби» ибарелери иле тасвир олунгъаны белли.

Демек, эсерде сёз я да ибарелер ярдымы иле адисе-вакъиаларының бири-бирине ошатылып, къаршы къююлып тенъештирилювине тенъештирюв дерлер.

Дестанда Тогъай бейнинъ суретли тасвираты меджазлар иле де ифаде олунған. Меселя, «Ол, Тогъай бей, ол saatte нейледи, зар къылып, ах-у-фигъан эйледи», «Кимсе сёз имейип, ол дем зи-беха, хейбет иле горюнирди адждер-беха» сатырларындаки «Зар къылып, ах-у-фигъан эйледи, корюнирди адждер-беха» киби меджазлар Тогъай бей сымасының даа да къуветли айдынлатылмасына хызмет этелер.

Дестанда Тогъай бейнинъ суретли тасвираты базы вакъытлары бири-бирине къаршы къююлып да тенъештириле. Меселя, «Ки аджен бехадер олур эр бири. Биз — къюоныз санки, онлардыр — борю», «Шекли — инсан, сурети — арслан эди» деп, шаир салмакълы мана ташыгъан къарама-къаршы «къюоныз — борю», «инсан — арслан» сёзлерини ян-янаша кетирип, сёзний манасыны къуветлендири.

Бойледже, эсернинъ теренликлерине синъдирильген ис-дуйгъу, гъяе ве мевзуулар бедиий тасвирий васталарның ярдымынен эсерге образлылыкъ берир, бедиетлигини теминлер.

Суаллер ве вазифелер:

1. Эсердеки тарихий манзаралар, къараманларның арекетлери, суретли тасвираты, къыяфети насыл тасвирий васталарнен джанланышыра? Олар эсернинъ насыл бир джәэтини арттыргъаныны айтынъыз.
2. Насыл бедиий тасвирий вастагъа тенъештирюв дерлер? Бу тасвирий вастаның дестандаки хызметини мисалларнен тарифленъиз.
3. Дестанда Тогъай бейнинъ суретли тасвираты насыл тенъештирильгенини мисаллар кетирип анълатынъыз. Шаир тарафындан къулланылған белли бир тасвирий васта онынъ сёз усталыгъына меарет къошкъаныны исбатланызыз.

АШЫКЪ УМЕР (1621—1707)



Ашыкъ Умер къырымтатар шишириетине салмакълы иссе къошкъан шаирлерден биридир.

О, 1621 сенеси Къырымда, Кезлев шеэринде Абдулла Кендже оғылу деген фукъаре эснаф къорантасында дюньягъа келе. Маалле мектебинде иптидайи бильги ала. Акъранлары арасында о, шохлыгъы иле айрылып тура, зеккийлиги ве азырджеваплыгъы иле этрафындаки инсанларны айретте къалдыра.

Къыскъа бир вакъыт девамында медреседе Къуран окъума-гъа огренген Ашыкъ Умер Кезлевдеки мешур Джума джами мединде о девирнинъ намлы шаирлерinden Кефевий Сеит Абдулькерим Шерифий киби эдебият оджасындан дерс ала. Шу вакъытларда о, шиирлер уйдурмагъа башлай.

Севимли оджасы вефат эткен сонъ Умер медресени быракъа ве озю язгъан шиирлерине макъам уйдурга. Саз чалып, къавеханелерде ашыкъ тюркюлерини йырлап, адамларны эглендире.

О, омюрининъ бир чокъ къысмыны Дагъыстан, Азербайджан, Иран, Сурье, Тюргиеде кечире. Истанбул, Бурса, Сакъыз, Варна, Багъад киби шеэрлерни кезип чыкъкъаны акъкъында онынъ шиирлеринде тасвир олунса. Эсерлеринде бу шеэрлернинъ гузеллиги акъкъында языла.

Ашыкъ Умер язылы эдебиятнынъ гъазель, къошма, семаи, мурабба, мухаммес, муседдес, мустезат, муамма, дестан, шаирнаме киби шекиллеринде иджат эткен халкъ шаиридир. Онынъ эсерлеринде ахлякъый, ашкъый (севги), дидактик, диний мевзуулар тасвир олунса. Эсерлерде шаирнинъ кескин акъылы ве тюшюндженелири ифаделене.

Бутюн омюрини шиир уйдурув ве бестекярлыкъка багъышлагъан Ашыкъ Умер асыл эвленимейип, аятыны бекярлыкъта кечире. Омюрининъ сонъунда о, догъгъан шеэри Кезлевге къайта ве 1707 сенеси сексен алты яшында бу ерде вефат эте.

Ашыкъ Умернинъ докъсан алты шиирден ибарет китапчыгъы 1894 сенеси Багъчасарайда Исмаил бей Гаспринскийнинъ «Терджиман» газетасынынъ басмаканесинде нешир олуна.

Ашыкъ Умернинъ эки джылтлыкъ эсерлер джыйынтыгъы 1988 ве 1990 сенелери Ташкентте дюнья юзю коре. Бу джыйынтыкъкъя шаирнинъ бинъ сатырлыкъ ширий асабалыгъы кирсетиле.

Ашыкъ Умернинъ иджады халкъымызынынъ эдебий ве медений вариетидир, къырымтатар орта асырлар эдебияты тарихынынъ рухий джевхерлеридир.

Суаллер ве вазифелер:

1. Ашыкъ Умернинъ балалыгъы ве генчлиги акъкъында не билесинъиз? Оларны тафсилятлы икяе этинъиз.
2. О, омюрининъ чокъ къысмыны анги мемлекетлерде кечирди? Шиирлеринде бу акъта тасвир олунгъанмы? Икяе этинъиз.
3. Шаир язылы эдебиятнынъ насыл шекиллеринде иджат этти? Онынъ эсерлеринде насыл мевзуулар озь тасвирини тапты?

Ашыкъ Умернинъ шириети

Ашыкъ Умернинъ иджадында чешит тюрлю мевзуулар айдынлатылгъан. Ватан ве яр асретлиги, омюр ве яшайыш киби мевзууларда инсаннынъ рухий чизгилери акъ олуна. Онынъ ахлякъий мевзууларгъа багъышлангъан бир чокъ гъазеллеринде инсанлар арасындаки мунасебетлер косътериле. Инсанлар арасындаки бу мунасебетлер даима эйи достане чизгилер эсасында къурулмакъ кереклиги акъкъында айтыла. Эр бир инсан джемиэтте озюни насыл алыш бараджагъы, озюни насыл тутаджагъы акъкъында насиатлар бериле. Къыйметли насиатларда инсанларнынъ табиат чизгилери косътериле. Базы бир табиат чизгилеринде бутюн бир миллетлернинъ миллий табиат чизгилери де ифаде олуна.

Нетиджеде, бу эсерлер бизге яхшыны ямандан айырмагъа огрателер. Меселя, инсанлар арасында бир кимсе акъкъында бефтан



сёз айткъан мунафыкъ инсаннынъ джемиетке кетирген заары косытериле.

Бу акъта Ашыкъ Умернинъ «*Джиан ичре хазер этмек герек инсан мунафыкътан*» киби гъазелинде ифаде олунға. Шаир аятта расткельген менфий табиат чизгиси — мунафыкълыкъ акъкъында фельсесий нетиджелер чыкъарып, ёл косытериджи төвсие ве насиатлар бере:

*«Не ола иблиценен тенъештирсем, сёзюмде янъылмам,
Мен, адам, дегиль де, бельки, шейтан къачар мунафыкътан.
Насиаттыр меним бу сёзюмни эшитсенъ, джаным,
Гәает сакът олмакъ керек, шу дост корюнген мунафыкътан».*

Бу гъазельде олур-олмаз ерде бефтанды, акъсызы сёз айткъан, бир кимсенинъ устюне ифтира эткен мунафыкънынъ сымасы «шайтан къачар мунафыкътан», «сакът олмакъ керек шу дост корюнген мунафыкътан», «ялынъыз олюмин истесин душман шу мунафыкътан» киби отъюор ибарелер къулланыла. Шаир мунафыкънынъ джийренч сымасына, пахыллыкъ, гъарезлик киби менфий чизгилерге къаршы олгъаныны косытере. Инсаннынъ алидженаплыкъ, темизгонъюллилік ве эйи ниетлилік чизгилерини шеरфлендире.

Ашыкъ Умернинъ эсерлеринде расткельген насиат ве тенбиелер чокъусы генчлердеге дөгъруттылып айтыла. Джемиетнинъ келеджеги генчлер олгъаныны бильдире. Шаир омюрдеки фена алларнынъ оғюни алмакъ кереклигини тенбиелей. Тюшюнмейип ве ташынмайып япылгъан арекетлернинъ нетиджеси акъкъында эвельден билип айта.

Ашыкъ Умер башындан кечирген гъурбетликнинъ джефасыны бедиий усталыкънен ифаделей. Бу акъта о: «*Гитме, джаным, гитме, гель, ёкъ интизасы гъурбетнинъ*» киби мураббасында яза. Шаир гъурбетликнинъ зорлукълары ве белясыны бойле тасвирилей:

*«Кетме, джаным, кетме, кель, ёкъ ихтияджы гъурбетнинъ,
Олма даа яшлыкътан сен дост-ашнасы гъурбетнинъ.
Йылда бинъ кере чеккен кедерлеринъ, джаным санъа,
Эталмам тасвирини, чокътыр джефасы гъурбетнинъ».*

Гъазельнинъ «...чокътыр джефасы гъурбетнинъ», «Чешит зорлукъларле къурулгъандыр белясы гъурбетнинъ», «Солдурыр гуль юзюнъни зулум-джефасы гъурбетнинъ» киби сатырларда гъурбетликнинъ аджыныкълы тарафлары ифаделене. Шаир гъурбетликнинъ зорлукъларыны козюмиз оғюнде бойле джанландыра:

*«Баре гъурбет ильде эркеликни терк эт, севдигим,
Чешит зорлукъларле къуруулгъандыр белясы гъурбетнинъ.*

*Сен даа ачылмагъан бир гъонъджесинъ, языктъ санъа,
Солдурыр гуль юзюнъни зулум-джефасы гъурбетнинъ».*

Бу сатырларныңъ эписи инсанныңъ тувгъан юртуна, халкъына олгъан садыкълыгъыны шерефлейлер.

Шаир «*Бивефа черхин иши эр дем фигъан олмагъимиш*» киби мухаммесинде инсан аяты акъкъында бир сыра фельсейфий фикирлер юрюте. Аджджа такъдирнинъ умумий тасвирини козюмиз оғонде джанлындыра.

Муаммесинъ эр бир дөртюнджи ве бешинджи сатырында:

*«Чаре не, башымда язы — бу кунни коръmek эмиш,
Бу эмиш такъдирнинъ иши гъурбете къоймакъ эмиш».* —

деп айтылгъан фикирлер шаирнинъ такъдир акъкъында бильдирген фикирлеридир.

Шаир насиат берильген бу эки эсерде де гъурбетлик мевзусы мүим меселе олгъаныны косытере. Дюнья юзюнде яшагъан миллиетлернинъ такъдирине гъурбетликнинъ буюктен-буюк тесири олгъаныны ифаделей. Гъурбетлик мевзусы инсан аятында эбедий мевзугъа чевирильгенини бильдире. Тувгъан топракъта яшамакъныңъ эр шейден мукъаддес олгъаныны несиллерге анълата. Бу севгини несиллернинъ зеинине насиат шеклинде синъдире.

Ашыкъ Умернинъ иджадында котерильген меселелер, бизим кунюмизде де озы эмиетини джоймагъаны, онынъ эсерлерини эбдийлештирелер.

Суаллер ве вазифелер:

1. *Джиан ичре хазер этмек герек инсан мунафыкътан* киби гъазелинде инсанныңъ насыл табиат чизгиси акъкъында лакъырды юрютиле? Бу эсеринде шаир насыл бир мүим меселе котергенини сатырлар иле беян этинъиз.

2. *Гитме, джаным, гитме, гель, ёкъ интизасы гъурбетнинъ* киби муррабасында шаир гъурбетликнинъ маджераларыны насыл тасвирлей? Мисаллар кетирип, шаир насыл фельсейфий фикирлер бильдиргенини айтынъиз.

3. *Бивефа черхин иши эр дем фигъан олмагъимиш* киби мухаммесинде Ашыкъ Умер насыл фельсейфий фикирлер юрюте? Эдебиятында гъурбетлик мевзусында язылгъан эсерлер акъкъында субетлешинъиз.

4. Юкъарыда анылгъан эсерлернинъ мевзусына эсасланып, шаир тарафындан котерильген меселелернинъ бизим кунюмизде де мүимлигини исbat этинъиз. Ашыкъ Умернинъ эсерлерининъ эбедийлигинен бағъланъыз.

ГЪАЗЕЛЛЕР^[17]

* * *

Джихан ичре хазер этмек герек инсан мунафыкътан,
Не ход ким не дер исенъ, гелир джумле мунафыкътан.

Онунъ этварына бакъма ки, баш душманынъ олдур ол,
Биль, ич гъафиль олмамакъ герек эр ань мунафыкътан.

Нола иблисе тешбих эйлесем, сёзюмде къызб этmem,
Бен, адем, дегиль, бельки, къачар шейтан мунафыкътан.

Насиаттыр, беним бу пендими гуш идесинъ джана,
Хазер къылмакъ герек мутлакъ, эле яран мунафыкътан.

Лисан-ы ал иле, Умер, беним анъладыгъым бу ким,
Дахи ектири олюмин истесин душман мунафыкътан.

Сатыр асты терджимеси^[18]

*Джиан ичинде сакът олмакъ керек инсан мунафыкътан,
Афсус ким не дер исе, келир джумле мунафыкътан.*

*Онынъ эткенине бакъма ки, баш душманынъ одыр, о!
Биль, ич гъафлет олмамакъ керек эр ань мунафыкътан!*

*Не ола, иблиснен тенъештирсем, сёзюмде янъылмам,
Мен, адам, дегиль де, бельки, шейтан къачар мунафыкътан.*

*Насиаттыр, меним бу сёзюмни эшитип синъдиресинъ джана,
Гъает сакът олмакъ керек, шу дост корюнген мунафыкътан.*

*Айттыгъы лафынъдан, Умер, меним анъладыгъым шу ки,
Ялынъыз олюмин истесин душман шу мунафыкътан.*

* * *

Эй, пери, бойле перишан олдугъым бильмезмисинъ?
Асретинъле куньде бинъ кез ольдюгим бильмезмисинъ?

Бен — Меджнун ашкъын китабын окъудым дестан гиби,
Эр не эмринъ олур исе, идеийим ферман гиби.

Фурсат эльде булуныркен, севдигим девран гиби,
Севдигим сен бенден озыге, бир севда бильмезмисинъ?

Багъ-ы хуснинъ гуллерине бульбуль эдим бир заман,
Шимди бенден юз чевирдинъ, нолдугъым бильмезмисинъ?

Джаныма бинъ джан багъышлар бинъ кере бакъышларынъ,
Агъзынъ ичинде дизильмиш инджи гиби дишлеринъ.

Эй, гузелим, эп бана джевр-у джефадыр ишлеринъ,
Севдигим бакъий дегильдир, бу фена бильмезмисинъ?

Акълы исенъ, эй, гонъюль, алчагъа сырынъ сейлеме!
Ашкын дерясына дал, сабр эйле, сакъын бойлама!

«Талийим ёкътыр беним» — део шикляет эйлеме!
Эй, Умер, верир мурадынъ, ол Худа бильмезмисинъ?

Сатыр асты терджимеси^[19]

Эй, пери, бойле перишан олгъаным бильмезмисинъ?
Асрестинъле куньде бинъ кере ольгенимни бильмезмисинъ?

Мен Меджнун ашкынъ китабын окъудым дестан киби,
Эр не эмринъ олур исе, ялайым (баджерейим) ферман киби.

Фурсат (себеп) эльде булуныркен, севгеним девран киби,
Севдигим, сен менден башкъа бир севда бильмезмисинъ?

Дюльбер багъынъ гуллерине бульбуль эдим бир заман,
Шимди менден юз чевирдинъ, насыл алгъа къалгъанымны
бильмезмисинъ?

Джаныма бинъ джан багъышлар бинъ кере бакъышларынъ,
Агъзынъ ичинде тизильген инджи киби тишлеринъ.

Эй, гузелим, эп манъа акъсыз эзиет ишлеринъ,
Севдигим бакъий дегильдир, бу дюнья кечиджи олгъаныны
бильмезмисинъ?

Акълы исенъ, эй, гонъюль, алчакъка сырынъ сейлеме,
Ашкъ дерясына дал, сабыр эйле, сакъын бойлама.

«Талийим ёкътыр меним» деп шикляет эйлеме,
Эй, Умер, берир мурадынъны тек Худа, бильмезмисинъ?

МУРАББА

* * *

Гитме, джаным, гитме, гель, ёкъ интизасы гъурбетинъ,
Олма дахи тифл икен, сен ашинасы гъурбетинъ.
Йылда бинъ кез чектигим михнетлеринъ джаным санъа,
Идемем такъририни, чокътур джефасы гъурбетинъ.

Сакин ол, михнетте ол, севдайы терк эт, севдигим,
Гель, ферагъат эйле, бу эвзайы терк эт, севдигим,
Бари гъурбет эльде истигънайы терк эт, севдигим,
Дюрлю михнетле къурулмыштыр белясы гъурбетинъ.

Махрем олмакъ затына дюшмез, бегим, такъикъ санъа,
Инкъисар эдер, хазер къыл, ашыкъ-ы садыкъ санъа,
Сен дахи ачылмадыкъ неврестесинъ, языкъ санъа,
Солдуур гуль рухлеринъ джевр-у эзасы гъурбетинъ.

Хизмет-и ашкъында Умер джумлесинден даймим,
Фурсаты февт этмедиим, амма, эфендим, надимим,
Сен не муnis бир гъулямсынъ, севдигим — Ибрахимим,
Олмаясынъ талиб-и зевкъ-у сафасы гъурбетинъ.

Сатыр асты терджимеси^[20]

*Кетме, джаным, кетме, кель, ёкъ ихтияджы гъурбетнинъ,
Олма даа яшлыкътан сен дост-ашнасы гъурбетнинъ.
Йылда бинъ кере чеккен кедерлеринъ, джаным санъа,
Эталмам тасвирини, чокътыр джефасы гъурбетнинъ.*

*Тынч ол, я кедерли ол, севданы терк эт, севдигим,
Кель, вазгеч, джаным, бу адептнини терк эт, севдигим,
Баре гъурбет ильде эркеликни терк эт, севдигим,
Чешит зорлукъле къурулгъандыр белясы гъурбетнинъ.*

*Ясакъ олмакъ затынъа тюшмез, бейим, асыл санъа,
Джаны агъырыр, сакът ол, о садыкъ ашыкънынъ санъа.
Сен даа ачылмагъан бир гъонъджесинъ, языкъ санъа,
Солдуур гуль юзюнъни зулум-джефасы гъурбетнинъ.*

*Ашыкъ хызметинъде Умер, джумлесинден даймим,
Фурсатны къачырмадым, амма, эфендим, пешманым.
Сен не муnis бир инсансынъ, севдигим — Ибрахимим,
Олмасын ич талабынъ шу зевкъ-сефасы гъурбетнинъ.*

МУХАММЕС

* * *

Бивефа черхин иши эр дем фигъан олмагъимиш,
Акъа-акъа гозълериминъ яши къан олмагъимиш.
Та Элестен бу язылмыш алныма эйвах, вах!
Чаре не башымда язы — бу гуню горьмегимиш,
Бу имиш такъдиринъ иши, гъурбете салмагъимиш.

Хасрете дюштим, медет, эй, бен гъамынъла михнете,
Зерредже мейиль итмезем, бен бу сафая ишрете,
Я суюм, я топрагъым чекти дияр-ы гъурбете.
Чаре не, башымда язы — бу гуню горьмегимиш,
Бу имиш такъдиринъ иши гъурбете салмагъимиш.

Шимдилик, достлар, беним гонълюм мелямет госътерир,
Адедидир эр гъамынъ сонъу селямет госътерир,
Горелим айин-е девран не сурет госътерир.
Чаре не, башымда язы — бу гуню горьмегимиш,
Бу имиш такъдиринъ иши, гъурбете салмагъимиш.

Дер ки, Умер лемезель Керим илях-и-ля-езал?
Салтанат джумле сенинъдир кетирир санъа зевал,
Гъурбет ильде чеке-чеке, олды къаметинъ хаял.
Чаре не, башымда язы — бугуни горьмегимиш,
Бу эмиш такъдиринъ иши гъурбете салмагъимиш.

Сатыр асты терджимеси^[21]

*Аджуvsыз бу тақъдирининъ иши эр вакъыт фигъан экен,
Акъа-акъа козълериминъ яши къан олмакъ экен,
Та Элестен бу язы башымда язылгъан экен,
Чаре не, башымда язы — бу кунни корымек экен,
Бу экен тақъдирининъ иши, гъурбетке къоймакъ экен.*

*Асремке тюштим, имдат, эй, мен гъамынъле миннетке,
Зерредже гонъюль бермем мен бу сефа-зияфетке.
Я сувум, я топрагъым чекти дияры гъурбетке.
Чаре не, башымда язы — бу кунни корымек экен,
Бу экен тақъдирининъ иши, гъурбетке къоймакъ экен.*

*Шимдилик даа меним гонълюм мелямет косътерир,
Адемтири, эр гъамнынъ сонъу селямет косътерир.
Бакъайыкъ, девран кузъгюси не сурет косътерир.
Чаре не, башымда язы — бу кунни коръмек эжен,
Бу эжен такъдирнинъ иши, гъурбетке къоймакъ эжен.*

*Дер ки, Умер, эбедий керим иляй бу не ал?
Салтанат джумле сенинъдир, ёкътырдыр санъа зевал.
Гъурбет ильде чеке-чеке олды дал боюм хаял,
Чаре не, башымда язы — бу кунни коръмек эжен,
Бу эжен такъдирнинъ иши, гъурбетке къоймакъ эжен.*



ЭДЕБИЯТ НАЗАРИЕСИ

РУКНЛАР

Аруз везнинен язылгъан эсерлернинъ белли бир окъулув къыраатлары бар.

Буны анъламакъ ичюн гъазельнинъ окъулув къыраатыны схемада косътерейик:

Фа и ля тун	фа и ля тун	фа и ля тун	фа и люн
Эй пе ри бой	ле пе ри шан	ол ду гъым биль	мез ми синъ
Ас ре тинъ ле	кунь де бинъ кез	оль дюгим биль	мез ми синъ
Багъыхус нинъ	гул ле ри не	буль буль э дим	бир за ман
Шим ди бен ден	юзъ че вир динъ	нол ду гъым биль	мез ми синъ

I II III IV

Биринджи сатырларда ачыкъ ве япыкъ эджаларнынъ къыскъя ве девамлы окъулувынынъ ишаретлери косътерильген.

Экинджи сатырда исе (*фаилятун фаилятун фаилятун фаилюн*) деп, шиирнинъ ольчюси ве эджанынъ къалышлары бериле.

Шиирнинъ ольчюси ве эджанынъ къалыплары арап тилинде рукин деп адландырыла.

Рукнларның маналары ёкъ. Олар шиирде нота вазифесини беджерелер. Рукнлар шиирнинъ везнини акъылымызгъа ве зеинимизге синъдирмек ичюн къулланылалар.

Шиирнинъ ольчюсими, везнини зеинимизге синъдирмек ичюн шиирде ишлетильген ве нота вазифесини беджерген эджа къалыптарына рукин дерлер.

Демек, юкъарыда (*фаилятун фаилятун фаилятун фаилюн*) деп косътерильген биринджи сатырда рукнлар берильген.

Бу рукнларгъа бакъып, Ашыкъ Умернинъ гъазели арузның насыл везнинен язылгъаныны къайд этейик. Биринджи сатырдахи эджаларның окъулув ишаретлерине бакъып, (— · — | — · — | — · — | — · —) Ашыкъ Умернинъ бу гъазели аруз везнининъ (*фаилятун фаилятун фаилятун фаилюн*) рукнинен язылгъаныны сечермиз.

Суаллер ве вазифелер:

1. Рукин демек не демек? Онынъ ширий эсерде беджерген вазифесини айттынъыз.
2. Шаркъ шириетинде насыл рукнлар къулланыла? Бу рукнларны схемада косътеринъиз. Къыскъа ве девамлы окъулувына даир мисаллер кетиринъиз ве анълатынъыз.

МУСТАФА ДЖЕВХЕРИЙ (?...—1720)



Мустафа Джевхерий XVII асырнынъ орталарында дөгъып, 1720 сенелери вефат эткен. О, XVII асырда Ашықъ Умернен бир сыртада тургъян ашықъ эдебиятынынъ темсильджилеринден бириди.

Мустафа Джевхерий медресе тасили коръген ве диван эдебиятыны терен бильген бир зат олгъан. О, мемлекеттен мемлекетлерге сеферлер япкъан, чокъ диярларны бойлап юрген. Атта Шам, Арабистан, Румелиде де олгъан.

Буюк истидат саиби Джевхерий ширий эсерлерини эки услюпте язғын. О, эм диван, эм саз тарзы шириетинде иджат эткен.

Эм диван, эм саз тарзы классик шириетинде иджат эткен шайрлернинъ эсерлеринде ватангъа, севгилисine ве аяткъа нисбетен асретлик дуйгъулары тасвирлене. Эсерлерде тасвирленген асретлик дуйгъулары фельсифий фикирлер иле бирлеше, айры бир мевзуларнынъ пейда олмасына мейдан яраты. Эсерлердеки фикир ве дуйгъулар юксек бедиетлик иле ифаде олунса.

Шайрнинъ иджадында айрыджа ер туткъан мустезат ве семаилер — диван тарзы классик шириет услюбинде язылгъан эсерлер сайылырлар. Юксек бедиийликке ляйыкъ олгъан къошма, тюркю, мани ве теджнислер классик шириет услюбинде язылгъандыр.

Мустафа Джевхерийнинъ шириети дигер саз шайрлерининъ иджады киби, чокъусы асретлик, ашыкълыкъ, къадын-къызынынъ дюльберлигини ифаделеген мевзуларгъа бағышланы.

Шайрнинъ 11 эдженен язылгъан къошмаларында ватан асретлиги ве гъурбетликнинъ инсан такъдириндеки адждыхысы, джефасы акс олунса.

«*Я, Раб, ниidже олур шу гъарип алым*» киби къошмасында Джевхерий дюньяда олып кечкен аятий ал — гъурбетлик маджрасыны мергин ибарелер иле тасвир эте:

*«Я, Rabbi, насыл олур шу гъарип алым,
Гъурбетке тюшкен иль манъа душман.*

*Ич күртарамам мен бу гәарип башым(ны)
Аягъым басылгъан ёл манъа душман».*

Къошманынъ биринджи сатырларында гъурбетлик меселеси халкъ ве инсанлар аятында муимден муим бир проблема олгъянан беян олuna. Бу дёртлюк гъурбетлик аджджысыны башындан кечирген шаирнинъ сымасыны джанландыра. Къошманынъ эр бир дёртлюгинде текрарлангъан «*Аягъымынъ бастыгъы иль банъа душман. Шу дагълардан акъкъан сель банъа душман. Тимарлар эттиги гуль банъа душман. Мейвасын вердиги дал банъа душман*

«*Банъа ярдан вазгеч дерлер...*» семаисинде шаир севгилисine олгъян муаббетлик ислерини буюк усталыкъ ве меарет иле ifадe этиe.

*«Банъа ярдан вазгеч дерлер,
Бен кечерим, гонъюль кечmez.
Эфтадеси чокътыр дерлер,
Бен кечерим, гонъюль кечmez».*

Семаининъ эр бир дёртлюгининъ сонъунда текрарлангъан «*Бен кечерим, гонъюль кечmez*» киби сатыр асretлиc дуйгъуларынынъ къувет иле янъгъырамасына хызмет этиe. Бойле этиip, фельсефий фикirнинъ тасвири бедиет дережесине котериле, Ватан, тувгъан юрт сымасы умумийлештирилип бериле.

Джевхерийнинъ мустезатларында инсан гонъюнинъ инджекликлери айрыджа бир аэнк иле тасвир олuna. Екюнлейиджи сатырлардаки суаллер фельсефий фикirлернинъ манасыны къуветлендирелер. Олар базыда тенбие киби де айтылалар. Меселя:

*«Дюльбер, санъа мен козълерни саргъуш демедимми,
Джазибели (ойнакъ, гонъюль алыйджы) демедимми?
Фигъан чыкъарып бу къул агълады демедимми,
Инъледи демедимми?»*

«*Дильбер, санъа бен козълери mestan демедимми, Феттан демедимми?*» киби мустезатында Джевхерий суаллернинъ ярдымы иле севгилисine ис-дуйгъусынынъ теренлигини бильдире.

О, севгилисine олгъан ис-дуйгъуларынынъ назиклигини, пак-лигини фельсефий анълайышлар вастасы иле беян эте. Бу къара-ма-къарышыкъ фена девирде ашкъ, муаббетлик ислери не къа-дар маджералы олгъаныны косытере. Ашыкъ олгъан инсан бир чокъ маниалардан кечкенини тасвирлей, севгининъ аизарыны пек яхши бильген шаир бизнен сырдаша, шахсий фикирлеринен акъылдане пайлаша.

Бойледже, XVII асырнынъ орталарында иджат эткен Мустафа Джевхерийнинъ эм диван, эм ашыкъ тарзы шиириетине къош-къан иссеси гъает буюктir. Онынъ зенгин иджадий асабалыгъы халкъымызгъа, медений варлыгъымызгъа хызмет этеджектir.

Суаллер ве вазифелер:

1. Мустафа Джевхерий шиириетнинъ насыл шекиллеринде иджат эткен? Шаир акъкъында бильген малюматынъыз иле пайлашынъыз.
2. Шаир озъ эсерлеринде насыл фельсефий фикирлер бильдире. Шаирнинъ диван тарзы классик шиириет условбинде язгъан эсерлери-нинъ шеклини къайд этинъиз.
3. Саз шаирлери тарзында язылгъан назм шекиллерни айтып кечи-нъиз. Шаирнинъ къошмаларында инсан такъдирининъ насыл бир аллары акс олuna?
4. Гъурбетлик мевзусына багъышлангъан эсерлерде шаирнинъ сымасы насыл ибарелер ве сатырларда джанландырыла? Сатырлардан мисаллер кетирип, исбат этинъиз. Бу къошманынъ серлевасыны айтЫНЪЫЗ.
5. «Банъя ярдан вазгеч дерлер...» семаисинде шаир насыл дуйгъу-ларны ифаде эте? Сатырлардан мисаллер кетирип, фикиринъизнен пай-лашынъыз.
6. «Дильбер, санъя бен козълери mestan демедимми?..» киби мустеза-тында не акъкъында айтыла? Фикирлеринъизни эсердеки сатырларнен багъланъыз.

Къошмалар^[22]

* * *

Я, Раб,nidже олур шу гъарип алым,
Гъурбете дюшели иль банъя душман.
Ич къуртарамам бен бу гъарип серим,
Аягъымынъ бастыгъы ёл банъя душман.

Я, Рабби, иргюр бени макъсадыма,
Асрет олдым яраныма, достума.

Къан буланыкъ гелен беним устюме,
Шу дагълардан акъкъан сель банъа душман.

Джуда дюштим, севдигими корьмедим,
Варып хакъ-и пае юзълер сюрьмедим.
Хар элинде дост багъына кирмедим,
Тимарлар эттиги гуль банъа душман.

Джевхерий дер: — Бу кунь баштан ашырды,
Хиджран атешийле багърым пиширди.
Элим сундукучча, мейвасын дюшюрди,
Мейвасын вердиги дал банъа душман.

Сатыр асты терджимеси^[23]

*Я, Рабби, насыл олур шу гъарип алым,
Гъурбетке тюшкен иль манъа душман.
Ич къуртарамам мен бу гъарип башым(ны)
Аягъым басылгъан ёл манъа душман.*

*Я, Рабби, ириштир мени макъсадыма,
Асрем олдым якъынларыма, достума.
Къан буланыкъ кельген меним устюме
Шу дагълардан акъкъан сель манъа душман.*

*Яңғызыз къалдым, севдигимни корьмедим,
Барып аякъ тозуна юзълер сюрьмедим.
Тикенли (юртта) дост багъына кирмедим.
Бакъышлар эткен гуль манъа душман.*

Джевхерий дер: — Бу кунь рухтан тюшюрди,
Айрылыкъ атешинен багърым(ны) пиширди.
Элимни узаткъанымнен мейвасын тюшюрди,
Мейвасыны берген дал манъа душман.

* * *

Эй, пери, джихане сен киби дильбер,
Не кельди, не келир, не кельсе керек.
Лаълынъ киби Лукъман тиръякъ-и экбер
Не булды, не булур, не булса керек.

Джефая башлады къадд-и мевзунынъ,
Та арша иришти ах-ы дерунынъ.
Бойле гидер исе чешм-и пюор-хунынъ
Не кульди, не кулер, не кульсе керек.

Эй, алем-и хуснинъ сахиб-къыраны,
Ольдюр кельб ракъиби, вирме аманы.
Ольдюрмезенъ кенди элинъле аны,
Не ольдю, не олер, не ольсе керек.

Бунджа дем козюмден акъаркен селлер,
Ваад этмиш икен сильмеге дильбер.
Ахдине дурмады ол пери-пейкер,
Не сильди, не силер, не сильсе керек.

Джевхерий, гузелим ирди паяна,
Бедир киби чыкъты о мех мейдана.
Бу джихана беним киби диване
Не кельди, не келир, не кельсе керек.

Сатыр асты терджимеси^[24]

*Эй, пери, джиангъа сен киби дюльбер,
Не кельди, не келир, не кельсе керек.
Эким киби зеэрге дерман олгъан тилинъни
Не тапты, не тапар, тапмаса керек.*

*Эзиет чеке башлады бой иле постунъ,
Та еди къат кокке етти ах чеккен гонълюнъ.
Бойле кетсе, къанларгъа баткъанъ козълеринъ
Не кульди, не кулер, кульмесе керек.*

*Алем гузеллигининъ эй, укюмдары,
Ольдюр копек бекчисини, берме аманы (дегенинъден
къалма, сёзюнъден данма),
Ольдюрмесенъ озюнъ элинънен оны —
Не ольдю, не олер, ольмесе керек.*

*Бу къадар козюмден акъаркен селлер,
Козюмни сильмеге сёз берген дюльбер
Сёзюнде турмады о гузель (юзълю) пери —
Не сильди, не силер, сильмесе керек.*

*Джевхерий, гузелим етти макъсаткъа,
Айнынъ он дёртю киби чыкъты мейдангъа.
Бу джиангъа меним киби дели (будала),
Не кельди, не келир, кельмесе (догъулмаса) керек.*

* * *

Бир кунь башым алыр чыкъар гидерим,
Бизе дагълар олсун иль дейи, дейи.
Къаялар башыны мескен идерим,
Меджнуннынъ кездиги бель дейи, дейи.

Яре яр олалыдан бери нашы,
Багърыма урулды мелямет ташы.
Асрет иле ақъар чешмиминъ яшы,
Умман олды кетти сель дейи, дейи.

Эр къачан дильдаре арз этсем халым,
Ах-у-зар этмеге къалмаз меджалым.
Фердалара салар бени бир залым,
Ашыкъ исенъ, дагълары дель, дейи, дейи.

Ол беним гонълюми алды местане,
Темеллюк театрлю косътерди джане.
Шимди идер юз бинъ тюрлю бахане,
Къоркъарым, тан идер иль дейи, дейи.

Чюнки раҳм этмездинъ, ах, сёзюме,
Ашкъынъле атешлер якътым озюме.
Яничюн эвельден кульдинъ юзюме,
Эй, беним, Джевхерим, кель, дейи, дейи.

Сатыр асты терджимеси^[25]

*Бир кунь башымны алып чыкъар кетерим,
Бизге дагълар иль олсун деп, айта, айта.
Къаялар башыны ятакъ ерим этерим,
Меджнуннынъ кезгени — бель деп, айта, айта.*

*Яреге яр олгъанымдан берли
Багърыма урулды чекишиов ташы.
Асрет иле ақъар козюмнинъ яшы,
Буюк денгиз олды кетти, сель деп, айта, айта.*

*Не вакъыт севгилиме арз этсем алым(ны),
Сес чыкъарып агъламагъа къалмаз меджалым (такъатым).
Къыяметке къояр мени бир залым,
Ашыкъ олсанъ, дагъларны теш деп, айта, айта.*

*Сархош киби о меним гонълюмни алды,
Мал-мульк арттырмакъ мерагъын(ы) джангъа косътерди.
Шимди юз бинъ тюрлю себеп, тапмакъта,
Къоркъам, юзылер бетиме иль деп, айта, айта.*

*Чюнки аджынмаз эдинъ, ах, сёзюме,
Ашкъынъ иле атешлер якътым озюме.
Я ничюн эвельден кульдинъ юзюме,
Эй, меним, Джевхерим, кель, деп, айта, айта.*

СЕМАИЛЕР

Не агъларсынъ, эля козълюм,
Гонъюль сенден айрылырмы?
Бу гузеллик сенде э肯,
Гонъюль сенден айрылырмы?

Эп гузеллер бура кельсе,¹
Ашыкъынъ халиндеп бильсе,
Джумле алем гузель олса,
Гонъюль сенден айрылырмы?

Гузеллер кельсе джихане²
Хуснинъ олмазды бахане,
Падиша олсанъ девране,
Гонъюль сенден айрылырмы?

Ол Джевхерий кельмейиндже,³
Гъоньдже гулонъ дермейиндже,
Я сен, я бен ольмейиндже,
Гонъюль сенден айрылырмы?

¹ Эп гузеллер бура кельсе — бутюн гузеллер мында кельсе

² Хуснинъ олмазды бахане — гузеллигинъ (дюльберлигинъ) олмаз эди себеп

³ Гъоньдже гулонъ дермейиндже — гъондже гулонъ(ни) джыймагъандже

* * *

Банъа ярдан вазгеч дерлер,¹
Бен кечерим, гонъюль кечмез.
Эфтадеси чокътыр дерлер,
Бен кечерим, гонъюль кечмез.

Ашкъына тюштим не чаре,²
Саташмышым ах-у-заре.
Чекерлэрсе бени даре,
Бен кечерим, гонъюль кечмез.

Ашкъ тузагъына тутулдым,
О яре яндым, якъылдым,
Араизден³ де чекильдим,
Бен кечерим, гонъюль кечмез.

Сени банъа верен хакътыр,
Къозум, ашыкъларынъ чокътыр.
Северим, инкярым ёкътыр,
Бен кечерим, гонъюль кечмез.

Джевхерийдир о къашларынъ,
Ашыкъка чокътыр ишлеринъ,⁴
Харман сув ки дервишлеринъ,
Бен кечерим, гонъюль кечмез.

* * *

Бугунь бен бир багъа кирдим,
Не багъ дуйды, не багъбанджы.
Гулюнъ шефталисисн дердим,
Не багъ дуйды, не багъбанджы.

Багъынъ дуварындан аштым,
Къырмызы гулюне къоштым.
Оптым, сардым, эляллаштым,
Не багъ дуйды, не багъбанджы.

¹ бен кечерим, гонъюль кечмез — мен кечерим (вазгечерим), гонъюль кечмез (вазгечмез)

² саташмышым ах-у-заре — оғырагъаным ах-у заргъа (аизаргъа)

³ араиз — баш язысы, такъдир

⁴ харман сув ки дервишлеринъ — берекетли (толып ташкан сув киби) чокътыр дервишлеринъ

Багъынъ къапысыны ачтым,
Санарсынъ дженнете дюштим.
Толдырдым бадесин¹ ичтим,
Не багъ дуйды, не багъбанджы.

Сааринъ танъ ери атты,
Бульбуль эльван-эльван² отти.
Джевхерий юкюни тутты,
Не багъ дуйды, не багъбанджы.

МУСТЕЗАТ

* * *

Дильбер, санъа бен козълери местан демедимми,
Феттан демедимми?
Эфгъан идерек бенде бу гирьян демедимми,
Налан демедимми?
Мефтион олалы сен мех-и табана гонъюльден
Ах, не келир эльден.
Къаддими хилял эйледи девран демедимми,
Хиджран демедимми?
Севмез бени ярnidжее дек, шах-и левендим,
Сен кенди эфендим.
Кель, севдиджегим, эйлеме бухтан демедимми,
Эр ань демедимми?
Эрменъ не аджен къадр-и висалынъле мурада
Бу деври фенада.
Эйям-и шериф Джевхерий къурбан демедимми,
Ферман демедимми?

Сатыр асты терджимеси^[25]

Дюльбер санъа мен козълерни саргъуш демедимми,
Джазибели (ойнакъ, гонъюль алыйджы) демедимми?
Фигъан чыкъарып бу къул агълады демедимми,
Инъледи демедимми?

¹ толдырдым бадесин — толдурдым ашкъ шарабыны — Аллахкъа севгимни изхар эттим, беян эттим.

² эльван-эльван — чешит-тиюрлю макъамлар уйдурып.

Севда олсанъ, сен пармакъ айгъа гонъюльден
 Ах, не келир эль(инъ)ден.
 Боюмны янъы ай эйледи заман демедимми,
 Айрылыкъ (асретлик) демедимми?
 Севmez мени яр не вакъыткъадже, кучълю шахым,
 Сен меним эфендим.
 Кель, севгилим, ялан айтма (бейфтан) демедимми,
 Эр ань демедимми?
 Иришменъ не аджен къадр-севгинънен мурадынъа
 Бу фена девирде,
 Куньдюзни мубарек Джевхерий къурбан демедимми,
 Эмир (буйрукъ) демедимми?



ЭДЕБИЯТ НАЗАРИЕСИ

ШАРКЪ ШИИРИЕТИНИНЪ НАЗМ ШЕКИЛЛЕРИ. СЕМАИ. МУСТЕЗАТ

Семай ве мустезат шаркъ шириетининъ назм шекиллеридир. Бу ширий шекиллер орта асыр къырымтатар назмиетинде пек кениш къулланылған эди.

Секиз эджа иле язылған шиирге *семай дерлер*. Семайнинъ энъ азы — учъ дёртлюктен, энъ чокъу исе беш-алты дёртлюклерден ibaret олур.

Семайнинъ тизилиши къошманынъ тизилиш бичимине бенъзер.

Мустафа Джевхерийнинъ «*Банъа ярдан вазгеч дерлер*» ширий эсери насыл назм шеклинде язылғаныны талиль этейик. Схемасыны айырайыкъ ве косятерейик.

Ба - нъа яр - дан	ваз - геч	дер - лер
Бен ке - че - рим	го - нъюль	кеч - мез
Эф - та - де - си	чокъ - тыр	дер - лер
Бен ке - че - рим	го - нъюль	кеч - мез.

I	II	III	IV	V
а	с	д	з	х
в	с	д	з	х
а	с	д	з	х
в	в	в	в	в

Тизильген схемаларны талилимиизге коре, бойле анълата билемиз. **Биринджиден**, ширий эсердеки сатырлар секиз эджа иле язылгъаныны къайд этемиз. **Экинджиден**, бу ширий эсер беш дёртлюктен ибарет олгъаныны сечемиз. **Учонджиден** исе, сатырларнынъ къафиелешюв схемасы къошма киби назм шеклининъ схемасына бенъзегенини косытеремиз. Бойле этип, бу ширий эсернинъ эсас хусусиетлерине бакъып, онынъ семаи олгъаныны айырамыз.

Бойледже, секиз эджа ольчоси иле язылгъан, учъ-алты дёртлюклерден ибарет олгъан ве сатырларынынъ къафиелешюв схемасы къошманынъ къафиелешюв схемасыны анъдыргъан ширий эсерге семаи дерлер.

Демек, Мустафа Джевхерийнинъ «Банъа ярдан вазгеч дерлер...» ширий эсери шаркъ шириетининъ семаи шеклинде язылгъандыр.

Мустезат киби ширий жанрнынъ эсас хусусиетleri неден ибарет экен? Оны анъламакъ ичюн мустезатлар деп берильген ширий эсернинъ тизилиши ве къафиесини айырайыкъ.

Башта бир эсернинъ тизилиш хусусиетини сечмек ичюн, эр бир сатырда ачыкъ ве япыкъ (девамлы ве къыскъа) эджаларнынъ сайысыны косытерейик. Сатырнынъ къафиелешюв тертибини арифлернен язайыкъ.

Дильбер, сана бен козьлери mestan демедимми,
Феттан демедимми?
Эфгъан идерек бенде бу гирьян демедимми,
Налан демедимми?
Мефтуон олалы сен мех-и табана гонъюльден
Ах, не келир эльден?
Къаддими хилял эйледи девран демедимми,
Хиджран демедимми?
Севmez бени яр ниджее дек, шах-и левендим,
Сен кенди эфендим.
Кель, севдиджегим, эйлеме бухтан демедимми,
Эр ань демедимми?

Эрменъ не аджеپ, къадр-и висалынъле мурада,
Бу деври фенада?
Эйям-и шериф Джекхерий къурбан демедимми,
Ферман демедимми?


а (14)
а (6)
а (14)
а (6)
в (14)
в (6)
а (14)
а (6)
с (14)
с (6)
а (14)
а (6)
д (14)
д (6)
а (14)
а (6)

Эсернинъ биринджи ве экинджи сатырларындаки ачыкъ ве япкъ (узун ве къыскъ) эджалар бири-бири артындан белли бир тертипте ерлешкендир. Биринджи сатыр — 14 эджадан, экинджи сатыр — 6 эджадан ибараттири. Сатырларнынъ къафиелешшюв тертиби: *aa, aa, vv, aa, cc, aa, dd, aa* шеклиндедир.

Демек, месневи шеклинде къафиелешшип, аруз везнинен язылгъан ачыкъ ве япкъ, узун ве къыскъ сатырлардан ибарат олгъан ширий эсерге мустезат дерлер.

Суаллер ве вазифелер:

- Шаркъ шириетининъ гъазель, месневи, къошма ве шаркъыдан гъайры даа насыл назм шекиллерини билесинъиз? Бу назм жанрында иджат эткен шаирнинъ адыны айтынъыз.
- Семаи къач эджа ольчиоси иле язылыр? О къач дёртлюктен ибарат ола билир? Буны эсерлернинъ сатырларына эасасланып анълатынъыз.
- Семаидеки сатырларнынъ къафиелешшюв схемасыны анълатынъыз. Мисаллернен исбатланъыз.
- Насыл ширий эсерге семаи дерлер? Мустафа Джевхерий язгъан семаилернинъ серлевасыны айтынъыз.
- Насыл ширий эсерге мустезат дерлер? Мустезатнынъ эсас хусусиетлерини айтынъыз. Мисаллерде косьтеринъиз ве анълатынъыз.



КЪЫРЫМТАТАР ЭДЕБИЯТЫНЫНЪ РУС ИСТИЛЯСЫ ДЕВРИ

(*Рус истилясындан (1783с.) «Терджиман» газетасынынъ чыкъып башлагъанына (1883 с.) къадар девир*)

Къырымтатар эдебияты тарихында Къырым Ханлыгъы деври пек гурьдели инкишаф эткен девирдир. Бу вакъытта пейда олгъян эдебият мундеридже, гъае, мевзу, шекиль джеэтинден гъает зенгин асабалыкъ сайыла. Бу девирде язылгъан эсерлерни миллийлик дүйгъусы киби чизги айыра. Миллийлик дүйгъусы иле ашлангъан бу эдебият классик асабалыгъымызнынъ къыйметли къазанчыдыр. Олар бугунъ де бугунъ эдебий вариетимиздинъ классик джевхерлеридир.

Орта асыр къырымтатар эдебиятында бу девирде буюк бир джерьян яратылды. Чюнки бу девирде халкъынынъ келеджеги-ни къайгъыргъан укюмдарлар бар эдилер. Олар эдебияттымыз-ны джан-юректен севгенлер, онынъ илерилев эснасына къолтуткъанлар. Озълери де бутюн суялеси иле онъа хызмет эткенлер, къыйметли эсерлер язгъанлар.

Амма девирлер денъише. 1783 сенеси Русие Къырымны заптэтте. Чар укюмети тувгъан юртумызнынъ эр бир кошелеринде озүнинъ зорбалыгъыны эп арттыра. Чар укюмети 1853—1859 сенелери Къырымдаки махсулдар топракъларны чекип алыш, миллетни юртундан къуррутмакъ ёлларыны арамагъа баштай. Халкъны меджбурий иджретлик ёлуна къоя.

1874 сенесининъ январь айынынъ биринден къырымтатар яшларынынъ къанун боюнчы чар ордусына аскер алынувы иджретликке кетювни кескинлештире. Чар укюметининъ бойле зорбалыгъы алтында Къырымдаки ичтимай аят денъише, халкъынынъ омюри агъырлаша. Бу девирде къырымтатар халкъынынъ буюк къысмы зорбалыкъ эсаретинден къуррутмакъ ичюн Тюркиеге иджрет этте. Окъугъан ве язгъан инсанларнынъ сайысы эксиле. Медений ве эдебий иджаткъа истек сёне. Кениш

кутьле арасында яшайыш хорлукълары арткъан сайын классик эдебият унутыла башлай. Медений инкишаф, бедиий иджат юз йылдан зияде меджбурий дургъунлыкъка (токъталувгъа) укюм этиле. Бу девир эдебиятта «къара асыр» деври деп адландырыла. Нетиджеде, XX асырның биринджи черигиндеки девирде къырымтатар эдебиятының инкишафы эр бир джеэттен (тарафттан) зайыфлаша.

Бу вазиетте эвель язылгъан классик эсерлернин мевзу, гъаеси, ширий тизилиши, шекиллери, бедиий тасвирий васталары унутылып, фукъарелеше. Ширий везинлернин къулланылуу денъише. Чокъусы алларда пармакъ везни ишлетилен. Бедиий иджатның илерилеви токътала. Эдебиятта хызмет эткен муэллифлернин сайысы азлаша.

Бу девирде язылгъан эсерлернин эсас мевзу, гъаеси халкъымыздының фаджиалы такъдирине, иджретликке, багъышлана. Миллетнин агъыр вазиети, дуйгъу-тюшүндөлөрдөр ве нефрети иджретликке къаршы дөгъруттылып ифаделене. Халкъ тарихындаки бу адживане вазиет эдебиятта пек кескин тасвир олунна. Чар сиясетинин ақъикъий — баскъындажы юзю ачыла.

Эсерлерде халкъымыздының топракъларыны тутып алгъан чар укюметинин халкъны башкъя ерлерге кочьмеге теклиф ве меджбур эткени косытериле. Халкъның дини, урф-адетлери, миллий шууры, намус-ахлякъы акъартленгени акъкъында икяе олунна.

Чар акимиетинин зулумы, иджретликкени фелякети ве аскерликке алув белясы адий халкъ тилинде айтыла ве языла. Иджретликкени икътисадий, ичтимаий ве маневий себеплери халкъ яратыджылыгъының чынъ, мане, йырлар ве дестанлар киби жанрларында иджат этиле. Бойле этип, муреккеп девирнин сарсынтылары нетиджесинде иджрет (муаджир) йырлары (тюркюлери), дестанлары пейда ола.

Муаджир тюркюлеринде, дестанларында тасвирленген мевзу, гъаелер Исметий ве Эшмырзаның иджатларында озь аксини коре.

Исметийнин «Кефе дестаны», «Озю вакъиасы дестаны» ве Эшмырзаның «Солдатлыкъ йырлары»нда медений инкишафта бедиий иджатта дургъунлыкъ деврини («къара асыр» деврини) пейда эткен сиясий себеплер айдынлатыла.

Халкъымыздының миллий аньанелерден, асырлар девамында күтюлип келинген яшайыш анаясасындан ич де айрылмагъа истемегени бу эсерлерде олюмден де бетер бир вазиетнен тенъештирилип косытериле.

Икътисадий, ичтимаий агъырлыкъларгъа къаршы дөгъгъан халкъымын ачууы, нефрети бу эсерлерде авам халкъымын тили,

дуйгъу-фикаирлери иле бильдириле. Эдебиятнынъ бойле бир аджыныкълы вазиетинде Орлы Сеит Халиль, Исметий, Эшмырза къарт, Абибулла Керем, Абдураман Къырым Хавадже, Абдурефий Боданинский киби муэллифлер эдебияттыңынъ девам этильмесине белли иссе къошалар. Озылерининъ язгъан бедиий эсерлери-нен эдебияттыңынъ темелини къавий тутмагъа тырышалар.

Эсерлерде ишлетильген халкъ ибарелери, сёзлери, айтymлary, бу девир эдебияттында тизильген миллий мунитни ве тарихий вакъиаларны айдынлаталар. Тарихий вакъиалар аятий акъикъат эсасында тасвирлене. Эдебияттыңынъ дургъунлыкъ девринде иджат этильген эсерлерде чар укюметининъ халкъымызгъа япкъан зорбалыгъы ве бу вахший сиясеттинъ халкъ такъдирине япкъан акъибети ачыкъ-айдын косытериле.

Бойледже, къырымтатар халкъынынъ дургъунлыкъ девринден бизим кунюмизге етип кельген эсерлер о девирде олып кечкен тарихий вакъиаларны олгъаны киби айдынлатмагъа хызмет этелер. Къырымтатар эдебият тарихынынъ Рус истилясы деврине айт малюматларны араштырып тапмагъа имкян яраталар. Бу девирде язылгъан эсерлерининъ къырымтатар эдебияты тарихында туткъан ерини айырмагъа мейдан азырлайлар. Авам халкъ тилинде язылгъан эсерлерининъ хусусий чизгилерини сечмеге ярдым этелер.

Бойле этип, Рус истилясы девринде классик эдебиятнынъ илерилеви сиясий дургъунлыкънынъ тесириinden тепрендирильгенине бакъмадан, эдебий эснас эп девам эте. Эдебият тарихында, авам халкъ тилинен ашлангъан, янны аятий ве тарихий акъикъатны олгъаны киби, реаль тасвир эткен реалистик эдебият джеръяны джанландырыла.

Суаллер ве вазифелер:

1. Къырымтатар эдебияты тарихынынъ Къырым Ханлыгъы девринде-ки эдебияттың хусусий чизгилерини айтынъыз. Классик эдебияттың къыйметли къазанчы укюмдарларнынъ насыл арекетлеринен бағълы эди?

2. Иджретликнинъ икътисадий, ичтимай ве маневий себеплери фольклорнынъ насыл жанрларында иджат этиле? Бу вакъыт насыл эсерлер (жанрлар) пейда олгъаныны айтынъыз.

3. Бедиий эдебиятта бу жанрлар къайсы музллифлерининъ эсерлеринде озы аксини коре? Эсерлерининъ серлеваларыны хатырлатынъыз. Бу эсерлерде тарихий вакъиалар насыл тасвирлене?

ИСМЕТИЙ^[26]

XIX асырда яшап иджат эткен ве миллий шириетимизнинъ темелини зенгинлештирген шаир Исметий къырымтатар эдебияты тарихында «Кефе дестаны», «Озю вакъиасы дестаны» ве къошмасы иле ер алгъандыр.

Исметий Къырымнынъ пек мешур дин ве илим оджагъы сайылгъян Колеч медресесинде окъугъан. О, Кефе медресесининъ мудериси Абдурахман Эфенди Кефевийнинъ янында тасиль ве илим хызметлери иле огърашкъан. Сонъра Истанбулда да тасиль ве илим алеминде эйи хызметлер япкъан.

1787—1791 сенелери Тюркие ве Русие арасында башлангъан дженкте иштирак этмеге къарап берген Исметий, Озю(Очаков) къалесине ёлланылгъан. Озю муаребесини коръген шаир, къале руслар тарафындан запт олунгъанда, эсирликке тюшкен. О, бир къач сенелер анда булунгъан сонъ, Колеч коюне къайткъан. Джамиде худдамлыкъ (хызметчи) ве теккиеде шейхлик вазифелерини эда эткен. Онынъ эдждатлары шейхлер сулялесинден тёрген.

Исметийнинъ бабасы Шайып Челеби де муляйим табиатлы инсан экен. О, бир чокъ эсерлер ве иляхилер язып къалдыргъан шейх олгъан. Шайып Челеби, 1766 сенеси аджылыкъкъа кетмеге ниетленгенде, Истанбулда токътай. Стамбул дживарындаки Седдюль-Бахир къалесинде дефн олунгъан бабасы — Абдусамед Эфендининъ къабрини зиярет эте. Бабасынынъ такъдири Шайып Челебини тюшонджеге далдыра. Бу ал онынъ сагълыгъына тесир эте. О, гъам-къасевет чекип, хасталана ве вефат эте. О, Седдюль-Бахир къалесинде бабасынынъ къабри янында дефн олuna.

Суаллер ве вазифелер:

1. Исметий Эфендининъ аяты акъкъында не билесинъиз? О, насыл вазифелерде хызмет эткенини икяе этинъиз.
2. Исметийнинъ бабасы насыл инсан олгъан? О да, Исметий киби эсерлер язгъанмы?
3. Исметийнинъ эдждатлары шейхлер сулялесинден тёргенини насыл бир малюматтан сечтинъиз. Метиндең исбатлайыджы сатырлар иле анълатынъыз.

«Кефе дестаны»ның мундериджеси

Исметийнинъ авам халкъ тилинде язылгъан эсерлеринде о, яшагъан девирнинъ ичтимай-сиясий шарапти акъкъында малюмат бериле.

Исметийнинъ «Кефе дестаны» XIX асырнынъ башларында 1813—1814 сенелери язылгъандыр. Бу девирде Русиенинъ зорбалыгъына чыдап оламагъан халкъ Къырымдан Тюркиеге иджретликке кетип башлай. Чюнки 1806—1812 сенелери Русие ве Франция арасында олып кечкен дженк нетиджесинде мемлекетте кой ходжалыгъы пек агъыр йыкъынтыгъа оғърай. Ойле де алы пек фена олгъан халкъынынъ вазиети даа да мушкюллеше. Дженклер, ачлыкъ, чар ордусына аскерликке алынувы халкъны иджрет этмеге ве фена алларгъа кельмесине уйтектлей. Бойле вазиет веба (чума) хасталыгъынынъ джайрамасына себеп ола.

Эпидемия этаракъа джайрамасын деп, халкъкъа джами ве киль-сelerde топлашмагъа ясакъ олuna. Кефе шеэри карантинге япыла.

Бу хасталыкъ нетиджесинде Кефе эалесининъ чокъусы олелер. Исметий бу хусуста шойле дей:

Мезарымыз учь рублеге къазылды,
Ольмемизчон артыкъ ферман язылды.
Эм докъуз юз отуз бир олю тизильди,
Устюмизге санки саркъты бир къале.

Веба хасталыгъынынъ чокъ джайрамамасы, башкъаларына юкъмамасы ичюн, Кефенинъ сокъакъларына къаравуллар къоюла. Бу къаравуллар Кефеге келип кетювни ясакъ этелер. Эр не къадар келип-кетювлөр ясакъ этильсе де, бу вакъытта артыкъ веба хасталыгъы аман-аман Къырымнынъ бир чокъ ерлерини къапладап ала.

Бебадан къорчалаймыз деп, халкъны меджбурий суретте карантинге топлайлар, Шу арада оларнынъ малы-мулькю якъыла. Бойле этип, халкъны мал-мульктен марум этелер. Дёрт дивар ичесинде карантинге отурталар. Исметий бу вакъианы бойле сатырларда айдынлата:

Эй, шанлы эфендим, эй, падишамыз,
Бу Кефе шеэрине сен назар эйле.
Япылды карантин, тизильди ташы,
Санки олды къуш кечильмез бир къале.

О девирнинъ аким сыныфынынъ векиллери эмекдар күттлени таламакъ ичюн озылерине эльверишли чарелерден файдаланаалар.

Нетиджеде, халкъ бир койден дигер койге, бир малледен дигер маллеге кочюриле ве эвлери-баркълары тутылып алына.

Исметий эсеринде чар аскерлери (зебанийлернинъ) халкъкъа япкъан джанаварлыкъларыны тарифлей:

Зебанийлер дёрт яныма кельдилер,
Баштан — аякъ мешин урба кийдилер,
Къанджер иле олютерни чектилер,
Къана, кимден ярдым олсун Кефеге.

Дестанда бу адис-вакъиалар шаирнинъ сеси иле халкъ адындан тарифлене. Нетиджеде шаирнинъ сеси халкъ сесинен бераберликте янъгъырап, айны девирде котерильген муим меселелер буюк кескинликнен айдынлатыла. Бойле муим меселелер эсернинъ бир сыра сатырларында тасвир олуна.

«Къарадан эм деръядан багъланды ёллар,
Башымызгъа недир кельген бу аллар!»

«Насыл бир зулумдыр язылды башкъя,
Захиресиз, согъумсыз къалдыкъ къышкъя».

Бу сатырларда халкъ сымасы тасвираты авам халкъ тилинде къулланылгъан бедиий тасвирий васталарнен беян олуна: «*Яшавдан, джанындан усланды, олдыкъ тамакюн, заметлендик, ёкъ хидает, олса эди бир мерамет, эмир олды татлы джаным больмеге, кок юзюне чыкъты аналар сеси*» киби ибарелер ве сатырларда халкъ тилиндеги нефислик ве бедиетлик ачыкъ-айдын тасвиrlenе.

«Кефе дестаны»нда беян этильген тарихий вазиетлер халкъ тилинен реаль суретте тасвир этилелер. Бу девирдеки зорлукълар ве халкънынъ башына тюшкен мушкюлликлер эсерде тафсилятлы беян олуна.

Халкънынъ мераметлик дуйгъу-ислери бойле сатырларда тасвир олуна:

«Чокъ виляет: — Языкъ, — деди — Кефеге».
«Джем алып, эписи зарланып агълар,
Бу не буюк, зор фелякет Кефеге?!»
«Олса эди, бир мерамет Кефеге?!»

Демек, бу сатырларда халкънынъ башына тюшкен мусибетлер чоңуусы алларда ичтимай-сиясий вазиетлернинъ тесириinden даа зияде осаллашкъаны косьтериле. Халкъ ве джемиетнинъ илерилевини дженкъ, хасталыкълар чаналаткъаны халкъ нидасы ве садасынен тасвир олуна.

КЕФЕ ДЕСТАНЫ^[27]

(Дестандан парча)

Кефе карантиниден чыкъты бир атеш,
Ич кимседен ёкътыр ярдым Кефеге.
Дженк мейданы киби инъледи саваш,
Чокъ виляет: «Языкъ, — деди, — Кефеге».

Зебанийлер дёрт яныма кельдилер,
Баштан аякъ мешин урба кийдилер,
Къанджер иле олюлерни чектилер,
Къана, кимден ярдым олсун Кефеге?!

Къарадан эм деръядан багъланды ёллар,
Башымызгъа недир кельген бу аллар?
Джем олып, эписи зарланып агълар,
Бу не буюк, зор феляket Кефеге?!

Агълашты джумлеси, шашты эр инсан,
«Ай-вай» этерек, эйледи фигъян,
Къаплады Кефени, этти пис зиндан,
Иришкейди бир хидает Кефеге.

Джами иле кильселери къапалды,
Эр кес яшавдан, джанындан усланды.
Эп ольген олюлер атешке янды,
Ойле къопты бу къыямет Кефеге...

Севинмединик, биз кульмединик ич бир кунь,
Кучюк-буюк — эп(и)миз олдыкъ тамакюн¹,
Чаре ёкъ чыкъмагъа, ич дегиль мумкцион,
Кимсе бильмез, бу не алдыр Кефеге.

Карантинге биз де кирдик, не чаре?
Артыкъ эштен, досттан олдыкъ бичаре.
Топлады, къувурды, сыйкъты бир ерге,
Заметлендик, языкъ олды Кефеге.

¹ олдыкъ тамакюн — там махкюм — бутюнлей махкюм олдыкъ, эпидемия вакътында тизильген вазиетнинъ сыйкынтысында сиясетнинъ агъырлыгъыны чекмеге укюм этильдик

Дёрт-беш юз тахтадан япылды япымыз,
Къапалыр акъшам, ачылыр саба къапымыз.
Дуагъа башладыкъ биз мында эп(и)миз,
Олмагъан эди бойле сыкълет Кефеге.

Эр кунь саба эким келир де бакъар,
Тюрлю сылтав иле бизлерни якъар.
«Пошол дурак!» — дер де, турмай о къачар,
Не ал олды? Бу да миннет¹ Кефеге.

Забитлер² къапунынъ огюндөн кечер,
Къалентирджи келип ипини чекер.
Ипни чеккенде эм, берир о хабер,
Бу да бойле бинъ «бешарет» Кефеге.

«Пошол ты к чёрту!» — деп багъырыр,
Бизни копек чагъыргъандай чагъырыр.
Бойле алдан эр кунь башынъ агъырыр,
Чокъ шикляет этемиз биз Кефеге.

Одунымыз ич булунмаз, эм ёкътыр комюр,
Устюмиз ачыкътыр, ягъмакъта ягъмур,
Астымызда олды бир къарыш чамур,
Шимдицен сонъ ёкъ хидаёт³ Кефеге.

Къыркъ эки кунь къалентирде бекледик,
Козълеримизден къанлы яшлар биз тёктик.
Кимимиз нидже арестлик эм зар чектик,
Олса эди бир мерамет Кефеге.

Он эки кунь Булгъанакъта бикъаар,
Исар тюбю боран, ягъмур, къар ягъар.
Эштафет ёлладыкъ, ич кельmez хабер,
Кимлери де олур джеллят Кефеге?!

Чакъмакълыкътан чыкъты бир къар туфаны,
Уфюрди учь saat, тутты эр яны.
Кимлер коръген бойле туфан, боранны,
Кимден ярдым олур экен Кефеге?!

¹ миннет — эйилик, тешеккюр, шукюр

² забит — аскер, офицер, субай

³ хидаёт — Аллахкъа эманет

* * *

Эй, шанлы эфендим, эм падишамыз,
Бу Қефе шеэрине сен назар эйле!
Япыйлды къалентир, тизильди ташы,
Санки олды къуш кечильmez бир къале.

Бир начальник тайинленди устюне,
Кимиси де тюштю онынъ къастына,
Кимиси де мужде айтты достуна,
Чокъ мусульман тюштю онынъ ичине.

Джеваплар сёйледи, кимсе инанмаз,
Олюм хаберине джанлар даянмаз.
Ниджелери къоркъар ич де алданмаз,
Ачылса хазинелер, малгъа бакъылмаз.

Дёрт янымызыны къаравуллар сардылар,
Гъафлет юкъусында келип бастылар.
Ана-баба эвлядындан кусьтюлер,
Чагъырышты сабийлер, кельди амангъя.

Азыр эди азраиллер кельмеге,
Эмир олды татлы джаным больмеге.
Рухсет ёкътыр суаль сорап бильмеге,
Коръген шашар бойле агъыр бу куньге!

Зеэр киби эсер эким нефеси,
Малдан, мульктен айырылды джумлеси.
Кок юзюне чыкъты аналар сеси,
Насыл юрек чыдар бойле белягъя!

Орталықълар ал къанларгъа боянды,
¹ Къурт иле яш да берабер янды.
Кими оть къусып, къоркъудан ольди,
Кимнинъ сарысы чыкъты юзюне.

Мезарымыз учь рублеге къазылды,
Ольмемизчюн артыкъ ферман язылды.
Докъуз юз отуз бир олю тизильди,
Устюмизге саркъты санки бир къая.

¹ Къурт — къарт

Насыл бир зулумдыр язылды башкъя,
Захиресиз, согъумсыз къалдыкъ къышкъя.
Бу зулумлыкъ япылды къарткъя-яшкъя,
Баштан-аякъ бутюн халкъ кийди сия.

Сыгъырлар мунърешти, бу неге лязим,
Ханелер йыкъылды, бойледир язым.
Меджитлер къапалды, ёкътыр ниязы,
Умютлер кесильди, къалдыкъ бичаре.

Ачылды богренлер¹, къанлар тёкюльди,
Нидже анелернинь багъры сёкюльди.
Ана-эвлят озюнден кечти, йыкъылды,
Ёлда къалдыкъ, тапылмады бир чаре.

Фаслы чокъ Кефенинъ сёйленмез анджакъ,
Маллелерге тюштю толу тамырджакъ².
Къаравуллар сени келип аладжакъ,
Чыкъмаз исенъ, ерсинъ къатты бир сопа.

Чагъырынъ экимни, хастагъя кельсин,
Эджель шербетинден бизге де берсин.
Чокъусы умутсиз мезаргъя кирсин,
Ольгенлер чокъ, ич алымаз эсапкъя.


Къан иле боянды топрагъы, ташы,
Козълерининъ тёкюльди гъондже яшы.
Минареге кирди генерал башы,
Муждеге кельгенге беринъ бир къафа.

Суаллер ве вазифелер:

- Исметийнинъ «Кефе дестаны»нда насыл бир тарихий вакъиалар акъкъында лакъырды кетмекте? Джевабынъызын дестандаки сатырлармен исбатлантызы.
- Веба хасталыгъынынъ пейда олмасына не себеп олгъаныны айтынъызы. Карантинге тюшкен Кефенинъ алыны Исметий насыл бир адżyныкълы келимелернен (ибарелернен) анълаты? Мисаллер кетирип та-рифленьзис.
- Козълеримизден къанлы яшлар биз тёктик. Кок юзюне чыкъты аналар сеси киби сатырларда халкъынынъ насыл вазиети тасвир олунса?

¹ богрен — хасталыкъынынъ энъ къайнагъан, энъ агъыр вакъты

² тамырджакъ — атешли бурчакълар



КЪЫРЫМТАТАР ЭДЕБИЯТЫНЫНЪ УЯНУВ ДЕВРИ

(«Терджиман» газетасынынъ чыкъып
башилганындан (1883 с.)
Совет деврине къадар (1917 с.))

Уянув девриндеки эдебиятнынъ илерилеви

Къырымтатар эдебияттынынъ Рус истилясы девринде олып кечкен тарихий вакъиаларнынъ тесиринден миллий эдебияттынъ инкишафы бутюнлей токътатылмады. Исметий, Эшмырза киби муэллифлернинъ эсерлери эдебият джеръяныны джанлан-дырылар. Оларнынъ эсерлеринде тасвир олунгъан тарихий, ичтимай, сиясий меселелер ве адисе-вакъиалар къырымтатар эдебияттыны муйим тарихий малюматларнен теминледи.

Бу девирден сонъ, XIX асырнынъ сонъу ве XX асырнынъ башында къырымтатар эдебияттында олып кечкен денъишювлөр эдебиятта тарих олып къалдылар. Бу вакъытта халкъымызынъ ичтимай, сиясий, медений аятында да мусбет тепренювлер олды. Ичтимай, сиясий, медений аят джеалет (джайллик) юкъусындан уянды.

Бу девирде Русиеде ве онынъ этрафындаки укюметлерде де икътисадий ве сиясий вазиет денъише. Илери кучълернинъ осьмеси Къырымнынъ аятына эр тарафлама тесир эте. Къырымда аньаневий икътисадият джанлана. Емиш ве себзе асрама тиджарети, айванасравджылыкъ, туз оджакълары, тютюн, тери ихти-саллары, заводларнынъ ачылмасы Къырым икътисадиятыны илерилей. Буларнынъ эписи медениетнинъ де осювине тесир эте. Миллий эдебияттымизда да буюк илерилев башлана. Шунынъ ичюн де къырымтатар эдебияттынынъ бу деври **Уянув деври** деп адландырыла.

Айны шу девирде бир сыра миллий зиялышымыз ве илери инсанларымызының арекетлери медениетимизниң илерилевине себеп олды. Исмаил Гаспринский тарафындан нешир олунгъан «Терджиман» газетасының басылмасы, юзлernerнен китапларның нешир олунувы әдебиятымызының джанланмасына темель къойды. Ондан да гъайры оның ишлеп чыкъаргъан янъы усулы мектеплерниң ачылмасына ёл ачты. «Зынджырлы» ве дигер медреселерниң ислыхы (реформа) Къырымның ичтимай аятына буюк тесир этти.

Къырым ве Къырымдан тыш дигер тюркій мусульман виляяттеринде де пек буюк ичтимай денъиshawлер олып кечти. Бу денъиshawлерниң джумлеси тюркій халқъларның миллий ве сиясий анъының осьмесине темель азырлады.

Къырымтатар халқъының омюринде олып кечкен терен денъиshawлер әдебиятымизда бир чокъ янъылыкълар пейда этти. Бу заманда ширинет, несирджилик ве драматургия саасында янъы рухнен ашланылгъан бир сыра эсерлер язылды.

Къырымтатар әдебиятында олып кечкен бу денъиshawлер эсасен Исмаил Гаспринскийниң idжадий фаалиетинен багълыдыр. Къырымтатар әдебияты тарихында жанрлар черчивесини кенишлеткен Исмаил Гаспринскийниң «Молла Аббас» романы буның айдын мисалидир. Тюркій әдебиятларгъа жанр джеэтинен нумюне олгъан бу роман, әдебиятымызының тарихына язувларынан де муим янъылыкъ кирсетти.

Суаллер ве вазифелер:

1. Рус истилясы девриндеки тарихий вакъиалар әдебиятымызға насыл тесир эткенини анълатыңыз. Исметий, Эшмырза киби мүэллифлердинь эсерлери къырымтатар әдебиятыны насыл эсерлернен теминледи?

2. Къырымтатар әдебиятының Уянув деврини къапладап алгъан сенелерни айттыңыз. Бу девир антик вакъыттан антик вакъытқа къадар девам этти?

3. Къырымтатар әдебиятында олып кечкен денъиshawлер кимниң idжадий фаалиетинен багълыдыр?



ИСМАИЛ ГАСПРИНСКИЙ^{[28]*1} (1851—1914)



Къырымтатар халкъынынъ ве бутюн тюрк дюнъясынынъ улу огълу, маарифпервер ве муаллим, языджы ве алим, мутефеккир ве эрбап Исмаил Гаспринский 1851 сенеси мартаңынъ секизинде Къырымнынъ дагълар ичинде сакълангъан Авджыкайде дюнъягъа кельди.

Бабасы — Мустафа Алиевге, Ордуда айрыджа бир нумюнели хызмет косытергени ичюн, 1853 сенеси поручик унваны бериле ве онынъ ады мырзалар шеджереси китабына языла. Бу мунасебет иле о, Мустафа Гаспринский сойадыны ала.

Исмаил Мустафа огълу Гаспринский иптидай бильгини кой мектебинде ала. Бабасы огълуна темелли бильги бермек ичюн, оны Акъмесджиттеки эркеклер гимназиясында окъута. Соңра огълұны арбий окъувгъа ёллай. 1864 сененинъ он беш февралиндөн 1867 сененинъ он бир июнине къадар Исмаил Гаспринский Москвадаки эки санлы арбий гимназияда тасиль ала. Лякин он дёрг-он беш яшына кельген Исмаил арбий бильги алмакъын биралып, кадет корпусындан достларындан бирисинен Идиль, Къазанны кечип, Туна озени ве Азав денъизи бойлап Багъчасарайгъа къайта.

1870 сенеси майыснынъ бириnde Исмаил Гаспринский Акъмесджиттеки 531 санлы гимназияны битирип, рус тили оджасы шеадетнамесини ала. Багъчасарайдаки Хансарай медресесинде рус тили оджасы олып чалыша.

1871 сенеси Исмаил Гаспринский Парижге кете ве тиджарет тешкилятларында терджиман олып чалыша. Франциядан Алманияны, ондан соң исе Испанияны да зиярет эте. О ерлерде алгъан унтутылмаз теэссуратлары акъкъында макъялелер, эсерлер яза.

* Гаспринский Исмаил. Молла Аббас. Исмаил Асан-огълу Керим. И. Гаспринскийнинъ «Молла Аббас» романы акъкъында. — 1 том. — Симферополь: Къырымдевокъувпенешир, 2001. — С. 5.

1876 сенеси Къырымгъа къайта ве оджалыкъ фаалиетини девам эте.

1883 сененинъ апрель айынынъ онундан «Терджиман» газетасыны нешир эте. Тюркий халкъларнынъ бирлештирильмеси ичюн газета вастасы иле чокъ хызметлер япила.

Тюркий халкъларнынъ медениетлери ве миллий анъларынынъ шекилленмеси огърунда макъалелер яза. Халкъ арасында маарифперверлик гъаелерини тешвикъят эте.

Онынъ XIX асырнынъ сонъунда язгъан «Фрэнкистан мектюплери» (1887), «Судан мектюплери» (1889), «Къадынлар улькеси» (1890), «Делилер виляети» (1890), «Дар-ур-Рахат мусульманлары» (1904) киби эсерлер «Молла Аббас» романынынъ къысымларыны тешкиль этелер*.

Исмаил Гаспринскийнинъ къырымтатар эдебиятынынъ уянув деврине къошкъан иссеси даа «Кунь догъды» (1906), «Юз йылдан сонъ» киби романларынен ве «Арслан къызы» (1893) адлы икяеси-нен бельгилене.

Бу эсерлернинъ эписи Исмаил Гаспринскийнинъ иджадий фаалиетини юксельткен ве шерефлendirген эсерлердир. Олар къырымтатар миллий эдебиятынынъ алтын хазинесини тешкиль этмектелер.

Суаллер ве вазифелер:

1. Къырымтатар халкъынынъ улу огълу И. Гаспринский не вакъыт ве къаерде дюньягъа кельди? Сеяхатта булуныр экен, о, къайсы мемлекетнерни кезип, кимлернен корюшкенини айтынъыз.

2. Исмаил Гаспринскийнинъ маарифперверлик ве неширджилик фаалиетлерини хатырланызыз. Нешир эткен газета ве дергилернинъ адларыны айтынъыз. Олар къачынджа сенелерде чыкъып башладылар?

Исмаил Гаспринскийнинъ эдебий яратылдылыгъы

Исмаил Гаспринскийнинъ маарифперверлик, неширджилик, публицистик ве эдебий фаалиетлери эсасен XIX асырнынъ сонъунда, Русие мусульманларынынъ энъ агъыр яшагъан девринде шекиллене ве кенишлей.

Чар акимиетининъ алып баргъан колонизаторлыкъ сиясети тесиринде Русиеде яшагъан тюркий халкъларнынъ омюр тарзы даа пек агъырлаша. Чюнки мусульманлар яшагъан топракълар-

даки табиий зенгинликтер чар акимиети тарафындан савурыла. Русиенинъ тышында ве ичерисинде яшагъан халкъларгъа нисбетен акъяретлейиджи сиясет алышып барыла.

Къырымтатар публицистикасынынъ тешеббюсчиси ве деллялы Исмаил Гаспринскийнинъ атешин макъалелери ве бедий эсерлери айны шу кескин вакъытта языла.

Улу мутефеккир, джемаат эрбабы, нашир, оджа Русиедеки мусульманларнынъ джаиллик эсаретинден къуртарылувины пек къайгъыра.

Шунынъ ичюн де эсерлеринде оларнынъ кечмиш тарихы ве келдеги акъкъында къыйметли фикирлер бильдире.

Онынъ публицистик макъалелеринде айдынлатылгъан гъаелер ве ичтимай-сиясий бакъышлар бедий эсерлеринде де озъ акси-ни коре. Бу илери гъаелер ве дюньябакъышлар эсерлердеки къараманларнынъ образында косътериле. Бойле этип, бу эсерлерде айдынлатылгъан меселелер заманнынъ муимден муим меселелерине чевириле.

«Молла Аббас» роман-эпопеясынынъ «Фрэнкистан мектюплери», «Дар-ур-Рахат мусульманлары» киби къысымлары бедий джиэттен кучлью эсерлер сайылалар. Тап о девирде мүэллиф оларны айры бир китап шеклинде нешир этмеге ниетлене. «Фрэнкистан мектюплери» насылдыр бир себеплерден нешир олунмай. Амма «Дар-ур-Рахат мусульманлары» эсерининъ эки сефер нешир олунгъаны белли. Бириндже кере бу эсер 1891 сенеси, экиндже кере — 1906 сенеси нешир олуна. «Дар-ур-Рахат мусульманлары» эсерининъ бириндже нешири — 126 саифеден, (бу асыл нусха аля даа тапылмады) экиндже нешири — 95 саифеден ибарет олгъаны белли. Бу эсернинъ учондже нешири 1995 сенеси, соңра эки къымынъ да гъайрыдан нешири 2001 сенеси филология намзети, профессор Исмаил Асан-огълу Керим тарафындан китап шеклинде дюнья юзюни коре.

Роман-эпопеянынъ эки къымында да тасвирленген адисе-вакъиалар Исмаил Гаспринскийнинъ аятынен багълы олгъаныны бильдирелер. Молла Аббас да Исмаил Гаспринский киби Франция, Алмания, Испанияда сеферлерде булуна.

Бу автобиографик тарихий хаялий эсерде сеферлерде булунгъан мүэллифнинъ дюньябакъышы, ичтимай-фельсөфий фикирлери Молла Аббаснынъ сымасында айдынлатыла.

Йигирми эки яшларындаки оғълан Молла Аббас бир чокъ мемлекетлерни долаша. Сеферде булунгъанда, бир чокъ алларгъа оғърай, чокъ адисе-вакъиалар коре, олардан белли бир нетиджелер чыкъара. Энъ эсасы, о, эр бир инсаннынъ аятында муим олгъан

меселелерни айыра. Илим ве медениетнинъ юксельмеси ичюн къасеветлене. Мусульман динининъ кечмиши ве келеджегини къайгъыра.

Бойле этип, эсерде Аббас сымасы озъ деврининъ илери дюнья-бакъышлы, бильгили, алидженап мусульман бир инсаны оларакъ тасвирлене.

Суаллер ве вазифелер:

1. И. Гаспринскийнинъ «Молла Аббас» роман эпопеясынынъ къысымлары къачынды жаңылды? Оларнынъ адларыны айтынъыз.
2. И. Гаспринскийнинъ «Молла Аббас» роман-эпопеясындан башкъа даа насыл романлары ве икәеси бар? Бу романларда насыл вакъиалар тасвирленгенни айтынъыз.

«Фрэнкистан мектүплери»нинъ сюжети

Молла Аббас баба-деделеринден къалгъан буюк параны алыш, Ташкент шеэринден сеферге чыкъа.

Одесса шеэринде тюрк тилини яхшы бильген Жозефина деген франсыз къызынен таныш ола. Олар бир-бирини бегенип эвленилер ве Авропа боюнчада саяхаткъа чыкъалар.

Алманияда Молла Аббас Генрих адлы немсе йигитти иле корюше. Генрих озюнинъ тюркшынастырь бильгилеринен Молла Аббасны шашырта. Генрих, о девирининъ белли тюркшынасы, Вамберининъ талебеси олгъянды анълашыла.

Молла Аббас меракъланып, мусульманларнынъ азизи ве эвлияларындан бири Гуль-Бабанынъ дюрбесини къыздырмагъа баштай. Онъа бу меселенинъ чезильмесинде Вамбери ярдым эте биле деп төвсие этелер. Вамбери де Гуль-Бабанынъ дюрбеси къайда олгъяныны айтып оламай. Вамбери Молла Аббаснен корюшкенде, Парижде окъумасыны төвсие эте. Жозефинанынъ дөгъмушлары Парижде яшагъаныны көз оғюне алыш, Молла Аббас къадынынен Парижке кетелер.

Парижде ерлешкен сонъ, Молла Аббас, арапларнынъ къыркъ азизлери акъкъында малюмат топламакъ мақъсадынен, башкъа шеэрge кете. Бу арада онынъ джеп saatы ве акъчасыны хырсызлайлар.

Аджеле эвине къайтмагъа меджбур олгъян Аббас, эвинде къадынынъ дөрт эр адамы арасында отургъаныны коре. Бу вакъиадан сонъ оларнынъ арасында дава чыкъа ве олар айрылышалар.

О вакъыт энди франсыз тилини аз-бучукъ бильген Аббас, биржаларда чалышмагъа башлай. Шу арада о, университетнинъ шаркъышынаслыкъ болюгинде окъүй.

Биржада Аббаснен берабер чалышкъан мусью Шалон генчни озюнинъ эвинде мусафир эте. Бу ерде Аббас мусью Шалоннынъ къызы Маргаританен таныш ола. Эр афта Маргаритагъа фарс ве тюрк тиллеринден дерс бере. Эки яш арасында севги дуйгъусы кеткен сайын къуветлешкенини сезген мусью Шалон дерслерни къыскъарта. Амма олар гизли корюшмекни девам этелер.

Молла Аббасны полис идаресине чагъырталар ве оны франсыз къадыннынъ ольдюрильгенинде къабаатлайлар. Полислер Аббасны къадыннен шеэр дживарында таныш олгъаныны ве бир къяч дефа корюшкенини исбатлап, оны апске къапайлар.

Амма шу франсыз къадыны ольдюрильген куню о, Маргаританен берабер ола. Амма Маргаританынъ намусыны сакъламакъ ниетинен, бу меселе акъкъында о, суса, агъыз ачмай.

Бу вакъия акъкъында газеталардан бильген Маргарита махкемеге келип, къадын ольдюрильген куню Аббаснен берабер олгъаныны бильдире. Аббас апстен азат олунса.

Бойледже, Исмаил Гаспринскийнинъ роман-эпопеясынынъ эр бир къысмында джемиетнинъ тизими акъкъындаки дюньябакъышлары беян усулы иле икяе олунса.

Молла Аббаснынъ сымасында миллий анъынъ джемиетте шекилленюв эврими, Фериде банунынъ сымасында исе мусульман къадын-къызынынъ ибretли чизгилери косьтериле.

Суаллер ве вазифелер:

1. И. Гаспринскийнинъ «Фрэнкистан мектюплери» ве «Дар-ур-Рахат мусульманлары» къысмыларынынъ нешир олунув тарихыны икяе этинъиз.
2. Бу эсерлернинъ автобиографик тарихий-хаялий эсер олгъаныны насыл исбатлай билесинъиз?
3. «Фрэнкистан мектюплери» къысмынънъ сюжетини тарифленъиз.
4. «Фрэнкистан мектюплери» къысмында насыл бир муим меселелер косьтериле? Джемиетнинъ тизими акъкъындаки дюньябакъышлар насыл усул иле икяе олунгъаныны айттынъыз.

ФРЭНКИСТАН МЕКТЮПЛЕРИ^[29]

(Къысқартылгъан)

* * *

Ай, ай, къардашлар, башымын къара язылары! Баша языланы, козь кореджектир, коръгеним де коп (чокъ) эм меним языларым айрыджа язылар имиш!

Джаш бир мусульман мал ве сагълыкъ сахиби¹ олдугъы алда Хиджаз ве мемалик мукъаддесе (мукъаддес мемлекетлерге) ёл тутарман исе, залым фелекин хюкмюндже² козюм ачыкъта озюми Фрэнкистанда коръдим! Аджайп ве гъараип (айрет этиледжек шейлер) ве маишет-и-эджнебиеде³, яни джат арасында, богъулұр алла-ра кельдим. Нишлемели? Баш язысы, Худая шукюр!

Медресе рефикълерим Ташкентин улугъ медресесинден фен текямюль идуп⁴ (олгъунлаштырып) ибадет ве тарикъат⁵ (маневий ёл иле) ве зиярет иле гонъюллери ни рахатландыруп, козълерини нурландыруп джуръюкте, мен бичаре мемалик-и-ислямиеден (ислям мемлекетлерinden) узакъ тюшюп Фрэнкистан бельделерини (шеэрлерини) ве улькелерини долаштыр идим. Анджакъ эр беляя, эр дерде къаршы Худанынъ ихсаны (лютфю, кереми) ве дуасы азыр олдугъы хюкмюндеп олуп, Венгрия улькесини долаштыкъта, унұтылмыш эвлиядан Гюль-Баба зиярети иле мюштереф олдум (шерефлендим).

Шукюрлер олсун ки, Фрэнкистанда учь-беш сенелер къалмая меджбур олдугъым сырада малаяни (бош-бошуна) вакъыт кечир-медиим: бир-ики зиярет идуп хайли хатыралар иле лезетлендим. Эвет, фрэнклерин ал-ахвалына ашна олдум. Корърюклерими на-къиль идеджегим⁶, чонки бу аджайп улькелери кезмек эр кесе мумкюн оламаз. Языларымдан бир-ики ал малюм олса да, фаидедир.

Ташкенттен сефере чыкътыгъымда йигирми ики яшында идим. Атамдан къалмыш (Хакъ рахат эйлее!) мал ве семен (къыймет, дегер) не къадар чевирсем етерлик иди. Озюм исе акъшам къайда, ветан ве юрт анда оладжакъ киби, ялынъыз бой джигит идим.

¹ сагълыкъ сахиби — сагълыкъ саиби

² залым фелекин хюкмюндже — залым такъдирнинъ укмюнен

³ маишет-и-эджнебиеде — эджнебий мемлекетлерде сеяхатта, зияретте булуңмакъ

⁴ фен текямюль идуп — фенге бильги кямиллиги (ишанчыны) пейда этип

⁵ ибадет ве тарикъат — дин күтип Аллахнен бағыланмакъ ёлу

⁶ накиль идеджегим — икяе этеджегим, айтаджагъым

Сыххат (сагълыкъ) ве ильм ве билик ичюн не къадар джурьсем, ар-къамдан бакъуп къаладжакъ ёкъ иди.

Оренбургтан кечуп Московая кельдим. Мында корърюклерим ве Къазанлы билиш-таныш ислямлардан анъладыгъым малюмата коре, Фрэнкистан гъает гонълюме тюшюп, шу улькелери корьмее авес олдум, ве бир де эски бир китапта Аврупада-и-заман араб-ютюрктен къалмыш азизлер ве зияретлер олдугъыны билюп, бунлары зиярет итмее мурат иттим.

Бу алда Одесса шехрине кельдим. Бир атласам, Истанбулда оладжакъ идим. Орада бир Къара денъиз бар. Гонълюмде бар исе де, ялынъыз ярым тиль бильмез алда фрэнк дюнъясына тюшмее къоркъуп тура идим, ама расткельди ... ярдым итти. Фрэнк хюкемасындан (алимлеринден) бири демиш: «Вай, къадынлар, вай, къадынлар! Вакъаа (акъикъатен), къадынлар нелер итmezлер. Манъада бири расткельди. Истанбул диерек, Парижде булундым, Ая-София диерек, Мадлен килисеси дживаарына тюштюм! Худанынъ икмети эсапсыз! Къадынлар да бири имиш. Худанынъ ниметлери коп къадынлар да — бири имиш. Тюристанда пек захир (белли) дегиль исе де: эрлер къадынларын эшеги олдугъы Фрэнкистанда ачыкъ захир олыюр¹.

* * *

Къысмет имиш, чаре олурмы? Одессада театро, яни темашахане бармыш идим. Темашая кельмиш бир фрэнк къызы янымда булунды, баде (сонъра) анълашылдыгъыузере бу къызын ады Жозефина олуп Истанбулдан ветаны — Париже къайтыюр имиш. Мен киби мусафир оларакъ темашахане кельмиш. Истанбулда везирлерин бирисине дерс вериор ве ховадже (оджа) къызлардан имиш. Бойледже, анъсыздан театрода расткельдик. Къысмет бу я! Театро недир десенъиз — бу бир темаша ве сейир ханесидир ки, анда олмуш шейлери де сёйлерлер, олмамыш аллары да беян идерлер. Къадынлар ве къызлар ачылмаяджакъ шейлери де ачуп-ачуп джурерлер. Фрэнкистан дживаары бу я! Айып буюрылырсе, Одесса эхалиси яры-ярыя фрэнктир.

Мен де инсаным, джансыз бир мумия дегиль! Хэр не бар исе, ихсан (эйилик) ве нимет билирим, хич де ачылмасынлар демиорым, лякин бойле къалабалыкъ джемиете мунасип коремиорым. Янымдаки фрэнк къызы саир къадынлара² ошамайып, эдеплидже бир шей корюниор иди. Боюнчыгъындан аягъын уджуна къадар

¹ ачыкъ захир олыюр — ачыкъ айдын анълашылыр, корюнир

² саир къадынлара — сайре, дигер къадынларгъа

къара материядан эсбабе (урбагъа) чырманмыш, эр ери mestur (къапалы) иди. Темашада булунан гъайры ханымларын чыплакъ ве ялангъач боюн ве кокреклерине бакътыкъча (насыл бакъмайым ки, къайсы якъкъа бакъсам хэп шу), Худадан къуввет ве тахаммюль (сабыр) истиюр идим, лякин мадмуазель (франсызджа къызлара бойле дерлер) Жозефина бунлар киби сукъландырыджы дегиль иди. Местур дегиль исе де, mesturiyetten хабердар киби иди. Машалла!

Бир оюн тамам олду. Оюнджылар къадын ве эр кишилер опюшоп, къучакълашуп ичери чекильдилер... Бир де чаршаф тюштю. Янымдаки Жозефина-ханым манъя чевирилип: «Таксир Эфендим, бу оюны ве темашайы хош булдунъызмы?» — деди.

Гузель агъыздан назлы сес иле чыкъмыш тюркче бир келимелер чичек балы, сибир майы киби, татлы келюп эдептен маҳрум олдуғъымы¹ къыза бильдирмек ичюн дедим: «Ханым-эфенди, темаша яман дегиль, оюн мефхумынджа (мундериджеси боонджа) коп заманлар сефер идуп юртуна къайтмыш къоджа, эвет, къадыны ве рефикъасыны сагъынып кельмиш. Айттыкълары шиир ве джырлар мухаббете даир олмалы, лякин сабырсызлыкъ къылдылар, перде тюшюп битmez бурун опюшмee башладылар... Опюшмек хата дегильдир. Эр ве къадын бир-бири ичюн ниметдар. Лякин тенхаджа маҳалль де булмалы. Бойле ашикъяр ярашмыюр. Гуль иле бульбуль я гидже ярысы, я сахарь маҳалли севиширлер. Сес узакъ китсе де, мухаббет севинч mesturdыр (гизли, къапалыдыр)...

Жозефина ханым эм кульдю, эм къызарды, гъайрылар ичюн утанды. Баде (сонъра) мен ким олдугъымы ве къайдалара киттигими суаль идуп, джевабы алды. Къыркъ йыллыкъ дост киби, сёйлеше башламыш идик, эм эдеп иле сёйлешиүр идик. Истанбулда маляяни (бошуна) вакъыт кечирмемиш, фрэнк къызы исламлардан, хайли тербие алмыш, утанмая, къызармая огремиш. Машалла!

Татлы-татлы айтышып турмая эдепсиз халкълар мани олдулар. Джумленинъ козю къыза ве манъя тикленди. Къыскъа дюрбин ве асма козълюк иле аясыз (эдепсиз) къадынлар бизе бакъуп-бакъуп кулюшмекте идилер. Къадынлар Жозефинайы, эрлер мени куньледиклери шубесиздир...

Бу алда фрэнк къызы алымы анълап, онынъ ханесине барып, акъшамын бир хиссесини (къысмыны) даха кечирмее теклиф итти. Тааджюп итменъиз! Фрэнк арасында даха аджайип адетлер бар. Давети къабул иттим. Киттик. Не ичюн бармайым? Эвеля — чагъырды, икиндjisisi — гузель бир къыз, учюнджиси — тюрк-

¹ Эдептен маҳрум олдугъымы — утангъанымны

чейи билип меним иле сёйлеше бильсе, дёрдюнджиси — бойле се-ферде вакъыт хош кечирмек керек, даха себеп чокъ, лякин бунлар да етер...

Анджакъ он дане фрэнк кольмеклери алдым. Акъикъат алда фрэнк безлери ве кольмеклери гъает алий ве назик шейлердир. Кольмек насыл олса да, зияны ёкъ. Кольмеклер иле бир-ики боюн багъы дахи алдым. Кольмеклерин кесимине коре лязим шейлердир. Жозефина ханым озы тарафындан сют киби беяз (акъ) ве кок (мавы) тюс къолчакълар (эльдивен) алуп хәдие буюрды. Яз ве къыш фрэнк улемасы, кибары къолчакъсыз джурмиюрлар имиш. Къолчакъ тербие ве незакетин бир ишарети имиш. Къабул иттим. Къолчакътан бир зиян ёкъ.

Фрэнк къызыны иптита (биринджи дефа) театрода корьдюкте, ичими къыздырыгъыны язмыш идим. Беш-он кунылерден бери бу къызгъынлыкъ сувмады, бельки артты. Шимдиден сонъ исе ёлда бир арабада, ашта бир софрада, керван-сарай ве мусафирханелерде бир больмеде булунмакъ ёл ве ахвал икътизасындан (лязим кельмесинден) олуп халымы фикир итмек лязим кельди. Чонки хусн-ю-джемал (дюльбер юзюлю), эхл-и-ирфан (окъумышлы инсанлардан) бир къызын даймий козь огюнде булундыгъы къан къайнатып, акъыл буландыраджагъы малюм иди... Фрэнклер нишшлиюрлар, бильмем. Даима эр ве къадын-къызлар бир ерде булунырлар! Бильмем къанларының теркибат кимивиеси (химик теркиби) бизлерден башкъамы, бильмем. Ичлеринде балыкъ къаны арекет идиормы? Бойле бир шей дегиль исе, mesturiyetin намы олур иди... Ёкътур!

Къызын рефикъалыгъыны² терк идуп башкъа бир рефикъ къыздырмај, арамая аджеј корьмиюр идим. Хиляф (терс) сёз керек дегиль: къызын ёлдашлыгъы гонъюле хош келир иди... Шубеми бар? Гузель ве хош къадын ве къыз иле ёлдашлыкъ зевкълы кельмезми? Малюмдир ки, къадынларын ёлдашлыгъы дегиль, белясы, къазасы дахи дамлы, лезетли олур. Пери къызлары, падиша къадынлары севгилилерини телефон иттикте (ольдюргенде), къан акъызмайып, къытыкълап ольдюрирлер!... Эр насыл исе, телефон олмакъ мурадым ёкъ иди. Не мухаббет деръясына бөгъулмакъ, не севинч багъчасында бонъалмакъ истемиюрдым, яни насыл къадын олса олсун, харамдан узакъча, гунахтан къачынмакъ мурадында идим. Ве бунунъ ичюн Жозефина иле сеяхатымы фикир итмее меджбур идим. Козьге хош къызычыкъ иди! Фикир итмемек мум-

¹ ахвал икътизасындан олуп — алыны анълатмакъ кереклигини, ихтияджыны, зарурлыгъыны билип

² рефикъалыгъыны — дост, аркъадаш, ёлдаш(лыгъыны)

кюнми? Эдеп ве ахлякъ кучълю шейлердир, лякин истек ве гонъюль де къувветсиз ве нечар дегильдир. Меселейи фикир иттиче, чаре тапамаюп, башым къабакъ киби шишер дереджее келир иди. Бир кунь денъиз кенары багъчеде кезеркен, хатырыма кельди... Олурмы, олмазмы? Аман¹ орманда адашуп, джоюлуп ёл тапмыш киши киби, ферахлануп къыза чаптым...

Суаллер ве вазифелер:

1. «Фрэнкистан мектюплери»нинъ къараманы сеферге чыкъкъанда, къач яшында эди ве Фрэнкистанда къач сене къалмагъа меджбур олгъаныны икяе этинъиз. Онынъ сефери насыл башлангъаныны ве насыл шеэрлерни кечип кетмек сырасы кельгенини сёйленъиз.

2. Одессада къараман кимнен корюше ве оларнынъ сеферлери насыл девам эте? Фрэнк къызыны не ичюн бегене? Сеяхатыны онынънен берабер девам этмеге разы олгъанынынъ себебини де эсердеки малюматларны къулланып джевап бермеге тырышынъыз.

3. Бу акъта ташкентли Молла Аббаснынъ фикирлери насыл олгъаныны да эсерден тапып окъунъыз, нетиджелер чыкъарынъыз.

* * *

«Гюль Баба» зиярети акъкъында малюмат алмакъ мурад итмиш идик. Энъ иптида Виянеде Османлы эльчинанесине бардыкъ. Ики немсе, учь франсыз ве бир тюрк корърюк. Кятиplerden «М» — бек иди. Ишбу бек эфендининъ «Гюль-Баба» акъкъында ич бир хабери олмадыгъына бен не къадар тааджюп итти исем, Тюрикстандан чыкъуп Фрэнкистана «Гюль-Баба» зиярetine кельдигиме, бек-эфенди даха зияде тааджюп итти... Анълашмая олмадыкъ, Алималла!² (Аллах билир ки). Зан идерим ки, кятип эфенди бени диване де эсал итмиштир. Виянеде османлы консулханеси дахи бар имиш. «Суя гиден, тал къармалар» (яни эр шейден умит эттер) фехвасын-джа (анъламына коре), андан да баруп сораштырайыкъ, — дедим. «Консул» демек — бир девлетин икинджи бир девлетте тиджарет³ векили, тиджарет мемуры демектир. Озы девлетининъ туджджара-нына ве тиджарetine муавин (ярдымджы) ве ёл ачыджы демектир.

Бардыкъ. Хызметчи — немсе. Ичеридеки кятип — немсе. Консул хазретлери башы фесли — кене бир немсе. «Не хызмет иле кельдинъиз?» — дедилер.

¹ ферахлануп — гонъюлю ачыкъланып, къуванып, севинип

² диване — дели, будала, акъылдан къолайлы

³ тиджарет — алыш-вериш

Жозефина манъа бакъуп:

— Бунларын бири ислам дегиль, «Гюль-Бабайы» насыл сорайыкъ? — деди.

— Керек дегиль, айтма, — дедим. Тиджарет бабындан (тиджарет иле багълы) эр не исе суаль эйле де къайттайыкъ.

Жозефина бир хайли мюкялеме итти (къонушты, сораштырды)... «Не анъладынъ?» — дедим. Шам (Дамаск) металарындан (шайлеринден, малларындан) Австрияда не киби шейлер мютебер¹ ола биледжегини суаль иттим? «Базарлардан тефтиш идин», — дедилер... Къайттыкъ.

— Джаным, Жозефина, немсе улькесинде османлы консуллары немседен тайин олунырю, Османлы улькесинде немсе консуллары османлыданмы тайин олунырю?

— Хайыр, эфендим, эр девлетин консуллары озъ эхалисинден тайин олуныры.

— Аджайип! Османлыларын бу усулунынъ хикмети² недир, аджеба? Истанбула бардыкъта, анъларыз.

* * *

Баде Вияненинъ улугъ медресесине бардыкъ. Фарс ве араб ве тюрккий муаллимлеринден базыларыны корънюк. Тааджюп олу-наджакъ будур ки, бу немселер бенден яхши арабча, беним къадар тюркче билиюрлар! Я Бухарада, я Истанбулда тахсил-и-улюм итмишлердир (илимлер огрендилер) зан идуп суаль иттике, «хайыр, эфендим, бунда, ишбу медреседе, окъудыкъ», — дедилер. Хайран олдум. «Буюрын бизим күтюпханее, корюнъиз!» — дедилер.

Бардыкъ... Дюньяда не къадар тиль бар исе, джумлесининъ китаплары бунда имиш, зан идерсинъ! Исламджа оларакъ бинъ еди юз китап бар иди. Корюльмееен, билинмееен эсер-и-ислямие бунда имиш! Хайли вакъыт күтюпханеде эгленюп зияret ве темаша иттигим сырада, муаллимлерин биринден сордум:

— Эфендим, бунджа масариф (масрафлар) ве гъайрет идуп ислам диллери ве илимлери тахсиль итмеден мурад недир?

— Бильмек ве хиссе (пай) алмакътыр — деди.

— Озюнъизде улюм (илимлер) ве маарифет аз дегиль, кяфи ве eterlik дегильми?

— Эльхамдюли-ллах. (Аллахкъа шукюр). Лякин дюньяда тоюл-маян ве тоюлмаяджакъ бир шей бар исе — илим ве марифеттир. Не къадар кесп итсенъ (эльде этсенъ, къазансанъ), кене аз корюлен бунлардыр. Илим ве марифет нуру алтундыр, къайсы улькеде

¹ мютебер — къыйметли

² усулунынъ хикмети — усулынынъ къыймети

чыкъса да, джумле дюньяда, къыйметлидир ве макъбульдир. Не къадар коп ве чокъ олса, эп аз корюниор. Бунунъ ичюндир ки, биз, фрэнклер, къайсы улькеде бир унер, бир китап, я бир хош усул ве адет корьсек, билип, анълап хиссе алмакъ истериз. Инсан алтун, джевхэр корьсе, къадир ве къыйметини бильсе, алмакъ истемезми? Сизин улькенъизде мешхур Мевляна Джеляледдин хазретлерин (Джеляледдин Руми (1207—1273), буюк суфий шаири) эфкяру тасаввurat алийеси (юдже анълайыш ве тюшонджелери), Хафиз Ширазининъ (1325—1389, буюк Иран шаири) летафет (эйилик) ве незакети Фрэнкистанда билинүп къадырленмиштири¹.

Лугъаты-къамус (танылгъан мусульман алими Фируз Абадийнинъ (1329—1414) чокъ мешхур бир лугъаты) фрэнк лугъатларына нумюне ве имсалъ тутулмыштыр². Ибн Халдун (1332—1406) асар-и-тарихийеси (тарихий эсерлери) ибret олмуштыр³. Ислам табиплери, оджаларымыз, унер ве устадлары унер олмуштыр. Кягъыт ясамакъ, багъ-багъча асрамакъ ве саир унер ве усуллары исламлардан огрендигимиз киби, базы гъайры шейлери саир халкълардан талим иттик. Илим ве акъикъат ве марифет зия-и-шемс (кунеш зиясы) кибидир. Джумле алеме айдынлыкъ ве къуввет берир. Алем ичюн мюштерек (ортакъ олгъан) бир нимет ве ихсандыр (эйилик, лютф). Бойле дегильми, эфендим?

— Барекалла! Барекалла! (Алла мубарек этсин) — дею немсе муаллимине бу дерси ичюн элини тутуп тешеккюр иттим.

* * *

Венгр улемасындан (алимлерinden) сейях-и-мешхур (мешхур сяяhatчи, кезиджи) Вамбери дженаплары бизи хош къабул итмишти. Эр не къадар бу адам иле тюркче ве сартча (озъбекче) сейлешмек мумкюн исе де, къадыным Жозефина бераберимде иди. Ханым-эфенди менден айры не къалыюр, не кезиор. Озюм де ойле алыштым ки, дайм хузурымда олмасы (илем) кейф ве рахатлы олыор идим. Вакъаа (керчек, акъикъатен) базы уфакъ-тюофек сыраларда ислам къадыны киби дегиль исе де, умумий алындан хошнут олуп аркъадашлыгъындан мемнүон идим.

Венгр дервиши, яни Вамбери, шехэр четинде багъчаларда икъамет идиор (яшай) иди. Хош-беш, ал-хатыр сораштыкътан сонъ, дженап сейях беним Ташкенттен чыкъуп Фрэнкистана тюштюгиме тааджюп иттигини беян буюрды.

¹ къадырленмиштири — къыйметли олгъандыр

² имсалъ тутулмыштыр — мисаль алынгъандыр

³ ибret олмуштыр — ярамай бир шейден дерс алмакъ, онынъ ярамай тарафыны анълап, ойле япмамакъ

— Урьметли, эфендим, — дедим, — йигирми сене мукъаддем сиз Тюристан джанибини (тарафыны) зиярет буюрдынъыз. Илим ве билик къыздыруп хавфлы сеферлерден ве сувсуз къырлардан къоркъмуюп джурьмее джесарет иттинъиз. Фрэнкистанда долашмакъ бойле къоркъунч дегиль. Чокъ селяметлик. Бу алда бен ялынъыз кельдигиме тааджюп буюманъыз, хаберсиз олуп, Фрэнкистана тахсиль ве тиджарет ичюн юзлеп-юзлеп кельмединизе тааджюп олуныр. Бенденъизин исе себеб-и-сеяхаты Фрэнкистанда барлыгъы риваает олунан базы эвлияларын¹ зияретидир.

Сөзлештиктен сонъ Вамбери дженаплары дедилер:

— Энъ иптида (эввеля) сизин сагъ ве селямет олдугъынъызы Худадан арз идерим. Баде (сонъра) къартлыгъыма ве дервиш олдугъыма риает буюрып ракат идер исенъиз, сизе бир-ики баба насихаты беририм.

— Барекалла, буюрын — дедим.

— Огълум, Бухара, Семеркентте (Самарканда) тиль теджри-бесинден мада (гъайры) мендже де тахсиль олунаджакъ бир шей ёкъ алда, мезкюр (ады кечкен) тарафлары² долаштым. Тиллери теджри-бе ичюн джаны авучыма алуп джурьдюм ве къатильден (олюмден) кучь-беля иле къуртулым. Буюрдыгъынъыз киби, Фрэнкистан селямет эм сербесттир, насыл истерсенъ, ойле джюрюрсинъ, кимседе къарышмаз. Бу юрлары корыме Худа наисип иттиги, сонъра да Фрэнкистана бош келип бош къайтманъыз. Хиссе ве илим алынъ, сиз даха яшсынъыз, тахсиль вакъты къачтыгъы ёкъ. Заманымызда Фрэнкистан дюньянынъ умумий дерсханесидир, илим ве маарифет хазинесидир. Сизин тарафларда унутылмыш Аристо (тель), Эфлатун (Платон), Ибн-Сина ве Фараби ве гъайры улема-и-мешхурын (мешхур алимлернинъ) зия-и-ильмиелери (илим зиялары) Фрэнкистаны мюневвер идиор (нурландыралар). Бунларын зиясы иле зиялансанъыз, зиян итмениш олурсыз, зан идерим. Париж шехрине китиорсыз, тахсил-и-улюм ичюн энъ мютебер (келишикли, буюк) шеҳэрдир. Сиз ичюн анда олан достларыма хат (мектюп) язайым, сизе михмандар (мусафирчен) ве ярдымджы олсунлар. Худа хайырлы эйлее, Жозефина ханым сизе лисан-и-франсеви (франсыз тили) оджасы олур. Лисан огрендегеч, тахсил-и-фунун (фен огрендемек) къолайдыр. Фрэнкистан талебеси Ташкент ве Бухара талебеси мертебесинде (дереджесинде) дегильдир. Озюнъиз де корип анъларсыз, серсебздирлер (шанслы, талихли, такъдири умитли), эм окъурлар, эм зевкъ-сефа идерлер, насыл истерлер исе, шойле

¹ эвлияларын — керамет саиби олгъанларнынъ, эренлернинъ

² мезкюр тарафлары — ады анъылгъан къыйметли ерлерни

маишет идерлер, шойле ки, эм сейях, эм талебе ола билирсиз ве фенлерден истифаде идерсиз (файдаланырысынъыз)...

Улеманынъ (алимнинъ) бу сёзлерини фикир идуп, бир-ики сене Фрэнкистанда булунаджагъым сыртада хүнер ве марифетлерине (таксиллерине) ашна олмакъ фаидеден хали (файдасыз) олмаяджагъыны къаарладым.

* * *

Медреседе лисан-и-фарси (фарс тили) дерсханесинде талим иден буюк бир туджджар иле нидже мертвебелер тиджаретханеде дахи расткелишюп таныш-билиш олдугъым алда, бир кунь деди:

— Мусью Аббас, бу акъшам бизим юртумыза тешриф буюрып (кельменъиз иле мени шерефлендирип), емекте булунманъызы нияз идерим (ялварырым). Сиз иле базы маслахатым (ишим) дахи олса керек. Вакъытынъыз олур исе, буюрынъыз, бенденъизи (эмир къулунъызы) гъает мемнун идерсиз.

— Баш устюне, мусью. Даветинъиз иле ифтихар идерим¹, — де-дигимде, джебинден чыкъаруп картесини (картвизитини) берди. Карте — кягъыт парчасыдыр. Устюнде сахибининъ ады ве ма-халл-и-икъамети (яшагъан ери) малюм олуныр.

Бана «мусью Аббас» дедигине тааджюп буюрманъыз. «Мусью» демек «эфенди», «агъя», «абзий» демектир. Ташкентли достларым Молла Аббас иле мусью Аббас арасында бир фаркъ олмадыгъыны бильсинлер.

Бу туджджарын ады Шалон иди. Акъшам ханесине бардым. Башымда къар киби акъ чалма, устюмде ешиль иpek халат олдугъы алда, аягъымда фрэнк башмакиси, элимде акъ къолчакъ, бойнумда къызыл пошу ве сачым-сакъалым низамланмыш, къокъулы майлар иле джилляланмыш (силенген, парлатылгъан) ве, заныма коре, ёсмалыгъым (сюслио кийингеним) кемалинде олдугъы сырада ичери кирдим. Мусью Шалон къаршылап чыкъуп франсызджа ве фарсидже мунасип эльтафатлар (хөш муамелелер) идерек буюк ве зийнетли бир больмее² дахиль итти (кирсетти). Больменинъ зийнет ве ярашыгъына хайран олдум³ исем де, франсыза дуйдурмайып ипектен пенджере ве къапу аскъыларыны (переделерини) джевиз ве шемшир (бик тереги) агъачындан ясалмыш алтун-кюмюш орнекли стул ве отургъучлары ве диварлара асылмыш буюк ресимлери шемдан (чыракълыкъ) ве лампалары сейире тутундым.

¹ ифтихар идерим — шан, шереф тилерим

² зийнетли бир больме — пек зенгин ве дюльбер эшъяларнен донатылгъан бир ода

³ хайран олдум — тааджиплендим

— Парижи насыл коръдюнъиз, хош шехэрми? — дею мусью Шалон сёз ачты.

— Эвет, эфендим, насыл хош олмасун ки, эр бир бинасы падишалара ляйыкъ, базар ве чаршулары¹ акъылдан харидж (акъылдан тыш, акъылгъа ятмагъан), эхалисинде бир нидже тербие ве низам бар, язда тоз, къышта балчыкъ олмаз бир беледедир (шехэрдир). Гъает бегендим. Париж джихан дюльбери олдугъына шубе иттем. Барекалла, бойле шехре малик олан миллет улугъ милдетир. Франсызларын хюнер-и-санайы фехм-ю-ферасет (анълайыш ве къабилиетлери) ве мерданеликлери (ийигитликлери) Парижин вуджуды иле сабиттири (исбатлангъандыр). Бутюн алем-и-инсан бу шехри меркез-и-медениет къабул иттиги ве джиханынъ эр джихэтinden зиярetine ве илим ве маарифине хассенменд (ортакъ, бебарбер) олмая кельдиклери — франсыз къавмынынъ буюк дереджесини косътерир. Барекалла!

— Вакъаа (акъыкъатен) джиханынъ биринджи бельдесидир. Лякин, мусью Аббас, Парижде олан летафет (дюльберлик) ве темизлик ве базы усуллар исламлардан алымныш ибret (нумюне) ве хиссе (дуйгъу) семересидир². Базарлarda, чаршуларда гиджелери фенерлер якъыкъ ёллары таш иле тёшеп, чамур ве балчыктан къуртулмакъ, шехэр ичинде гульбагъчалар етиштирмек, чешмелер бина итmek (къурмакъ) киби адетлер Андалус хилафет-и-ислямииеси (Андалус Ислам Халифаты) заманында корюльмиштири. Къартуба (Кордова шехри), Себилье (Севилья шехри), Гъранате (Гранада шехри) медреселерinden ве устадларындан³ чокъ хиссе алдыкъ, чокъ фикир огрендик.

— Эвет, мусью, Андалус медениет-и-ислямииеси Авропанынъ теракъкъисине (илерилемесине) буюк себеп олдугъы малюмдыр. Барекалла! Хош ве мюнаасип алдан⁴ хиссе ве ибret алмакъ эм хаз (зевкъ, мемнюниет), эм фазилеттири (эйиликтири, гузель васыфтыры). Бу джихэттен сизлере бердигимизи къайтаруп алмайы Худа-утаала мюеессир эйлее (насип этсин).

— Аминь, эфендим! Эхл-и-ислямын теракъкъиси маариф иле зиялануп медениет саесинде ракат ве бахтияр олмасы франсызлары мемнюн идеджек аллардандыр.

— Шубе ёкъ, эфендим, чюнки заманымызда франсызлар джихан оджаларындыр. Маариф ве медениет зиясыны дюньянынъ энъ

¹ чаршулары — базарлары

² семересидир — файдасы, нетиджеси, бир шейден эльде этильген келирдир

³ устадларындан — оджа, уста, санаткяр, белли бир саада озюнинъ ишинен олтъан устюн косътерген бир кимселерден

⁴ мюнаасип алдан — ляйыкъ, келишикли алдан

узакъ, энъ чет ерлерине етиштириюлар. Ифтихар идерим ки, омюримин беш-он куню бунларын меджлисинде (олар иле берабер) кечеджектери...

Шу аралыкъ икинджи больменинъ къапусындан бир яш къадын корюнди. Мусью Шалон къаршы баруп къадын иле банъа додъру кельдилер. Аягъа турдум. Фрэнк усулыдыр.

— Ташкент мютеберанындан (мютебер инсанларындан) мусью Аббас ве къызы Маргарита, — дею, бени къыза такъдим итти, яни бильдири. Бойледже таныштырмакъ фрэнк адетидир.

— Меджлиснъиз иле (сиз иле берабер булундыгъымдан) бахтияр олдум, — дею, къыза хитап иттигимде, къыз:

— Бенденъиз зат алийлерини корымек иле мюшерреф олуорым (шерефленем). Нидже вакъыттыр атам сизден отърю бана хайли (чокъ) хабер буюрмышлар иди, танышлыгъынъызы арзу идиор идим. Бугунь мюессер олду (Аллах наисип эйледи), мемнүон олдум, — деди.

Билирим, билирим: «Къыз насыл иди?» — дею суаль идеджек-сиз! Сизе нидже тариф идейим ки, озюм де яхши бильмиорым. Я, Рабби, дюнья юзюнде бойле гузеллер олуор имиш! Ай киби ап-акъ бет узеринде гуль киби уфачыкъ агъыза, кок киби мавы козълере, къалем иле чекильмиш къара къундуз (русча: бобр) къашлары, бельден ашагъы тюшмюш кестане сачлары, къалыба тёкюльмиш киби¹ бой ве къыяфет къошсанъыз, бельки Маргаританынъ сыфатындан азчыкъ хабер алышсыз. Къызын сесинде, эр бир арекетинде ве бакъышында олан незакет ве летафет тариф иде биледжегим аллардан дегильдир. Иште, къыз бойле олуор имиш!!!

* * *

Мусью Шалон бенденъизе яхши зияфет берди. Бу франсыз аш ашамая билен ве аш севен адам олдугъы анълашылды. Лякин сёз дюрюст (додъру) лязим олуп, софрада къызы Маргарита ханым къаршымда отурдыгъындан, къызын тесиратындан себеп энъ гузель, энъ лезетли ашлары феркъ итмеоп къалдым.

Франсызлар шарапсыз аш ашамазлар. Акъча олмаз исе, шорбайы терк идерлер, ама сеферде шарап булуунмалыдыр. Маргарита ханым бенденъизе дахи шарап теклиф буюрды... Насыл ред идейим?! Бойле гузель ве ширин агъыздан чыкъян эмире итаат итmemек² кучь исе де, мусульмана шарап харам олдугъыны анълаттым.

¹ къалыба тёкюльмиш киби — бой ве къыяфетине мунасип (ляйыкъ) шекиль берильгени киби (нумюне, орънек киби)

² эмире итаат итmemек — эмирge бойсунмамакъ

— Айып буюрманызыз, эфендим, сархошлыкъ ве эсиргелик харамдыр ве бир-ики къадах (къаде) ичмейи зиянсыз зан идиёрым — деди.

— Хайыр, эфендим, сархош оланларда къадах-къадах ичюп сархош олурлар, дегильми, я? Харамын азы ве чокъу олмаз — эп харамдыр, итикъадым (инанчым) бойледир, айып, буюрылмасын.

— Бизлер исе, шараба о къадар алыштыкъ ки, бунсуз ишимиз иш олмуюр, — дею, Маргарита озюне бир къадах толдурды.

Бу аралыкъ атасы къыза хитабен деди: «Исламлар дин эмирлериңе зияде дикъкъат ве урьмет идерлер. Барекал! Бу неден ичюн Авропа улькелеринде олан пек чокъ эдепсизлик дияр-и-ислямда корюльмемектедир»...

Кемален ашап софрадан тургъач, мусью Шалон къызы Маргаританың фарсий ве тюркий талим идеджегини беян идуп, дерс бермейи манъя теклиф итти. Франсызын сёзюне коре, Иран ве Тюристан иле хайли тиджарет ве мюнасебети олуп, къыздан гъайры эвляды олмадыгъындан, илериде иш кочюрмек, бельки, къыза маҳсус оладжагъындан, мезкюр тиллери тахсиль итмек зарур корюльмиси. Эвет, къызым бир къоджая барыр, лякин шу къоджа ярарлыкъты адам олурмы, олмазмы, Худа билир ... Къызым озю билиджи олур исе, даха эфзалдыр (яхшыдыр) — деди. Бу теклиф чокъ тааджюбиме келюп, бирден-бир насыл джевап бермейи билемедим. Къыз да шу арада чай, къаве ясап хузурымызда булундыгъындан, бир мertebe (кере) даха сыкъылыюр идим.

Аджайип фрэнклер! Къызы фарсий ве тюркче талим иттиреджек. Хивая, Техрана (Тегерангъа) эдие ёлланаджагъы ёкъ, я! Эр не исе окъусун, бильсин, меним ишім дегиль, лякин мюдеррислиги (оджалыгъы) насыл итмели? Саатлердже козъ-би-козъ (козъ козъ-ге) берабер къалуп гуль киби ағыздан лятиф ве татлы сёзлер ишитмек, сют киби акъ ве беяз къөллары тутуп, язы талим иттиремек енгиль хызмет дегильдир! Дерс берир икен, озъ дерслерими унутсам, озъ бильдигими джойсам, насыл олур?... Эр не оладжакъ исе олсун, Худаның бир языгъы бардыр...

Джевап бермединим неден олдугъыны бильмеюп, мусью Шалон башкъа фикре тюшюп деди:

— Аббас Эфенди, акъча ве айлыкъ джихэтини къайгъы итмейнъиз. Афтада учь дерс, эр бири ики saat олмакъ узъре девам идерсиз, айда сизе ики юз франк (яни етмиш рубле) хакъ бериirim.

— Теклифинъиз гъает хош. Фикир иттигим бу дегиль. Озюм окъумакъ эфқярында (фикиринде) олдугъымдан, оджалыкъ итмее ве дерс бермее вакъыт къалмаз, — дею къоркъуюрым.

Бу алда атасы (ве) къызы зияде риджа ве нияз идуп (ялварып) франсызджа дерслериме эльден кельдиги къадар дикъкъат иде-джеклерини ваад идуп разылыгъымы алдылар. Маргарита ханым музыка дерси дахи косътереджек олду...

Учъ куньдан дерсе башладыкъ. Дерс ханемиз багъча ве гуль азбар тарафында хош бир больме иди. Дерс вакъты бир къач замана къадар янымызда бир къарт инглиз къадыны булуныюр иди. Бу къадын Маргаританың фюнун (фенлер) ве эдеп муаллимеси¹ иди. Бир ики мертебе (кере) Маргарита бенденъизе лятифелер (незакет арекетлери) иттике, бу джады къыза инглиздже сөзлер айтты, ама недир билемедим. Инглиз тили шайтан тилиндөн кучь бир тильдир.

Бир ай кечти. Афтада учъ дерс берюп, saat икide келюп, дёргите къайтуп ките идим. Базы вакъыт мусью Шалон емеге къалдыруп, акъшам берабер темашаханелере китилюр идик. Парижде шу къадар чокъ тюрлю темашаханелер, сейир махаллелери бардыр ки, эр кунь бирине барсанъ, бир сенеде джумлесини долашуп оламазсынъ! Ама эхл-и-эдеп (эдепли, медений инсанлар) джумлесине бармаз...

Маргарита дерслерине гъает зеки ве хавес олдугъындан², окъув зияде теракъкъи идиорды³. Къыз иле сёйлешшюп, мюзакере итмекте олуп, хата сёйлеп утандамакъ ичюн гъайрет иттигимден франсызджайы мюкеммель огремекте идим. Къыз дерслеримден мада (гъайры), алымга эфкяр⁴ ве иттикъадларыма (инанчларыма) дикъкъат идуп эм Тюркистан акъкъында суаллер идуп, хабер алмакъта иди. Бир айда бойледже окъуп ве музакере идуп, эски достлар киби билишмиш идик. Ялан керекмиз! Къызын летафет (дюльберлиги) ве ирфаны (бильгиси) гъает хош табиаты гонълюми запт идиор⁵ (къаврамакъта) иди, лякин арамызда дияр (мемлекетлер) ве джынс, ве мезхәп (дин), ве ахвал киби деръялар олдугъыны фикир идуп, гонълюми зындҗыр ве демир иле багълыюр идим. Алымы бильмесин, анъламасын ичюн гъайрет идиордым. Анълар исе, бельки кулер, диване зан идер⁶ ...

¹ эдеп муаллимеси — тербие оджасы

² зеки ве хавес олдугъындан — зийрек (чабик, тез анълагъан) ве авес олгъанындан

³ теракъкъи идиорды — илерилей, тез менимсениле эди

⁴ эфкяр — тюшюндженлер, фикирлер

⁵ гонълюми запт идиор — гонълюмни къаплап алмакъта

⁶ диване зан идер — дели деп беллэр (билер)

Суаллер ве вазифелер:

1. «Гуль Баба» зиярети акъкъында малюмат алмакъ ичюн эки яш къаерге бардылар? Тап Тюркистандан чыкъып, Фрэнкистангъа «Гуль Баба» зиярetine кельгенделире не ичюн тааджипленгенлерини исбатлантыз.
2. Баде Вияненинъ улу медресесинде сеяатчылар неге дучар олдылар ве тааджиплендилер? Илим ве маарифет акъкъында насыл малюматлар эльде эткенинъизни, эсернинъ мундериджесинен файдаланып, анълатынтыз.
3. Метинде насыл муэллифлеринъ адлары ве оларнынъ анги эсерлери-нинъ серлевалары аңылгъаныны айтЫНТЫЗ.
4. Венгр дервиши, сеяхатчысынен Молла Аббаснынъ корюшовлери не джеэттен меракълы олгъаныны тарифлентьз. Вамбери онъа насыл баба насиаты бергенини сейлентьз.
5. Молла Аббаснынъ медреседе лисан-и фарси дерсханесинде талим алгъан түддикъар Шалоннен корюшови насыл бир янъылыкъ асыл этти? Экисининъ арасындаки субетни дикъкъатнен окъунтыз. Эхл-и Исламнынъ теракъиси маариф иле зияланмасы акъкъында олар насыл бир лакъырдылар юрюттилер?
6. Молла Аббас мусульманлыкътан эджнебий бир джемиетке тюшер экен, озюни насыл алып баргъаныны, этрафтаки инсанларгъа ичкиджиликнинъ менфий тесирини насыл бир инджеликнен анълаткъаныны эсерден тапынтыз, окъунтыз, нетиджелер чыкъарынтыз.

* * *

Хапсханеे тюштюгим ики афта олмуш иди. Франсыз хапсханеси къытай зинданы дегиль имиш. Къабахатлылары ве махрюмлары (хукюм олунгъанларны) адалет узъре бакъыюрлар. Больмелер темиз, аш-сув яхшы, мемурларын муамелеси (давранмалары, мюнасебетлери) назик эм дикъкъатлы, шойле ки, бильмееен киши хапсханеे керван сарай я ки мусафирхане ве эмарет (бейлик) зан идер!

Хапсханенинъ назыры (незаретчиси) бендентьизе айрыджа ильтифат (хошгонъюллик) ве дикъкъат буюрып эр не суаль иттигимде, аман джевап бермее азыр булуныюр иди. Фрэнк хапсханеси ялынтыз махалл-и-джеза (джеза ери) олмуюп, бир де мектеб-и-хусусе (яни хусусий мектеп) имиш.

Аджеба, махкеме нишлер? Бельки, бени азат идер, ама къабахатлы корюп къатлиме (ольдюрильмеме) хюкюм итмеси даха зияде ихтималдыр¹. Бу алда франсыз низамы муджиби² башым балта иле кесилдектири! Я, Рabb, сен ярдымджы ол!³ Сен инает (мерхамет) къыл!

Махкеме хузурында мухафаза⁴ (къорума, сакълама) ичюн тарафымдан векиль олмакъ узъре бир дава векили (адвокат) туттум. Бу

¹ ихтималдыр — ола бильмеси мумкундир, бельки, ола билир

² низамы муджиби — тертиби, низамы боюнчы

³ махкеме хузурында — давалар корюлип, укюм этильген ерде

⁴ мухафаза — къорчаланмакъ, тарафыны тутмакъ

адам иш ве ахвалдан хабер алуп мухафаза пек кучь ве халым мухатаралы (техлюкели, хавфлы) олдугъыны сёйледи. Буюк белядан ве, бельки, башынъызы къурттармакъ ичюн къатиль гиджеси къайда олдугъынъызы ачмакъ керек, ёкъ исе, сизден гъайры къабахатлы корюльмиюр, — деди. Хайыр, эфендим, бу mestур бир алдыр, ачмая акъкъым ёкътур. Кемал (еткин) ве махир (уста) даваджы исенъиз, бу киби гунах(кяр) олдугъыма къаний исенъиз (инансанъыз, къанаат этсенъиз), бу теклифи буюрманъыз икърар (ачыкъ сёйлемек) мумкюн исе, тефтишchie икърар идер, хапсханee тюшmez идим.

Бир кунь сабах зияде ичим, алым агъырды (агъыр эди). Эгленmek ичюн тазе чыкъымыш газетелерден бир ниdge нусха алдырдым. Бирини ачуп ишбу хабери окъудым: «Кечен айын йигирмисинде (фелян) къарьеде (фелян) къадыны къатиль идуп акъчаларыны алмыш адам тутулмыш. Кемал тефтиш мютхиш ве къоркъунч вакъиайы лязиминдже ачмыш. Запт ве ханс олан махкюм (хюкм олунгъан) Ташкентли Молла Аббас намында бир киши олуп, хайли замандан бери Парижде хусусий дерс ханеде талебелик ве базарда базы тиджарет идиор имиш. Тааджюптир ки, бу адам бай ве зенгин олдугъы сырада огъурлыгъа (хырсызлыгъа) джесарет итмиш, лякин бичаре къадыннынъ юртунда (эвинде) тапылмыш къанлы ягълыгъы (явлугъы, пошусы) ве акъча кисеси, ве къатиль гиджеси къайда олдугъыны беян итмедиги къабахатына ич шубе къалдырмыюп бир къызын нам ве адыны фаш итmemек (ачмамакъ) ичюн шу гидже къайда олдугъыны косытермee разы олмуюр имиш. Бош сёс!»

Я, Рабби! Я, Худа! Бу не мушкюль алдыр, бу? Достлар, бильдиклер бу газетейи окъуп, хабер алуп, банъа лянет окъуп нефret идеджеклер! Вай, къара языларым, вай... Агълауп газетейи ташладым, икинджи бир нусхай алдым... «Шехэр хаберлери» бабында язмышлар: «Савдагяр (алыш-веришчилер) арасында малюм ве белли туджджар мусью «Ш» бу куньлерде улугъ къайгъыда олса керек. Бирден бир къызы «М» ханым кечен кунь газете окъуп турдукъта, фена хасталануп, озюни бильмеюп (эссиз алда) яттыгъы ривает олуныюр. Тыбларын (экимлернинъ) сёзюне коре, бичаре къызын алы гъает мушкюль имиш. Худа инает эйле.»

Бу хабери окъудыгъым иле акъылым китюп, газете элимден тюштю! Анъладым яху, анъладым. Туджджар «Ш» — мусью Шалон ве «М» ханым — севдигим ве бичаре Маргаритадыр! Заваллы къызчыкъ беним алымдан отъю газетеде хабер корюп эджель ве олюм тюшкюне кирмиш! Бир-ики афтадан бери не алда ве къайда олдугъымдан хабер ёкъ иди... Газетеде корымюп ве ким ичюн хапсханee тюштюгими ве къатиль олмая азыр олдугъымы билюп харап олмуш. Бичаре къызчыкъ! Я беним алым шимди на-

сыл олур? Кечен айын йигирмиси гиджеси малюм къатиль олунмыш... Шу кунь ве гиджеси бен бедбаҳт (бахтсыз) ве бичаре Маргарита иле махусус туттугъым ханеде кечирдим. Нам ве намусыны бана эманет итмиш иди, фаш итмедим (мейданға чыкъармадым) — эджелинеми себеп оладжагъым? Я, Худа, гуняхым чокътур, лякин сенинъ мерхаметинъ къаرارсыздыр, санъя ишандым! Я, Рабби, къызы хифз эйле (сакъла, къорчала), ачылмамыш гульдюр, тюшюп китмесун... ... Бен озюм нишлиеджегим? Къанлы къатиль сюретинде франсыз балтасы тюбюндеми джан теслим идеджегим... Я, Рабби! Я, Рабби!

* * *

Давамын махкеме куню тайин олунуп кельмекте иди. Къуртулмакъ чареси ёкъ. Намым бербат (харап) ве башым франсыз балтасы тюбюнде къаладжагъы шубе къалмуюр иди...

Базылар дирлер: «Яху ничион такърир бермииорсынъ (анълатмайсынъ) — къатиль гиджеси къайда олдугъынъы ничион айтмайорсынъ? Бир къызы, я къадыны mestur итмек (гизлемек) ичион озъ башынты харап (виран), идуp¹ акъикъат къатилин къуртулмасына себеп оладжакъынъ. Бу акъыл иши дегиль.» Бенденъиз де бу алы чокъ фикир иттим. Ве кене фикир идиорым къарьеде (койде) къартчыкъ къатиль олундыгъы кунь ве гиджеси бен эп Парижде олуп вакъытлары Маргарита иле кечирдигими икърар итsem² (ачыкъласам), аман къуртуладжагъым. Вакъиэн (ве акъикъатен) уйледен сонъ ве акъшам кеч заманлара къадар къыз иле берабер махусус (хусусий оларакъ) иджаре иттигимиз (кирагъя (ода) туткъан) махалледе (ерде) идик. Хызыметчилер дахи билиорлар, лякин къызын бети эп ортюли олдугъындан, ким олдугъыны ве бен исе фрэнк къаяяфетинде олдугъымдан, мусульман олдугъымы бильмезлер, ама корыслер танырлар...

Тефтиштен малюм олдугъына коре, къартчыгъы кечен айын йигирмисинде акъшам иле яры гидже арасында къатиль итмислер. Шу вакъытта мен ве къыз гогерджин ве къуш киби сейлешип, мухаббет идуp турор идик, къаръе (кой) исе, шехэрден дёрт saatлик махалльдир (ердир). Эвет, къатиль бен оламаяджагъым. Анълашыладжакъ, лякин бичаре къызын ады ве намусы харап ве бербат оладжакъ. Къатлиме (къатиль олгъаныма) разы дегилим, ама бунъя да разы оламияромы.

Намлы ве намуслы бир адамын къызы банъя мухаббет итти. Кишидир, инсандыр зан идуp, эмниет итти, джандан азиз адыны

¹ харап (виран) идуp — ёкъ этип

² икърар итsem — ачыкъ-айдын анълатсам

банъя эманет итти. Насыл хиянет идеим? Хакъ-Тааля (Юдже Аллах) башыма белялар-къазалар язмыш. Баш беним, бичаре ве мухаббетли къызын беним узурымда къабахаты nedir? Озь башымы къуртартмакъ ичюн онунъ башыны беляя насыл къоймалы? Чокъ ойладым, фикирледим. Къызын адыны фаш итмее (ачмагъя) къараар идемедим. Инсафым, виджданым разы оламады. Белядан къуртулмакъ ичюн эманетеми хыянет олайым? Хайыр, ашагъылыкъ, алчакъылыкътыр. Эр не олса, олсун — хыянет ве алчакъ оламам! Сахибимиз Худадыр, бир яздыгъы бардыр... Имдады (къуртулышны) Худадан истерим, чарейи башкъя ёлдан беклери... Бигунахлара Хакъ ярдымджыдыр.

Газетелерде, рузнамелерде акъкъымда язылан хаберлери корюп, тааджюпленюп достлар-билишлер эп хапсханее келюп теселли (раатлыкъ) бердилер. «Бу иште бир янълышлыкъ бардыр. Къоркъманъыз, иншалла, анълашылыр, теп-темиз олурсыз» — диюрлар иди. Лякин я хатыр ичюн, я бильмиюп айтყюрлар иди. Къуртулмая бир чаре корюльмиюр... Къатиль гиджеси къайды олдугъымы косытериуп, къызын намусыны фаш итмее ич разы дегиль исем де, къыз иши анълап ве бана урмет идуп, озь ирадесиле (кендисининъ гонъюль истеги иле) келюп, тефтишчие ахвалындан хабер берсе, бельки къуртулмакъ ихтимал иди, лякин бичаре къызычыкъ алымдан хабер олдугъы иле дюнъядан кечмиш сюрете кельмиш. Энди ким хабер идер?! Кимден суаль олуныр? Бельки бен къатиль олмаздан эввель къызын дженазеси чыкътар... Эй, къара язылы башларымыз!

Эвет, Худая асий (гунахкяр) олдукъ. Эр не къадар яманлыкъ ве феналыкъ итмедик исе де, гуль ве бульбуль киби темиз ве пак мухаббет иле сабыр иттик исе де, бир-биримиз иле корюштигимиз, бир-биримизи хаялландыгъымыз дахи, бельки, гунахтыр, ама я, Худа, джезамыз пек агъыр тюштю. Афу къыл (багъышла),nidже къабахатлары афу буюруорсынъ, я, Рабби, санъя ишандым, инает (лотф, керем) ве ихляс (темиз севги) сенден.

Он алты куньден махкеме оладжакъ. Кунь би кунь (кунь-куньден) башым балта тюбоне якъынлашыюр... Артыкъ олюме азырланаип, тёвбе ве дуая япыштым... Ташкентте бир-ики тааллукъатым (акърабаларым, дөгъумушларым) бар. Бунлара мектюплер тертип идуп, Африка къытъасына (материгине) китюп, начар къалмыш эхл-и-ислям (ислям дининдеки халкъ) бейнинде (арасында) интишар къува-и-ислямие (ислям динининъ яйылмасы) иле мешгүль оладжагъымы яздым. «Узакъ китти, джоулды» — десинлер, къыдырмасынлар ве алымдан хабер алуп атамын намына леке ве киркельмесин фикринде идим.

Не аджайип (худжур) такъдир! Не гъарип ал! Мерхум атам ни-
дже акъча кесп идуп (къазанып) бана терк итти (быракъты) Шимди
бунлар беним башымдан къалып, огъры, хырсыз акъчасы киби,
къатиль олунмыш къартчыгъын варислерине (мирасчыларына)
къаладжакъ! Ич акъыллара келеджек шейми бу?

* * *

Ишлер бойле... Олдукъча франсыз достларым келюп-китюп
хатыр гонъюль алдылар. Аджеба, даха келюп бен бичарейи зи-
ярет идерлерми? Зан итmem... Бичаре Аббас, ялынъыз Аббас!
Джюмлесинден якъын зан иттигим мусю Шалон дахи келюп
алыма теэссоф итти... Лякин бу вазиетте энъ зияде ве энъ сады-
къ достум мухаббетли (севимли) Маргарита бу мюшкюль вазиет-
те бенден мюшкюль ала кельди! Бичаре къызычыкъ! Я дюнъядан
кечмекте, я кечмиштир! Бичаре къызычыкъ, беним къара языларым
сенинъ джанынъ дахи ашадылар... Бир джан, бир беден — тамам
ялынъыз къалдым! Дијар-и-гъурьбет башымы ашайджакъ. Ифтира
ве франсыз мемурларындан гъайры ёлдашым ве рефигъым (достум)
корюнмиюр!..

Ялынъызылкъ не олдугъыны шимди бильдим. Дост ве рефикъ
къадрини шимди огрендим. Ах, бир достум олса иди, алым не
енгиль, не хош олур иди. Франсыз балтасы дахи бу къадар къор-
къунч корюнмелди.

Бу балта хатырыма кельдикче, вуджудым бузлап, сачларым
тим-тик туралар! Гиджелери козюме бир saat уйкъу кирсе, къоркъунч
тюшлөр рахат бермииюр. Худая шукюр, акълым китмиюр.

Гужа къабахатым беян олунан къабахатнамейи (приговор) мах-
кемеден бана ёлламышлар иди. Къач мертвебе окъуп чыкъты исем
де, къаршу бир джевап тапмадым... Худая ишандым, зияретлери
и чюн Фрэнкистана тюштюгим эвлиялара (яни Къыркъ-азизлер ве
Гюль-бабагъа) эманет олдум...

* * *

Реис-и-маккеме (маккеме реиси) мезкюр къадынлардан такъ-
рир (анълатма) алмая башладыгъы сырода, бирисинин гъайры
больмее чекильмесини теклиф итти. Бу алда шу къадын шахаде
оламадыгъыны ве рефикъасы алсыз олдугъындан берабер кель-
дигини беян итти. Реис икинджи яш къадына хитабен: «Молла
Аббасын давасындан отърю айтаджагъынъыз бармы?» — деди.

— Эвет, эфендим. (Джевабы къадын акъыртын (яваш) сеси иле
берюп, алсыз ве къувватсиз олдугъындан джеваплары эп отурды-

гъы ерден, аягъа турмаюп бермее рухсет истеди. Алына урьметен махкеме рухсет берди).

— Сизин адынъыз ве лакъабынъыз (яни фамилиянъыз) недир? Эм бетинъизи ачып джевап бермелисиз, чонки корюнмеең адамдан такърир алмакъ низам дегильдир, — дею, реис азретлери шахадеे (шаатлыкъ эткен къадынгъа) хитап итти.

— Ким олдугъымы айтмамакъ ве бетими ачмамакъ истиюрым, — джевабы алынды.

— Олмаз, бу алда шахитлигинъ джаиз ве къабул дегильдир.

Бичаре къадын башыны ашагъы салуп фикире тюштю. «Нишлейим?» — суали иле мешгъуль олдугъы ашикъар иди. Джумле халкъын джаны бу къадындан мюхим хаберлер алына-джагъына къаний иди, зан идерим. Реис-и-махкеме теклифини текрар иттике, къадынчыкъ бир эли иле бет орьтюсини котепрюп, акъыртын (яваш) ве нарын (индже, назик) сеси иле: «Адым Маргарита Шалон къызы», — деди...

Бу ад ве сес йылдырым киби къулагъымдан ичери кирюп гонълюми нур ве саадет иле толдурдыгъы алда мухакемей, давайи унутуп отурдыгъы еримден сычрап къызын аякъларына сарыладжакъ олдугъымда, дава-и-векилим (адвокатым) бана айлануп, элимден тутуп: «Иш анълашылды. Козюнъиз айдын олсун, энди раЫат олунъ», — дею, фикирим башыма кельмесине себеп олду. Реис такърире (ачыкълама ишини) девам идуп:

— Къяч яшындасыз ве къайда отурасыз? — деди.

— Яшым он секиз. (Фелян) махалледе, (фелян) номералы озъханемизде.

— Бу давада не беян идеджексиз?

— Тефтиш ве махкеме бигунах адамы махкюм ве къатиль итмек узъре олдугъыны беян идеджегим.

— Делиль ве исбатынъыз бармы?

— Эвет, бар. Бичаре къарт къадын къатиль олунан кунь ве гиджеси Молла Аббас Эфенди беним иле вакъыт кечирди. Бир saat айырылмады. Бу алда шехэрден ики-учь саатлыкъ ерде олан къарьеде адам къатиль идемиеджеги табийдир...

Аман еримден атылуp мухаббетли (севимли) ве бичаре Маргаританынъ янына тюшүп мютешеккирен (тешеккюрлер бильдирип) аякъларына сарылдым. Халкълар эп эль уруп (алгъышлап) «Аферин! Аферин!!!» — айтыштылар. Лякин бунлара дикъкъат итмee меджалым къалмады. Маргарита хюзн-хюзн (гъам ве кедер иле) козюме бакъуп байылуp къалдды... Бельки, джан теслим итти фикри иле бен де озюми джоюp баде (сонъра) не олдугъыны бильмез ала кельдим.

Суаллер ве вазифелер:

1. Молла Аббасның апсханеге тюшкенининъ себебини айтыңыз. Апсханеде тюшүнген тюшүнджендерини окъуньыз, фикирлерinden оның табиат чизгисини тайинлөңтөз, оның насыл бир инсан олгъаныны сейленңиз.
2. Молла Аббас акъкъында Париж газетлеринде не киби фикирлер язылғаныны окъуп, бу джемиеттинъ ичерисиндең дюньябакъышларны ифаде этмеге арекет этиңдө.
3. Маргаританы къорчаламакъ ичюн, айны геджеси берабер олгъанларыны айтмагъанының себеби ненен бағылышы? Молла Аббасның олып кечкен вакъиада янып-якъылгъаныны тасвирлеген абзацларны айрып окъуньыз. Инсан гонълюнинъ темизлиги насыл чизгилер эсасында къурулмакъ кереклиги акъкъында субет кечириңиз.
4. Махкеменинъ акъибетли екюнленмесине ким иссе къошкъаныны тарифленңиз. Маргаританың япкъан арекетлери узеринде токъталып аньлатыңыз.



ЭДЕБИЯТ НАЗАРИЕСИ

БЕДИЙ ӘДЕБИЯТТА УСЛЮП АНЪЛАЙШЫНЫНЪ ТАКЪДИМИ

Әдебиятта муэллифлернинъ шахсий язув хусусиети ве чизгисини тешкиль эткен ве бунынъ иле эсерни дигер муэллифлернинъ эсерлерinden айырмажа хызмет эткен бедиий тасвирий васталаргъа *услюп* дерлер.

Эр бир иждатқарнынъ услюби (әсернинъ язылувы иле айырды этильген хусусий чизгилери) иджадынынъ девамында пейда этиле. Муэллифнинъ иджадий фаалиетининъ девамында инкишаф эте.

Услюпнинъ алель-хусуслыгъы языджынынъ дюньябакъышы, шахсиети ве истидаты эсасында тизиле. Акъикъий сөс устасынынъ услюби екяне ола, ич де текрарланмай. Исмаил Гаспринскийнинъ иджадий фаалиетинде къулланылгъан услюп бунъа мисаль ола билир.

Аятий акъикъатны негизине етип тасвирлемек — онынъ иджадынынъ эсас хусусиети олды. Нетиджеде, эдебияттымбызда Гаспринскийнинъ услуби пейда этильди.

Языджы тарафындан къулланылгъан тиль васталары эсердеки услупни образлылыкъ иле теминледилер. Бу тиль васталары не-сирджининъ терен фикирлери ве дюнъябакъышыны ифаделемек ичюн де хызмет эттилер.


Тафсилятлы язылгъан аят левхалары, къараманларнынъ фикирлери муэллифнинъ нуткъыны тешкиль этелер. Меселя: «*Къатиль бер дегилим! Къатили тапмакъ беним борджум дегиль. Башым кесильмек джезасы тертип оладжагъыны билиюрым, нишлейим? Эманете хыянет оламам. Сиз къызы беян идуп, намусыны бербат идемем...*» киби диалогда къараманнынъ алидженаплыгъы косьтериле. Онынъ нуткъында алидженап инсанннынъ ис-дүйгүлары ифаде олуна.

Муэллиф инсанннынъ къальбиндеринъ психологияк тарафларыны айдынлата. Гаспринский буюк психолог оларакъ, къараманнынъ эшитильмеген ички нуткъуны «ички монолог» шеклинде яза. Меселя: «*Я, Худа гунаяхым чокътур, лякин сенинъ мерхаметинъ къаарсыздыр, санда ишандым! Я, Рабби, къызы хифз эйле, ачылмамыш гульдор, тюшюп китмесин... Бен озюм нишилджеғим... Я, Рабби! Я, Рабби!*» киби Молла Аббаснынъ ички монологында онынъ тюшөндөжелери, озъ-озюнен лаф эткени тасвирлене. Бу монологда муэллиф къараманнынъ ички дюнъясыны этрафтаки барлықънен бағылап косьтере.

Бойледже, Гаспринскийнинъ эсерлериндеринъ бедий услуп бедий тасвирий васталарнынъ къулланылувы иле айырыла. Усталыкъ иле язылгъан муэллифнинъ нуткъу, къараманларнынъ ички дюнъясыны терен ве тафсилятлы тасвирлев киби хусусиетлер Гаспринскийнинъ язув услубини тешкиль этелер.

Суаллер ве вазифелер:

1. Эдебиятта *услуп* анълайышы насыл анълатыла? Услупнинъ хусусий чизгилери насыл тизильгенини ве пейда олгъаныны айтынъыз.
2. Услупнинъ аллель-хусуслыгъы насыл меселелер узеринде тизиле?
3. Къараманнынъ нуткъуны тешкиль эткен шейлер недир? Мисаль кетириңиз.
4. Гаспринскийнинъ иджадында пейда этильген услубий хусусиетлер нeden ибараттir? О, буюк психолог оларакъ, къараманнынъ ички нуткъуны насыл тарифлегенини мисаллар кетирип анълатынъыз.



ДЖИАН ЭДЕБИЯТЫНДАН

ОРТА АСЫРЛАРДАН РЕНЕСАНС ДЕВРИНЕ КЪАДАР ЭДЕБИЯТНЫНЪ ИЛЕРИЛЕВИ

В асырнынъ ортасындан та XV асыргъа къадар девам эткен тарихий девир тахминен Орта асыр деп адландырыла. В асырда Рим императорлыгъы дагъыла ве инсанлыкъ тарихында — Уянув, Ренесанс деп адландырылгъан янъы девир башлана.

О девирде чешит халкъларнынъ эдебияты тарихында эсас ер алгъан халкъ агъыз иджады ве христианлыкъынъ орта асыр эдебиятнынъ илерилев эснасына гъает буюк тесири олгъаны беллидир. Орта асыр деп, адландырылгъан девирде сиясий, ахлякъий ве маневий къувет эсасен католик кильсенинъ элинде булунгъан. Шундан себеп, о девирде яратылгъан эдебиятнынъ илерилев тарихы да, кильсенинъ тесири алтында инкишаф эткendir.

Орта асырларда чокъусы халкъларнынъ эдебиятында эпик жанрлардан эсасен къараманий эпослар инкишаф эткен. Бойле этип, англосаксонларнынъ «Беовульф акъкъындаки поэма», франсызларнынъ «Ролланд акъкъында йыр», алманларнынъ «Нибелунглар акъкъында йыр», испанларнынъ «Меним Сидым акъкъында йыр» киби къараманий эпослары пейда олгъанлар. Бу къараманий эпосларда агъыр ве шиддетли курешлерде тувгъан юртуны къорчалагъан пельван аскерлернинъ джесюргилиги шерефлендирильгендир.

Орта асырлар девринде феодаль дагъыныкълыкъ деври олгъан. Улу Рим императорлыгъынынъ дагъылмасы Авропада озъара давалашкъян бир чокъ буюк ве кучюк девлетлернинъ пейда олмасына земин азырлагъандыр. Шунынъ ичюн де, о девирде язылгъан эсерлерде тувгъан юртуна, топрагъына олгъан севги дүйгъусынен

бераберликте, айрыджа озъ эфендисине олгъан садыкълыкъ дүйгүсү да шерефлендирильгендер.

Орта асырларның сонъунда алий-дженабане (рыцарская) лирикасы ве алий-дженабане романлары пейда ола. Эсердеки къараманлар озюнинъ эфендисине, севген яресининъ ашкъына джесор-ликлер косытерелер.

Девирлер кечкен сайын, эдебиятта инсанынъ дюньябакъышы на эмиет бериле. Къараман яхшылыкъ ве яманлыкъ акъкъындаки дүйгүларыны ачыкъ-айдын ифаделеп башлай.

Юкъарыда къайд олунгъан меселелеринъ джумлеси, орта асырның сонъки ве янъы, ренесанс деврининъ бириндже шаири Данте Алигьериининъ иджадында озъ аксини коръди ве терендже ифаде олунды.

Шириетте фарс тили укюмран олгъан бир муитте къырымтатар шаири — Мухаммед Кымиль, озъбек шаири Алишер Навои адий халкъ тилинде иджат эткени киби, Данте, латин тили укюмран олгъан муитте, эсерлерини итальян ана тилинде язгъандыр.

Данте Алигьери озюнинъ ильки «Янъы аят» (1292) адлы сонет (он дөртлюклер) ве кансон (йырлар) джыйынтыгъында Флоренция гузели Beatrice Портинарининъ ольмейдже ширий сымасыны яратты.

Джиан эдебиятында Лейля, Джулъетта, Лаура киби Beatriче де, ашкъ, вефа, темизлик тимсалы олып, севилип келинмекте.

Суаллер ве вазифелер:

1. Орта асыр деп адландырылгъан девир не вакъыт башланып, не вакъыт бите? Къачынджы асырларны къаплап алгъаныны айтынъыз.
2. Орта асыр насыл чизгилернен характеризлене?
3. Орта асыр эдебиятынынъ илерилев эснасына тесир эткен эки хусусистни къайд этип, аньлатынъыз.
4. Къараманий эпосларның инкишафы насыл девирде олып кечти? Насыл эсерлерни къайд эте билесинъиз.
5. Орта асырлардаки дагъыныкълыкъ эдебиятта насыл мевзулярның пейда олувинын ёл ачты.
6. Девирлер кечкен сайын орта асыр эдебиятында насыл меселенинъ тасвир олунувына эмиет берильгенини икяе этинъиз.

ДАНТЕ АЛИГЬЕРИ (1265 — 1321)



Бутюн инсаниеттинъ тарихында, янъы саифелер ачкъан Ренесанс девринде, яшап иджат эткен Флоренциялы шаир — Данте Алигьериининъ такъдири гъает аджыныкълыдыр. Шаир озъ-озюне «къабаатсыз сюргүн» деп, бефтан айтмагъандыр. Тувгъян юртундан сюргүн этилювининъ себеби онынъ омюринде расткельген бир чокъ меселелернен багълыдыр.

Рим империясынынъ йыкъылмасы ве дагъылмасы нетидже-синде, дигер Авропа мемлекетлеринде олгъаны киби, Италия да бир чокъ къысымларгъа болюнген эди. Эвельден Италияды Рим папасынынъ миллий бирлешшөвде буюк тесири оладжагъыны козъ-леген, ве, бу вакъиадан сонъра да, онынъ фазла чокъ файдасы тиеджек деп, тюшүнгөн тарафдар инсанлар пейда олдылар. Оларнынъ партиясы гвельфлер деп адландырылгъан. Италияны император идаре эткенини истеген тарафдарлар исе гибеллинлер партиясыны тешкиль эткен.

Данте Алигьери о девирде гвельфлер партиясы сырасында хызмет этип, ичтимай аятта фааль иштирак этмеге тырыша. О, бу партияда булунаракъ, Флоренциянынъ мустакъиллигини мудафаа эте. Гвельфлер партиясы тар-мар этильген сонъ, Дантеинъ аяты бутюнлей денъише. Оны сюргүнликке махкюм этелер. Бу маалъде о, эвли-баркълы ола. Севимли Джемма адлы къадынынен яшай. Джемманынъ бабасы гибеллинлер партиясынынъ ёлбашчысы олгъанындан себеп, сиясий сюргүнликке огъратылмай. Бундан отърю, Джемма да бабасынен бераберликте Флоренцияда къала. Данте исе сюргүн олуна. Сюргүн олунгъян Данте, омюрининъ сонъуна къадар, омюр аркъадашынен ич де корюшмей.

Чокъ сенелер девамында Данте, тувгъян юртуна олгъан севгисинен, асretлик чекип яшай. Севимли Флоренциясыны хатырлап, о, ят топракъларда янъгъызлыкъ ис этерек, омюрини эп девам эте. Омюрининъ сонъки куньлеринедже о, сюргүнликте яшай.

Къадимий Римнинъ шан-шерефи, къудретининъ гъайрыдан ти-кленюви арзусынен яшай. Дюньявий ве руханий укюметлернинъ бири-бирине уюп инкишаф эткенини пек истей. Флоренциягъа къайтып оламай, Равенна шеэринде вефат эте.

Суаллер ве вазифелер:

1. Данте Алигьерининъ такъдири акъкъында не бильдинъиз? Онынъ такъдири не ичюн аджыныкълы олгъанынынъ себебини анълатынъыз.
2. Шаир озы-озюне «къабаатсыз сюргүн» деп, не себептен бефтан айтмагъаныны анълатынъыз. Онынъ тувгъан юртундан сюргүн этилювининъ себеби насыл бир меселелернен багълы эди?
3. Данте насыл бир партиянынъ азасы олып, онынъ сырасында хызмет эте? Ичтимай аятта фааль иширак этерек, онынъ насыл ишлер япкъа-ныны икляе этинъиз.
4. Дантенинъ къадынанен арасындаки айрылыкъ мусибети насыл вакъианен багълыдыр?
5. О, ят топракъларда булунгъанда, тувгъан юртуны хатырлаймы? Бу девирдеки арзу, макъсалтарыны тарифленъиз ве такъдири насыл аджыныкълы вакъианен екционленгенини икляе этинъиз.

«Иляхий комедия»нынъ тизилишине даир

«Иляхий комедия» баты эдебиятынынъ энъ улу эсерлеринден биридир. Бу эсер христианлыкъынъ энъ буюк ширий эсери оларакъ къабул этильмекте. О девирлерде бу эсернинъ язма нусхалары эльден-эльге долашкъан. Бир чокъ тиллерге терджиме олунып, асырлар бою Авропанынъ «Китаб-и Мукъаддес»тен сонъра, чокъ окъулгъан китаплар арасында ер алгъан.

«Иляхий комедия»нынъ энъ буюк къыймети — онынъ халкъ къонушма тилине якъын, итальянджанынъ флоранса леҳджеси-нен язылмасынадыр.

Китапны тешкиль эткен узун ширий эсер Джәэннем, Араф, Дженнет киби учь къысымдан ибареттир. Эр бир къысымгъа отуз учь йыр мевджют. Эсерге кирсетильген «Кириш»нен бераберликте «Иляхий комедия» 100 йырны тешкиль эте. Бутюн комедия 14233 мисрадан ибареттир.

«Иляхий комедия» Кириш, Джәэннем, Араф, Дженнет киби дөрт къысымдан ибарат эсердир. Эсернинъ Джәэннем къысмы — 4720 сатырдан, Араф къысмы — 4755 сатырдан, Дженнет къысмы исе — 4758 сатырдан ибареттир.

Суаллер ве вазифелер:

1. «Иляхий комедия» баты эдебиятынынъ насыл эсерлери сырасына кире? Бу эсер, христианлыкънынъ насыл ширий эсери оларакъ, къабул этильгенини айтынъыз.
2. О девирлерде эльден-эльге долашкъан бу эсернинъ язма нусхалары насыл китаплар арасында мүим ер алгъандыр? «Иляхий комедия»нынъ энъ буюк къыймети неден ибарет олгъаныны тарифлентүйз.
3. Китапны тешкиль эткен узун шиир къач йырдан иберетти? Эсерге кирсетильген киришнен бераберликте «Иляхий комедия» къач йырны тешкиль эткенини ве бутюн комедия не къадар мисрадан ибарет олгъаныны айтынъыз.
4. «Иляхий комедия» насыл бир къысымлардан ибаретти? Бу къысымларнынъ серлеваларыны айтынъыз.

«Иляхий комедия»нынъ мундериджесине даир

Эсернинъ мундериджеси гъает меракълыдыр. Эсерде олып кечкен бутюн адисе-вакъиалар шаирнинъ адындан икяе олuna. Отуз беш яшындаки бир шаир, къаранлыкъ бир геджеде, ёлуны шашырып, чытырманлы орманда къала. Бу орманда о, арслан, къаплан ве къашкъыр киби учь йыртыджынынъ аши ола биледжегини бильдире.

Бу учь айванннынъ эсерде тасвир олунувынынъ символик анълатылувы бар. Бу эсерде фаний дюнъядаки инсанннынъ ахирет ёлджулыгъы косытериле. Арслан сымасында — гъурур ве джебир¹, зорбалькъ, зулумлыкъ киби табиат чизгилерининъ темсили акс олuna. Борю сымасында — тамакъярлыкъ, кендисини севюв киби инсан чизгилерининъ темсили косытериле. Къаплан сымасында — яланджылыкъ, саткъынлыкъ, шехветлик², шан-шуретлик (сладострастие) киби инсанлыкънынъ табиат чизгилери темсиль олuna.

Данте Алигьери, латин шаири Вергилийнинъ мусафир-перверлиги саесинде, бу къаранлыкъ ве чытырманлы орман ичинден Джээннемге энелер. Олар Джээннемни зиярет эткен сонъ, кене де Вергилийнен берабер Арафкъа кечелер. Бир ара, оларнынъ ёлджулыгъына къошуулгъан къадимий шаир Статуснынъ рефкъатынен, Арафны да зиярет этелер, кезип юрелер. Сонъра исе Данте генчлигинде кечинген севгилиси — Беатриченен корюше. Олар бераберликте, Дженнетни мейдангъа кетирген, докъуз къат-

¹ джебир — насилие

² шехветлик — сладострастие

лы кокте долашалар. Эсернинъ энъ сонъунда исе Данте, Азрети Мерьемнинъ ярдымынен, Арш-Аляда Аллахнынъ джемалини мюшахеде этмек (козетmek) арзусына наиль ола.

Иляхий комедияда къараман, Дженнет ве Арафта булуныр экен, айны даиреде тюрлю тарихий девирлерни козете, тюрлю мединиетлерге менсюп олгъан мешур шаирлерни, мутефеккир ве тарихий эрбапларны коре. Озюне эш олгъан путперест Вергилийнен берабер, анда, олар озълерининъ сиясий меслекдешлери ве душманлары, антик деврининъ мифологик къараманлары, мусульман ренесансынынъ алим ве мутефеккирлеринен де расткелишеле.

Дантенинъ фен ве санаткъа олгъан урьмети пек буюк олгъаны, о, мусульман алимлери — Абу Али Ибн Сина ве ибн Рушдны дженнеттей бир мескенге ерлештиргенинде корюне. Шу ерде къадимий юнан фельсегеджилери Араст иле Афлотун да булуналар. Данте озюнинъ сиясий душманларыны (диндаш олгъанларына бакъмадан) Арафынынъ энъ дешетли ерлерине ерлештире.

Бойледже, Данте Алигъерининъ эсерини огредирип экенмиз, дюньявий санатнынъ дигер эрбаплары киби, Данте де, инсанитетке ярдым этмек арзусынен яшап, омюр кечиргенини анълаймыз. О, бедий эсер вастасынен, фаний ве бакъий дюньяянынъ маневиетини тасвирлеп, инсанлыкъкъа аятий акъикъатны олгъаны киби къабул этмеге огратти.

Гуняхлар ишлеп яшагъан инсанитет, мукъаддес, улу китапларда язылгъан шартларгъа риает этмесе, тайинленген куню-саатинде джезасыны буладжакъ деген фикирлерни эсеринде айрыджа та-рифледи. Кечмиш заманларда ве озюнинъ девринде яшагъан улу шахысларнынъ сымаларында бу фикирлерини тасвирледи.

Суаллер ве вазифелер:

1. Шаир, шашмалап тюшкен орманда, насыл учь йыртыджыны расткетире? Бу учь айваннынъ эсердеки тасвири насыл бир символик анълатылувларнен бағълы олгъаныны икяе этинъиз.
2. Бу эсерде фаний дюньядаки инсаннынъ анги бир ёлджулыгъы косьтериле? Арслан, борю ве къаплан сымасында насыл бир чизгилер ифаделенгенини айтынъыз.
3. Шаир Вергилийнен бераберликте анги бир ерлерни зиярет этелер? Анда кимлерни корыгенини айтынъыз.
4. Эсернинъ энъ сонъунда насыл бир адисе-вакъиалар олып кече? Метиннен файдаланып, икяе этинъиз.

«Иляхий комедия»да Джәэннемнинъ тасвири

Данте Алигьериининъ «Иляхий комедия»сында Джәэннем пек меракълы тасвир олуна. Эсерде Джәэннем дюньянынъ меркезинде ерлешкен, ве, бир хуню киби, кеткен сайын, тарлашкъан, докъуз къат коктен ибареттири. Джәэннемнинъ эр бир къаты фаний дюньяда яшагъан инсанларнынъ япкъан гуняхларынынъ мыкъдары эсасында тайин олуна. Эсерде гуняхларнынъ ве къаргъышлы джезаларнынъ агъырлыгъы, юкъары къатларгъа котерильген сайын, чокълашкъаны косьтериле. Эсерде Джәэннемнинъ эр бир къаты, инсанларнынъ омюрде япкъан гуняхларынынъ агъырлыкъ дережесине коре, бойле сыралана: къоркъакълар, шехветперестлер (ис ве дүйгүүнинъ нефисхор эсирлери), обурлар, залымлар, къатиллер, Аллаңкъа къаршы кеткенлер, гомосексуалистлер, къадын сатыджылар, ара бозуджылар, фалджылар, экиюзълюлер, къалпазанлар, акърабаларына, ватанларына, мусафирлерине, къутсал имангъа хиянет эткенлер.

«Иляхий комедия»да Арафынъ тасвири

Араф океанлар ортасындаки бир ада узеринде ерлешкен дюньянынъ энъ юксек дагъыдыр. Хуню шеклинде ве еди къат олгъян дагъынынъ сонъ къаты, ер юзюнинъ дженнетидир. Ве, бундан сонъ, он къатлы кок юзю дженнетине кечилир.

Арафта афу этильмесине, багъышланмасына акъ къазангъан, факъат Аллахнынъ севгили къуллары сырасына киребильмек ичюн, кечиджи бир темизлев, арындырув сынавындан кечкен, гуняхы аз олгъан кишилер булуна экенлер.

Арафта гуняхларнынъ ве къаргъышлы джезаларнынъ агъырлыгъы джеэннемдекилернинъ аксине, юкъары котерильдикче азлашкъаны анълатылыр. Мында, сонъ нефесте тёвбе эткенлер, дженкте ве джинаетликнен ольдюрильгенлер, кибирлилер, хасетчилер (кунъджю ве къызгъанычлар), опъкелерини тутамагъанлар, тембеллер ерлешкенлер.

«Иляхий комедия»да Дженнетнинъ тасвири

Дженнет Кокте ерлешкен Ай, Меркурий, Венус, Кунеш, Марс, Юпитер, Сатурн киби сейярелерни арекет эттириджи Кок ве Арш-и-Алядан ибареттири. Арш-и-Аля саф нурдан ибареттири, мад-

деден арынгъан, мытлакъа сюкюнет дияры олгъан Раббининъ къатыдыр.

Дженнеттинъ гузелликleri ве ичинде булунгъанларнынъ мөртебелери къатлар юксельген сайын артар. Энъ ашагъыдаки къатта: эйиликсеверлер, ашыкълар, алимлер, шеитлер, адиль укумдарлар, иляхи ашкъкъа далгъанлар, азизлер, мелеклер ерлешкенлер.

Эсеринъ Джәэннем адлы болюгинде бильдирильген малюмат Дантеинъ энциклопедик бир инсан олгъаныны тарифлей. Бу эсерде бильдирильген малюмат пек яшагъан девриндеки, астрономия ве геометрияны, фельсфе ве эдебиятыны, чешит илим даллары ве сааларыны Данте терен бильгенини косътермектелер. Муәллиф къабаатлы инсанларнынъ, Джәэннем ве Арафта насыл джезалангъаныны, левхаларда, бар акъикъатынен, косътерип, окъуйыджыны дешетке къоя.

Эсеринде Данте мусульманлар акъкъында акъарет тешкиль этеджек ифаделер къулланмай. «Иляхи комедия»да, Хазрети Мухаммед иле Хазрети Алини Джәэннемде косътерильмегени дикъкъатымызын чеккен бир хусусиеттир. Бу эсерде муәллиф учь мусульмангъа — Селляхиддин Эйубке, Ибн Сина, Ибн Рушдилерге дикъкъат айыра. Олар Арафынынъ къапусында ве азап чекмегенлернинъ арасында дадыр.

Эсерде тасвир олунгъан бу вазиет о девирде Хадж сеферлерининъ христианлар арасында шиддетнен къабул олунгъаныны тарифлей. Оларны Джәэннемнинъ энъ тюбюнде дегиль, болюджилик япъкъанларнынъ къатында, секизинджи къатында косътерильмеси де, Хазрети Пейгъамбернинъ олардан айырылып, янты бир дин къургъаныны, христиан дюньясына бильдирмектедир.

Суаллер ве вазифелер:

1. Эсерден Джәэннемнинъ анги бир шекильде олгъаны ве не ерде ерлешкени акъкъында насыл малюмат ала бильдинъиз? Сизге бу бильгилер насыл джеэттен къыйметли олгъаныны сёйленъиз.
2. Джәэннемнинъ эр бир къаты, фаний дюньяда яшагъан инсанларнынъ гуняхлярына нисбетен, насыл тайин олuna? Анда кимлер тюше биле?
3. Эсерден Арафынынъ анги бир шекильде олгъаны ве не ерде ерлешкени акъкъында насыл малюмат бильдинъиз?
4. Арафынынъ эр бир къаты, фаний дюньяда яшагъан инсанларнынъ гуняхлярына нисбетен, насыл тайин олuna? Анда кимлер тюше биле?
5. Дженнет акъкъында не бильдинъиз?
6. Дженнеттинъ эр бир къаты, фаний дюньяда яшагъан инсанларнынъ япъкан эйиликлерине нисбетен, насыл тайин олuna? Анда кимлер тюше биле?

ИЛЯХИЙ КОМЕДИЯ

ДЖЕЭННЕМ^[30]

Биринджи йыр

Данте къап-къараплыкъ, зульмет толу орманда, бутюн кунь ёлуны шашырып юрер экен, танъгъа якъын, о ерден, чаре тапып чыкъа ве юксек тёпеликке котериле. Амма онынъ ёлуны къаплан, арслан ве къашкъыр кестирип чыкъалар. Оны гъайрыдан орманынъ ичерисине къувалар. Шу арада шаирнинъ къаршысында къадимий дюнья шаири Вергиллий пейда ола. О, онъя бир къач сёз айта. Вергиллий Дантели Джээннем ве Арафтан аман-эсен алыш отеджегини, Дженнетке исе Beатриче алыш кирежегини бильдире. Шойле этип, Данте Вергилийнинъ пешинден кете.

- 1 Аятый омрюмнинъ ярысын юрип,
Чытырман дагъларда шашырдым ёлум.
Зульметтен¹ сарсылгъан ормангъа сюрип
- 4 Киргеним, айтмагъа адживизир гонълюм.
Хатыргъа пек синъген мудхиш сезгини
Унутып оламай, соглъандыр гулюм.
- 7 Эджельден къоркъунчлы олгъан бир эзги
Сейяхындан² таптым эбедий савап,
Коръгенимни айтсам: мисильсиз кузъю,
- 10 Хатырлап оламам. Ненидир арап,
Ормангъа баргъаным ёлумдан тайып,
О тюшми, гонъюльни сарсыткъан харап.
- 13 Къан къускъян ерде гъайып олмадым шашып,
Дагъынинъ бир четине еттим ве, шу анъ,
Юксек тёпеликке эндим, къыр ашып.
- 16 Сейярелер шу дем олунды беян.
Шевкъ сачтылар этрафкъа икметтен ташып,
Тёклилер дагъ сыртына козъяшын урьян.

¹ зульметтен — зифт къараплыкътан

² сейяхындан — зияретинден

- 19 Къоркъудан арынгъан юрекке сакин
Къаранлышъ геджеден синъсе де теляш,
Гонълюм тазе нефес алды бир такъым.
- 22 Далгъалар къахринден¹ къуртулгъан сейях
Саильге чыкъкъандай, артына бакъып,
Хор санып озюни алемден кяде,
- 25 Серсериј тюшюндже, фикирден рухум
Тынчланды шай этип, тез, февкъульаде,
Коререк ёлларда, акъкъанын зокъум.
- 28 Вуджудыма синъенде коклерден къувет,
Земинге тюш энген басамакълардан
Юксекке ынтылдым, сурьатле энип.
- 31 Чет бир дагъ, къаядан буюрып давет,
Тюшип кельди, пысып, балабан къаплан,
Юньлери ёлакълы, фелектен дёнип.
- 34 О, юксек ёлумны кечкенде, яман
Айланып туарды, юткъунып, сакъыт,
Хаялсырап эдим, къайтмақъны аман.
- 37 Лякин пейда олгъанда, кунеш, шу вакъыт,
Йылдызлар топуны сырттан къушатты
Иляхий Севгининъ мисли ёкъ тахыт,
- 40 Йылдызлар шавлесин Ерге узатып,
Саары вакътындаки хош saat дерсинъ,
Къальптеки теляшым шу ань джоюлды.
- 43 Къоркъубильмез исин этрафикъа сер сен²,
Дер экеч, корюнди балабан арслан.
Къальптеки ишанчта оюкъ оюлды.
- 46 Келе эди ёл басып, шексинмей аслы,
Ер панджалап, ачлыкътан джаггъы тарсылдал,
Тёгерекке яйып, дешетли къоркъу.

¹ далгъалар къахринден — далгъаларнынъ шиддетли, джезалы тепренювинден

² сер сен — (сермек) яй, дагъыт сен

49 Къуру кемик къашкъыр да, тиши тасырдан,
Ольдюриджи къытмырлықътан арынмай фаслы,
Келе эди джан йыртыджы, дуалар оқъу...

61 Зульмет вадийсинде тедбирсиз әдим,
Бир зат пейда олды къаршымда шу ань,
Гуя лафсызлықътан талгъянын сездим.

64 Оны коръенимнен, ялвардым: — Аман,
Къуртарынъыз мени, эйлейип керем,
Колеткесинъми, инсан, ич фаркъы ёкъ.

79 — Сен Вергилийсинъми, къаршымда бугунь
Расткельген багъры кенъ ве джумерт гонъюль?! —
Шойле джевап бердим. Къальбимде дюгюнъ: —

82 — Назм эхлининъ Хуршиди ве пири қамиль¹,
Санъа севгим иле чекип чокъ захмет,
Иджадынъ окъумагъа олгъаным наиль.

85 Сен манъа устазсынъ, унерли ибрең,
Эр ерде шан тапкъан гузель ве маҳбуп
Услюпни² тюс эттинъ әдие, къамет.

88 Манъа мынав маҳлюкъ азар бере чокъ,
Медет эйле³, энди, эвлия инсан,
Япмышындан сабырым тюкенди толып.

91 — Сени къуртараджакъ ёл олды беян. —
Алымга козъ ташлап, сёс башлады о, —
Дешетли мензильге къайтма бир заман.

94 Сени къан агълаткъан Къашкъыр пек джарис,
Бу якъкъа юксельсе, анги бир бенде,
Махф этер⁴, ёлларын кесип шу ерде.

97 О, шойле явузздыр, гъаддар, масхара,
Ач афат, тоймамыш, ярамаз, хасис.
Алларгъа кетиргеч, бинъ гулюнъ солар.

¹ қамиль — шишир усталыгъынынъ Күнеши

² маҳбуп услюпни — севген услюпни

³ медет эйле — ярдым эт

⁴ маҳф эттер — ёкъ эттер

- 100 Бу явуз Къашкъырны баскъан ис арам,
Расткельген бир затны ёлдан урап зар,
Шевкъатлы Ит кельгеч, иш де терс олур.
- 103 Нефис къулу дегиль о, Къашкъырдай башсыз,
Идракли ве джумерт, эр бир иш аля
Яшар къанаатле, дайм музaffer.
- 106 Эвриал эм де Турн, Нис ве Камилла
Мульку къурбан олгъан итальянгъа хас,
Икметли олгъайдыр шанлы Ит илля.
- 109 Къаерге къачмасын Къашкъыр бешарет,
Ит оны Арафкъа сокъаджакъ бир кунь.
Гъарез мензильге тюшмектен терс кет.
- 112 Меним сёзлериме энди динълен, тур,
Рухларнынъ эбедий мескени таба,
Ёлбашчынъ олайым, меним иле юрь.
- 115 Андадыр къадимий рухларнынъ эпси
Оларнынъ ферьядына асарсанъ къулакъ,
Динълерсинъ зар олгъан ихтияджларын.
- 118 Атешгях багърыны корерсинъ бираз,
Бир къавм ки, олса да, азаптан азат,
Дженнет ферагъатын¹ беклейлер мытлакъ.
- 121 Даа юксекликни эйлесенъ мурат,
Дилявер рух джесюр юрекли сени алыр къаршылап,
Экинъиз кетерсиз, этермиз хайрат.
- 124 Мен Арш-Азретинден кетамам кечип,
Чюнки эйлемедим ёлун итираф,
Дост- эшни де бирден къалыр о, тутып.
- 127 Эмри ваджип тахты манъа макъульдир.
О Ер — Алий дергях², О — Алий хиргях³,
О Ерге етишмек шереф ве савап».

¹ Дженнет ферагъатын — Дженнет раатлыгъыны

² Алий дергях — Танърынынъ къаты, узуры, мекяны

³ Алий хиргях — Танърынынъ эбедий къаты, узуры, мекяны

130 Дедим: «Сен ёлунъдан хаберсиз эляк
Ресульнинъ акъкъыны эйле ильтиджа,
Шаирим, белядан къурттар мени, ах.

133 Ёл башла, айткъанынъ рух таба фелях,
Бир ара Дженнетнинъ къапусын корьсем,
Джеза чеккенлерни де махкюм, мубтеля».

136 Кетти, юрдим мен пешинден серсем.

Суаллер ве вазифелер:

1. Зульмет вадийсинде Данте насыл бир адисе-вакъиаларгъа расткель-генини эсерден окъуп анълатынъыз. Эсерде муэллиф тарафындан къулла-нылгъян къаплан, арслан, къуру кемик къашкъырнынъ сымалары нени анълаталар?

2. Данте ве Вергилий не акъкъында лакъырды этелер? Вергилий онъя къашкъыр акъкъында нелер айткъаныны эсерден ифадели окъунъыз.

3. Данте Вергилий иле къайда кетелер? Бу акъта эсердеки сатырлардан мисаль кетирип тарифленъиз.

4. Вергилий Дантели къаерге къадар озгъараджагъыны бильдириди. Себебини анълаттымы? Эсердеки сатырларнен тасдыкъланъыз.

Бешинджи йыр

Вергилий ве Данте айланып тюшкен экинджи даиренинъ къа-тындаки бендelerнинъ гуняхыны тайин этип, джезасыны косьте-риджи Миносны корелер. Бу даиреде шехветперестлер ерлешкен экен. Олар дешетли къую этрафында токътавсыз айланып юрелер. Бу ерде Данте баҳтсыз севгилиси Франческа иле субетлеше.

1 Биринджи даире ичин терк этип,
Аизар инъильти толгъан дияргъа
Аякъдаш достумнен тез кельдик этип.

4 Инъильти, седадан ава сияргъан
Бу ерде Миноснынъ иши бес-белли,
Озгъарып рухларны тизип сырагъа,

7 Джезалав эсабын авасы елли,
Махкюм рух кельгенде, деръяны кечип,
Миноснынъ чыкъаргъан фенти пек телли.

10 Къуйругъыны орап, махкюмни сечип,
Айыбына коре, буладжакъ некес,
Гуняхына ляйыкъ зокъумын ичиш.

13 Титреерек, джезасын беклерди эр кес,
Дешетли хакимге бир-бир янашып,
Ашагъы тюшелер чыкъармай нефес.

16 — Гъам эвине кельдинъми, дайре ашып.—
Деди Минос, титис ишин токътатып,
Сеси седа олды, тешрифке шашып.

19 — Не анъладынъ бу ёлгъя, сен окъ атып,
Озюнъни бас, дайре кезмеге къыйын.—
Ёлдашым кестирип, деди сёз къатып:

22 — Джээннем онъя ляйыкъ, эм де тайин
Шеадет бергендер О, Алий дергях,
Дергях эмри ваджип, санъя айтайым.

25 Шу вакъыт чалынды къулакъта ах-вах;
Бинълеп бенделернинъ зарлы налеси,
Къанъгъытып быракъты гонълюмни эй-вах!

28 Бу ерде нурларнынъ учкъан шавлеси,
Мисильсиз пек къоркъунч, терен денъизден
Фышкъыргъан фуртуна — рухларнынъ сеси,

31 Кутюкленинг учты серпильген изде,
Къошып махкюм рухкъа къасевет-къааръ,
Къаранлыкъ бошкъунлыкъта эр шей тенсиз де.

Шаир ёлбашчысы, ёлдашы Вергилийнен экинджи дайредеки ал-вазиетни козетип юрьгенде, баҳтсыз севгининъ къурбаны олып, вефат эткен севгилиси Франческанен корюшеп.

85 Меним гурь сесимни эшитип олар,
Дидонанынъ сафында сезмейип эв-баркъ,
Узурыма ашыкъты, котерип къоллар:

88 — Ашкъ дадын таткъан зат мераметле саркъ,
Кельгесинъ, налемиз Аршкъа еткенде,
Корымеге зульметте олгъанларны гъаркъ.

- 91 Мындан Рабби дуа къабул эткенде,
Багъышлав алыр әдик, ялкъарып, сорап.
Гуняны багъышлагъан тек Алий дергях.
- 94 Не бильмеге истейсинъ, кельдинъ не ёрап,
Разымыз биз субеттен кейф алмакъ, акъ,
Боран тынгъан вакъытта, арзуладар арап.
- 97 По неэри шувулдап акъкъанда иракъ,
Пек джумерт, хайырлы ерлерге етти,
Тынгъан саиллерде таптым мен дуракъ.
- 100 Гузель бир буджуткъа пек мефтион этти
Севишен диллерни багълагъан зия,
Вуджудым севгиден хор олып, битти.
- 103 Ашкъ атеши севгиден олмады зиян,
Гонъюльдеш инсанны севем мен аля...
Къальбимде деръядай ташмакъта иссян.
- 106 Бу севгиден башымызгъа тюштю зор беля,
Бизим къатильни беклейлер Каинде,—
Деди бир колетки — козълери эля.
- 109 Бу сёзлерни динълеп, боюм олып яй,
Сонъсыз азаплардан баш эгдим гъамлы:
Насыл фикир къыйнай бойле мескенде.
- 112 Дедим: — Асыл да олгъанмы бильген,
Оларны насыл пак, бир хаял джамлы
Бу аджджы къысметке алып кетирген?!
- 115 Сюкюнет энгенде, мен бердим суаль:
— Аизарынъ динълеп, даянмам асыл,
Франческа къальбиме гъам къойды шу ань.
- 118 Туташтыргъан недир, айт, сен, тутма сыр.
Гъарип гонъюллери асертте эбджиль
Тута нас... тесадиоф, насыл ал, асыр? —
- 121 О деди: — Бахтсызлыкъ чагъында эр диль
Шад вакътын хатырлап, гъам чеккен аньде
Алынъа устазынъ оладжакъ кефиль.

124 Бу мудхиш, талийсиз севгининъ зарлы
Тафсилятын этсем, эгер де беян,
Сель акъяр козъяшым, сёндирир къандиль.

127 Бильмездик Ланчелотны бу алгъа къойгъан
Ашкъ хавфыны акъылгъа ич де ильмейип,
Юрердик о заман первасыз, ян-ян.

130 Севги аизарын къальплер бильмейип.
Козълер токъушарды саифе ара,
Бизге баҳт бақъяр эди, козъяш сильмейип.

Бойле этип, Франческанынъ колеткиси, сагъ-селямет олгъанда, Дантенен бераберликте Галеото адында бир эдипнинъ Ланчеллотнынъ севгиси акъкъында язгъан къыссасыны окъугъанда, къальплеринде сыйджакъ ислер уянгъаныны анълата. Бу вакъиадан сонъ, олар китап окъумагъаныны бильдире.

139 Эрвах сёйлер эди, эйлейип веда,
Эши де ынътарды, ынътарды тёлю,
Асретлери мени эттилер эда,

142 Йыкъылдым шу аньде, мисильсиз олю.

Суаллер ве вазифелер:

1. Экинджи дайренинъ къатында шехветперест инсанларнынъ вазиети насыл тасвир олунгъаныны эсерден окъунъыз. Икяе этинъиз. Миноснынъ бу дайреде япкъан вазифелери неден ибарет эди?

2. Миноснен Дантенинъ арасында насыл бир лакъырды олып кечкенини тарифленъыз. Эсерден мисаллер кетирип, джевабынъызын тасдыкълантыз.

3. Бахытсыз севгининъ къурбаны олгъан Франческанен Данте къаерде корюше? Олар озюнинъ севгиси акъкъында нелер бильдиргенини эсерден окъуп изалантыз.

Отуз учонджи йыр

Пизанлылар граф Уголинонынъ эки оғълу ве эки торуныны къааранлыкъ ерге къапатып, ачлыкъ чектирип, ачлыкътан къыйнап ольдюргенлер. Граф Дантеге бу акъта икяе эте. Бу фурсаттан файдаланып, шаир — Данте, саткъын инсанынъ руху вуджуды

даа сагъ олгъан арада, онынъ руху Дженнетке тюшюрильгени, шу арада рухсыз тенге ибليس кирип, ерлешип алгъаны акъкъындаки малюматнен таныш ола.

10 Кимсинъ бильмейим, насыл къавм-несильден?

Къайтылмаз мекяндан кельдинъ серсерий,
Тосканлисинъ, тиль-лехдженъ де, эсимде.

13 — Граф Уголино эдим, омрюм эксерий
Кечти. Янымда — олюмге себепкен,
Къомшум — архиепископтыр — Руджьери.

16 Онъя инанырдым, ич де тутмай кем,
Ольдюрди, махф этип, санки бар джиан,
Иман бирлигини узип мустехкем.

19 Анги бир себепле махв эткенин джан,
Аля даа бильмейдир ич бир замандаш,
Динълеп лафларымны, топла эеджан.

22 Ач къаале къасрына тюштим берип къаш,
Нидже бенде олып анда хор туткъун¹,
Къафесте тюш корип, агъартмакъта баш.

25 Кечирдим мында мен нидже-нидже тун.
Мени булгъап бир ань, вахимели сес²,
Истикъбалъ ёлларым къапатты бутюн.

28 Тюш коръдим, гуя о мельун ве некес
Луккуни бизлерден айыргъан якъкъа
Борю явруларына алмагъя нефес

31 Бермейип, къувлагъан меджрух³ авлакъкъа,
Гваланди, Сисмонди, Ланфранки — эпси —
Копеклер шашкъандай къанлы талавгъа,

34 Махв этти оларны хасис тепкиси
Явуз авджыларгъа ем олдылар хор,
Суръатле чевирип омюр тесписин.

¹ хор туткъун — хор эсир

² вахимели сес — къурунтылы сес

³ меджрух — яралангъан

- 37 Уянгъан эдим мен дуйып алым зор,
Эшиттим, токътамай гонъюльден суер
Дёрт огълум азардан агълагъанын тор...
- 40 Козьыш тёккенсинъми, сен де джанкуер?
Эвлятлар алындан орътиюнип гонълюм,
Козылерим торланып, джаным шай куер.
- 43 Уянды дёрт огълум, юкъудан дамлы,
Емиш даркъаткъанда, зинданбан¹ шу вакът,
Туардыкъ биз тюшнинъ тесринден гъамлы.
- 46 Эшиттим къаленинъ къапусы такъ-такъ
Япылды, мен исе бакъардым эфзал².
Къаранынъ янында таш къаткъандек акъ,
- 49 Бынъранмагъа атта етмезди меджал³.
Огълум Ансельмуччо деди: — Бабам, акъ
Чырайынъ агъарды кескендай къанджал. —
- 52 Агъламаз эдим мен, тильсиздай, сессиз
Кечирдим гедже ве куньдюзимни къыт.
Кунеш догъып, къонгъанда, эдим мен эссиз.
- 55 Гъамлы серт ханеге кунешнинъ йылт-йылт
Шавлеси серпилип тюшкен сание
Анъладым — алымыз этиле такълит⁴.
- 58 Пармагъым тишледим — агърысы тие,
Балларымнынъ алым ойланып къат-къат,
Ачлыкътан бир-бирин ашарлар дие.
- 61 Дедилер: — Бизни сен эткенсинъ бербат⁵.
Вуджутны гъайры ал, разымыз, баба,
Бизни ашап олсанъ, къуртулышэр зат.

¹ зинданбан — зиндан бакъыджысы

² бакъардым эфзал — бакъардым къоркъу иле

³ меджал — такъат

⁴ такълит — алымыз эвель олгъаны киби текрарланып косытериле

⁵ эткенсинъ бербат — эткенсинъ харап, виран, ёкъ эткенсинъ

- 64 Тынчланым, диллерин этмейип фена,
Сюкюнетли куньлер кечти йыракъта.
Къара ер, ютмадынъ, сыр этип, тена?!
- 79 Эй вах, Пиза тамгъасын топракъкъа
Сесинъ де джайрагъян топракъкъа иснад¹.
Къомшу иль джезанъны созса узакъкъа —
- 82 Капрая, Горгона дересин къушат,
Еринден къозгъалсын, токътатсын Арноны,
Арсыз илинъ иле ол сен гъаркъ, бербад!
- 85 Насыл шан юксельткен Уголиноны,
Шай исе, къасырны о, теслим эткен,
Не айбы бар, бу дёрг садеф огъланннынъ?!
- 88 Адыны тамгъалап, айткъанлар да пак,
Пактыр Угуччоне ве Бригата зар...
Къая тегиз ерден арадыкъ пытақъ.
- 91 О ерде гунахкяр — къавми интизар
Махкюмлер² ятарды бенд олып мытлакъ,
Бузлу энъселери откъя олып зар.
- 94 Агълап, агълајлмаз олар налекяр,
Козунде топланып къалғъан истирап
Синъип кете эди тенге азапкяр.
- 97 Буллюр серпкен козълер гужа истер ап,
Зевалны токътаткъан, козъяшы сырлы
Бузлап къата эди, михтапны арап³.
- 100 Бу ерде юзы-козюм, кирпигим дымлы,
Дешетли сувукътан олгъанда къара,
Сезмездим сувукъны шай йылдырымлы!
- 103 Ис эттим серт ельни, лякин шу невбет
Дедим устазыма: — Къайдан зар-зевал,
Сыджақъ рузгяр мында бузлагъан эбед...⁴

¹ иснад — ярдымдыр

² интизар махкюмлер — беклеген махкюмлер

³ михтапны арап — эджель балтасыны арап

⁴ эбед... — эбедий

- 106 Устазым деди ки: — Сабр эйле, эхвал...
Ничюн къутургъанын ельниң шу заман
Озюнъ кореджекте, анъларсынъ деръяль!
- 109 Бузларара бенде¹ бир махкюм шу ань
Къычырды: — Эй, бу ян эткенлер сефер,
Шевкъятызы олманъыз, аджынъ текяран.
- 112 Артыкъ козьни къаплагъан сувукъ буз этер,
Ачынъыз, тёкейим азгъана козъяш,
Зира козъяш иле зерре де кетер.
- 115 Джевап эйлеп, дедим: — Берип манъа къаш,
Беян эт кимлигинъ, сёзюмден къайтсам,
Олайым буз ичинде къатып мисли таш.
- 118 Деди: — Альбериго — ракъибим, инан,
Ниметтен явуз иш къозгъадым, амма,
Хурмагъа инджырны денъиштим шу ань.
- 121 Негях дедим: — Къачан таптынъ сен фасыл?
Деди: — Джысмым тири ярыкъ дюнъяды,
О насыл эхвалдадыр? Бильмезим асыл!
- 124 Толомея яни — къатлы семада
Шойле къаиде бар: джеза булмай джан,
Атропос этмеден тенни тамада.
- 127 Манълайымдан бузны сыйыргъан вакъыт,
Санъа зевкъ берсин деп, сыр ачам эркин:
Саткъынлыкъ олгъанда, эйленъиз сакъыт...
- 130 Рух кетип, вуджуткъа иблис киреркен,
Омюрнинъ муддети биткени къадар,
Вуджут эвелькидай яшап юреркен.
- 133 Рух исе бошлукъкъа серпильген заман,
Бакъ сен, шу джинджикип, тельмирген рухкъа,
Тириге ошап юредир олып къараман.
- 136 Мегерим, кельгенсингъ, сен бойле чагъда,
Бранька дОръяны бильмегинъ керек,
Мында къавруламыз оннен бир ягъда.

¹ бенде — къул

139 Дедим: — Бильдирмектем лафларынъа шек,
Браньки дОръя аля да азат,
Ашамакъ, ичмекни эткен дегиль терк.

142 О деди: — Микеле Цанке — шайд зат
Тенин кечмишине эйлеген земин,
Аля мум хавузда олмайып бербат,—

145 Иблис кирген беденине къуванып, эмин,
Эши олгъян онынъ, Бир де тапкъян шан,
Чекип алып тенини, этип ант-емин.

148 Козълерим таба соз къолунънен нишан,
Ач оны! Лякин мен къайттым лафымдан,
Манъа шереф эди мердсизлик шу ань!

151 Ах! Генуялылар, затлар тенинден
Намус-ар, идрак эбедий терк эткен,
Геберип биткейдинъиз баре земинден?!

154 Пис, муртад эдждат¹ сырасына еткен
Аллякъ'а расткельдим, руху — Коцитте —
Элем неэринде. Тени сагъ кеткен

157 Инсанларнен юре, айретке дегер!
Айше Кокиеваның төрджимеси

Суаллер ве вазифелер:

1. Граф Уголино Дантели насыл таный. Онынъ лакъырды тилини насыл айырды эткенини эсердеки мисралардан мисаль кетирип исбатланызыз.
2. Пизанлылар граф Уголинонынъ огъулларыны не ичюн къыйнап ольдюргенини эсердеки сатырларнен исбатланызыз.
3. Ансельмуччо Уголиногъя насыл сёзлернен мураджаат эткенини окъуньызы. 61-инджи терцинада олар бабасына насыл бир риджада булуналар?
4. Дехшетлерни коръген Данте ве Вергилий арасында насыл субет отъкериле. 100, 103, 106, 109-ындджы терциналарны окъуп джевабынъызын айдынлатынъызыз.
5. Фурсаттан файдалангъян Данте инсанынъ руху акъкъында насыл малюмат орене? Бу акътаки сатырларны ифадели иза этинъиз.

¹ муртад эдждат — динини денъиштирген, саткъян эдждат



ЭДЕБИЯТ НАЗАРИЕСИ

ТЕРЦИНА АКЪҚЫНДА АНЪЛАЙЫШ

Дерслигимизнъ назарий къысымларында сизлер ширий везинлер, шаркъ шириетининъ жанрларынен таныш олгъян единъиз. Баты шириетининъ де озюне хас везинлери бардыр. Данте Алигъерининъ «Иляхий комедия»сы *терцина* деп айтылгъян ширий везин иле язылгъандыр. Терцинанынъ къафиелешов схемасыны анъламакъ ичюн, кене де эсер акъқында мевджют олгъян бильгилерге мураджаат этейик.

Баты эдебиятынынъ энъ улу эсерлерinden бири сайылгъян «Иляхий комедия»ны тешкиль эткен узун шишир отуз учь йырдан ибарет олгъаныны билесинъиз. Эсерге кирсетильген киришнен бераберликте «Иляхий комедия» 100 йырдан, бутюн комедия исе 14 233 мисрадан ибарет олгъаныны окъугъян единъиз.

«Иляхий комедия» Кириш, Джәеннем, Араф, Дженнет киби дөрт къысымдан ибарет олгъаныны, эсернинъ Джәеннем къысмы — 4720 сатырны, Араф къысмы — 4755 сатырны, Дженнет къысмы исе — 4758 сатырны тешкиль эткенини оғрендинъиз.

Эсерде ракъамларнынъ бойле тизиливи бефтан дегильдир. Ондан да гъайры Данте З ве 9 ракъамларына буюк эмиет бергени де сизге беллидир. Атта поэмада къулланылгъян бент учь сатырдан ибараттири.

Учъ сатырдан ибарет олгъян бент — терцина деп адландырыла. Терцинада биринджи сатыр учонджи сатырнен къафиелеш. Экинджи сатыр исе биринджи ве ондан сонъ кельген учонджи сатырнен къафиелешип кетелер.

Къафиелешов эсернинъ девамында эсернинъ башында насыл къафиелешкен олса, ойле де де текрарлана. Эгер биз эр бир къафиени арифнен косытермек истесек, терцинанынъ къафиелешов схемасы бойле сыфат ала билир:

Аба, бвб, вгв, гдг, дед, её, ёжё, жзж, зиз, ики, клк, лмл, мнм, нон, опо... ве иляхре. Терцинанынъ схемасыны бутюн элифбе тер-

тиби боюнду тизмек мумкун. Терцианы тамамламакъ ичюн сонъки къафиелешкен **эюэ**, **юяю**, сатырларгъа даа бир сатыр я келип къошула. О да, элифбенинъ сонъки арифини бильдирген къафиели сатыр ола бикир. Меселя, эсерден бир парчаны къулланып, бильгилеризни талиль этейик:

- | | |
|--|-------|
| 10 Кимсинъ бильмейим, насыл къавм-несильден? | а |
| Къайтылмаз мекяндан кельдинъ серсерий, | б аба |
| Тосканлисинъ, тиль-лехдженъ де, эсимде. | а |
| | |
| 13 — Граф Уголино эдим, омрюм эксерий | б |
| Кечти. Янымда — олюмге себепкен, | в бвб |
| Къомшум — архиепископтыр — Руджьери . | б |
| | |
| 16 Онъя инанырдым, ич де тутмай кем, | в |
| Ольдюрди, махф этип санки бар джиан, | г вгв |
| Иман бирлигини узип мустехкем. | в |
| | |
| 19 Анги бир себепле махв эткенин джан, | г |
| Аля даа бильмейдир ич бир замандаш, | д гдг |
| Динълеп лафларымны, топла эеджан. | г |
| | |
| 22 Ач къале къасрына тюштим берип къаш, | д |
| Нидже бенде олып анда хор туткъун, | е дед |
| Къафесте тюш корип, агъартмақъта баш. | д |
| | |
| 25 Кечирдим мен мында нидже-нидже тун. | е |
| Мени булгъап бир ань, вахимели сес, | ё еёе |
| Истикъбалъ ёлларны къапатты бутон. | е |
| | |
| 151 О, Генуяллылар, затлар тенинден | э |
| Намусар, идрак эбедий терк эткен, | ю эюэ |
| Геберип биткейдинъиз баре земинден?! | э |
| | |
| 154 Пис, муртад эдждат сырасына еткен | ю |
| Аллякъъ расткельдим, руху Коцитте — | я юяю |
| Элем неэринде. Тени сагъ, кеткен, | ю |
| | |
| 157 Инсанларнен юре, айретке дегер! | я |

Бойледже, Дантелинъ «Иляхий комедия»сында биз талиль эткен ве эсерде къулланылгъан ширий везин **терцина** деп адландырыла. Комедиянынъ учь болюги, башындан сонъуна къадар, къафиелешип, терцина киби ширий везиннен язылгъандыр.

Суаллер ве вазифелер:

1. Насыл бир ширий везинге терцина дерлер? Терцина киби ширий везиннинъ къафиелешюв сатырларыны тафсилятлы анълатынъыз.
2. Терцинанынъ къафиелешювини арифлернен косътермек истесек, оны насыл яза билемиз? Эсерден мисаллар кетирип, анълатынъыз.
3. Терцинанынъ схемасы бутюн элифбе тертиби боюнчада насыл тизиле? Соңки къафиелешкен сатырларны язып косътеринъиз.

УЯНУВ ДЕВИР ДЖИАН ЭДЕБИЯТЫНЫНЪ ИЛЕРИЛЕВИ

Орта асырлар девринде мемлекетлер арасында буюк дагъыныкълыкъ пейда олгъан эди. Мемлекетлер арасындаки дагъыныкълыкъ девирлер кечтикче джоюла башлай. О девирде бир чокъ джогърафик кешфлер япыла ве бир чокъ китаплар нешир олуна. Инсанларнынъ рухий аят тарзына кильсенинъ пек буюк тесири ола. Джемиет аятында бир чокъ иддалашувлар пейда этиле. Яни бу девирдеки инсанларнынъ омюринде пек чокъ медений ве ильмий денъишишов ве янъарувлар олып кече. Джемиет омюриндеки бойле денъишишовлар ренесанс деврининъ джанланувына, уянувина темель къоя.

Бу девирде антик медениетининъ зенгин дюнъясына меракъ пек арта. Энди бутюнлей унутылгъан аньанелернинъ гъайрыдан джанландырув эснасы башлана. Археологик къазузвлар япылгъанда, бир чокъ эски эйкеллер тапыла. Эвельден белли олмагъан антик языджыларнынъ эсерлери мейдангъа чыкъарыла. Нетиджеде, бу девирде гъайрыдан тапылгъан антик эдебият буюк бир муджизевий нумюне оларакъ къабул олуна.

Санат ве илимде, латын тилининъ кениш къулланувынен бир сырада, халкъ тиллерине, халкъ агъызы иджадына да эмиет берилип башлана.

Уянув девир джиан эдебиятынынъ илерилев эснасынынъ энъ эсас чизгиси — бу девирде шерефлендирильген инсанитетининъ къыйметинен бельгилене. Гуманизм, яки инсанитетлик гъасиининъ тарафдарлары эр бир инсан озюининъ такъдирини озю къура бильгенини, озю джевапкяр олгъаныны илиян этелер. Олар инсанынъ омюри бойле олгъанына пек инана эдилер.

Бильгенинъизге коре, бу девир башланмаздан эвель, Италияда иджат эткен Дантеинъ эсерлеринде та о вакъыт энди ренесанс-нынъ, уянувнынъ чизгилери сезиле, эсерлеринде инсан гонълюнъ къыймети косьтериле. Франсыз эдебиятында Рабленинъ «Гаргантюа ве Пантагрюэль» эсери уянув деврининъ къыйметли эсери сайылды. Инглиз эдебияты исе бу девирде джиангъя Шекспирни багъышлады.

Джиан эдебиятынынъ уянув девринде бутюндюнъявий тарихий къыйметке малик олгъян улу муджизелер яратылды. Бу муджизелер шундан ибарет эди ки, уянув деврининъ векиллери тек эдебият саасында дегиль де, илим ве санатнынъ чешит сааларында да хызмет эте эдилер. Олар чешит бильги ве зенаат саиплери олгъянлар. Рафаэль Санти, Леонардо да Винчи, Микеланджело Буанаротти, Рембрандт ван Рей киби дигер сымаларнынъ адлары сизге бу сааларда олгъян янъылыкъыны хатырлата биле.

Шахсиеттинъ гармоник илерилев гъаелерининъ тарафдарлары акъыл идракинен этафтакилерни шашырткъян санат ве медениет векиллери олгъянлар. Оларгъя базыда, истидаты пек кениш олгъаны себебинден, «Уянув деврининъ титанлары» деп де ад бергенлер. Меселя, Леонардо да Винчи эм рессам, эйкельттраш, алим, муэндис олгъян.

Мона Лиза (Джаконда)нынъ портретини о, япты. О, парашют гъасини илькиде төвсие эткени белли.

Микеланджело да эйкельттраш, рессам, шайр олгъяны белли.

Бойле этип, уянув девир джиан эдебиятынынъ илерилев эснасы эвеля Италияда башланып, сонъра дигер мемлекетлерге де джайрай. Бу эснас XVI асырда текмил чечеклене.

Суаллер ве вазифелер:

1. Ренесанс девринде насыл янъылыкълар олып кече? Муджизевий нумюне оларакъ къабул олунгъян сааны айтынъыз.
2. Уянув девир джиан эдебиятынъ илерилев эснасынынъ эсас чизгиси ненен бельгилене эди?
3. Бу девиринъ башланувына темель къойгъян эсерлеринъ адлары ве оларнынъ муэллифлерини къайд этинъиз. Сиз оларнынъ эсерлеринен танышсынъызмы?
4. Джиан эдебиятынынъ уянув девринде насыл бутюндюнъявий муджизелер яратылды? Бирер-бирер хатырлап, икяе этинъиз.
5. Бу девирде яшагъян санат ве медениет векиллерине даа насыл ад бергенлер?

ВИЛЬЯМ ШЕКСПИР (1564—1616)



Уянув деврининъ улу инглиз драматургы озъ девринде замандашлары арасында белли инсан сайылмагъан. Онынъ улуттыгъыны, ондан сонъки девирде яшагъан несиллер, эсерлери ни окъуп, онынъ адыны алемге таныткъанлар. Шу себептен де, онынъ аятий фаалиети акъкъында малюмат гъает аздыр. Бизге тек онынъ эснафчы-къолчакъчы къорантасында дөгъып осъкени ве шаир-драматург олгъаны малюмдир. Шаир ве драматурглар о девирде джемаатнынъ дикъкъатыны джельп этмегенлер. Джемаат арасында бу инсан оларнынъ урьметлери олмагъанындан себеп, олар акъкъында ич бир шейлер язмагъанлар. Бу девирде чокъусы къыраллар, дин хадимлери ве адий аскерлер акъкъында язгъанлар. О девирде, атта пъесаларда, роллерни иджра эткен актёрларгъа урьмет, бу эсерлерни язгъан драматурглардан да буюк олгъан. Шекспир шу джеэттен омюринде замандашлары арасында танылмагъан.

Эйвон неэрининъ бир четинде ерлешкен кучюк Стратфорд шеэрчигинде дюньягъа кельген Вильям Шекспирнинъ аяты гъает мешакъатлы олгъан. Онынъ бутюн балалыгъы бу шеэрде кечкен. Вильям Шекспирнинъ бабасы — Джон Шекспирнинъ къорантасы секиз джандан ибaret экен. Вильям онынъ энъ буюк оғылу олгъан. Джон Шекспир, къолчакълар тикип сата, ве, базы да бир кучюк алыш-веришчиликнен оғъраша экен. Алыш-веришчиликте бир чокъ къазанчлар эльде эткен Джон, шеэр шұрасынынъ азасы оларакъ сайланана. Сонъра исе шеэр башы оларакъ да тайинлене.

Вильям секиз яшындан тувгъан ве къадимий тиллерге дикъкъат айырылгъан, ерли мектепке къатнап баштай. О, мында латындыжа ве къадимий юнан ве латын тиллерини менимсей.

Балалыгъындан театр не олгъаныны бильген оғылан, дюньянынъ агъырлыкълары ве къуванчыны озюндже къабул эткен.

Затен, Стратфорд шеэрини актёр такъымлары пек чокъ зиярет эткенлер ве мындаки джемаатны спектаклериинен къувандырыгъанлар. Ондан да гъайры Стратфорд шеэринден отуз километр авлакъта ерлешкен Ковентри шеэринде эр сене диний драма-мистериялар иджра олунгъан. Шекспир балалыкътан бу сейирлерге алышып къалгъан. Чюнки оларның къорантасы да, дигер якъын шеэрчилерде яшагъан къоранталар киби, бу шеэрge келип, темашаларны сейир эткенлер.

Балалар осъкен сайын, Джон Шекспирнинъ къорантасында маддий вазиет агъырлашкъан. Шу арада Вильям Шекспир де эвленген. Шоттери адында койнинъ бир фермерининъ Энн Хэттуй адлы къызына эвленген. Никяхлары 1582 сенесининъ ноябрь айында къыйылгъан. Арадан вакъыт кечтикче, оларның къызылары дөгъулгъан. Адыны Сьюзен къойгъанлар. Бу арада о, мектепте оджаның ярдымджысы, бельки де, бабасына алыш-веришчиликте къолтутып, хызмет эткendir. Бунъа бакъмадан, Джон Шекспирнинъ аилевий маддий вазиети эп феналашкъан. Эв саibi, ачлыкътан джан къурттармакъ макъсадынен, эви, топракълары ве олгъан мал-мулькюни сатмакъ меджбуриетинде къалгъан. Пахылдайын 1585 сенеси оларның аилеси даа арткъан. Вильям Шекспирнинъ къадыны эгиз дөгъургъан. Огъланчыгъының адыны — Хамлет, къызының адыны исе — Джудит къойгъанлар. Аилени бакъмакъ ичюн, бир якъларгъа кетип, иш къыдырмакъ сырасы тюшкен.

1587 сенеси Вильям Шекспир аилесини быракъып, бир актёр такъымына къошулып, Лондрагъа ёл ала. Озюнинъ иш фаалиетини о, башта, спектакльни сейир этмеге кельген дженапларның атыны бакъмакънен баштай. Соңра театрде суфлёр олып чалыша. Тек булардан соңъ, театраль такъымда актёрлыкъ япмакъ сырасы тюше. Омюринде бойле агъыр вазиетлерге оғърагъан инсан, актёрлыкъ япа-япа, тап соңунда, озю де драматик эсерлер яратув хызметини сече.

Бойле этиип, бугунъки кунюмизге, Шекспирнинъ къалемине менсюп олгъан 37 драматик эсер, келип еткен. Алимлер, драматургның иджадий фаалиетини, язгъан эсерлерининъ гъаевий ёнелишине базанып, учь девирге такъсим этелер.

Вильям Шекспирнинъ 1590—1600 сенелеринде язылгъан эсерлерини оның иджадының биринджи деврине кирсетелер. Иджадының биринджи девринде иджат эткен эсерлерде тасвирленген адисе-вакъиалар аят эшкъы, къуванчынен толу олгъаны

себебинден, *оптимистик деври* деп адландыралар. «Ромео ve Джультетта», «Сонетлер» бу девирнинъ ялкъ эткен йылдызычыкъларыдыр.

Драматургнынъ экинджи иджадий деври 1601—1608 сенелерини къаплап ала. Бу девирде язылгъан эсерлеринде ренесанс деврининъ уйгъунлыгъы бербат олгъаны, инсанперверлернинъ (гуманистлернинъ) аяткъа ачыкъ козынен бакъя башлагъаны тасвирленгени ичюн, бу девирни иджадынынъ *фаджиалы деври* деп, сечелер. «Хамлет» (1601), «Къырал лир» (1605), «Макбет», «Отелло» киби фаджиалы эсерлери бу девирде дюнья юзю корелер ве саналаштырылалар.

Иджадынынъ учонджи деврини 1609—1613 алимлер *романтик деври* деп саналар. Бу девирде Шекспир дёргү романик эсер яза. Бу эсерлер жанр джеэтинден я романтик драма, я да фаджиалы комедиялардыр. Оларнынъ арасында «Туфан» эсери айырылып турмакъта. Бу девирге «VIII Генрих» серлевалы тарихий хроника эсери де кирсетиле.

Вильям Шекспирнинъ бутюн эсерлеринде инглиз эдебиятынынъ ренесанс деврине мевджют олгъан омюр тарзы, акъикъаты тасвирлене. Энъ меракълысы шу ки, беш асыр эвель язылгъан бу эсерлернинъ муим къыймети аля бугунъ де инсанитетликнинъ гонъюль теллерини чимирдетмектелер. Бу эсерлер, бизим девирде де, земаневийлешмектелер.

Вильям Шекспир 1616 сенесининъ апрель айынынъ йигирми учонде, озюнинъ деврини умуминсаний фаджиалы девир оларакъ къабул этип, вефат этти. Аят ве инсанлыкъны джан гонъюльден севген адам, джиангъя эсерлеринде эбедий яшагъан айдын сималарны акс этип, келеяткъан несиллерге ёл-ёрукъ косътерген къараманларны тасвирлеп, дюньяны терк этти.

Суаллер ве вазифелер:

1. Вильям Шекспирнинъ аятий фаалиети акъкъында икяе этинъиз. Секизинджи сыныфта алгъан бильгилеринъизнен пайлашынтыз. Бельки, дигер эдебияттан окъугъан малюматынъыз бардыр? Къыскъа шекильде маруза отъкеринъиз.

2. Шекспирнинъ драматик вариетине менсию девирлерни айтынъиз. Девирлернинъ сенелерини тарифленти... Бу девирде насыл эсерлер язылды. Дефтеринъизде къыскъа план тизип, джевап бермеге азырлыкъ корюнъиз?

В. Шекспирнинъ «Хамлет» фаджиасы. Эсернинъ сюжет ве композициясынынъ хусусиетлерине даир

В. Шекспирнинъ «Хамлет» фаджиасы пек муреккеп бир эсердир. Муэллифнинъ язгъан дигер трагедияларына коре, бу эсернинъ терең анълатылмасына чокъ изаатлар талап олунған. Дюньявий эдебиятта бу эсер акъкъында чешит-тюрлю дюньябакъыштар пейда этильди.

Трагедиянынъ там манасыны анъламакъ ичюн исе, эсернинъ сюжет ве композициясыны терен талиль этмек лязим.

«Хамлет» фаджиасында тасвир олунгъан адисе-вакъиалар, данимаркалы (датский) къыралларнынъ укумет меркези — Эльсинор сарайында олып кече. Вакъиалар Шекспир яшагъан де-вирден де эвельдеки вакъытларгъа аиттири. Шекспир бу эсеринде кечмиш тарихны тасвир этер экен, терен кечмиш тарихнынъ чизгисини эсерде сакълап къалып, озюнинъ девриндеки джемиетте асыл олгъан инсаний мунасебетлерни бирлештирип косыттере.

Шундан себеп, Шекспирнинъ эсериндеки къараманлар эм кечмиш, эм де муэллифнинъ девринде яшагъан къараманларгъа менсюптири.

Фаджианынъ сюжетиндеки чешитлик шундан ибараттири. Яни Хамлетнинъ шахсий драмасы кечмиш тарихтан эвель сюрюле ве тарихий вакъиалар гуя эки девирде олып кечкени киби дуюла. Бунынъле бераберликтө, эсерде косытерильген адисе-вакъиалар кениш микъяста айдынлатылгъаны себебинден, Хамлетнинъ шахсий фаджиасы икътисадий-сиясий меселеге чевириле. Яни бу адисе-вакъиа окъйыйджы тарафындан, инсанлыкъ тарихында олып кечкен, бир делиль оларакъ къабул олунған.

Фаджианынъ тизилиши (композициясы) эки эсас сюжет ёлагъындан ибараттири. Бабасынынъ намуссызы хайнлердже ольдюриловинде Хамлетнинъ адалетли ахтыман алмагъа истегени эсернинъ биринджи сюжет ёлагъыны тешкиль эте. Тутып алгъан таҳтны Хамлеткө къаршы чешит фитне ве фесатлар къургъан къатиль Клавдийнинъ арекетлери эсернинъ экиндже сюжет ёлагъыны тешкиль этелер.

Эсерлеринде эки параллель сюжет ёлагъыны къулланув усулы — Шекспирнинъ севген усулдыры. Бойле сюжет усулунен драматург айны бир вакъытта адисе-вакъиаларнынъ келип чыкъувы, илерилеви ве чезилишини чешит инджеликлернен айдынлатылмасына мейдан яраты. Бойле усулнен Шекспир Хамлет симасы (акъылдан

азгъан акъыл идракли къараман) вастасынен вакъыт арасындаки багъ узюлип, инсаниетнинъ фаджиалы такъдирини айдынлатма-гъа ёл тапа.

Эсернинъ бутюн сюжет ёлакълары данимаркалы къыралнынъ оғылу Хамлетнинъ сымасы этрафында чатыштырылып айдынлатыла. Виттенбург университетининъ талебеси Хамлет, бабасынынъ апансыздан олови акъкъында хабер алгъанынен, эвлерине келе. Эвде оны, онынъ намусына сыйгъмагъан, даа бир хабер беклей. Акъайынынъ олюминден сонъ, Хамлетнинъ анасы — Гертруда, рахметли акъайынынъ агъасы, Клавдийнинъ къадыны ола. Хамлет бабасынынъ олюми ве анасынынъ акъайгъа чыкъувыны къабул этмей, юректен чекише. Сарайдаки муит оны синъирлендире ве афакъанланда.

Бабасыны, айнеджи ве хаин Клавдий ольдюргенини, бильген Хамлетнинъ макъсады денъише. О, эмджесининъ япкъан хаинлигинден очь алмакъ, интикъам алмакъ арзусында булуна. Хайн-къырал Клавдийнинъ тарафдарлары — Полоний, Озрик ве атта Хамлетнинъ университет достлары Розенкрэнц ве Гильдестерн — эписи Хамлетке къаршы чыкъалар.

Хамлет, акъылындан чылдыргъан инсан киби, оларнен курешмеге башлай. О, пешинден джасуслыкъ этип юрьген Полонийни ольдюре, университет достларынынъ саткъынлыгъыны фаш эте. Хамлетке къаршы уйдурылгъан фитнеге Офелиянынъ джельп олунгъаныны бильген Хамлет ондан гонълони узе. Офелия зулумлыкъ ве фитнеге даяналмайып, акъылыны чылдыра ве оле. Хамлет, Эльсинор сарайына сырлы-сакълы къайткъанда, Офелиянынъ дженазесине расткеле.

Клавдий, тизген планы аль олунмагъаныны корип, Офелиянынъ агъасы Лаэрт ве Хамлетни бири-биринен чатыштыра. Лаэрт оледжекке якъын, хаин-къырал Клавдийнинъ истеклерини эр кеске билдирип, дюньяны терк эте. Хамлет ичюн азырланып, зеэрленген шарапны, эр кесининъ козюнинъ огюнде ичкен Хамлетнинъ анасы да джан бере. Хамлетнинъ къылычындан Клавдий, Клавдийнинъ къылычынынъ ярасындан зеэрленген Хамлет де, бу дюньяны терк этелер.

Бойледже, фаджианынъ сюжетинде тасвир олунгъан бутюн адисе-вакъиалар (IV актъа къадар) узюльmez вакъиаларгъа багъланып, эп девам эте. Бу вакъиалар дёрт кунь ичинде олып кече. Тек IV ве V актлар арасында бир-эки кунылюк пауза мевджут олuna.

Шекспирнинъ девриндеки театрлерде декорациялар даа олматында, ерлернинъ денъишиюи къараманларнынъ нуткъынен анълатыла эди.

Шекспирнинъ бу эсеринде Хамлетнинъ монологлары эсас ерни алалар. Бир тарафтан, бу монологлар суръатнен кечкен вакъытны бираз токътталар. Дигер тарафтан исе, бутюн фаджиагъа фельсейфий ренк ве чешит лиризм багъышлайлар.

Ингилтереде, XVI—XVII асырларнынъ кечити ве уянув (ренаанс) деври эдебият ве санатта инсанненликнинъ меселелерине айт гъаелерни тасвирилгене себебинден ичтимай-сиясий мунасебетлернен уйгъунлашмагъан девиргэ чеврильди. Юмругъымыз бизим — намус-арымыз, къанун — бизим къылышчымыз, деген хаяллар алтындаки къувет, кеткен сайын инсанларнынъ гъаелерини тепрендириди. Шу арада Шекспир озюнинъ энъ муреккеп, терен, фельсейфий ве муим проблемалы «Хамлет» фаджиасыны яраты. Бу эсеринде Шекспир паранынъ, мал-мулькнинъ дертли асыл къуветини косытермеге тырышты.

Муэллифнинъ истегине бинаэн, Хамлет, эдеп, намус, ар киби, умуминсаний чизгилернинъ бербат олунгъаныны коре. Бу фаний дюнъяда инсан насыл гъае огърунда яшамалы, деген муим меселе котериле.

Девирнинъ муимден муим проблемасына чеврильген бу меселе уянув деврининъ аятында джемиетнинъ ахлякъий амеллерини чюрютеджек бир хасталыкъ эди. Айны бу меселе Шекспирнинъ «Хамлет» фаджиасында буюк усталыкъ ве меаретнен тасвир олунат. Бу эсер бутюн дюнъя инсанлыкъ тефеккюрини аля даа раат-сызламакътадыр.

Суаллер ве вазифелер:

1. 8-инджи сыныфта Шекспирнинъ насыл эсерини кечкен эдинъиз? Бу эсерде насыл адисе-вакъиалар тасвир олунат?
2. В. Шекспирнинъ иджадий фаалиети акъкъында не билесинъиз? Хатырлантыз.
3. В. Шекспирнинъ «Хамлет» фаджиасынъюнъ сюжетине айт хусусиетлерни айтнъиз.
4. В. Шекспирнинъ «Хамлет» фаджиасынъюнъ композициясина айт хусусиетлерни къайд этингъиз.

ХАМЛЕТ^[31] (Эсерден парчалар)

Биринджи акт *Биринджи перде* *Дөртюнди сана*

Кәале огюонде бир мейданчыкъ. Хамлет, Хорацио, Марцелл келип кирелер.

Хамлет

Рузгяр санча инедай! О къадар да сувукъ ки.

Хорацио

Аяз да шай чымтылап, бутюн эсимни алды.

Хамлет

Саат къач олгъян экен?

Хорацио

Бираздан сонъ он эки...

Марцелл

Он экини кечти де. Даа демин чанъ чалды.

Хорацио

Догърумы?
Әшитмедин. Олайыкъ бираз сакъыт,
Етип кельди колетки пейда оладжакъ вакъыт.

(Сана артындан чалгъы-чагъана чалынып, пыштавлардан окъ атыла).

Бу да даа не демек экендер, вай, Шахзадем?

Хамлет

Къырал ичмекте шарап къаарындан зияде,
Йыкъылгъандже ойнакълай, тангъадже софра къурып,
Тюплеркен эр къадени, чалгъы-чагъана урып,
Бар этаракъа бильдирмек ичюн, япа ишарет,
Ер ве Кокке гъалибин этип шанлы метанет.

Хорацио

Бу ал исе не демек? Адемидир?

Хамлет

Адемидир,

Несильден несиль къувып, кутюльген бир иллеттири.

Онъа къаршы чарелер тапып, керек джоймагъя

Гъарб ве Шаркъкъа джайрагъан күфюр масхаралыкъны,

«Шарапчы, донъуз» деген адгъя нокъта къоймагъя,

Адымызын кирлекен бу чиркин къаралыкъны.

Шу иллетнинъ белясындан эксильмекте шан, урьмет,

Урьмет, нуфуз, фасиет, эксиле бизим хызмет.

Базан шойле ола экен, дөгъулгъанда бир инсан,

Малюм дөгъма эсаретнен олып дюньягъя ихсан.

Я, бу онынъ гуняхымы, айбы олып къалгъандыр,

Затен ана-бабасыны, о, сайлап алмагъандыр.

Я да адетинде пейда олгъанмыдыр бир чизги,

Япкъан арекетиндеки алеллиги пек къызгъын,

Несильден төреп чыкъкъанмы, бу адет кимге айт.

Ич уймагъан бу нукъсангъя асыл энди, ким шахид.

Расткельгеннинъ акъылыны бирден озюне алыш.

«Вай, тёвбе» деп, истигъфарлар ичинде шай къалдырып,

Затен кеништир Танърынынъ азиз шерафтлери,

Шевкъаты, нимети, шеффаф, аля фазилетлери.

Онъа къаршы кеткен эр ань буладжакъ дайм зевал,

Арекети, япмышына коре буладжакъ эхвал.

Эписине шу къан-куфюр тамчы ола себепкяр,

Япылгъан эр бир эйилик кете арамгъа шикяр.

Хорацио

Бакъынъыз, шахзадем!

Rux kelin kire.

Хамлет

Къорчаланъыз бизни кокнинъ фериштелери!

Кимсинъ, рухий теселля, я да бир шейтан.

Дженнет нефеслери я, джеэннем атешлери

Ниетинъде савапмы, күфр бармы, сыр айтсанъ,

Не олса да, тешрифинъ юрекке къоркъу къойды,

Сонъусуз тюшюндженлерден гонъюлим артыкъ тойды.

Шу себептен ялкъарам, ялварып, сорайым эп,

Сенден, укюмдар къырал, азиз педерим, Хамлет...

Рұх ве Хамлет берабер кетелер.

Рұх

Быракъ. Аджынма манъа, джан күйдирип сен шимди,
Бирер къулакъ асып, динъле айткъянларымны энди.

Хамлет

Къулагъым сенде.

Рұх

Айткъянымны динъле, эвель, сонъра очын ал ондан.

Хамлет

Не дединъиз?

Рұх

Геджелери кезинип юрьмеге серсерий
Куньдюзлери джеэннемде янмагъа махқюм
Олгъаным. Мен, бабанъынъ руҳудырым.
Гунахларым янып эда олмагъанынджа,
Девам эттер бу вазиет, фена базарлықъ.
Зинданымнынъ сырларыны айтмагъанымджа,
Тариф этмейиндже дердим, олмаз аралықъ.
Джанынъ тепренмеге оғърап, къатар къянларынъ,
Йылдызлар кок мейданындан авушкъан киби,
Козълеринъ акъ ханесинден чыкъкъан аньлери,
Тенинъдеки эр бир тюкнинъ гъазап теркиби,
Къутургъан окълу кирпининъ отъюор инелеридай,
Тикке тураг, гүя сычрап атылмакъ истеп.
Бакъийликни фаний инсан анъламайып эп,
Хата япар. Амма мени, динъле, сен эвель,
Севген олсанъ педеринъи, бундадыр темель.

Хамлет

Я раббим!

Рұх

Кин-гъарезли къатилликнинъ очыны сен ал.

Хамлет

Къатилликнинъ?

Рұх

Ә, къатиллик озю — къабаат,
Амма мешхум¹ къабаатның къабааты бу!

Хамлет

Сёйле, тезден, мен шу аньде осьтюрип къанат,
Тасавур ве тефеккюрнинъ тезлиги иле,
Ахтыман алмагъя, бабам, къайда учайым.

Рұх

Сен ойлесинъ, корип турам, ким олур эдинъ,
Эгер ойле теляшларгъа бирден тюшмесенъ,
Олю деръя сувларында бурюшип осъкен
Бакъя тону, сасыкъ джувшан, бельки, олурдынъ.
Эшит, Хамлет, мени багъда юкълап яткъанда,
Йылан тишлип ольдюрди деп, яптылар илян.
Алдаттылар эльге шойле яланлар айтып,
Бу яланнны фаш этмекчүон, кельдим мен къайтып.
Амма мени гедже тишлип ольдюрген йылан,
Шимди тахтта, таджым кийип, шенъ отурмакъта.

Хамлет

Ах, бешаретим!
Эмдженем!

Рұх

Ә, ана шу фасих², риякъар³ бенде,
Айнеджилиkenн ёлұны тапкъан юзысуз инсандыр.
(Ойле күфюр акъибетке етеклер экен,
Лянет олсун, ойле догъма къабилиетке!)

Факъат косътериджи эйилик, инсанietлике
Хиянетлик этмеге чокъ истеди илlet,
Насыл ағъыр бир резалет⁴ ёл берди, Хамлет!
Кечип, меним сема киби, буюқ севгимден,
Никях куню берген анттан, сёзден вазгечип,
Менден къач керелер тёбен, ашша, наляйыкъ,
Бир муртадның къуджагъына кирди, не сечип!

¹ мешхум — оғъурсызы

² фасих — фесатчы

³ риякъар — экиозызлы

⁴ резалет — резиллик, алчакълыкъ, масхаралыкъ

Нидже эмель косътермесин фахш-у-резалет¹,
Къыбырдамай тургъан киби фазл-у-фезалет².
Хирс³ ве харис⁴ фериштенинъ афузынен эм
Раат-ферагъаткъа бир кунь къанып бутюнлей,
Озюни де шай булгъалап олюмге атар,
Гъарезлик зеэрин севген юрекке къатар.
Тынчлан! Энди тант ярыгъы артаяткъанда,
Тез айтмакъ керегим... мен тенха багъ ичинде
Ятсы ибадеттен сонъ, юкълап яткъанда,
Багъ ичине пысып кирген къатиль — эмдженъ де
Лянет къолларында зеэр иле кельгендир,
Зеэрни де къулагъыма о тамызгъандыр.
Билесинъми, аджытыджы явуз бир агъу,
Акъкъан къанынъ токътатыркен, дешетке сала,
Бутюн тенинъ, бар нефесинъ чырмалап ала.
Сютке сирке къююлгъандай къанынъны шу дем
Шай увута. Шу белягъа ёлукътым мен, эм
Бир нефесте гуя беден ярагъа толды,
Кадям къолу иле, юкъу къойнунда омрюм,
Мал ве мулькюм, къадынымдан этильдим махрум.
Асий омрюм шарт кесильди тамырымдан да,
Не тёубелер айтып олдым, не бир эльвида.
Махшергяхкъа⁵ озгъардылар ашыкъып, шашып,
Джумле джинаетлеримни башыма асып.
О, бу дешет, дешет, дешет! Намус иле ар
Юргингъни якъмаз исе, урунма бекяр.
Дания къыралларынынъ тёшеги къат-къат
Фахш-у-резалетке хызмет этмесин, фактат.
Къадыр ахтыманынъ резиль олмасын, сакъын.
Сен рухунъны мусаффа тут, ананъа тийме.
Онъа адиль хаким, онынъ ляйыкъ джевабы —
Танъры Таалядыр ве де видждан азабы.
Сагълыкъынен къал! Йылтырагъан къуртлар
Танъгъа якъын бите-бите сёнеятырлар.
Эльвида, эльвида унутма мени!

(Кеме.)

¹ фахш-у-резалет — ич юзю ачылгъан масхаралыкъ

² фазл-у-фезалет — эйилик этмеге ве феналыкътан четлешмеге алышкъан истидат

³ хирс — сонъу олмагъан истек

⁴ харис — тамакъяр, бир шейни къараарындан зияде истемек

⁵ махшергяхкъа — къыяметте олюлернинъ тирилип, топланаджакъ ери

Хамлет:

Эй, сема! Эй Земин! Къайда бир имкян
Ким динълер мени? Бельки, къара джеэннем?
Юрек, чыкъып кетме, токъта, бер чыдам!
Аякъларым буқюльменьиз! Тутунъыз, энем...
О: «Унутма» — деди, асыл унутырыммы?
Гъарип, къайгъыгъа баткъан рух мийиме аман
Бир хатире олып синъди, унутырыммы,
Бар хатирем кузъюсинден сильдим бир тамам
Теэскурлатларымны, бутюн аляметлерни,
Китаплардан синъген сёзлер, икялерни,
Балалыкътан козетильген левхагъа тюшкен
Тасавур ве сыр, эм де бар муджизелерим,
Хатиренниң бутюн дефтер, бутюн китабын
Къуравлы этмейип бирден, язып чыкъарым —
Тек, ялынъыз сенинъ сёзюнъ, ферманынъ иле,
Гуж Танъры къаршысында тикке тургъандай!
О, риякъяр къадын! О, сен ярамаз, гъаддер!
О, резалет, дудакъта кульгю ойнагъан аяр!
Буны язып къоймам шарттыр, къалемим къайда,
Язайым да татлы-татлы, тебессюм иле,
Кулип-кулип, аллякъ олмакъ мустеджип экен.
Башкъа ерде олмаса да, шу Данияда.

(Яза.)

Азыр олды, эмджечигим, шиарым энди:
Эльвида! Эльвида! Унутма мени!
Унутмайджам, унутмайджам, ант этем кендим.

Хамлет бабасынынъ оғзрагъан фаджиасыны актёрлар вастасынен саналаشتырып, эмджесинен анасына сейир этмек ичюн, фурсат яратмагъа истей.

Хамлет

Тюоф-тиоф, лянет! Уян, меним идраким, уян!
Эшиткендим, ярамазлыкъ япкъан кимселер,
Сейирджилер олып, къара севданы корип,
Тамам сербет ихтиярны къолдан бой берип,
Япмышлары ичюн, икърар олур экенлер.
Э, къатиллик тынч турса да, сёzsюз-седасыз
Ашкъяр этер озъ-озюни. Буюрыым мен:
Актёрлар бу эмджечининъ козю огюнде
Бабам къатиль олгъан сананы этсинглер иджра.
Озюм ондан козюм узьемем. Корерим насыл

Тесир этер әкен бу ал. Эгер тесир эткенде,
Япаджагъым лязим олса, сонъра япарым.
Ихтималдыр, шу колетки иблистир, бельки,
Кирип алыш, бабамның бу къыяфетине,
Истифада этип ёргүн, маюслигимден,
Мени элякетке дучар этмедишиген?!
Эй, делиллэр керек кене, делиль чокъчаракъ.
Тек сейирнен, къатиль акъкъында сахна къурып,
Мен къыралның юргине салырым ильмек.

(*Keme.*)

Суаллер ве вазифелер:

1. Къале огунде ерлешкен бир мейданчыкъта Хамлет, Хорацио ве Марцелл не акъкъында субет этелер? Хамлет несильден несиль къувып, күтюльген анги бир иллетниң ёкъ этильмеси акъкъында айткъаныны эсерден мисаллэр кетирип тарифленъиз. Хамлет бунъя насыл бир нетидже чыкъара?

2. Хамлет ве бабасының руху арасындаки сырларны эсердеки сатырларны окъуп, ограйниңиз. Рух оғылуна айнеджиликнен ёлunu тапкъан юзьсюз инсан акъкъында насыл бир акъикъатны бильдире? Джевабынъызы эсердеки сатырларнен тасдыкъланъыз.

3. Хамлет бабасының фаджиасыны анълагъан сонъ, насыл арекетлер япа? Къыралның юргине ильмек салмақъ макъсадынен не япмагъа тюшүнгенини эсердеки сатырларнен анълатынъыз.

Учонджи акт

Биринджи сана

Къасрда бир хане. Къырал, къыраличе, Полоний, Офелия, Розенкранц ве Гильдестерн келип кирелер.

Къырал

Лаф келямы, ачыкъ-айдын билямадынъыз
Делилигининъ себебини.
Ничюн асабийдир, къоркъмай акъибетинден
Тавкелликке къурбан эте ферагъатыны?

Розенкранц

Эсим акъылымда ёкъ, меджулим дей о,
Не себептен ойле олгъян, билип олмаймыз.

Гильдестерн

Нидже сорап-сораштырдыкъ, эписи бекяр,
Сагълыгъындан сёз ачылды дегенде, шу ань,
Дели киби, пек айнеджи сёйлене эфкяр.

Къыралiche

Сизге ничюон къаршы чыкъты?

Розенкранц

Танти, мердане.

Гильдестерн

Озюни бираз зорлагъандай дуюлды кене.

Розенкранц

Бираз да бир суаль берди, сыра кельгенде,
Сёзлер артты дер экечте, созулды лафы.

Къыралiche

Теклиф этмедиңизми сиз гонъюль ачмагъя?

Розенкранц

Э, эльбетте. Ёлумызны фурсаттыр ачкъян.
Расткельдилер къаршымызгъа бир чокъ актёрлар.
Эшитиркен бу акъта о, ойле къуванды.
Актёрлар да шимди энди къасырдадырлар,
Олар бугунь ойнамагъя эмир алдылар.

Полоний

Акъикъатен, сурьят иле вакъыт кечмекте,
Сиздай заты алий, заты алиелерни
Темашагъя бугунь Хамлет теклиф этмекте.

Къырал

Джан гонъюльден. Мен мемнүним эшитип, мегер,
Тапылгъанкен джансыкъмагъян оюн-мейиллер.
Кене даа чоммасын о, тарсыкъувларгъа,
Авесини осътуринъиз, сезмесин кедер.

Розенкранц

Сарф этгеймиз тамам кучю-гъайретимизни.

(*Розенкранц ve Гильдестерн кетелер.*)

Розенкранц

Гертрудам, сен де, чыкъып тургъайдынъ, барем,
Биз Хамлетни чагъыртырдыкъ бу ерге сакин:
Озю бундан хаберсиздир. Бекленильген ал,
О, бу ерде Офелия расткелип къалыр,
Биз самимий аким олып, Полоний иле
Козетермиз, шахзадени къыйнагъан беля —
Чындан ашкъ-у-муаббетми, олгъан мубтеля.

Къыраличе

Яхши, разым, шахым. Сизге, о, Офелия,
Тилегим шу: шахзаденинъ делилигине
Дюльберлигингъиз тек гужа себепчи олсун;
Шерафетинъизден дөгъру ёлгъа кирсин о,
Экинъиз де тапынъыз козь-къаш.

Офелия

Хайыр къыраличем.

Къыраличе кете. Къырал ве Полоний де кетелер. Хамлет келип кире.

Хамлет

Я аят, я олюм: меселе шойле,
Лязиммекен ол джебиру джеббар фелекнинъ
Джефасына эр дақъикъа чыдаса юрек?
Я белялар денъизинде конъделен олып,
Къайышлар ве къасаветке сед къоймакъ керек?
Олюм. Озюнъни уннутув. Тамам-весселям.
Рухий истираплар, теннинъ азапларына
Сынъыр олгъан шу агъыр юкъу.
Эда олмакъ. Ве эдасыз юкъугъа чоммакъ.
Сонъра тюшлер корымек. Мына суальге джевал.
Олюм юкъусында — анавы къалын либастан
Къутулгъанлар, насыл тюшлер коре экенлер?
Мына иза. Мынадыр шу ақъикъий себеп —
Бизим къайгъы-элемлерни йылларгъа созгъан,
Я олмаса, ким чыдарды девран тахкъири,
Къувгъынларнынъ мешакъаты, джеалет кири,
Ашкъ-муаббет сефалети, асрет, мерамет,
Укъукъызылыкъ ве даа нидже япылыркен сед,
Укюмдарлар салтанатын оюн-аваларына.

Я, олмаса энъ акъикъий хызмет юзюнден
Пейда олгъан укюметниъ оюн даваларына
Даянмазды буларгъа асыл да, ич бир севда?
Атта ханджер агърысындан тапарса эда?
Ким конерди, тири олмакъ юкю астында
Букюльгенге ёл басмагъа инъильдеп, эгер
Олюм артындаки ана шу къара мевхумат.
Азмы сефер этип кимсе къайтып кельмеген
Ана шу мульк-мевхуматтан къоркъугъа далып,
Ирадени къайырмаса, басып кечмесе,
Ве беллисиз саиллерге кендин ургъандан,
Таныш олгъан къабаатны догъру демесе,
Джумлемизни къоркъакъ этип къояр тефеккюр.
Накъис акъыл сачкъан нұрсыз шавледен
Азмы къарап ренки сёнип, сиярып къалыр.
Колеми ве икътидары буюк ниетлер
Догъру ёлдан тайып, макъсат босагъасында
Думан олып кетер, тамамланыр, сонъ битер.
Етер артыкъ, о, Офелия! Эй, гузель пери,
Мухтаджым мен дуанъа пек чокътан бери.

Экинджи сана

Къасрда бир зал. Хамлет ве бир къач актёрлар келип кирелер. Хамлет актёрларнен субет эте. Сонъра Дания маршы чалынып Къырал, Къыраличе, Полоний, Офелия, Розенкранц, Гильдестерн ве дигерлери келип кирелер. Хамлет кене озюни дели киби косьтермек ичюн, Офелиянын олгъан субетинде чешит-турлю күлюнчи, акъылгъа ятмагъан къылыкълар япа. Шу арада най чалына ве пантомима башланы. Пантомимада санадаки Къырал ве Къыраличе севги-муаббетке толып ташкъаны изхар этиле. Къырал Къырличени, Къыраличе исе Къыралны къучакълай. Гульзар ичинде раатланмагъа ята. Юкълап къала. Къыраличе кете. Бир башкъа адам келип, къыралнын таджыны алып, опе, сонъ юкълагъан къыралнын къулагъына зеэр тёкип, четке чекиле. Къыраличе келип кире. Къыралнын ольгенини коре. Къатиль учь адамнен келип, Къыраличеге башсагълыгъы бильдире. Мевтаны алып чыкъалар. Къатиль Къырличени гонъюни алмагъа ынтыла, о, оны ред эте. Лякин бираздан сонъ йымшай. Олар чыкъып кетелер.

Офелия

Шахзаде, бу не демек?

Хамлет

Анъламадынъизмы? Бу зеэрли йылан, я да къара къатиль демектир.

Офелия

Ихтимал пантомима корюледжек пьесанынъ мундеридже-сини бильдирмектедир?

Пьесаны башлайджакъ йигит келип кире.

Хамлет

Эр бир шейни мына шу йигиттен билип аладжакъмыз. Актёрлар сыр сакъламагъа бильмейлер, эр бир шейни олгъаны киби айта къоялар.

Офелия

О, косътерильген пантомиманынъ манасыны изалаймы?

Хамлет

Э, не коръген олсанъыз, ана шу шейнинъ манасыны изала-берир. Сиз бу косътерювден тек утансанъыз олгъаны, О, анълат-макътан ич де чекинmez.

Офелия

Мен темаша коръмеге истейим. Башлайыджы, биз бу тема-ша ичюн сизден муруват сорап, теменналар этемиз, такъат иле динъленъиз.

Бу сахнада пантомимада косътерильген арекетлер сёзлер иле анълатыла. Къыраличе омюр аркъадашына садыкъ оладжагъына ант-емин эткен арада, актёрларнынъ сёзлерине Хамлет де къа-рышип «Я, ялан айтса-чи? — деп ташлай. Соң анасынынъ яны-на келип: «Пьесаны бегендинъизми?.» — деп сорай.

Къыраличе

Менимдже, ханым пек буюк ваде этти.

Хамлет

О! Ве лякин о, озъ берген вадесини тута билир.

Къырал

Сиз санада косътериледжек мундериджеден хабердар-сынъымы?

Анда такълидлеген бир шей ёкъмы?

Хамлет

Ёкъ, ёкъ. Эписи шакъя. Атта ки, зеэрлеп ольдюрюв де. Такъид эткен ич бир шей ёкъ.

Къырал

Пъесанынъ ады не?

Хамлет

«Къапкъан» манасымы? Меджазий. Пъеса Венада юз берген къатилликни тасвирлей. Герцогнынъ ады — Гонзаго. Къадынынынъ — Баптиста. Шимди корерсинъиз. Сиз алий азретлеринен бизим виджданымыз темиздир, бизге алякъасы ёкъ. Къырчанъгъы ат тепмелеп арт аякъларыны къанатыркен, тепмелене берсин. Бизим кемиклеримиз бутюндир.

Дёртюнджи сана

Къыраличенинъ одасы. Къыраличе ве Полоний келип кирелер.

Хамлет

Ана! Аначыгъым!

Къыраличе

Сиз къоркъманъыз ве там манада манъя инанынъыз. О, кельмекте мегер. Тезджерек сакъланынъыз.

Полоний диварда асылы макъам аркъасына сакълана. Хамлет келип кире.

Хамлет

Недир анам? Манъя насыл хызметинъз бар?

Къыраличе

Сен бабанъны ничюн тахкъир этесинъ Хамлет?

Хамлет

Сиз бабамны ничюн тахкъир эттинъиз, анам?

Къыраличе

Сен менимле бир авамдай лаф этмектесинъ.

Хамлет

Сиз де суаль бермектесиз мунафыкъане.

Къыраличе

Хамлет. Бу не демек?

Хамлет

Сизге исе не керек, айтынъыз.

Къыраличе

Меним кимлигимни хатырлайсынъмы?

Хамлет

Аллах Хакъкъы. Хатырлайым.

Къыраличесиз. Акъайынынъ кадесине яр,

Чокъ языккъ ки, эм де меним анамсыз кене.

Къыраличе

Етер артыкъ лаф этсингелер сеннен дигерлер.

Хамлет

Къыбырданманъыз. Отурынъ. Мен сизни джиберип оламам.

Анайым деп юзюнъизге тутарым кузъги —

Бутюн бары-ёкъунъызын беян этер о.

Къыраличе

Я не япмагъа истейсинъ. Мени ольдюрмеге истей, о.

Эй, ярдым этинъиз! Ярдым!

Полоний

(*Макъат артындан*)

Ярдым этинъиз!

Хамлет

Къылычыны къынындан чыкъарып

Бу да недир? Сычавулмы? Ольгенинъ макъуль!

(*Макъаткъа къылычыны сокъа. Полонийни ольдюре.*)

Къыраличе

Ах, анайым, Не ишлединъ асыл сен, балам?

Хамлет

Кимлигини бильмедин де, Къырал эдими о?

Къыраличе

Бир мисильсиз къабааттыр шимди япкъанынъ!

Хамлет

Бу — къыралны алдав иле ольдюровден ве
Къайыны иле тапышувдан бетердир, ханым.

Къыраличе

Не? Къыралны ольдюровден?!

Хамлет

Э, ханым, шойле.

Къыраличе

Не яптым я мен санъя, сен ойле терс ве къаба
Манъя джевапланасынъ.

Хамлет

Япкъанларынъыз бутюн ахлякъызылыкътыр
Акъикъатны масхара, утанаңч, эйлеп.
Масюм эшкъ-муаббетнинъ беяз манълайында да
Ташма ташып тургъандай, ташып турмакъта.
Пек мукъаддес никаях акъкъы ниетлерини
Хумарбазнынъ севдасына айландырмакъта.
Сиз шойле бир ярамазлыкъ эттинъиз аслы,
Бекяр олып къалды берген ваде ве вефа.
Шериатнынъ ресмий ремзи сизге бир оюн,
Япкъанынъызы корип, атта къызыарыр фелек.
Мавы кок де сизге бакъып, къарапа башлар,
Гужа къара къыямет кунь — гужа ки махшер...

Къыраличе

Шу къадар бир этмишинъден мумкционми бильмек,
Лафларынъынъ асылында нелердир сакълы?

Хамлет

Мына сизге эки сурет: мына ве мына.
Агъа-къардаш сымасы бу ресимде бар.
Бакъынъ нидже джазибелер сакълы биринде.
Зевс манълайдек гуя манълайы ачыкъ,
Сачы Апплононнынъ кербар сачыдай сачыкъ.
Марснынъ назарындай онынъ бакъышы магъур.
Турушында булут ашып топракъка тюшкен
Эльчи Меркурийнинъ сёнемез селябети бар.
Фазилетлер муджессеми, эр нокътасында
Иляхийлик муаббети, мухури ашкяр.
Бу — биринджи акъайынъыз. Мына бу исе —
Экиндjisиси. Хасталыкъ тийген башакъка ошар —
Тазе башакъ янында. Вай, козъчигинъиз къайда?
Ойле юксек яйлявдан шу сасыкъ батакъка
Насыл барып тюштюнъиз? Козюнъиз къайда?
Севги деменъиз. Сизинъ яшта боран билинмез.
Къафа иле яшагъайлар. Айтынъыз ана шу —
Табутны да таныйджакъ къафа къайдадыр?
Истен маҳрум дегильдирсиз, олмаса да, сиз —
Къымыр этмездинъиз. Демек, дуйгъунъыз белли.
Базарлыкъны да бойле атта этмезди телли.
Тынынъ бираз, насыл иблис сизни купе ве куньдюз
Ёлдан аздырып, шойле бир алларгъа салгъандыр.
Козълери кёр, къулагъы сагъыр олгъанда да,
Шуурынъа бираз-бираз таянгъан адам
Бойле ёлун шашырмазды, бойле атмазды адым.
Эй, къайдасынъ, къаердесинъ ар-намус, икрам.
Эй, весвесе шейтан сенинъ кучционъ, къудретинъ
Тул къядыннынъ бир эвине зулумлыкъ сарса,
Насыл этип енъсин къызлыкъ тафтини инам.
Тийменъ, шамдай ирий берсин. Алевнинъ кучю
Танъда орудж этсе — иснад¹, мелямет² дегиль.
Атта буз да янар экен, ве алий идрак
Ирадени къайыраркен, дегиль сандыракъ.

Къыраличе

Хамлет олур, етер энди! Ax, меним , къозум,
Козълеримнинъ къарачыгъын гонълюме бакътырдынъ,

¹ иснад дегиль — япкъан бир ишини бириси ичюн япты демек дегиль

² мелямет дегиль — айыплама, азарлама дегиль

Къара тамгъаларгъа толып кетти къарачыкъ,
Бир шей энди ювып олмаз, япмаз аппачыкъ.

Хамлет

Ифляс тёшекке ятып,
Джиркенч, фахши ферагъатның териңе батып,
Нефиске чатып, севмек, севильмеклер...

Къыраличе

Хамлет, аджын артыкъ!
Эр бир сёзүнъ ханджер олып урула дильге
Къулагъымны тешеята.

Хамлет

Даа ким иле — къатиль иле, айван иле, бир муртад иле,
Педеримнинъ тырнағына ич тенъ олмагъян,
Къырал урбасыны кийген бир къоқъла иле,
Салтанаткъа къыргъынлыкъны серпкен ляинле,
Тадж хырсызлап, азыране, къолтукъкъа къойып,
Этегининъ энъ астына сакълап, ве, озюни акълап,
Юрьен, ер котерген бир хырсыз иле.

Къыраличе

Хамлет, артыкъ аджын!

Хамлет

Бир алчакъ иле!
(*Ольдюрильген къыралның үрүфө, колеткеси келип кире.*)
Къорчаланъыз мени сема фериштелери!
Алий азретлери сёйленъ сизге не деркяр?

Къыраличе

Эй-вах, онынъ тутанагъы тутты.

Хамлет

Ихтимал,
Догъру ёлгъа чекмек ичюн дембелъ оғъулны
Кельгендирсиз, куньлер кече, къоркъунч ферманынъызын
Беджералмадым. Айтынъыз, амма вазифемден даа таймадым.

Къыралның колеткеси

Кельгенимнинъ макъсады — сенинъ тентиреп тургъан
Азим къарапынъын кене якъмакътыр, илля.

Амма шимди ананъа бакъ! Мерамет эт онынъ алына.
Оны эйле вахимеден, дешет, къоркъудан,
Аджиз рухлар олур къурбан къоркъу-вахиме окъундан.
Бир агъызчыкъ мұляйим сөз, сейле ананъа.

Хамлет

Ханым, не олды, я?

Къыраличе

Я озюнъе не олды я? Бошлукъкъа бакъып,
Не акъкъында лаф этесинъ бош ава иле,
Козылеринъни акъайтырып, чакъайтырасынъ.
Санки юкъу серсеминден эшитип ферман
Вуджудынъда сачынъ, тюкюнъ тикке туралар.
Балачыгъым, озюнъни сен къолгъа алгъайсынъ,
Козылеринъе корюнгенлер нелер къуралар?

Хамлет

Ана о, ана о! Э, бакъынъыз, о ап-акъ!
Онынъ сыфаты, онынъ беяз череси
Атта ташны иритеджек. Юзюнъни менден чевир,
Юрегимни парчалай бакъышынъ сенинъ.
Санъа бакъсам, алсызланыр, юрегим меним,
Къан ерине козъяш тёкип, шайланыр гужа.

Къыраличе

Вай, къозум, кимнен сен шай лафлар этесинъ?

Хамлет

Бакъынъыз, аджеба,
Анавы якъта сиз бир шей корьмейсинъизми?

Къыраличе

Ёкъ, этрафтаки корюнген шейлерден гъайры ич бир шей
корьмейим.

Хамлет

Эшитмейсинъизми?

Къыраличе

Сенинъ иле меним сесимни тек эшitem.

Хамлет

Ана озю, турмакътадыр! О таба бакъынъ,
Бакъынъ, гуя тири джандай катып турмакъта.
Бабам шимди къапы таба ёлун алмакъта, коръдинъизми?

Къыраличе

Хаста рухнынъ семереси бу
Уруфларны хаста рухлар тек коре биле.
Хамлет, балам! Къальбим яна, эп парчалана.

Хамлет

Яхшы парчанъызын асрап — азизлемекчюн,
Яман парчанъыздан вазгечинъ бутюн.
Хайырлы гедже. Эмджееме барманъыз энди.
Саф видждандай озюнъизни тутунъыз бугунь.
Адет джанлы ис-дуйгүнүнъ душманыдыр эп,
Лякин базан достлугъы бар, душманлыкъ дегиль.
Янты куньдай кийип ахлякъ къаидесини,
Биз яхшылыкъ огъурында юреккенмиз деп,
Олгъян лафны яхшылыкъкъя ёрармыз адет.
Бугунь сёзни туталсантыз, ярынгъя енгиль,
Гедже кечер, енгиль олур, меним шеадет.
Эп тилейим, сизге кене хайырлы гедже,
Тёвбе-тевфиксъ ёлун тутып, кетсенъиз, Юдже
Багъышларкен эпимизге япкъан хатаны.

(*Айше Кокиеванынъ терджимеси*)

Суаллер ве вазифелер:

1. Къасарда ерлешкен бир ханеде къырал, къыраличе, Полоний, Офелия, Розенкранц ве Гильдестрен не акъкъында лакъырды юрютeler? Къыралгъа Гильдестернин Розенкранц нелер айткъаныны эсердеки сатырларнен исбат этинъиз. Олар Къыралгъа Хамлет акъкъында насыл бир малюмат бильдирелер?
2. Хамлеттин «Я аят, я олюм» киби монологында насыл меселелер котирile? Бу монологны эзберлентьиз.
3. Санадаки пантомиманы корыген Офелия шахзадеге насыл бир суалынен мураджаат эте? Соңра озю насыл бир нетидже чыкъаргъаныны айттынъыз.
4. Хамлет анасы ве къыралгъа насыл джевап къайтара? Бабасынынъ ольдюрилювини анасына насыл беян эткен сатырларны эсерден тапып окъунъыз.

5. Анасының япкъан къабаатыны Хамлеттинъ сёзлеринде айтылған маневий сатырларнен исбатланызыз. Ар, намус, икрам меселелери акъкъында айткъан сёзлерини айырынтызыз. Бу вазиетни къыралының руху оғылуна насыл сёзлер айтып токътата?

КЛАССИЦИЗМ УСЛЮБИНИНЬ ИЛЕРИЛЕВИ

Джиан эдебиятының чешит девирлеринде классицизм, сентиментализм, романтизм, реализм киби услюpler инкишаф эткени беллидир.

Классицизм XVII асырда франсыз эдебиятында шекилленди, XIX асырның башына къадар Авропа мемлекетлери эдебиятында къулланылып, иджадий бир услюп олып къалды.

Францияда классицизмнинъ муим эснаслары Пьер Корнель, Мольер, Жан Расин киби ве дигер языджыларның эсерлеринде ifадесини тапкъаны беллидир.

Классицизм муреккеп ве зыддиетли адисе олып, джиан эдебияты тарихында айрыджа әмиет ве къыйметке юксельди. Францияда — классицизм — абсолютизмнинъ мустехкемлениш шараптинде, Италияда — кечки Уянув девринде, Русиеде — абсолютизмге къаршы ильк гъаелернинъ пейда олув (декабристлер) девринде мейдангъа кельди.

Классицизм эсерлерининъ мундериджеси земаненинъ муим икътисадий ве ахлякъий меселелерини акс этти. Классицизм эдебияты-реалистик тефеккюрнинъ маҳсулаты ве корюниши олып къалды.

Реалистик тефеккюрнинъ менсюплигини косытерген эки алямет бар. Реалистик тасвириң бириндже алямети — классицизм векиллери къараманларның ички дюньясыны терен ве айдын косытериловине әмиет бергенлеринен бағылышыр. Классицизмнинъ къудретли къуралларындан бири — психоанализ яни психологик талильдир. Эсерде иштирак эткен әр бир къараманның япкъан арекетлери, йипинден инесине къадар, терен косытерилов ве тасвир этиловдир.

Реалистик тасвириң экинжи алямети — эсернинъ тили ве сюжетининъ аддийлигинен тайинлене.

Классицистлер чокъусы антик эдебий эсерлерде ишленген сюжетлерни къулланып әдилер. Кечмиш санаткъа олгъан терен ихтирамыны олар бойле ёлнен ифаде эте әдилер. Бу сюжетлер, XVII — XIX асырдаки Авропаның ичтимай-сиясий аятында меркез ерни алгъан меселелерни айдынлатмакъ ичюн, языджылар тарафындан сечилир ве ишленир әди.

Классицизм усулынен язылгъан эсернинъ муим хусусиети бар. Язылгъан эсер муэллифнинъ терен инсаниетлик гъаеси ве ирадеси-не бойсундырыла. Къараманларнынъ тақъдири эсас гъаеге олгъан мунасебет эсасында тасвир олуна. Эсерге бойле шартлар къюолгъа-ны ичюн, къараманларнынъ психологиясы рухий вазиети ве тили терен косытерильмей.

Инсан характерининъ бойле схематик шекильде тасвир олуну-вы классицизмнинъ муим эснасларындан келип чыкъа эди. Олар аятны абстракт бир схема киби, тек «къара» ве «беязны» коре эди-лер. Шундан себеп, эсерлеринде къараманларнынъ сымасы я менфий, я да мусбет къараманларгъа болюнир эди.

Классицизм эстетикасы боюнчада, эсерде «учь бирлик» талабы къулланыла. Эсерде тасвир олунгъан адисе бир сюжет ёлагъынен ифаде этиле. Яни биз айткъан шейлер — арекет бирлиги къаидеси-ни тешкиль этелер.

Адисе-вакъя бир ерде олып кечмели. Яни бу экиндже талап — ер бирлиги къаидесини мейдангъа кетире. Вакъиалар йигирми дөрт saatte олып кечмели. Бу исе классицизм услюбининъ «ва-къыт бирлиги» деп адландырылгъан учонджи талабыдыр.

Эсер котеринки услюпте язылып, анда фикир этов ифаделер-нинъ назиклиги ве гузеллигине айрыджа эмиет берильгени де классицизм услюбининъ буюк векиллери иджадыны пек муим ве зарур меселелерге багъышлангъанлар. Бу эсерлернинъ гъае-сини инсаниетнинъ ахлякъий меселелери тешкиль эте эди-лер. Классицистернинъ эсерлеринде девирлер кечкен сайын аят акъикъаты терен, кениш тасвир олуна башланды. Хусусан Ж.Б. Мольернинъ иджадында акъикъатперверлик пек кучлю та-свиrlenди. Классицизмнинъ бу хусусиетлери сонъра джиан эдеби-тында реалистик услюпнинъ шекилленюинде буюк роль ойнады.

Суаллер ве вазифелер:

1. Классицизм услюбининъ шекилленюов деври анти асыргъа аиттири? Бу услюп къайсы муэллифернинъ эсерлеринде озъ ифадесини корыге-нини айтынъыз.
2. Классицизм Франция, Италия, Русиеде насыл девирлерде мейдангъа кельди? Классицизмнинъ эсас хусусиетлери не узеринде тайинленгенини айтынъыз.
3. Классицизм эстетикасы боюнчада эсерге насыл талаплар къюолгъа-ныны анълатынъыз.

ЖАН БАТИСТ МОЛЬЕР (1622—1673)



Улу драматургнынъ акъикъий сойады — Поклен. Мольер исе онынъ тахаллюсыдыр. Бабасы жан Батист къыралнынъ сарайында хызмет эткен, урьметли бир инсан олгъан. Драматургнынъ ады бабасындан келип чыкъкъандыр. Эвлядынынъ келеджегини къайгъыргъан ана-баба, сарайдаки зенаат бабасындан оғълуна кечсин деп, рухсет алмагъя наиль олгъанлар. Амма эвлядынынъ арзу истеклери башкъа эди. Къартбабасынынъ ярдымынен коллежке оқъумагъя кирип, элине дипломыны ала. Паралы зенаат оны мерақъланырмагъаны себединен, о, актёрлыкъ зенаатынынъ саби ола. Энди Поклен ёкъ эди. Францияны ве бутюн дюнья театр санатынынъ шерифини арттыргъан Мольер пейда олды.

Мольер фикирдешлери ве достлары арасындан труппа топпал, Париже театр тешкилтландыра. Амма олар бу иште мувафакъиет къазанып оламайлар. Театрни къапатмакъ сырасы келе. Кене де келишмеген бу ал яшны къанаатлендирмей. О, актёр олмагъя истеген экен, актёр олып, кезип юрьген комедиантларнынъ труппасына къошула. Оларнен Франциянынъ шеэрлерини кезип юре, лякин озю пьеса язаджагъыны биле, акълына кетирмей. Бойле этип, 13 сене девамында бу театр труппасынен мында быралкъы киби кезе. Бу девирде, о, аят мектеби кече.

Мольернинъ драматургистидады апансыздан пейда ола. Труппасынынъ фукъяре репертуарыны кенишлетмек себединен, о, къолуна къалем ала. Комедиографынынъ комедиялары 1653 сенеден сонъ этрафкъа джайрай. 1650 сенелери Мольер Парижге къайта. Истидалты ве теджрибели режиссёр ве драматургкъа чевриле. О, реберлик эткен труппада истидалты актёр ве актрисалар чалышлар. Версальде, къырал огюнде япылгъан чыкъышларда бу труппа бир чокъ мувафакъиетлерге наиль ола. Ильки вакъытлары генч къырал Людовик XIV драматургкъа нисбетен алидженаплыкъ эте. Театр сарай театри статусына ирише.

Парижде Мольер озюнинъ шан-шуретли «Тартюф» (1664), «Дон Жуан» (1665), «Мизантроп» (1666), «Тамакъяр», «Жорж Данден» (1668), «Корьмемиш задекян» (1670), «Скапеннинъ ийлекярлыгъы» (1661) киби бир сыра драматик эсерлерини яза.

Драматургнынъ омюрининъ сонъки сенелери гъает мурек-кеп кечкени беллидир. Комедияларынынъ сатирик джеэтлеринден буюк заар корыген битараф инсанлар муэллиф акъкъында этрафкъа бинъ тюрлю уймагъан фитнелер дагъыталар.

1673 сенесининъ февраль айында Мольернинъ «Сахте хаста» адлы комедиясынынъ премьerasы олып кече. Эсас рольни Мольернинъ озю иджра эте. О, озюни пек ярамай ис эте, амма зенаатлыкъ гъууруры устюнлик этип, о, алыш-эвалына эмиет бермейип, спектакльнинъ биткенине къадар иджра эте. Шу геджеси драматург фани дюньяны терк эте.

Парижде, архиепископ мевтаны «комедиант» «япкъан гуняхлары ичюн афу истемеген гуняхлы» оларакъ, мезарлыкъта дефн этмеге рухсет этмей. Сонъ-сонъуна оны озюнинъ джаныны къыйгъан ве хачланмагъан балалар комюльген ерге дефн этмеге рухсет эткенлери беллидир. Муэллифнинъ такъдири бойле аджыныкълыдыр.

Суаллер ве вазифелер:

1. Жан Батист Мольернинъ сой-адына аит бильгилеринъизни озъ сёзүнъизнен икяе этинъиз.
2. Драматургнынъ аятын ве иджадий фаалиети акъкъында бильген ма-люматынъизнен пайлашынъыз.
3. Муэллифнинъ драматург оларакъ истидады не вакъыт пейда олды? Труппа тизип, насыл ишлер беджергенини икяе этинъиз.
4. Парижде Мольер насыл эсерлерини язды? Эсерлерининъ серлевалары ве язылгъан сенелерини айтынъыз ве дефтерлеринъизге къайдынъиз.

Мольернинъ «Корьмемиш задекян» комедиясына даир

Сарай янында тешкиль олунгъан театрде ойналгъан пьесаларнынъ эписи мытлакъ къыралнынъ япкъан сымарышынен язылыр эди. Язылгъан пьесанынъ сюжетине къырал истеген шейлерини кирсетмеге къарышкъаны да белли эди.

Къырал Людовикнинъ Туркиси арасында олгъан даясыйндан сонъ, Мольерге янты эсеринде турклернинъ устюнден кулюнген эпизод кирсетильгени сымарыш этиле. Мольер озюнинъ «Корьмемиш задекян» пьесасына къараманлыкъта такъдим этильген комик эпизодны кирсете.

Эсерде пек зенгинлешкен буржуа дженап Журден медениетли адам олмагъа истей. Бильгили, тербиели олмакъ ичюн, озюне оджалар тута, озюни джемиетте тутмагъа огрене, йырламагъа, ойнамагъа, чалмагъа, севгилисine мектюплер язмагъа огрене. Туткъан оджаларының эр бири зенгин талебесине артыкъ чокъ шей огремеге ынтылалар. Оның зенгинлигини козь огюне алыш, ярамай йырласа да, яхши деп, айбетлейлер.

Бойле этип, оджалар гъярип зенгин устюндөн кулелер. О, исе оның япкъан илерилевлери ве къазанчларыны макъуллеген оджаларына инана. Ондан франкларыны кунь сайын, савургъан граф Доранткъа да ишанчы кямиль ола.

Шойле бир эджнебийликнен, Журден кулюнчли мерасимде иштирақ этмеге разы ола. Бу кулюнчли мерасимни де Мольернинъ озю тюшүнүп тапкъан. Журденге франсызларның шеджере-синден дегиль де, турклернинъ шерджересини бергенде, таякъларнен оны котеклеп, дели ерине санып, ашшалайлар.

Оджалар, граф Дорант, фазилетли Клеонт ве оның доландырыдьзы ярдымджысы Ковъель не себептен Журденни севмейлер, оны ашшалайлар? Оны ашшалагъанда да, буюк бир кейф алалар. Журденнинъ этрафында адамлар граф маркиз олмагъа истеп, япкъан арекетлери узеринден кулелер.

Энъ эсасы, бу инсанлар оның бильгиге олгъан ынтылышы, истегини ич де багъышлап оламайлар. Къадыны, къызы биле оның тарафыны тутмайлар. Атта эв-баркъны джыйыштыргъян Николь биле, эвге кельген адамлар эв-баркъны темиз тутмагъа кедер этелер деп, къаршы чыкъа.

Комедияның сонъу гузель нетиджелене. Журденнинъ къызы Люсиль ве Клеонт эвленеджек олалар. Маркиза графының къадыны оладжагына разылыкъ бере. Журден эфенди исе, олып кечкен шейлерни акъикъат деп таный. Журденнинъ задекянлыкътаки намус, ар, изет, нефис, сечилюв, уулулыкъ киби анъламларның эписи — хаялгъа къапылув, озъ-озюни алдав олгъаны анълашыла.

Бойле этип, Мольер Журденнинъ кулюнчли вазиетлерде тасвирлеп, кулькю пейда эте. Буныңле берабер Журденнинъ этрафында къараманлар да муэллиф тарафындан кулькюгө алына.

Суаллер ве вазифелер:

1. Комедиясына Мольер насыл комик левха кирсете? Буны онъа ким теклиф эткенини айтыңыз.
2. Комедияда тасвир олунгъан адисе-вакъиаларны икяе этинъиз.
3. Бу эсернинъ эсас проблемасы насыл гъялернен багълы олгъаныны, метинни окъуп, анълатмагъа тырышынъыз.

КОРЬМЕМИШ ЗАДЕКЯН^[32]

(Беш пердели комедиядан парчалар)

Биринджи перде

*Бир чокъ чалгъы алетлери иле увертура иджра этиле;
Сана ортасында маса башында музика оджасының талебеси
Журден бей эфенди сымарлагъан серенадагъа макъам уйдурға.*

Биринджи корюниш

*Музыка оджасы, оюн оджасы, эки йырдожы, йырдожы кѣyz, эки
кеманеджи, дөрт оюнджы.*

Музыка оджасы (*йырдожы ве чалгъыоджыларгъа*)

Мында, бу якъкъа буюрынъыз, мына бу залгъя, о, кельгендже
бираз раатланынъыз.

Оюн оджасы (*оюнджыларгъа*)

Сиз де, мына бу тарафкъа кечип турунтыз.

Музыка оджасы (*талебеге*)

Азырмы?

Талебе

Азыр.

Музыка оджасы

Къана бакъайыкъ... ярамай дегиль.

Оюн оджасы

Яңты бир шейми, ёкъса?

Музыка оджасы

Эбет, бизим анав гъарип адам юкъудан уянып тургъандже, та-
лебеге бир серенада макъамы уйдур, дедим.

Оюн оджасы

Бакъмақъ мумкюнми?

Музыка оджасы

Бей эфендимиз кельген сонъ сиз о серенаданы диалогынен бера-
бер динълерсиз. О, тезден келир.

Оюн оджасы

Артыкъ бизим ишимиз башымыздан да юксек.

Музыка оджасы

Айтмагъа келеми! Биз керек адамымызны энди таптыкъ. Жур-
ден бей эфенди озюнинъ задекянлыкъ делилигинен, задекянлыкъ
къылыштарынен — бизим ичюн бир хазине! Эгер эр кес онынъ

киби олса эди, сизинъ оюнларынъызnen меним музыкама башкъа бир шей керекмез эди.

Оюн оджасы

Эбет, тап о къадар дегиль. Онынъ озюнинъ файдасы ичюн, биз айткъан шейлерни, биз анълаткъан шейлерни анълагъаныны истер эдим.

Музыка оджасы

Анъламагъя — анъламай амма, лякин бизге яхшы пара тёлей, бизим санатымыз да, шимди бундан башкъа шейге муҳтадж дегиль. Оюн оджасы

Догърусыны айтсам, мен шан-шуретке о къадар первасыз бакъмайым. Эль-чырпмалар манъя кейф бере. Ахмакълар ичюн санатынъны сачып-тёкмек, къабакъбашлар, кутюклерге къыймет кестирмек, эр анти артист ичюн олюмдир. Санатны яхшы анълагъан, онынъ инджеликлерини бильген, догъру къыймет кескен, эмегинъни макътап алгышылагъан адамларгъа джаным къурбан олсун. Эбет, энъ гузель муқяфат — оларнынъ эльчырпма, алгышыларыдыр. Бойле муқяфат бильгили, медениетли адамлар тарафындан берильсе даа яхшы.

Музыка оджасы

Мен де бунъя разым, мен де макътавларны севем. Керчектен де, эльчырпмалардан да яхшы шей бармы? Къурудан-къуру макътав кимге керек? Лякин бир тарафтан ялынъыз бир макътав инсангъя азлыкъ эте. Даа бир башкъа бир шейлер керек; меселя, къолунызға бир шейлер туттырсалар, бу энъ яхшы макътавдыр.

Догърусыны айткъанда, бизим бей эфендимизнинъ де, бильгици о къадар буюк дегиль, эр шейге билир-бильмей къыймет кесе, керек олмагъан ерде, эль шапылдата, амма — лякин къыйышмысын арекетлерини акъчанен догъурлай, онынъ ферасети — кисесинде, онынъ макътавлары — акъчанен ольчене; шунынъ ичюн пе-е-к бильгили, окъумышлы, будаладан коре, биз ичюн, бойле джаиль задекян файдалыдыр.

Оюн оджасы

Сизинъ сёзлеринъизде джан бар, лякин менимдже, сиз парагъя къаардан зияде эмиет бересиз; айтаджакъ олсам, ачкозылюк, пара пешинден чапмакъ ойле бир шей ки, о инсангъя бир заман эйилик кетирмеди.

Музыка оджасы

Бунъя бакъмадан, сиз бизим анав гъарип адамдан ымпыс-тым-пыс пара аласынъыз.

Оюн оджасы

Эбет, алам, лякин пара мен ичюн баш меселе дегиль. Эбет, онынъ байлыгъына коре, бираз даа бир шейге зевкъы олса эди, меним истегеним — бу!

Музыка оджасы

Мен де шай: я биз экимиз шунынъ ичюн тырышамыз да. Амма насыл олмасын, онынъ саесинде, бизге эмиет берип башладылар. Башкъалары макътаса, о, пара тёлей.

Оюн оджасы

Мына, озю де кельди.

*Экиндже перде
Бириндже корюниш*

Журден бей эфенди

Машалла! Ама да ойнайлар! Пек гузель, юксек дереджеде!

Оюн оджасы

Оюн музыкагъя уйгъун олса, даа да тесирли ола. Биз сиз ичюн балет чагъырттыкъ, онынъ насыл гузель олгъаныны озюнъиз корерсиз!

Журден бей эфенди

О балет манъа бугунь керек оладжакъ. Уйле емегине мусафирликке гузель бир ханым келеджек, онъя юксек муртебени косьтиририм.

Оюн оджасы

Эр шей азыр.

Музыка оджасы

Бир шей айтмакъ истейим, бей эфендим: Сиз киби инсан афтанынъ эр чаршенбе я да першенбе куню эвинъизде концерт бермек керексиз.

Журден бей эфенди

Я задекян бей эфендилер ойле концерлер берелерми?

Музыка оджасы

Эбет, бей эфендим.

Журден бей эфенди

Ойле олса, мен де берип башларым. Биз беджерип олурмызмы?

Оюн оджасы

Маркизагъя теменна этмекними?

Журден бей эфенди

Эбет, онынъ ады — Доримена.

Оюн оджасы

Къана элинъизни беринъиз.

Журден бей эфенди

Керекмей. Сиз манъа косьтеринъиз, мен озюм билерим.

Оюн оджасы

Эгер сиз онъа пек итирам косътермек истесенъиз, арткъа бир адым япшп, бир кере теменна этмек, шундан сонъ, онъа якъынлашып, учь кере теменна этмек ве ахыры-сонъу онынъ аякъларына эгильмек керексиз.

Журден бей эфенди

Къана, косътеринъиз.

(Оюн оджасы косътере.) Анълашылды.

Учюонджи корюниш

Кене шулар, къылышбазлыкъ оджасы ве элинде эки къылыш (рапира) иле лакей.

Къылышбазлыкъ оджасы (*Лакей элинден къылышларны алып, биригини Журден бей эфендиге бере*).

Къана, буюрынъыз, эфендим: теменна; кевденъизни дөгъру тутунъыз! Сол тарафынъызгъа чокъджа таянынъыз. Аякъларынъызын о къадар керменъиз. Эки табанынъыз да бир сырада олсун. Элинъиз белинъизден ашагъы олмасын. Къылышынъызынъ уджу омузынъызынъ къаршысында олсун. Элинъизни о къадар узатманъыз. Сагъ элинъизнинъ авучы козъ юксеклигинде олсун. Сол омузынъызын аркъагъа чекинъиз. Башынъызын тик тутунъыз. Ишанчлы козынен бакъынъыз. Илери уджюм. Беденинъиз къыбырдамасын. Квартнен уджюм этинъиз, ойле де арткъа чекилинъиз. Бир, эки. Кене эвельки ерге барынъыз. Кене ишанчинен башланъыз. Бир адым арткъа. Огге ташлангъанда, къылыш огге атылсын, беденни исе мумкун олгъаны къадар, дарбеден къорчаламакъ керек. Бир, эки. Къана, лютфен: терс усулынен уджюм этинъиз, ойле де усульнен чекилинъиз. Уджюм. Беден къыбырдамай. Уджюм. Эвельки ерге. Бир, эки. Кене янъыдан башланъыз. Бир адым арткъа. Имае этинъиз эфендим, имае этинъиз! (*Имае этинъиз! Сакът олунъыз!* — деп къычыраракъ, Журден бей эфендиге бир-къаач кере къылыш уджуны санчып ала).

Журден бей эфенди (оюн оджасына)

Акъылдан аздынъызмы не? Къылышбазлыкънынъ бутюн усусларыны, беш пармагъы киби бильген, ракъибини бир сильтемнен ольдюрмекни корьсеткен кишинен давалашмакъ истейсизми?

Оюн оджасы

Тюкюрдим мен онынъ терс, кварт усуулларына!

Журден бей эфенди (оюн оджасына)

Етер, дейим сизге!

Къылычбазлыкъ оджасы (оюн оджасына)

Ах, сиз, арсыз адам, мына шимди косътеририм!

Журден бей эфенди

Тынчланынтыз, азиз фехтмейстер!

Оюн оджасы (къылычбазлыкъ оджасына)

Ах, сиз, атбаш адам!

Журден бей эфенди

Тынчланынтыз, азиз оюнмейстер!

Къылычбазлыкъ оджасы

Мына мен сизге барып етсе эдим!

Журден бей эфенди (къылычбазлыкъ оджасына)

Яваш, яваш!

Оюн оджасы

Меним элим сизге етсе эди!

Журден бей эфенди (оюн оджасына)

Етер, дедим!

Къылычбазлыкъ оджасы

Мен сизни шимди эзип ташларым!

Журден бей эфенди (къылычбазлыкъ оджасына)

Алла ашкъына!

Оюн оджасы

Мен сизни шимди шиширирим!

Журден бей эфенди (оюн оджасына)

Ялварам!

Музыка оджасы

Ёкъ, эфендим, биз онъа бир акъыл къояйыкъ! Тербиесиз!

Журден бей эфенди (музыка оджасына)

Вай, Аллахым! Вазгечсенъиз шуны!

Суаллер ве вазифелер:

1. Пек зенгинлешкен буржуа дженаплары Журден, медениетли ол-макъ ичюн, нелер япа? Биринджи корюништен окъутмагъя, огремеге ту-тулгъан оджаларнынъ сёзүндөн бу акъта нелер анълашылгъаныны икяе этинъиз?

2. Афтанинъ эр чаршенбе ве я да першенбе куню Журден эвинде кон-церт бермеге башлайджагъыны бильдире. Оджалар Журден эфендиге чешит тюрлю марифетлер яптырып, устюндөн кулюнген эпизодларны окъуп, айырынтыз. Нетиджелер чыкътарынтыз.

3. Учонджи корюниште къылычбазлыкъ оджасы талебеси Журденге нелер огремеге ынтыла? Онынъ устюндөн, насыл кульгенини, эсерден мисаллер кетирип анълатынтыз.

Докъузынджы корюниш

(Түрк мерасими)

(Муфтий, йырлагъан дервишлер, ойнагъан турклер, муфтий-нинъ тавабалары).

Биринджи балет корюниши

Алты түрк чифт-чифт олып келелер. Олар учь дане килим кетирелер. Бир-къяч оюн арекетлерinden сонъ килимлерни башлары устюне котерелер. Йырлагъан турклер килимлер тюбюндөн кечерлер ве сананынъ эки тарафына тизилирлер. Муфтий ве дервишлер бу корюнишинъ сонъзунда булунырлар. Бундан сонъ турклер килимлерни тёшерлер ве тиз устюне чёкерлер, муфтий ве дервишлер ортада туралар. Муфтий чешит тюрлю шимарларнен юзюни бурюширип, Магометни чагъыра, тавабалары ве хызметчилири исе бу вакъытта юзю көбюн тюшип, эллерини котеререк, «Алла!» деп дуа окъуйлар, сонъра ерлерinden къалкъып, «Аллаху экбер!» дейлер, эки дервиши исе, Журден бей эфендининъ артындан келирлер.

Онуңдже корюниш

Кене шулар ве түркчө урба кийген Журден бей эфенди.

Муфтий (Журден бей эфендиге)

Бильсенъ эгер джевап бер,

Бильмесенъ эгер, индеме

Мен мында муфтийим,

Сен агълайсынъ?

Анъламасанъ,

Не агълайсынъ,

Не сакълайсынъ,

Такъмакълайсынъ...

(Эки дервиши Журден бей эфендини алып чыкъалар.)

Он биринджи корюниш

Муфтий, дервиш, турклер

Муфтий

Ады не я, ады не я?

Турклер

Джиурдина. Джурдина.

Муфтий (*секирип*)

Джиурдина. Джиурдина.

Турклер

Джиурдина. Джиурдина.

Муфтий

Магомета эфенди!

Сорайым мен Джиурдина,

Оны япаджам паладина,

Береджем онъя алебардина

Ёллайджам оны Фелестина

Геми иле бригантина

Дженк этмеге христианина.

Магомета эфенди!

Элини сорайым Джиурдина.

(*Түрклерге*) Бегенесизми Джиурдина?

Турклер

Эвалла! Эвалла!

Муфтий (*йырлай ве ойнай*)

Ха-ла-ба, ба-ла-шу,

ха-ла-ба, ба-ла-шу, ба-ла да.

(*Муфтий ве дервишлер кетелер.*)

Он экинджи корюниш

(*Кене шулар, муфтий, дервишлер ве Журден бей эфенди.*)

Экинджи балет корюниши

Журден бей эфенди

Ух!

Муфтий (*Журденге*)

Алдатмайсаноз?

Турклер

Ёкъ. Ёкъ. Ёкъ.

Муфтий

Дегильсинъми шарлатанос?

Турклер

Ёкъ. Ёкъ. Ёкъ.

Муфтий (*турклерге*)

Берейимми онъя тюрбанос!

Турклер

Алдатмайсаноз? Ёкъ. Ёкъ. Ёкъ. Дегиль шарлатанос? Ёкъ. Ёкъ.

Ёкъ. Беринъиз онъя тюрбанос!

Учюнджи балет корюниши

(Музыка алтында турклер ве Журден бей эфендиге тюрбан кийсетелер).

Мұфтий (Журденге къылыш бере)

Сен энди — дворян.

Дегиль бу ялан.

Бу къылышчи алан.

Түрклер (Къылышларының къынындан чыкъаралар.)

Сен энди — бу дворян.

Дегиль бу ялан.

Бу къылышчи алан.

Дёртюнджи балет корюниши

(Түрклер, музыка алтында ойнай-ойнай, Журден бей эфендини къылышынъ артынен уралар).

Мұфтий

Вур, вур.

Къылышчи сувур.

Бешинджи балет корюниши

(Түрклер ойнай-ойнай, Журден бей эфендини сопаларнен уралар)

Мұфтий

Не утаныр, Не къоркъар, Урьмети артар!

Түрклер

Не утаныр, Не къоркъар, Урьмети артар!

Мұфтий учюнджи кере Магометни ғағыра. Дервишлер онъа къолтуталар, сонъра түрклер ойнай-ойнай ве йырлай-йырлай муфтининъ этрафында айланалар ве ниает Журден бей эфендини озылеринен берабер алып чыкъып кетелер.

Бешинджи перде

Учюнджи корюниши

(Кене шулар, Журден бей эфенди.)

Дорант

Азиз бей эфендим! Биз маркизанен берабер сизинъ янъы унваниңызды хайырламакъ ве түрк султаны иле къызынъыздынъ оладжакъ никях тою къуванчыны пайлашмакъ ичин кельдик.

Журден бей эфенди (оларға түркче теменна эте)

Сизге, дженабы алийлери йылан кучюни ве арслан ақълыны арз этем.

Доримена

Мен биринджилер сырасында сизни энъ юксек шурет басама-
гъына котерильгенинъиз иле хайырламакъ бахтына наиль олдым.
Журден бей эфенди

Сизге, ханым эфенди, йыл бою къатмер гуль киби, ачылып тур-
манъызын арз этем. Мени шерефлемек ичюн, кельгенинъизге пек
миннетдарым, ве, сизинъ къаршынъызда, апайымнынъ япкъан
акъылсызлыкъ арекетлери ичюн, афу сорайым.

Доримена

Айды, бир шей дегиль! Мен онынъ бу япмышыны джан-го-
нъюльден багъышлайым. Эбет, мен о, сизни бойле къызгъан-
гъаныны пек яхшы анълайым, сиз киби хазинени, къызгъанма-
макъ олурмы?

Журден бей эфенди

Меним юрегимнинъ, хазинемнинъ саibi олмагъа ялынъыз сиз
акъылсынъыз.

Дорант

Коресизми, маркиза, Журден бей эфенди енъишлерден башы
айлангъан адам дегиль: о ич бир вакъыт достларыны унутмай.

Доримена

Бу — эйи къальб аляметидир.

Дорант

Турк дженаплары къайда я, корюнмей? Биз сизинъ достла-
рынъыз оларакъ, онъа озъ урьметимизни косытереджек эдик.

Журден бей эфенди

Ана, о, келеята. Мен шимди къызыымны да чагъырттым, келип,
онъа севгисини бильдиреджек.

Единдже корюниши

(Кене шулар ве Журден ханым)

Журден ханым

Бу не я? Бу насыл янъылыкъ? Айткъанларына коре, сен къызы-
мызын бир масхарабазгъа акътайгъа бере экенсингъ!

Журден бей эфенди

Агъызынъы япаджакъсынъмы, ёкъмы, арсыз къадын? Без-
дим сенинъ акъылсызлыкъларынъдан! Ич де акъылынъ кирмеди!

Журден ханым

Ёкъ, сенинъ акъылынъ кирмеди башынъа: эр корюнюшинъде
бир дели къияфетинде оласынъ. Не япмакъ истейсинъ? Бу да на-
сыл топлашув?

Журден бей эфенди

Мен къызымыны турк султанынынъ огълуна ақъайгъа береджек олам.

Журден ханым

Турк султанына?

Журден бей эфенди

Әбет. (*Ковъельни косътерип.*) Бу тильмач вастасынен онъа олгъян урьметинъни беян эт.

Журден ханым

Керекмей манъа тильмач-мильмачынъ. Мен озюм онъа къызымыны санъа бермем, деп айтырым.

Журден бей эфенди

Агъызынъны къапатаджакъсынъмы, ёкъмы?!

Дорант

Журден ханым эфенди, сиз керчектен де бойле шерефни ред этесизми? Киевинъиз, турк султаны киби, алий зат олгъаныны истемейсизми?

Журден ханым

Ялварам, эфендим, сиз бизим ишимизге къарышманъыз.

Доримена

Бойле буюк баҳттан юзъ чевирмек олмаз.

Журден ханым

Сизге де риджа этем, ханым, эр ишке бурнунъызын сокъманъыз.

Дорант

Биз сизни, достумыз олгъанынъыз ичюн, къайгъырамыз.

Журден ханым

Дост-мост анъламам, ве, бойле достлукъкъа ихтияджым да ёкъ.

Дорант

Я къызынъыз бабасынынъ сёзюне къаршы дегиль де.

Журден ханым

Меним къызым туркке чыкъмагъа разымы?

Дорант

Шубесиз.

Журден ханым

О, Клеонтны унута билирми?

Дорант

Я дюньяда юксек мертебели, алий затлы олмакъ ичюн, не япмазсынъ?!

Журден бей эфенди

Не къадар инат я, бу къадынлар! Бир еринъ экシリеджекми ёкъса?

Ковъель

Сиз мени тек динъленъиз, соңъ насыл истесенъиз, ойле япарсынъыз.

Журден ханым

Сонъ, не дейджексинъиз я?

Ковъель (Журден ханыма, яваш.)

Биз сизге бир сааттен берли ишмар этемиз. Аслы да биз бутюн бу маскарадны сизинъ ошлы акъайынъыз Журден бей эфенди ичюн яптыкъ. Онынъ къылышыларыны озюнъиз коресиз де. Турк султанаңынъ оғылу исе — Клеонттыр.

Журден ханым (Ковъельге)

Меселе бойле десе!

Ковъель (Журден ханыма яваш)

Мен исе — Ковъелим, тильмач.

Журден ханым (Ковъельге, яваш).

Ойле олса, мен анъладым ве разым.

Ковъель (Журден ханыма, яваш)

Ама бильдирменъиз.

Журден ханым (къычырып)

Э, эр шей еринде. Никях тоюна мен разым.

Журден бей эфенди

Не исе де, акъылы ерине кельди!

(*Къадынына*). Сен исе оны динълемеге истемеген эдинъ! Сени къандыраджагъына инана эдим. Иште, турк султаны демек будыр.

Журден ханым

О манъя эр шейни тантиминен анълатты, мен разым. Нотариусны чагъыртмакъ керек.

Дорант

Пек яхшы ниет. Сиз исе, Журден ханым эфенди, тынчланынъыз ве эндиден сонъ, мухтерем акъайынъызын куньлеменъиз. Биз, маркизанен берабер шу айткъян нотариуснынъ хызметинден файдаланып, никаяхлы къары-къоджа олурмыз.

Журден ханым

Мен бунъя да разым.

Журден бей эфенди (Доранткъа, яваш)

Бу не, козъбоявмы?

Дорант (Журден эфендиге, яваш)

Барсын, бу масалгъя инана берсин.

Журден бей эфенди (яваш).

Пек яхшы, аля. (*Къычырып*). Нотариускъа адам ёлланъыз.

Дорант

Нотариус келип никая кягъытларыны азырлагъандже, келинъиз, балет бакъайыкъ, — бу, турк дженабы ичюн де, эглендже олур.

Журден бей эфенди

Чокъ яхшы фикир. Юрюнъиз, барып отурайыкъ.

Журден ханым

Я Николь?

Журден бей эфенди

Никольни мен тильмачкъа берем, къадынымны исе — ким истесе, алсын.

Ковъель

Тешеккюр, эфендим. (*Четке бакъып.*) Амма бойле дилидонны, бутюн дюньяда къыдырсанъыз биле, тапып олмазсынъыз!

III. Селимнинъ терджимеси

Суаллер ве вазифелер:

1. Турк мерасими кирсетильген корюнишлерден насыл нетиджелер чыкъара билесинъиз. Мольер къыралнынъ истегини беджердими? Комедияда къаарлаштырылгъан кулькю шахсыны булдымы?

2. Комедиянынъ башында тасвирленген аятий вазиет комедиянынъ сонъунда насыл бир сыфаткъа дёне?

3. Комедияда тасвир олунгъан Журден бей эфенди, Журден ханым, Доримена, Дорант, Ковъель киби, къараманларнынъ акъикъий юзю, насыл ёлларнен такъдим олунгъаныны, оларнынъ нуткъу эсасында тайинлентьиз.



ЭДЕБИЯТ НАЗАРИЕСИ

КОМЕДИЯ

Комедиянынъ эсасий къуралы — кулькю олгъаны ичюн, онда драматик элемент трагедиядаки киби инкишаф этмей ве фаджия дереджесине котерильмей. Акс алда кулькю джоюла биле. Нетиджеде, муэллиф тарафындан котерильген муим меселе, джиддий гъяе тесирсизлигинен кулькюден тербиеый эмиет алымайып къала.

Комедиянынъ башында тасвирленген аятий вазиет эсернинъ сонъунда дигер бир сыфаткъа киргени — комедиянынъ хусусий чизгиси сайлыа. Меселя, Гогольнинъ «Ревизор» комедиясында шеэр акими ве онынъ муити бизим козюмиз огунде башкъа бир сыфатта ве сонъунда дигер бир сыфатта айдынлатыла.

Бойле этип, комедиядаки къараманларның ким олгъаны куль-кюнинъ тесиринде бельгилене. Кулькю комедияда энъ муим бир къурал сайлы. Шунынъ ичюн де Мольер озюнинъ бу комедиясында къуллангъан левхаларыны кулькюнен уянтмакъ вазифесине бойсундыра. Ж.Б. Мольернинь «Корымемиш задекян» комедиясында тасвирленген шахслар, озылерининъ маневий дюньясы джеэтinden, сейирджилерден фаркълашып косътерилелер.

Комедиянынъ мувафакъиет дереджеси бизим рухумызыны «темизлей билиш» къабилиетинен бағълыдыр. Бойле эсерлер сейирджилерни ойле бир эеджанландыра, тюшонджеге къоя билелер ки, атта бундан, биз зевкъ ве шевкъ аламыз. Яни ярамазлықтарны корип, темизленемиз ве, сонъундан, яхшы олмагъа тырышамыз.

Нетиджеде, иллетлеримизден темизленип, керекли фазилетлернинъ саibi олмагъа арзу эте баштаймыз. Яни, бойле этип, муэллиф комедия вастасынен, инсан рухуны шекиллендире биледжек эмиетини ifаде эте.

Суаллер ве вазифелер:

1. Комедия жанрынынъ эсас къуралы недир? Онынъ тербиеий эмиеитини айырынъыз.
2. Комедиянынъ хусусий чизгисини тарифленъыз. Мисаллер кетирип аньлатынъыз.
3. Комедияда тасвирленген шахысларнынъ маневий дюньясы акъкъында не айта билесинъыз?
4. Комедиянынъ мувафакъиет дереджеси насыл бир къабилиеттенен бағълыдыр? Бизим аятымызда да бойле вазиетлер ола билеми?

ЯРЫҚЪЛАНДЫРУВ ДЕВИР ДЖИАН ЭДЕБИЯТЫНЫНЪ ИЛЕРИЛЕВИ

XVIII асырда Авропа мемлекетлериндеки эдебиятта буюк гъаевий ёнелиш пейда олды. Бу ёнелишке хызмет эткен маарифпервер инсанлар эдебиятта икътисадий илерилев, шахсиетнинъ сербест шекилленюви, инсанлар арасында достлукъ ве тенълик киби гъаелерни огге сюре әдилер.

Ярықъландашырув гъаелери илькиде Ингилтереде мейдан-гъа кельди. Бу вакъыт Даниэль Дефонинъ «Робинзон Крузо»,

Джонатан Свифтнинъ «Гуливернинъ сергузештлери» ве Роберт Бёрнснынъ эсерлери язылды.

Бундан сонъра ярыкъландырув джереянынынъ гъаелери бутюн Авропагъа джайрады. Фрэнкистанда — бу гъаелер алтында Вольтер, Руссо, Бомарше, Алманияда — Лессинг, Гёте, Шиллер киби маарифпервер инсанлар эдебиятнынъ инкишафына иссе къоштылар.

Маарифперверлик ве ярыкъландырув гъаелери рус эдебиятынынъ тарихына да аиттир. XVIII асырда Д.И. Фонвизин, А.Н. Радицев, XIX асырда исе Грибоедов ве Пушкин киби муэллифлернинъ эсерлеринде маарифперверлик гъаелерининъ аньанелерине эмиет бериле эди.

Ярыкъландырув девир эдебиятынынъ инсаниетлик гъаелери, бутюн чешитлигинен, алман эдебиятында озь тасвирини коръди. Муэллифлер эдебиятнынъ миллий чешитлигиге эмиет бере эдилер. Эсерлерде къараманий характернинъ, вакъиаларнынъ, къуветли дүйгъуларнынъ тасвир олунгъаныны талап этэр эдилер. Олар психологияк талильнинъ янъы усулларыны ишлеп чыкъмагъа, арекет эте эдилер. Алманияда Гёте ве Шиллернинъ иджады бойле гъаелер эсасында илериледилер.

Нетиджеде, ярыкъландырув деврининъ эдебияты санатнынъ макъсат-вазифелерининъ назарий джеэтлерини ишлеп чыкътылар.

Бир адым огге аттылар. Эдебиятта тербие романы, фельсейий повесть, аиlevий драма киби жанрлар пейда олды. Бу эсерлерде ахлякъий къыйметлерге эсас дикъкъат айырылды. Инсан шахситетининъ анълылыгъы тасдыкъ олунды. Буларнынъ эписи бераберликте эдебият ве санат тарихында муим бир девир оларакъ такъдирленди.

Суаллер ве вазифелер:

1. XVIII асырда Авропа мемлекетлеринде насыл бир ёнелиш мейдангъа кельди? Бу ёнелиште хызмет эткен муэллифлер эдебиятта насыл гъаелерни огге сюргенини тарифленъиз.

2. Ярыкъландырув джереяныны гъаелери насыл муэллифлернинъ эсерлеринде айдынлатыла.

ИОГАНН ВОЛЬФГАНГ ГЁТЕ (1749—1832)



Алман әдебияты тарихына мисильсиз иссе къошкъан, улу мутефеккир ве шаир И.В. Гёте Франкфурт на Майне деген шеэрдэ дюньягъа кельди. Онынъ бабасы зенгин ве зияллы бир инсан эди. Огълунынъ кениш тасиль саиби олмасы ичюн, чокъ арекетлер япты, буюк ярдым косътерди. Гёте Лейпциг, Страсбург шеэрлеринде ерлешкен университетлердө окъуды. Мында о, адлиеджилик, тыб-биет ве әдебият саасындаки бильгилернинъ саиби олды. Гёте гъает эмексевер, чалышкъыр бир инсан экен. Саип олгъан бильгисини, омюрининъ девамында эп арттыра берген.

Эсерлерде табиат левхаларынынъ тасвир олунувы илькиде Гётенинъ шириетинде озь тасвирини коръди. Бойле этип, Авропа шириетинде табиат левхаларыны тасвирлеген эсерлер язылды. Бундан соңъ, Авропа шириетинде янъы бир девир башланды. Табиат левхаларыны тасвирлеген мевзуулар чокълашты.

Гётенинъ ильки девирде язгъан эсерлеринде инсан къальбининъ энъ назик дүйгүулары ифаде олунды. Табиат ве инсан арасындаки узюльmez багъ инджеликнен ве буюк бедиий усталыкънен косътерильди.

Гёте 1775 сенеси Веймар шеэрине коче ве омюрининъ соңъы куньлеринедже анда яшай. О, бир чокъ сеяхатларда булуна. Эки сене девамында Италияда яшай. Антик әдебиятнынъ зенгинлиги оны шашырта. Бутюнджиан инсаниетлик дюньябакъышынынъ чокърагъы мындан чыкъып, төрөгенини сезе. Бу гъаелер онынъ «Коринфли келин» балладасында (1788), «Ифигения Тавридада» фаджиасында (1787), «Рим эллегиялары»нда (1790) акс олунгъаны беллидир.

Шаир, Италиядан Веймаргъа къайтып келир экен, семерели чалыша. О, бу арада тек әдебиятнен огърашмай. О, бу девирде анатомия саасында чалышып, бир чокъ янъылыкълар кешф эте ве эсерлер яза. Амма бунъа бакъмадан, о, бутюн джиан медениети

тарихына шаир оларакъ, хусусий иссе къошып, белли олгъаныны къайд этмек керекмиз.

Гёте, ширий эсерлерден гъайры, несир эсерлер яраткъан бир эдиптири. Эдип 1774 сенеси роман яза. «Генч Вертернинъ аизарлары» адлы романы онынъ ильки эдебий къазанчы ола.

Базы алимлернинъ язгъанына коре, Гётенинъ бу романы Русиеде мот олгъан экен. Атта алимлер Н.М. Карамзиннинъ «Гъарип Лиза» повести Гётенинъ бу эсеринде тасдыкъ олунгъан аньанелер эсасында тизильгенини къайд этелер.

Алимлер Лермонтовнынъ да «Васиетнаме» (1831) ширии Вертернинъ Шарлотагъа язгъан мектюби эсасында, такълидий шекильде, язылгъаныны тахминлештирелер. Яни бунынънен Гётенинъ иджадына олгъан меракъ ильк-эвеля бу эсерден башлангъаныны къайд этелер.

Суллар ве вазифелер:

1. Алман эдебияты тарихына мисильсиз иссе къошкъан И.В. Гёте насыл къорантада дюньягъа кельгенини айтынъыз. Онынъ акъкъында бильген малюматны озь сёзүнъизнег икяе этинъиз.

2. Гёте тасиль алгъан шеэрлерни къайд этинъиз. О, насыл бир инсан эди? Онынъ табиат чизгилерини айтынъыз.

3. Алман ширииетинде олмагъан насыл мевзу, ильки оларакъ, Гётенинъ ширииетинде айдынлатылды?

4. Гётенинъ ильк девринде язгъан ширилеринде инсан къальбининъ насыл дуйгъулары тасвир олунды?

5. Гётенинъ Италияда булунувы онынъ насыл эсерлерининъ язылувина сильтем олды? Бу эсерлеринъ серлеваларыны хатырлатынъыз.

6. Гётенинъ анги романы рус языдъиларынынъ иджадына тесир этти? Повесть ве ширининъ серлевасыны айтынъыз.

И.В. Гётенинъ «Фауст» фельсифий фаджиасына даир

Улу алман шаири И.В. Гёте «Фауст» серлевалы фельсифий фаджиасыны чокъ сенелер девамында язгъаны белли. Бу эсер 1774 сенеси язылып башланды, 1831 сенеси исе екционленди. Бу эсеринъ язылувина Гёте озюнинъ бутюн анълы омюрини багъышлагъандыр. Элли еди сене девамында язылгъан эсерининъ мундериджеси ве гъаесинде шаирнинъ дюньябакъышы тасвир олунгъандыр. Бу эсерде инсаннынъ бильгиге, акъыл-идракке олгъан эбедий мера-гъы шерефлендириле. Муэллиф, бу эсеринде инсаннынъ акъикъат

огъурнда туткъан ёлу — фаджиалы, хатасыз ве шашырувсыз кеч-мегенини акс эткени себебинден, озюнинъ драматик поэмасыны фаджия деп адландыра.

Эсернинъ мундериджесинде къулланылгъан эким Фауст акъ-къындаки эфсане эвеля халкъ ағызыз иджадынынъ белли бир жан-рарында озъ тасвирини корыгени беллидир. Бу эфсанеде идрак назариесини кенишлетмек, кечмиш ве келеджекни табир этмеге бильмек ичюн, шайтангъа джаныны сатмагъа азыр олгъан бир инсан сымасы косътериле.

XVI асырда кяинатны тедкъикъ этмеге ынтылгъан инсан сымасы акъкъында бир чокъ китапларда икяе олунгъаны белли. Дантенинъ «Иляхий» комедиясындаки къараман Улисс (Одиссей) джеэннемнинъ энъ сонъки даиресине ерлештирильгенининъ асыл себеби де, онынъ Ер ве Кок сырларыны кешф, тедкъикъ этип, дигерлерге бильдирмек истегинен багълы эди. Кяинатнынъ сырына далмакъ, асылында, энъ къабаатлы ве гуняхлы арекет олгъандыр.

Бойле этип, эдебиятнынъ эр бир девирлеринде бир чокъ муэллифлер Фауст сымасынынъ айдынлатылуына мураджаат эткендер. Шекспирден эвель иджат эткен инглиз драматургы Кристофер Марло, ярыкъландырув девринде иджат эткен муэллифлер де бу сюжетни эсерлеринде къуллангъан эдилер.

Амма, олардан фаркълы оларакъ, алман шаири, бу эфсаненинъ сюжетинен файдаланып, терен фельсифий маналы эсер яраты бильди.

Фаджия «Арш-и-Алядаки башлангъыч» деген къысымнен башлана. Мелеклер Аллахны хамд¹ эткен арада, Шайтаннынъ сеси де келип къошула. Шайтан — Мефистофель, гунахларгъа баткъан инсанлар арасында ич бир заман уйгъунлыкъ ола бильмейдже-ни тасдыкълай. Фауст, рухан не къадар темиз, гунахсыз олмасын Мефистофель, оны гунах ишлемеге чеке биледжегине, сыра тапад-жагъыны тасдыкъламагъа тутуна.

Огүнде тизильген къыйынлыкълардан Фауст насыл чыкъа биледжегини косътермек ичюн, бойле сюжетли багъланыш уйду-рыла. Инсаннынъ улұлыгъы, аятий омрюндеки эмиети, онынъ сывавлардан насыл бир кямилликнен кечебиледжеги бойле ёллар-нен исбатлангъаны косътериле.

Фаджиянынъ эсас къараманы муэллифнинъ озюdir. О, энци-клопедик бильгиге саип олгъан бир инсандыр. О, фельсифе, ад-лие, тыббиет, иляхиет саасындаки бильгилерге менсюп инсан ол-гъанына бакъмадан, хаял сююнетине оғърай. Озюнинъ бильгисине къанмайып, бутюн омюрининъ девамында огърашкъан ве япкъан ишлерини манасыз ишлер сая.

¹ хамд этмек — Танърыгъа олгъан тешеккюр дүйгүларыны бильдирмек.

Сонъундан, акъикъатны араштырып тапмакъ мерамынен, тылсымгъа уруна. Дюнья къурулышының сырларыны бильмеге ынтыла. Инсан аяты ве клянатны идаре эткен къанунларны анъ-ламагъа къапыла. Буның да нетиджесини анълагъан сонъ, зеэр ичиp, бу дюньядан вазгечмеге истей. Оны кене де бу аяткъа чанъ-ларның сеси къайтара. Амма гонълюнде укюм сюрьген рухий бошлукътан ич де азат олунып оламай.

Сонъундан, гонъюль бошлугъыны енъmek ичюн, Иляхий баш-лангъычъа мураджаат эте баштай. Фауст, бутюн омюр япкъан ишлерининъ, ынтылышларының къыйметини анъламакъ ичюн, Инджильинъ терджимесине кирише.

Бойле этип, Гёте бу эсерине Faust, Вагнер, Мефистофель, Маргарита киби сымаларны кирсетип, бутюн инсаниеттинъ ёлуны аллегорик тарзда тасвирлей. Бу бильгилер эсасында исе, биз, дюньявий тарих, фельсифе ве иджадий фикирнинъ кечмиши, бугуни акъкъындаки бильгилернинъ саиби олып къаламыз.

Эки къысымдан ibaret олгъан эсернинъ биринджи къысымында къараманнынъ ички дуйгъусы косытерильсе, экиндже къысымында дюньяның тышкъы къаяфети тариф олuna.

Эсернинъ экиндже къысымында умумийлештирильген символик левхалар айдынлатыла. Вакъыт ве клянатның сынъыры бозулып, Faust орта асырдаки алман императорының сарайындан, антика дюньясына келип тюшпе. Дюльбер Елена Faustнынъ апайы ола.

Эсернинъ сонъунда, энди къартайгъан ве фарыгъан Faustнынъ сонъки монологында, аятының эсас манасы айдынлатыла. Фаний дюнья яшайышындаки инсан аятының манасы, эсасен тын-май-талмай хызмет этювнен, эбедий бильгиге, кемалаткъа ынтылувнен бельгиленгенини анълаймыз.

Гёте озюнинъ бу эбедий эсеринде эпос, лирика ве драма, фаджия киби эдебий тюрлерини къуллана. Бу эсерде фантастик, мистик меселелер де айдынлатыла. Шундан себеп, эсернинъ услюбий ху-сисетлерини айырмакъ меселеси пек муреккептир.

Бу эсерде, бутюн инсаниеттинъ фаджиасы тасвир олунгъанындан себеп, Гёте о девирде белли олгъан бутюн бедий тасвирий васталарны къулланмагъа тырышкъаныны коремиз.

Эсерде шойле этип, иляхий сюжетлер, антик сымалар, халкъ ривааетleri, турмуш левхаларының реалистик тасвирлери символик темсиллер эсасында ifade олuna. Гётенинъ бу эсеринде айдынлатылгъан бедий дюнья о къадар зенгин ки, чешит мемлекетлере де яшагъан алимлер оларның манасы кениш ве теренлигини аля

даа сонъуна къадар анълатып оламадылар. Бу эсернинъ къыймети, бельки де, дюнья эдебияты тарихында ич де текрарланмагъан иджадий чешитлик ве поэтик улулыкънен багълыдыр.

Шахэсерлернинъ заман ве мекян сынъыры ёкътырдыр. Олар муайен девир, муайен халкъ иджады земининде дөгъулып, бутюн девирлер ве чешит халкъларнынъ мульку олып къалалар. Фирдевсийнинъ «Шахнаме» си, Дантеинъ «Иляхий комедия» си, Навоийнинъ «Хамсе»си, Махмуд Къырымлынынъ «Хикяет-и Юсуф ве Зулейхасы» асырлар теренлигинде къалып кетмей, бизим куньлеримизге де етип кельгени, бизни эеджанландыргъаны ве айретке къойгъаны ненен багълыдыр, аджеба?

Бу эсерлерде котерильген меселелер умуминсаний гъаелернен багълы олгъанындамы? Бу эсерлер мукеммель ве кемалатлы бир эсерлер олгъаны ичюнми?

Асылында исе, бу эсерлерде, юкъарыда къайд этильген чизги-лернинъ бутюнликте, бераберликте тасвир олунувы ве акъикъатны, инсан къальбининъ сербестлигини косьтерген амеллернинъ тереннюм этилювинен багълыдыр.

Он беш бинъ мисрагъя якъын бу муджизени инсанiet тарихынъ, негизи деп санабилемиз. Алтмыш сене девамында язылгъян бу эсерде инсан къысметинде тарихынъ муджессем олгъаны косьтериле. Бу тарихны биз тек акъыл ве идрак иле дегиль де, юрек иле ис эте билемиз. Бу эсердеки гъаелернинъ фельсифеси шаркъ фельсифесине якъын олгъаны исе, бизим бильги алув ёлумызны даима айдынлатып тураджагъыны тарифлей.

Суаллер ве вазифелер:

1. Танъры ве Мефистофель арасындағи даванынъ манасыны анълатыңыз.
2. Мефистофельнинъ сымасыны насыл анълайсынъыз?
3. Фаустнынъ хatalары ве енъишлери эсерде насыл тасвиrlenгенини икяе этинъиз.
4. Гётенинъ «Фауст» эсерининъ жанр чешитлигини анълатыңыз.

ФАУСТ^[33]

Арш-и-Алядаки башлангъыч¹

Танъры, сема къоруыйыджылары — учъмелек, сонъ Мефистофель.

Эсрафиль

Семанынъ уйгъунлы, къудретли къатында
Эзелий ёлундан токътамай, дёнмей,
Гудюрди янъгъыратып фелек атында
Кезине джианны ал кунеш сёнемей.
Хайрат исини тиклеген мелеклер,
Аджеп, ким кучь берген, бельгисиз дюнья
Яратылгъан аниден бу демге къадар,
Менгулик шерефтири Аллаху-Таала!

Джебраиль

Аньлашылмагъан суръатле бар земин
Айланмакъта зульмет геджесини къувлап.
Ал танъны нурлу шевкънен этип темин,
Чарх фелекни кечмекте зыпкъын, дувлап.
Денъизлер дильбентлер юзюне чекип,
Суюр къаяларны ювмакъта дайм.
Курре-и-алемни елькенге екип,
Огюмден эбедий кечкенидайын.

Микаиль

Ёлунда не коръсе, этип виране,
Акъышында седа котерип тургъан
Сахра, къараларны этип сейране,
Укюм сюрьмектедир дешетли боран.
Титреп гудюрдюден Кокнинъ къуббеси,
Йылдырым серпилип, Ер узъре акъсын.
Кене де, эй, Халикъ, эй, муджизекяр —
Сенинъ къудретинъе окъуймыз тахсин².
Учъ меляике бераберликте
Яратан иджадий къудретинъ алтында
Фышкъырып артмакъта семавий къувет.
Муджизели яшайыш кунеш алтында
Аятны севмеге этелер давет.

¹ Арш-и-Алядаки башлангъыч — (rus.) Пролог на небесах

² тахсин — алгъышлав, хамд этюв

Мефистофель

Меляникелерден, Эй, Танърым, кене:
— Алемде не ола? — сормакътасынъ эп.
Эвель мени ят тутмаздынъ, мына
Узуринъа мен де кельдим, шу себеп.
Бильмелисинъ, сёзге усталыгъым ёкъ,
Базы Мелеклердай вааз айтмам къуру,
Эгер юксек перваз нуткъ¹ сейлеп олсам,
Къакъылдалап кулердинъ, атта ки сен де
Тильге алмай, йылдыз, сейярелерни
Сёйлейим Ер узресиндең ярелерни.
Инсан кяинатта кичкене алла,
Шойле яратылгъан о, эзельден берли.
О, бельки яхшыджа яшарды бугунь,
Сен къоймагъян олсанъ, гонълюне учкъун.
Ана шу учкъунны акъыл деп адар,
Шундан отърю, онынъ куню айвандан бетер.
Багъышла мени, онъа бердинъ бешер ад,
Амма яшамакътаnidже ашерат.
Гуж чегерткидай от арасында
Кя учар, секирер, кя тизер йырлар.
Олса эди бу мекяннынъ тынчдары,
Эр ишке бурнуны сокъа о, Танърым!!

Танъры

Арзынъ шумы? Кене эски лаф
Бир эшкъял эр иштен аджеп тапарсынъ?
Эйилик битти деп, вахиме япарсынъ?

Мефистофель

Танърым алеминъде иш пек резильдир.
Ойле акъибетте яшар ки, адам —
Аджынам алына онынъ мен, мадам.

Танъры

Фаустны таныйсынъмы?

Мефистофель

Экимними?

¹ Юксек перваз нуткъ — юксеклерге учып еткен нутукъ

Танъры
Къулумны.

Мефистофель

Лафынъ догъру, амма итаат усулын
Эда этер гъает фена ал.
О, курешни севе — ашырып девран,
Узакъ мензиллерни козълей дайма.
Истей — йылдызлар бергенин сема,
Ер — бахшып эткенин тюкенмез сефа.
Ве лякин, эр бири олгъанда камрян¹ —
Тынчлыкъ тапып олмаз, о гонъюль аслы.

Танъры

Билем мен — мен ичюн омрю захметте,
Демек ки, хидает олгъан сервери².
Фидан сачкъян олса, багъбан, эльбетте —
Козь огюнде олурды онынъ да гулю.

Мефистофель

Къавильге азырым. Ишанчым къамиль,
Бу къулунъны сенден тартып алрым.
Мен озюм оны бир ёлгъа салырым.
Векялет³ бер, меним бу ишими амиль.

Танъры

Яхшы сынап корь сен, сенде ихтияр,
О, сагъ олур исе, къолунъда сенинъ.
Сынав олгъан ерде, ёл шашырмакъ бар.

Мефистофель

Тешеккюр, Танърым, олю затларгъа меним
Зерре къадар ишим ёкътыр. Олар не деркяр?
Мени чеке фактъат сагъ олгъан бир джан,
Юзюндеки къырмызылыкъ, юректеки къан.
Керек дегиль манъта мевталар асла,
Тири сычан керек мышыкъка атта.

¹ олгъанда камрян — арзу, ниетине иришкенде

² хидает олгъан сервери — Алла ёлуна къылавузлама (асыл манасыны анълаткъан) башлангъыч

³ векялет — векиллик

Танъры

Эманет этмектем оны, ихтиярынъа,
Нидже тёбенликлер варса, сен озюнъ башла,
Корейим, не къадар пешинъе тюшер,
Разым алып барып джаргъа ташлайбер,
Сен къавильде сёсиз бир гъалип олдынъ.
Зульметтен де ёл тапып, чыкъар бу инсан,
Онъа чыракъ олур, мен берген идрак.

Мефистофель

Къавиль тутмагъа разым мен бакъ,
Лякин беян олур, кечмей чокъ фурсат,
Теслим олур манъа адамзат, эльбет.
Корерсинъ сен, нидже инангъан адам,
Топракъкъа къарышып оладжакъ бербат.
Меним мисильсиз севимли алам —
Йылан киби, сюйрелип, кечирер аят.

Танъры

Ойле исе, яп ойле, тартынма сыра,
Сен кибилер манъа ят дегиль, инан.
Базы иблислерле дигер джан ара
Манъа якъынджаасынъ, яланджы шейтан.
Инсан табиаты уйкъугъа мейиль,
Сен онъа шубе сал, тютип тур дайм,
Этрафында айлан, къозгъалт эрте-кеч,
Эр заман тарсыкътыр, раатлыкъ берме ич.
(Меляикелерге)
Эй, сиз, фериштeler, кок къуббесининъ
Севимли эвлятлары, сёзүм динъленъиз.
Алем гузеллиги зевкъ берсин сизге,
Ким ки, юргинде шевкъ иле яшар —
Ким ки, элем чекер, янар, курешир,
Яр ве эш олсунлар юргинъизге.

Кок семасы къапала, Меляикелер даркъалып кетелер.

Мефистофель (янгызыз)

О сёзлер, не къадар сакин, муляйим!
Онъа озюмни якъын тутам мен дайм.
Бу чалнынъ аджайип бир хислети бар,
Атта иблiske де бермей о, азар.

Биринджи къысым Гедже

Готик услюпте ишленген, тёпеси къуббели эв. Фауст, масагъа къо-
иолгъан ачыкъ китапкъа козъ тикип, курьсюде теляшлы отурмакъта.

Фауст

Иляхиет иле бент олдым,
Фельсефени билиджи олдым.
Укъукъ ильмин, ильми-тыбиет —
Джумлесини огрендим къат-къат,
Факъат манъа бир шейдир беян,
Надан эдим, наданым хеман.
Бардыр доктор, магистр адым,
Он йылдыр ки, кечер аятым
Шегиртлерни алдамакъ иле,
Кя догъру, ялан сабакъ иле.
Тасиль корем, бильмейип савап,
Шундан чеке виджданым азап.
Ичке кирмеген джин олур аз —
Джинлер де дерс альрлар менден,
Кимлигимни билем мен, пек саз,
Гъууруп иле санам мен эм де,
Озюмни алем багъбаны деп,
Эхли адам чыракъбаны деп.
Тапкъаным ёкъ байлыкъ ве шурет,
Тапкъаным ёкъ аятта лезет.
Кечиргеним мен насыл хаят!
Мен джадыдан изледим неджат¹,
Илим манъа олмады ич ят.
Беян этсин эсрарын² алем,
Къальбимде къалмасын элем.
Атта ки, серт джеалетке бент —
Ич саймайып озюм акъылбент,
Теналыкъта бильмейим, алем
Насыл кучъле ала тенден джан.
Гонъюль бермей надан бедаткъа,
Барып етмек тюп акъикъаткъа.
Теналыкъынъ дерди юректе
Даим тюшюндженен юрьмектем.
Мында ялынъыз кунештен менсур

¹ неджат — къуртулыш

² эсрарын — гизленильгөн сырлар

Тюшмез манъя ич де парча нур.
Тозгъа баткъан китаплар иле
Толу бу эв тавангъа къадар.
Чыракъ тютюнинден бу кульбе
Атта куньдюз куню де къара.
Мында санъя сонъсуз къалангъан
Алеминъ шу — шу санъя мескен.
Бильги иле къавий къаплангъан
Юргинъде эеджан эскен?
Насыл сен бу зинданда къат-къат
Йыллар кечип, олмадынъ бербат?
Айт сен, ничион кечтинъ, Танъры яр
Табиатнынъ сагълам джанындан?
Дивар ичре ясадынъ дивар
Эдждатларнынъ несиль, анъындан?
Къач, бу ерден кечирме, вакъыт!
Къач ве ёлдаш этип ёлунъя
Сырлар толу Нострадамуснынъ
Китабыны ал сен къолунъя.
Шунда санъя йылдызылы сема
Беян олур айдын гонъюльде
Тамгъалардан олып мусаффа¹.
*(Китапны ачып макрокосм бельгисини коре.
Суретни дикъкъат иле козъден кечире.)*
Бу тынымсыз кянат ичре
Аджең, кямиль чекип итибар,
Мулькю барлыкъ арасында да
Ихтиятлыкъ хазинеси бар.
Нидже бинълер къанатлы джанлар
Невбет иле алтын чёмюchte
Бири-бирине узатмакъта ар.
Бири учар, кянат къучар.
Не гузель бир манзарадыр, айт,
Джансыз сурет — манзара фактъат.
Сенинъ къутлу акъышынъдан, вах,
Кене четте къалдым табиат!
Насыл мумкун санъя етишмек,
Къучакътаки нурунъдан пишмек,
Сенинъ элял чокъракъларынъдан
Тойып-тойып, ичмеге шербет.
*(Элем иле янъы саифени ача
ве ер рухунынъ бельгисини коре.)*

¹ мусаффа — темиз

Манъя белли бойле алямет
Заман руху беллидир манъя.
Бу вастанен шефкъ иле фактъат
Ынтылам мен даима огге.
Бойле чагъда азыр олурым
Багъышламагъа эр кеске джан.
Кунюм биткен олса, ич солмам,
Баш котерип, магърур олурым.
Къабарып ята акъ булут,
Ай олды ярыкъ,
Чыракъ сёндю, тютюнге
Бурюонди ханем.
Сыйпап кечти къызгъын нур
Манълайны яваш,
Вуджудымны титретип,
Къойып эеджан,
О дюньянынъ дехшетин
Этип шай беян.
Шу ердесинъ тез, тез кель
Кель, кель, кель, тезден.
Юрек янар, барлыгъым
Сен иле эр дем.
Фикирлерим чылгъындыр,
Титрек къаплады теним.
Кель, кель, кель, тезден.
Корьсем де, ольсем.
Китапны алып, сырлы бир дуалар эте.
Къызгъын алев ичинден рух пейда ола.

Рұх
Ёкъладынъмы?

Фауст
Насыл бир дешет!

Рұх
Джурьат къайда, эй, алий адам?
Дүйгъуларынъ атеши къайда?
Сенсинъми шу Фауст мен иле
Магърур турып, сёйлешкен бир зат.
Кельдим, ничюн бир сёз айтмайсынъ,
Айт, гъуурурынъ олдымы бербат?
Къоркъуларда далгъаланаынъ
Къалтыравукъ сылавчан киби.

Фауст

Ёкъ, рух! Мен къоркъканым ёкъ!
Мен Фаустым, менден ненъ бар чокъ?

Рух

Мен аятнынъ эр бир шейиндем.
Арекетлер эм боранындам,
Алевге, эм сувгъа да ярым
Эписи ерде эр вакъыт барым:
Догъув, олюв нисбетинде мен
Дайм осюв хызметиндем мен.
Заман иле нагъыш тюрюон ер узъре яйып,
Урба тикем Илляхиет ичюн аджайип.

Фауст

Эй, сен, селяметликнинъ тынышсыз деасы —
Меним тимсалым.

Рух

Ёкъ! Акълынънынъ зиясы.
Кешф эткен рух фактат санъа ашнадыр,
Тек манъа дегиль!

(Рух козъден джоюла.)

Фаустнынъ ишханеси

Фауст копек иле келип кире. Онъа бир кошеге кирип, тынч ятмакъны теклиф эте. Озюнинъ ильхамы акъкъында лакъырды юрюте. Илляхий керамет сёзюне мураджаат эте. Инджильни немесе тилине терджиме эттеге кишише. Терджиме эткенде, терен ве эсас мананы анълаткътан сёзлерни араштырып тапып, ерли-ери-не ишлетмеге тырыша. Онынъ бу япаджакъ муйим ишине джин ве шейтан къарышалар.

Одада тютюн даркъалып, собанынъ артындан дервиш урбасыны кийген Мефистофель пейда ола.

Мефистофель

Къулунъызыз хызметке азыр.

Фауст

Аджеба, кулькюли сыр олды ашкяр,
Копек олып корюнген, дервиш экен де?

Мефистофель

Улу алим, урьметимни этейим изхар,
Пек де къыйнадынъыз сиз мени, азар...

Фауст

Адынъ недир?

Мефистофель

Бойле суаль лязимми асыл?
Сёз сенчюн не?!... лаф четте къалсын.
Сенчюн фактъат эмельдир ки мукъаддес,
Адым бильмек суалинъни бирден кес?

Фауст

Эр эмельнинъ озюн намы бар, амма
Анъламакъчюн манъа сенинъ затынъны,
Бильмек кифаедир, бельки, адынъны.
Джынсынъмы, шейтан, иблизинъми я?
Кимсинъ, айт?

Мефистофель

Мен эр дайм яманлыкъ тилен,
Яхшылыкъ этиджи кучьнинъ бир къысмым.

Фауст

Аддийдже этип айт, не демек бу лаф?

Мефистофель

Мен инкяр рухуман, инкяр этмекни
Кесб¹ этип алгъаным — кяинат кениш,
Танъры не яратмыш, эписи шефаф,
Истегим де — ёкъ этип, гъалипке эниш,
Текине сиз яманлыкъ деп адагъан —
Бозув, амансызлыкъ деп де, адалгъан
Кучь — мен озюмдирим.

Фауст

Сен къысымым дединъ, сёйле не ичюн?
Ахыр сен къаршымда турасынъ бутюн.

¹ Кесб — зенаат

Мефистофель

Мен акъикъат сёзюн айттым гизлемей,
Менменлик — бу гъафиль¹ адамзаткъа хас.
Бутюн деп, билелер олар озылерин
Мен исе къысымынъ къысыымын ихляс.
Эльбет, мен бир парчам. Бутюн не демек?
Бу гедже, заманлар — барлыкъны бутюн —
Къаплад алгъан зульмет! О яратты нур,
Нур энди зульметнен дайм курешир.
Джысымлар сыртыздыр онынъ мекяны,
Джысымлар — джысымдыр къаны ве джаны.
Вакъыт да алемден, джоюлса джысым,
Барлыкъта къалмайджакъ сен соргъан исим.

Фауст

Энди манъа сенинъ кимлигинъ малюм.
Джойып олмагъандже алемни бутюн,
Кичик бир шейлерге этесинъ уджюм.

Бойле этип, Фауст Мефистофельнен пек чокъ шейлер акъында лакъырды этелер, субетлешелер. Мефистофель джинлар-нен бераберликте Фаустны юкълаталар.

Фауст (уянып)

Кене алдангъаным, гъафлетте хаят,
Юкъладым, унутмадым, сёзюни айткъян
Тюшюмде къаршыма чыкъкъанын шайтан.
Ит исе ханемден къачкъанкен, эй-ат!

(Къапуны къакъып, даа бир кере Мефистофель кельген сонъ, бу дюнья ишлиринден ёрулгъан Фауст, шайтаннын мукъавеле тизе.)

Мефистофель

Фигъанынъ фелекке етмесин, шашма,
Мына азыр. Етер бир парча кягъыт,
Бир тамчы къаннен бу кягъыткъа яз.

Фауст

Ана, санъа! Шумы? Язайым, сачма,
Шарт деген шей олса да, бираз.

¹ Гъафиль — келеджеги эйи тюшюнильмеген дикъкъатсызлыкъ

Мефистофель
Къан бир татлы шербеттири, ёкъ онъа къыяс!

Фауст

Быракъ, келишмеген шубеден вазгеч,
Сенинъким мен, алдатмакъ олур энди кеч.
Давададыр аятым фактъат,
Пек олса да, о, манъа къыймет?
Хаятым не, озюм мен кимим?
Инсалыкътан ялынъыз фахрим —
Клинаткъа бериджи тизим,
Буюк рухнен сёйлештим озум.
О, назаргъа мени ильмеди.
Китаплардан къайтты ихлясым¹,
Энди меним бар ихтирасым² —
Юргимнинъ бар шевкъ, гъайрети —
Санъа олсун алем лезети,
Ал багърынъа заман туфаны,
Сергузештлер къучагъына ат.
Шевкъ ве дертке толу дюнъяны
Шадлыкъны эм, гъам-у-джефаны,
Севгини эм, асрет, беляны
Берсин манъа олгъандже хаят.
Алып барса, шиддет керваны,
Озылюгини тапар адамзат.

Фауст ве Мефистофель сеферге чыкъалар.

Мефистофель
Яшамагъа огремек къыйын дегильдир,
Тек шарты шу — ишанчны озюнъе эгильдир.

Фауст
Насыл бир сефердир бу, оладжаммы токъ,
Арабасы, аты да, арабаджы ёкъ.

Мефистофель
Мына меним япынджам, оны кенъ яйып,
Авагъа тез учармыз, гонълюнъ олсун токъ.
Амма, ала къойма ич де, артыкъча бохча,

¹ ихлясым — севгим


² ихтирасым — сакъынмам, чекинмем

Бу керектирип бизлерге юксельмек ичюн.
Менде олгъан атеш, ава арттырыр кучюн,
Учармыз, везнимиз дайын сабадай олсун.
Къуттул олсун, энди санъя бу янъы дюнъя,
Янъы хаят мубарек бир ислернен толсун!

Айшес Кокиеваның бердіжимеси

Суаллер ве вазифелер:

1. Эсернин «Арш-и-Алядаки» башлангъыч къысымында учь мелек ве Мефистофель арасындаки лакъырдыда насыл мана бар? Эсрафиль, Джебраиль, Микаиль ве Мефистофельдинъ сёзлерини дикъкъатнен оқъуп, бу мананы берген ибарелерни айырынтызы.
2. Фаустның аятий тюшюнджелерини айдынаткъан къысымынды оқъуп, онынъ аятий варлыкъка олгъан мұнасебетини айырынтызы. Озынаныз бираз бу акъта субет кечириңтызы.
3. Рухнен Фаустның субети насыл екюнлене? Инсаннның дюнъяды яратылғынанынъ макъсады анълашыламы?
4. Фауст ве Мефистофельдинъ лакъырдысы сизнинь оюнтызды насыл бир тюшюнджелер пейда эттилер.
5. Мефистофельдинъ сымасына аит мұнасебетинъизни бильдириңтыз, эсердеки сатырлар иле исбат этмеге ынтылынтызы.



РОМАНТИЗМ УСЛЮБИНИНЬ ИЛЕРИЛЕВИ

Романтизм иджадий усулы XVIII асырның сонъунда ве XIX асырның башында Авропа ве Америка әдебиятында пейда олды. Ондан зерттеү исе бу усул әдебиятта ве эстетикада уқюмранлықъ эткен классицизм усулы иле курештеп шекилленип илериледи.

Романтизм усулдарынъ эсас хусусиети — омюрни акъикъий аятта олгъаны киби дегиль де, языджен ве санатқарның арзу эткен, хаялында джуляландырып, тасавур этип, акс этювден ибараттири.

Романтизм санат ве эдебиятта классицизм, символизм, реализм киби акъынты ве усуллардан эвель пейда олгъандыр.

Романтик тефеккюр антик эдебияты (къадимий юнан ве рим эдебиятында) ве феодал девир эдебиятында пек къуветли олгъян. Меселя, Эсхилнинъ «Прометей», Софоклнынъ «Шах Эдип» ве Еврипиднинъ «Елена» киби фаджиаларында аятий акъикъат романтик рухта идеаллаштырылып косытерильгени белли.

Орта асырларда бутюн шаркъ эдебияты романтик рух иле суварылгъаны беллидир. Фирдевсий, Дехлевий, Низамий, Руставели, Джамий, Лутфий, Навоий ве дигер шаирлернинъ иджады романтик тефеккюр хусусиетлерини къаврап алгъян эди.

Романтик эсерлерде тасвир этильген адиселер дигер тарихий де-виirlерге ве дигер мемлекетлерге кочюрилип косытериле. Меселя, Фархад — Къытай шахзадеси, Меджнун ве Лейли — араплардан, «Къаплан терисини япынгъан пельван» Руставелининъ тарафындан арап эфсанеси тарзында телькъин олуна. Айны вакъытта да Навоий ве Руставелининъ эсас къараманларынынъ аяты ве психологиясы языджыларнынъ замандашлары ве ватандашларыдыр.

Романтик эсерлерде къараманларнынъ ички рухий вазиетleri, дюнъясы тасвирленген арада, эсас эмиет оларнынъ омюриндеки энъ гузель ве энъ къасасетли алларгъа дикъикъат айырыла. Романтик тефеккюрнинъ бу хусусиети, эсасен лирик шириетте, гъазель жанрында озь аксини корымекте.

Эки инсан арасында севги дуйгъусы мубалягъя иле идеаллаштырылып, медх этилюви, романтизмнинъ энъ фаркълы хусусиети сайылмақъта. Бу хусусиеттинъ тасвири нетиджесинде Гъарпта «ашкъ романлары» ве Шаркъта «ашкъ дестанлары» пейда олды.

Романтизм халкъларнынъ аньаневий аятынынъ пек муим бир хусусиетине чеврильди. Романтизм усулы эр бир мемлекетнинъ эдебиятында озюне хас хусусиетлерге малик олып, базы вакъытлары реакцион эмиетке де етишти.

Джианда яшагъан халкъларнынъ эдебий омюри эсасында романтизмнинъ, иджадий бир усул сыфатында, бир сырға хусусиетлерини айырмакъ мумкүн.

Аятий акъикъатны, укюран буржуа тертиплерини, олгъянны киби, бутюн вариетинен къабул этмеюв, оларгъа къаршы кетюв, оларны ред этюв, реаль аятий акъикъаттан кечмишке я да табиат багърындаки сербест аяткъа ынтылыш, шахыснынъ сербестлиги оғърундаки курешни эдебиятнынъ мукъаддес борджу деп, тюшюнмек киби меселелер романтизм усулынынъ муим хусусиетлери сайылыр.

Романтизмнинъ классик бешиги олгъян Алманияда — агъа-къардаш Ф. ве А. Шлегеллер ве Э. Гофман, Франсада — В. Гюго, Ингилтереде — Байрон ве Шелли, Италияда — Ж. Леопарди ве А. Мандзони, Норвегияда — Г. Ибсен, Полонияда — А. Мицкевич ве Г. Словацкий, Америка Къошма Штатларында — Ф. Купер ве Г.У. Лонгфелло ве дигерлернинъ иджадында юкъарыда айтылып кечильген хусусиетлерни сечмек мумкун.

Романтизмнинъ нумюнеси Руссиеде илькide Пушкин, Лермонтов, Гогольнинъ иджадында ве декабрист шаирлернинъ иджадында шекилленгени беллидир.

Романтиклернинъ феодал ве буржуа зулмына къаршы оппозицияда олувлары бир чокъ мемлекетлерде сербест аят огъурнда курешкен адий халкънынъ гъаевий ёлбашчылар олып къалмасына себеп олды. Италияда азадлыкъ огъурнданаки куреште — Байрон, Полонияда — А. Мицкевич, Латин Америкасында — Э. Эчиверриа киби муэллифлер иштирак эттилер.

Авропа романтизминде Байроннынъ иджады гъает буюк эмиетке малик бир иджат оларакъ сайылмакъта.

Суаллер ве вазифелер:

1. Романтизм иджадий усулы не вакъыт ве насыл халкълар эдебиятында пейда олгъаныны айтынъыз. Романтизм усулы о девирде эдебиятта ве эстетикада укюмранлыкъ эткен насыл усул иле куреште шекилленип илерилиди?

2. Романтизм усулынынъ эсас хусусиети неден ибарет олгъаныны айтынъыз. Санат ве эдебиятта романтизм насыл бир акъынты ве усуллардан эвель пейда олгъандыр?

3. Гъарпа «ашкъ романлары» ве Шаркъта «ашкъ дестанлары» пейда олмасынынъ себебини айтынъыз. Романтик тефеккюрнинъ хусусиетлери эсасен лирик ширинетте насыл жанрда озь аксини коръгендир?

4. Алмания, Франса, Ингилтере, Италия, Норвегия, Полония ве Америка Къошма Штатларында иджат эткен анги бир языджыларнынъ иджадында романтик тефеккюрнинъ чизгилерини сечмек мумкун?

5. Я Руссиеде романтизмнинъ нумюнеси анги муэллифлернинъ иджадында шекилленгени белли. Къырымтатар эдебияты тарихында романтизм хусусиетлеринен тайинленген эсерлернинъ муэллифleri ким? Эсерлернинъ серлевасыны хатырланъыз.

ДЖОРДЖ ГОРДОН БАЙРОН (1788—1824)



Бутюнинсанлыкъ тарихында буюк бир медений девирни тедбикъ эткен шахсietлер бар. Данте ve Шекспирнинъ иджадий фаалииетлери бутюнинсанлыкъ тарихында буюк бир медений девирни къаплад алды.

XIX асырдаки Авропа эдебиятына Байроннынъ къошкъан исеси гъает буюктири. Байроннынъ иджады Авропа медениетининъ тарихында янъы бир девирнинъ пейда олмасына түрткюч олды.

Байрон 1788 сенесинингъ январь айында Лондрада, гъает белли ве, лякин бираз фукъарелешкен зияллылар аиласинде, дюньягъа кельди. Пек эрте бабасыз къалгъанындан себеп, онынъ генчлик сенелери баҳтлы-частлы кечмеди. Анасынынъ тарсыкъувлары, дөгъма топаллагъаны онынъ табиат чизгисине пек тесир этти.

Байрон башта адий мектепте, сонъра исе Кембридж университетинде окъуды. Озюнинъ дөгъма топаллыгъыны этрафта-килерден сакъламакъ ниетинен, Ингилтереде шу девирде о, гузель ве мергин атыджы, ат устюнде озюни форсалы тутмагъа бильген ве ат чапувларда иштирак этип, нам къазангъан ат айдайдыжысы олгъан. Бундан да гъайры о, дөгъма боксчы ве пек яхши ялдайыджы олгъан. Геллеспонт (Дарданелл) bogъазыны башындан сонъуна къадар ялдал чыкъып, джиан рекордына саип олгъан.

Байрон, адден индже ве тесирчен къальбли бир генч олгъанындан себеп, этрафтаки варлыкъны бутюк къарама-къаршылыгъынен къабул этип оламагъан. Затен, чокъ салмакълы китаплар окъуп етиштирген истидатлы генч, инглиз джемиетинде асыл олгъан менфий чизгилерни пек эрте анълагъан. Яшагъан джемиетининъ эски турушындан разы олмагъан Байрон этрафтаки мемлекетлердеки яшайышны озы козюнен корип, билип, къафасында инсаниетлик акъкъында янъы тасавур пейда этмек макъсадынен, 1809 сенеси сеяхаткъа чыкъа.

Иджадий фаалиети адий лирик шиирлернинъ язылувынен башлана. 1809 сенеси шаир Албанияда булунгъанда, «Чайльд Гарольдинъ зиярети» адлы лиро-эпик поэмасыны язмагъа тутуна.

1811 сенеси о, Ингилтереге къайта. 1812 сенесининъ башында онынъ «Чайльд Гарольдинъ зиярети» адлы поэмасынынъ эки къисмы дердջ олунан.

Бу эсернинъ эки ильк йырынынъ 1812 сенеси дердջ олунувы окъуйыджылар тарафындан гузель къабул олунды. Бу акъта Байрон озюнинъ къараманлары арасында: « Аджайип куньлернинъ биринде, саба уяныр экеним, белли инсан олгъанымны эшиттим», — киби язылар къалдырыдь.

Мүэллифнинъ ильки сеяхаты бу эсернинъ язылувына тюрткюч олды. О, Испания, Греция, Албания, Тюркиени зиярет этти. Бутюн бу диярларны зиярет эткен сонъ, онда пейда олгъан фикир-дуйгъулар ве теэссуратларнынъ эписи бу эсерде акс этильди.

Байрон, бабасынынъ олюминден сонъ, парламентте лордлар палатасында иштирак этмек акъкъыны къазана. Амма, шу вакъыт о, пек яш олгъанындан себеп, айны девирнинъ ичтимай-сиясий аятында иштирак этмей. Лякин чешит мемлекетлерге япкъан сеяхатындан сонъ, тувгъан Ватанына къайтып келир экен, лордлар палатасында пейда ола. Оны анда истекнен къаршыламайлар. Чюнки бу арада парламентте гъает муим ве кескин ичтимай-сиясий меселе бакъылмакъта эди. Байронларнынъ къальасы янында ерлешкен Нотингем адлы шеэрде тикиджи фабрикасында чалышкъан ишчилер иштен къувулувына къаршы тикиджи көрьяларыны урып парлайлар. Оларгъа олюм джезасыны бермек къарапы чыкъарылгъанда, Байрон бу къарапгъа кесенликнен къаршы чыкъа. Барып кельген мемлекетлериндеки вазиетлерни козъ оғюне кетирип, онынъ ватанындаки халкъынынъ адден фактъыр олгъаныны лордлар оғюндеки чыкъышында кесен-кес бильдире. Парламентте, онынъ бу чыкъышыны, чокъ вакъыт девамында унутып оламайлар.

Шаирнинъ юргине бу къасевет пек терен ерлешкени себебинден, онынъ ильки шиирлеринде инглиз джемиетинде укюм сюрген аньянелерге къаршы дөгъруттылгъан мевзуулар айдынлатылды. Бунынънен бераберликтө бу девирдеки эсерлеринде романтик дуйгъуларнынъ тасвирленюви иджадынынъ эсас чизгисине чевирильди.

Шаир 1913 сенеси «Явур», «Абидосслы келин», 1914 сенеси «Корсар», «Лара», 1916 сенеси «Коринфнинъ къушатылувы», «Паризина» киби, сонъундан «Шаркъий поэмалар» серлевасыны алгъан ширий эсерлерини яза.

Бу эсерлерде эр бир мемлекетнинъ башына тюшкен миллий тюшкюнликтен чыкъмакъ ёлларыны араптыргъан ве бу вазиетни джан юректен къайгъыргъан бедий къараман сымасы усталикънен косьтериле. Къувгъунлыкъкъа огъратылгъан инсан янъгъызыкъ аизарына къапылмайып, янъы, акъикъатсевер джемиетнинъ пейда олмасыны арзу эткени тасвир олуна.

1916 сенеси ватандашлары тарафындан зорбалыкъкъа огъратылгъан шаир Ингильтереден кетип, Извечреде ерлешмек къарамына келе. Дюнья ве гонъюль теразеси арасындаки фаркъны бу топракта гъает терен ис эткен Байрон, инсан аятынынъ къыйиметини тарифлеген амеллерни араптырмагъа девам эте.

1917 сенесининъ кузонде шаир ерли мустебидлер тарафындан къуллукъкъа огъратылгъан Италиягъа ёл ала. Мында шаир Австраия мустебидлерининъ зорбалыгъындан, джесюране ынтылышлар япып, къуртулмакъ чарелерини арагъан итальян халкъынынъ миллий драматик такъдирини буюк дикъкъат ве гонъюльченликнен козете.

Бундан соңра, Байроннынъ тарихкъа, инсаниетликке, ичтимай-сиясий мунасебетлерге олгъан дюнъябакъышы бутюнлей денъише, гъайры баштан шекиллене. Шу себептен де, онынъ эсерлеринде айны нетиджели фикирлер озь аксини коре башлайлар. Энди, о, яраткъаң къараман аятий варлыкъкъа къаршы кетмей. Бу къараман энди шу варлыкъта пейда олгъан вазиетте инсангъя зыт олмагъан, ляйыкъ ве келишикли, уйгъун ве юрегине якъын амеллерни сайлап алмагъа биле. Бу хусусиет Байроннынъ «Чайльд Гарольдинъ зиярети» поэмасынынъ соңъки йырларында тасвир олунгъандыр.

Суаллер ве вазифелер:

1. Бутюнинсанлыкъ тарихында буюк бир медений девирни тедбикъ эткен шахсиетлер кимлерdir? XIX асырдаки Авропа медениетининъ тарихында янъы бир девирнинъ пейда олмасына Байроннынъ къошкъан иссесини тарифленъиз.
2. Джордж Гордон къачындыкъ сенеси ве къаерде дөгъулып иджат эткенини айтынъыз. Онынъ генчлик сенелери баҳтлы-частлы кечмегенининъ себеби насыл бир адисе-вакъиаларнен бағълы эди?
3. Адий мектепте, Кембридж университетинде окъугъан мааллери бу инсан озюни этрафтакилерге насыл бегендиртти? О, насыл сааларда озюни илери инсан оларакъ косьтергенини икяе этинъиз?
4. Байроннынъ инглиз джемиетинде асыл олгъан менфий чизгилерни пек эрте анълагъанынынъ себеби недедир? Онынъ сеяхаткъа чыкъкъанынынъ инджеликлерини анълатынъыз.

5. Шаирнинъ ильки шиирлеринде насыл мевзуулар айдынлатылды? 1913 ве 1916 сенелери язған эсерлерининъ серлевасыны айтынъыз.

6. Шаирнинъ бу эсерлеринде насыл меселелер тасвир олуну?

7. Ингилътереден кетип, Извечреде ерлешкенининъ себеби насыл бир вакъиаларнен багълыдыр? Байроннынъ тарихкъа, инсаниетликке, ичтимай-сиясий мунасабетлерге олгъан дюньябакъышы бутюнлей не вакъыт денъишкенини айтынъыз.

«Чайлд Гарольдинъ зиярети» поэмасына даир

Байрон эсери узеринде бир къач сенелер девамында чалышкъаны беллидир. Буюк поэма дөрт къысымдан, яни дөрт йырдан ибараттири. Оларнынъ эки къысмы, яни эки йыры 1812, учюнджи къысмы — 1817 ве дөртүндже къысмы — 1818 сенелери дердже олунгъандыр.

Поэмалынъ эсас къараманы Чайлд Гарольд, ильки тасвирлерде шенълеммеге, кезинмеге севген бир генч оларакъ тасвирлене. Амма, эсерни окъумакъны девам эткен сайын, онынъ акъыллы, дуйгъулы ве тесирчен бир инсан олгъаныны анълаймыз. Джемиэтте олып кечкен адисе-вакъиаларгъа къаршылыкъ бильдире. Этрафындаки омюр онъя — титис, тувгъан юрт — апсхане, баба оджагъы — къабир олып дуюла.

Чайлд Гарольдинъ, яни романтик къараманнынъ эсас табиат чизгиси — джемиэтте тизильген акъикъяткъа къаршы чыкъмакътан ибараттири. Байрон ве Чайлд Гарольди бири-бирине якъынлаштыргъан даа бир хусусий чизги — бу оларнынъ экисининъ де шаир олгъанларыдыр.

Экзотик мемлекетлерге япкъан сеферлери нетиджесинде онынъ гонълюнде янъы ислернинъ пейда олмасына имкян яратыла. О, кене де янъгъыз олып, гонълюни кимсеге ачмай. Амма къудретли табиат, адий инсанлар, оны лякъайдлыкъ алындан чыкъмакъ ичюн себеп олалар.

Къараман ве муэллиф. Эсерде эки къараман иштирак эте. Бириндиси — Чайлд Гарольд, экиндиси исе — муэллиф. Оларнынъ анги бириси арекетлернинъ сюжет ёлагъында эсас къараман олгъаны бельгиленмей. Амма сонъра, эки къараман арасындаки месафе явш-явш бирлеше. Бу исе муэллиф тарафындан уйдурылгъан бир усулдыр. Эсернинъ девамында Чайлд Гарольдинъ эсас ерини муэллиф ала. О, козюмиз огунде, затен, бир энциклопедик инсан оларакъ джанландырыла. Чешит мемлекетлернинъ тарихыны теренден бильген инсандыр. Муэллиф, бу

мемлекетлерде яшагъан халқъларны эллериңе къурал алып, къаршы чыкъмагъа, курешке чагъыра. Бу эсерде поэманиң болюклери арасындағи бирликни бағыламагъа арекет эткен Чайлд Гарольд дегіль де, муэллифтір. Затен, сеях да муэллифтір. Мукъаддес то-пракъларны сейир эткен ве зиярет эткен де муэллифтір. Зиярет этильген топракълар — Испаньола, Грециядыр. Испаньола әвляттары уриет оғұрунда үкюмдар Наполеоннен джесюрилікнен курешке тутуналар.

Поэманиң жанр джеэтинден чешитлиги, поэмада къулла-нылгъан беян къараманның сеяхаты, муэллифнинъ фикирле-ри эсасында девам этиле. Къараманның фикирлеріндегі белли бир тертипли фикирлер тапмакъ затен къыйындыр. Бу фикирлер асылында оқъуызды ве муэллиф арасында олып кечкен бир ла-къырды, субет шеклини ала. Шундан себеп, поэмада пек чокъ ли-рик чекилювлер, эмоциональ, джошкъун хатырлавлар къулланыла. Муэллиф ичюн Руссо, Вольтер, Наполеон киби, эвеллери яша-гъан къыйметли инсанларның тақъдири гъает меракълыдыр.

Байрон яшагъан девирде «Чайлд Гарольдинъ зияреті» по-эмасы жанр чешитлигинен шан-шурет къазанды. Байрон бутюн джиангъа, джиан шириетинде энъ ильк кере, эпос ве лириканы бирлештирген эсер яратқынанен белли олды. Аньяневий эпик иклеме шаир лирик шириетнинъ элементлерини кирсете бильди. Бириндже шахыс адындан алынып барылгъан беян, муэллифнинъ къайгъы-къасаветининъ ачыкъ-айдын тасвир олунувы ве олып кечкен адисе-вакъиаларгъа муэллифнинъ къыймет кесиови киби меселелер — лирик шириетнинъ элементлері сайымакъталар. Байронның бу буюк эсерининъ жанр джеэтинден чешитлиги эде-бий-тариҳий әмиетке маликтір.

Суаллер ве вазифелер:

1. Байрон «Чайлд Гарольдинъ зияреті» эсери узеринде къач сенелер девамында чалышкъаныны айтындыз. Бу буюк поэма къач къысымдан ибараттір? Олар къачынды сенелерде дердже олунгъаныны тарифле-нъиз.
2. Поэманиң эсас къараманы акъкъында не айта билесинъиз. Муэллиф ве къараман арасындағи фарқъ ве ошатув ненен айырыла? Эсернинъ девамында олар акъкъында насыл бир малюмат бильдирильге-нини айтындыз.
3. Поэманиң жанр джеэтинден чешитлиги акъкъында насыл бильги-лер оғрендинъиз? Оны тарифленъиз.
4. Байрон бутюн джиангъа насыл белли олды? Бу эсернинъ жанр джеэтинден чешитлиги насыл әмиетке малик олгъаныны исбатланызы.

ЧАЙЛЬД ГАРОЛЬДНИНЪ ЗИЯРЕТИ^[34]

(Парча)

Биринджи тюркю

1

Кечмиште эдинъ де кок мутебери,
О, ильхам периси, шиириет назы.
Лиранъны лекелеп та рттылар кери
Къафие къуллары язгъан эр язы.
Раатлыгъынъ бозмагъя гонълюм наразы!
Дельфада олсам да, динъледим чёльде
Кумюштиос далгъялыш чокърагъынъ сазын.
Адий бир икәем джанлана тильде,
Мабуде ярдымгъя муҳтадж дегиль де.

2

Яшай Альбионда бир генч. Озъ асын
Багъышлап зияде кульку-оюнгъа.
Къуванч ве раатлыкъ арзусы шырын,
Писликже нефрет де кельмей оюна.
Тюштю алдавларнынъ шайтан тоюна.
Намус эм де утанч, дерсинъ, онъа ят,
Севди о, чешит ренк дюнья къойнуны,
Тек къыскъя багъларны бегенди, фактъат,
Онъа къадедешлер — шенъ бир джемаат.

3

Намы Чайльд-Гарольд. Эп бир дегильми,
Нурлу кечмишлерге о, кескен къыймет.
Тынч бир аят олсун, олсун дженк ильми,
Эдждатлар къазанды урьмет ве шереф.
Эринчеклик бозгъан тенбелль даа бири,
Энъ эйи несильге юкътыра пислик.
Бунда аджив къала медхлер чембери,
Деделер макътавы бермей нефислик,
Къусургъа — темизлик, лекеге — паклик.

Он докъуз яшына адым аткъанда,
 Енгиль, шох эди, о, перване джандай,
 Тюшюнмей эди де, куньлер баткъанда,
 Гедже келеджегин сувукъ зиндандай.
 Лякин баары эп гуль ачкъан аньде,
 Хаста фикри, къальби дуйдырды бирден,
 Бойле яшайышкъа тойып быкъкъанын,
 Пислик япышкъандай эр шей, эр ерден:
 Ватан — апсхане, эви — къабирден.

Чайльднинъ юрегин сагъыр дерд ала,
 Лезет арапети эп сувуй онда,
 Козюнде яшлары йылтырап къала,
 Къайнавукъ гъуурурын сёндюрген аньде.
 Лякин, безгинликтэ — зеэрли бир кучъ,
 Юртун терк этмеге даветкяр эди.
 Ят кок йылдызлары, дерсингъ, бир севинч,
 Къайгъысы шадлыкъдай эп куле энди,
 Альбиондан кетмек ахты бар эди.

Ислер къудретине Чайльд бериле,
 Атта сагълыкълашмай озь анасынен.
 Синълиси, екяне сырдашы биле,
 Унутылып къала, чыкъа эсинден.
 Бильмей якъынлары, тувгъанлар, атта,
 Онынъ кеткенини. Ташибагъыр дегиль:
 Озь деде эвинден ильк кетеята,
 Ве, о, биле эди юрги чокъ йыл
 Сакълар козъяшынынъ излерин текмилъ.

Тендюрист ель эсе, елькенлер джанлы,
 Денъизнинъ тёрюне чалт ялдай геми.
 Къаялар агъара, сёнгендай шаны,
 Ве оларны юта кенъликлер деми.

Бельким, юрегинден къайгъысы кетмей,
Дерсинъ, сонъсузлыкъынъ о да теркиби.
Лякин козъяш тёкмей, пешман да этмей,
Козълери торлангъан ёлдашлар киби,
Еллерге зарлангъан къарашлар киби.

13

Далгъагъа тийгенде, кунешнинъ чети,
Сувукъынлы бакъа, озъ адетиндже.
Шиддетли борангъа эманет эте,
Эм аджджы, эм бахтлы аньлерни анджа.
Дуйгъу теллеринде къальпнинъ элеми,
Сонъсуз сес-седалар авелей кокке.
Чайльдиннъ йырыны акъкъанат геми
Учурыйп, беклеген ялыгъа тёке,
Не языкъ, тюркюси сувларгъа чёке:
«Багъышла, багъышла! Сагъанакъ саип,
Котериле фуртуна, фуртуна.
Ингильтере къайда? Ялысы гъайып,
Къарышты шу сувлар юртуна.
Ялдаймыз Батыгъа, кунеш пешинден,
Баба-деде диярын къалдырып,
Сагълыкъынен къал кунь нуру, танъ сеннен,
Юртум, хош къал, козълерни талдырып!
Гедже кечип кетер, дөгъар кунеш де,
Янты куньге сачар зиялар.
Корерим денъизни, кокни де, иште,
Ватанымны коралмам текрар».

36

Енъишлеринъ сеси йырларынъда тек,
Испания, яшай тюркюнъде шанлар.
Сутунлер къырылмыш, йылнамелер ёкъ,
Йырлар — улулукътан къалгъан нишанлар.
Семадан бир бакъ сен, ер зенатына,
О, гъуур! Къырыла тунч эм де ялчын,
Эр шейден йыр садыкъ кенди ядына,
Тарихчы алдата, гъайып яланджы,
Эбедийлигинъ йыр сакълайджакъ, анджа.

Эй, ана табиат, ёкъ санъа тенъеш,
 Сен аят яраттынъ, яраттынъ зия.
 Къойнунъдам, сен манъа балалыкътан эш,
 Коксюнъден кучь алыш осымдимми, я?
 Бельки, севмесенъ де, ред этмедиң тек,
 Озы кийиклигингъ де, кендиме нисбет.
 Адам лекесинден саф, паксинъ, керчек,
 Севем, сабийликтен кулюшинъ, эбет,
 Эр анынъе севгим къудретли, эйбет!..

Тегиз ер, дагълар да, тура къарарып,
 Мавритан куллеси олгъан диварлар.
 Түякълар кечкенлер земинни ярып,
 Сюрюльген ерлерде атеш мууры бар.
 Бу ерни запт эткен дешетли душман,
 Андалуслар къалкъан эткен кендисин.
 Къылышлары нидже къаннен боялгъан,
 Ювасы бозулгъан адждерлер талгъан,
 Орькешли дагъларда залым берген джан.

Эджель яздымы, я, сизге де, такъдир,
 Испан огъланлары, о, атеш яшлар!
 Экисин бириими: къуллукъ, я — къабир,
 Я залымгъа — олюм, я Ватан — тар-мар,
 Я гъаддаргъа эр кес баш эгип яшар!
 Аллах корымайми я, сиз, мерд несильни,
 Къурбанлар нидасы коклерден ашар,
 Я, эпси нафиле: мердлик силине,
 Къан, шереф, джесарет, челик билине.

Къысметинъ айретли эй, Испания,
 Туткъун халкъ урьлюк, деп къалкъа аякъкъа,
 Капитанлар теслим, къырал да къыя,
 Лякин адий аскер садыкъ байракъкъа!

Сен онъа тек аят берсенъ де эп бир,
Сербестлигинъ онъа азиз отъмекдай.
Сен ичюн эр шейин бермеге азыр,
Ве руху юкселе, дерсинъ, кунеш, ай,
«Я — Ватан, я — олюм!» — халкъ шиары шай.

126

Эй вах, бизим аят! Алем хорунда
Сахте бир седасынъ. Баба-деделер
Эманет къайгъысы — омюр огърунда
Анчар терегиси — мейванъ да зеэр.
Тамырынъ — земиндир, кок — пытакъларынъ,
Тыпкъы, сагъанакъдай ягъя белялар:
Олюм, ачлыкъ, къуллукъ, дерт аи-зары,
Ашкяры козъяшлар, ичен агълавлар,
Юреклер тёрюни соңсыз дагълавлар...

127

Къоркъмай тюшюнмели! Насыл сакълайыкъ,
Сонъки къалемизни сербест, мустакъиль?
Айды, тек сен меннен къалмагъя ляйыкъ,
Фикир ве мантыкънынъ мукъаддес акъкъы.
Сен — Танъры бахшышы! Биз дөгъгъан куньден,
Джеллятлар кишенлеп бағълар сени эп,
Та учып олма, деп зиндан ичинден.
Акъикъат кунешин нурун ис этип,
Кёр анълар, эр шейнинъ аслына этип!

Шеръян Алиниң төрдөжимеси

Суаллер ве вазифелер:

1. «Чайльд Гарольдинъ зиярети» эсерinden берильген къысымларны оқыунызы. О, озъ юртуны не ичюн терк эткенини сейлентиз.
2. Къараманнынъ гонълюни айдынлаткъан ибарелер 12—13-юнджи болюклерде насыл дуйгъуларны айдынлатмакъта?
3. Чайльд Гарольд баба-деде диярын насыл гонъюльнен терк эткенини икяе этинъиз. Тувгъан юрткъа олгъян севгининъ муджизевий исини сиз дуйдунъызмы?

БИБЛИОГРАФИК ИЗААТЛАР

1. *Muharrem Ergin*. Orhun abideleri. Kültigin abidesi. — Istanbul, 1989. — 93 s.
2. Малов С.Е. ве *Муаррем Эргиннинъ* транслитерациясы ве терджимелери эсасында япылгъан. Айше Кокиеваныңъ терджимеси. (Малов С.Е. Памятники древнетюркской письменности. Тексты исследования. — М.; Л., 1951).
3. *Muharrem Ergin*. Orhun abideleri. Tonyukuk abidesi. Tercüme. — Istanbul, 1989. — S. 54—61.
4. Малов С.Е. ве *Муаррем Эргиннинъ* транслитерациясы ве терджимелери эсасында япылгъан. Айше Кокиеваныңъ терджимеси (Малов С.Е. Памятники древнетюркской письменности. Тексты исследования. — М.; Л., 1951. Памятник в честь Тоньюкука. — С. 60—70).
5. *Besim Atalayныңъ* транслитерациясы ве терджимеси эсасында япылгъан. Айше Кокиеваныңъ терджимеси. (Besim Atalay Divani Luğat-it-türk. — Tercüme. — Ankara, 1992. — I—III с.)
6. Ahmet Kabaklı. Türk edebiyatı. Yusuf Balasağunlu. — Istanbul, 1997. — I с. — S. 92—100.
7. Ахмет Кабаклыныңъ транслитерациясы ве терджимеси эсасында япылгъан. Айше Кокиеваныңъ терджимеси. (Къулланылгъан эдебият юкъарыда косътерильген).
8. Кемал Къонгратлыныңъ арап уруфатындан япкъан транслитерациясы // Cünsel. — 1999. — № 1. — S. 27—34; № 2. — S. 19—28; № 3. — S. 20—29; № 4. — S. 32—45; № 5. — S. 32—42.
9. Seyfi Saraji. Gülistan tercümesi. (Kitab Gülistan bi't-t-Türki) Hazirlajan Doç. Dr. Ali Fehmi Karamanlioğlu. — Ankara, 1989. — Ay, gonül! — S. 183. [364(182 в)]. (Арап уруфатындан Айше Кокиеваныңъ транслитерациясы.)
10. Seyfi Saraji. Gülistan tercimesi. (Kitab Gülistan bi't-t-Türki) Hazirlajan: Doç. Dr. Ali Fehmi Karamanlioğlu. — Ankara, 1989. — Dilberimin... S. 181. [360(180 в)]. Арап уруфатындан Айше Кокиеваныңъ транслитерациясы.
- 11, 12, 13. Ismail Hikmet Ertajlan. Gazi Geraj Divançesi. — Istanbul, 1958. — 91 s. (Сатыр асты терджимеси Айше Кокиева тарафындан япылды.)
14. Fevziye Abdullah Tansel. Kirim Hani IV Mehmed Girajin Kamili Takma adı ile varmış olduğu koüma ve Türküler. Belleten, XXXI/124, Ekim. — 1967.
15. Сатыр асты терджимеси Айше Кокиева тарафындан япылды.

16. Эдебият хрестоматиясы. — Ташкент, 1971. — С. 22—27; Къаранфиль япракълары. Шиирлер. — Ташкент, 1972. — С. 10—14.
17. Ашыкъ Умер / Тертип ве терджиме эткен Риза Фазыл. Ташкент. — 1990. — II дж. — Гъазеллер — С. 51, 72, 305, 316; Мурабба — С. 225, 416; I дж. — Мухаммес. — С. 221, 400—401.
- 18, 19, 20, 21. Сатыр асты терджимеси Айше Кокиева тарафындан япылды.
22. Усеинов Т.Б. Къырымтатар эдебиятының орта асырлар де-вири. Джевхерий — Акъмесджит, 1999. (Къошмалар — С. 97, 105, 115; Семаилер — С. 112, 113; Мустезат — С. 117—118).
- 23, 24, 25. Джевхерийнинъ эсерлерининъ сатыр асты терджимеси Айше Кокиева тарафындан япылды.
26. Шаир акъкъындаки малюматлар Нариман Абдульваап тарафындан Günsel меджмуасындан дердж олунгъан Осман Мурасовның «Шаир Исметий ве Озю вакъиасы дестаны» макъалесинден алынды. (1999. — № 3. — С. 10—11).
27. Эдебият хрестоматиясы. — Ташкент, 1971. — Исметий. Кефе дестаны. — С. 28—32.
28. Сейтгәзазы Гәрафаров. Исмаилбей Гаспринский. (Аяты ве фалиети). // Йылдыз. 1990. — № 1. — С. 111—135; № 2. — С. 79—98; № 3. — С. 93—111; № 5. — С. 87—106; 1991. — № 1. — С. 77—94; № 3. — С. 82—103. Исмаил Асан-огълу Керимнинъ «Бедиий сөзюмизнинъ эврими» макъалеси эсасында язылды // Йылдыз. — 1998. — № 8. — С. 165—166; 1999. — № 4. — С. 113—128.
29. Исмаил Асан-огълу Керимнинъ арап уруфатындан трансли-терациясы. Гаспринский Исмаил. Молла Аббас. — Эки томлукъ. Биринджи том. — Симферополь: Къырымdevокъувпеднешир, 2001. — 400 с. «Фрэнкистан мектюплери» С. 20—73.
30. Рус тилинден А. Кокиеваныңъ терджимеси.
31. Рус тилинден А. Кокиеваныңъ терджимеси.
32. Рус тилинден Ш. Селимнинъ терджимеси.
33. Рус тилинден А. Кокиеваныңъ терджимеси.
34. Рус тилинден Ш. Алиевнинъ терджимеси.

МУНДЕРИДЖЕ

Кириш	3
КЪАДИМИЙ УМУМТЮРК ЭДЕБИЯТЫ АБИДЕЛЕРИ.....	6
Орхон (Коктюрк) абиделерининъ тапылув тарихы.....	6
Орхон (Коктюрк) язысы	7
«Куль Тигин», «Тоньюокъукъ» абиделери	9
Бирлик, къудрет ве аманлыкъ орнеги	11
«Куль Тигин» абидеси	13
«Тоньюокъукъ» абидеси.....	19
<i>Эдебият назариеси. Язылы эдебиятнынъ ифаде усуллары.</i>	
Беян этюв усулы	22
Махмуд Кашгъарий	25
Махмуд Кашгъарийнинъ «Дивану лугъат-ит-турк» сёзлоги	26
Дивану лугъат-ит-турк	29
Юсуф Баласагъунлы	34
«Къутадгъу билиг» дестанынынъ мундериджеси.....	36
Эпик-дидактик дестан	38
Дестанда айдынлатылгъан меселелер	40
Къутадгъу билиг.....	42
<i>Эдебият назариеси. Ширий ольчюлер. Аруз везни</i>	48
КЪЫРЫМТАТАР ЭДЕБИЯТЫНЫНЪ КЪАДИМИЙ ДЕВРИ ..	50
Махмуд Къырымлы	52
Махмуд Къырымлынынъ «Хикяет-и Юсуф ве Зулейха»	
дестанынынъ сюжети	54
Хикяети Юсуф ве Зулейха	58
<i>Эдебият назариеси. Ширий ольчюлер. Пармакъ везни</i>	73
КЪЫРЫМТАТАР ЭДЕБИЯТЫНЫНЪ АЛТЫН ОРДУ ДЕВРИ..	74
Абдульмеджит Эфенди	76
Эй, гонъюль!	77
Ахмедходжа эс-Сарайий	79
«Дильберимнинъ ол садефтек ағъзында дюр бар ирур...»	80
ЭДЕБИЯТЫМЫЗНЫНЪ КЪЫРЫМ ХАНЛЫГЪЫ ДЕВРИ	82
Гъазай.....	85
Гъазайининъ шириети	87
Гъазеллер	89
Гъазайининъ «Долаб» месневиси (дестаны)	92
Долаб	95
<i>Эдебият назариеси. Язылы эдебиятнынъ ширий</i>	
шекиллери. Гъазель. Месневи	99

Мухаммед Қямил	102
Мухаммед Қямильнинъ шириети	103
Къошмалар	105
Шаркъы	108
Эдебият назариеси. Язылы әдебиятнынъ ширий шекиллери	
Къошма. Шаркъы (Тюркю)	109
XVII АСЫРДАКИ КЪЫРЫМТАТАР ЭДЕБИЯТЫНЫНЪ	
ИЛЕРИЛЕВИ	112
Джанмухаммед	114
Джанмухаммеднинъ «Тогъай бей» дестаны	115
Дестанда халкъ ве Тогъай бей сымасынынъ тасвиrlenюви	117
Тогъай бей	119
Эдебият назариеси. Бедий тасвирий васталар.	
Тенъештиров	124
Ашыкъ Умер.....	126
Ашыкъ Умернинъ шириети.....	127
Гъазеллер	130
Мурабба	132
Мухаммес	133
Эдебият назариеси. Рукнлар	134
Мустафа Джевхерий	136
Къошмалар	138
Семайлер	142
Мустезат	144
Эдебият назариеси. Шаркъ шириетининъ назм	
шекиллери. Семаи. Мустезат	145
КЪЫРЫМТАТАР ЭДЕБИЯТЫНЫНЪ РУС	
ИСТИЛЯСЫ ДЕВРИ	148
Исметий	151
«Кефе дестаны»нынъ мундериджеси	152
Кефе дестаны	154
КЪЫРЫМТАТАР ЭДЕБИЯТЫНЫНЪ УЯНУВ ДЕВРИ.....	158
Уянув девриндеки эдебиятнынъ илерилеви	158
Исмаил Гаспринский	160
Исмаил Гаспринскийнинъ эдебий яратыджылыгъы	161
«Фрэнкистан мектюплери»нинъ сюжети	163
Фрэнкистан мектюплери	165
Эдебият назариеси. Бедий эдебиятта услюп	
антълайышынынъ такъдими	184

ДЖИАН ЭДЕБИЯТЫНДАН

ОРТА АСЫРЛАРДАН РЕНЕСАНС ДЕВРИНЕ КЪАДАР ЭДЕБИЯТНЫНЪ ИЛЕРИЛЕВИ.....	186
Данте Алигьери	188
«Иляхий комедия»нынъ тизилишине даир.....	189
«Иляхий комедия»нынъ мундериджесине даир	190
«Иляхий комедия»да Джәэнненменинъ тасвири	192
«Иляхий комедия»да Арафынъ тасвири	192
«Иляхий комедия»да Дженнеттинъ тасвири	192
Иляхий комедия. Джәэннем	194
Эдебият назариеси. Терцина акъкъында анълайыш	207
Уянув ДЕВИР ДЖИАН ЭДЕБИЯТЫНЫНЪ ИЛЕРИЛЕВИ... Вильям Шекспир	209
В. Шекспирнинъ «Хамлет» фаджиасы. Эсернинъ сюжет ве композициясынынъ хусусиетлерине даир.....	214
Хамлет.....	217
КЛАССИЦИЗМ УСЛЮБИНИНЪ ИЛЕРИЛЕВИ	235
Жан Батист Мольер	237
Мольернинъ «Корымемиш задекян» комедиясына даир	238
Корымемиш задекян.....	240
Эдебият назариеси. Комедия	251
ЯРЫКЪЛАНДЫРУВ ДЕВИР ДЖИАН ЭДЕБИЯТЫНЫНЪ ИЛЕРИЛЕВИ	252
Иоганн Вольфганг Гёте.....	254
И.В. Гётенинъ «Фауст» фельсөфий фаджиасына даир	255
Фауст	259
РОМАНТИЗМ УСЛЮБИНИНЪ ИЛЕРИЛЕВИ	270
Джордж Гордон Байрон	273
«Чайлд Гарольднинъ зиярети» поэмасына даир	276
Чайлд Гарольднинъ зиярети.....	278
Библиографик изаатлар	283

Навчальне видання

КОКІЄВА Айше

Інтегрований курс «Література» (кримськотатарська та зарубіжна)

підручник для 9 класу загальноосвітніх навчальних закладів
з навчанням кримськотатарською мовою

Рекомендовано Міністерством освіти і науки України

У підручнику використано матеріали з вільних інтернет-джерел

Відповідальний за випуск І. Б. Чегертма

Формат 60x90/16. Ум. друк. арк. 18,00. Обл.-вид. арк. 17,00.
Наклад 300 прим. Зам. № 1201.

Видавець і виготовлювач видавничий дім «Букрек»,
вул. Радищєва, 10, м. Чернівці. 58000.

Свідоцтво про внесення до Державного реєстру суб'єкта видавничої справи
ЧЦ № 1 від 10.07.2000 р.